

## Ella pressa dil 19avel tschentaner ed autras notizias

### 1800

Felix Maria Diogg, il portretist cun ragischs da **Tschamut**, sia mumma ei stada la Catarina Deflorin da leu, scriva ils 18 da matg **1800** ina brev a Johann Caspar Hirzel (1725–1803). Ord la brev seresulta che Diogg vevi treis frars: Gion Giusep che viveva 1799/1800 a **Tschamut** cun dunna e tschun affons, Columban, che viveva 1799 a **Turin**, e Pieder Paul (*Placi Fidel*), che serenda 1799 sur **Berna** (*tier Felix Diogg*) tier siu frar Gion Giusep a **Tschamut**.

Miu stimau e meriteivel fautur,

Avon circa otg jamnas ei miu frar giuven Pieder Paul, *en verdad Placi Fidel*, arrivaus nunspetgadamein tier mei a **Berna**. A **Turin** viva il frar Columban e quel hagi fatg leu in ventireivel svilup: Quel hagi supplicau el da serender a **Tschamut** tiel frar che seigi vegnius mudergiaus dalla sort criua dall'uiara.

Il frar hagi lu raquintau davart la verdad dalla uiara e dil temps sventirau e co els hagien stuiu pitir a **Tschamut**. Treis gadas seigien ei vegni clamai all'uiara. El hagi surviviu quella ed adina hagi il destin manegiau bein culla veta da miu frar Gion Giusep. Entras l'inundaziun dils Russ e tier las sepitgadas che seigien schabegiadas leu, hagi il pauper piars tut. 26 tocs biestga seigien vegni engulai ord il nuegl, quei vul dir tuttas nuorsas, cauras, pors, schetgs e vaccas; tut il movent, gnanc ina cazzetta d'iron ei restada en casa per cuschinari ina suppa. El hagi stuiu empristar ina d'in cuntschacazzetas per sedustar dalla pli gronda miseria.

Il bien frar vevi gest cuort avon quella sgarscheivla uiara baghegiau cun gronda miseria ina undreivla casa. Tut la lenna ch'el vevi menau tier per cuvierer la casa ei vegnida transportada els camps e leu barschada. Per la casa, ch'el hagi pitiu gronds quitaus stat aunc. Ussa ein escha e finiastras fatgas, mo ei maunca la ferradira e quella seigi buca stada pusseivla da survegnir. Tgei ha el fatg. El serenda en tuts loghens da sepitgadas d'uiara. Baul anfla el ina buis, ina bajonetta, in fest da cargar ed il davos ha el anflau ton bia ch'il fravi hagi segirau ad el ch'el hagi pli che avunda fier per sia casa. El veva era anflau biaaras ruclas da plum e quei ha tunschiu per tuttas finiastras dalla casa.

Tgei curiositat ei quei che **Petersburg**, **Vienna** e **Paris** han sin quella moda furniu il fier e plum per baghegiar ina casa el pei dil **Crispalt**.

Denton pren ussa tut in meglier decuors en quella cuntrada, tuts ein uni ella miseria, sco els eran avon en beinstanza. Negin sa da pussonzas, da Giacubiners e da patriots, tuts ein units e gidan in l'auter schibein ed schibia sco ei pon.

Miu frar piarda per mia consolaziun buca la curascha ed ha buca plidentau mei per agid finanziel quei ch'ei dad el perdert, pertgei che jeu savess era buca sustener el e pertgei ch'il giavel e sia tatta van a cavagl sin mei sco sche jeu fuss buca pli buns en negin calzer.

Fontauna: Zentralbibliothek Zürich: FA Hirzel: 230, Nr. 208

### 1801

La claustra possedeva aunc igl onn 1802 beins a **Selva**, ch'ins haveva survegniu lubientscha da vender duront la sedisvacanza 1801 - 1804.

*Pader Placi a Spescha*

### 1803

Sin il capetel dils 12 da fenadur 1803 ei vegniu concludiu dils revendissims paders dalla claustra da **Mustér** da vender „bona quaedam in **Selva** .... justo pretio parata pecunia“....

*Notizia da pader Baseli Berther*

### 1804

Ils 13 da fenadur, sin in capetel dils paders: „Post haec quae situm al Cels<sup>mo</sup> est, an fundos in **Selva** sitos, e quibus solvi census „ 20 divendere consultum esset, nec? Annuere R.R.D.D.

Capitulares, si cum lucro divendi possint,“ Acta Capitularia, pag. 17.

*Notizia da pader Baseli Berther*

## 1804

„Circa finem Novembris (1804) post comitia Magistratus Disertinensis renovata est per publicum instrumentum sigillo, et minori Conventuali roboratum, et al Altefato Abbatte ac Decano subscriptum, Locatio Alpium in Tavetsch sc. Vall e Vallgiuf pro annuo censu 600 cren. Casei grassi in natura, et cum antiquis privilegiis solvendi.“

Acta Capitularia 1799-1813, pag. 82.

Notizia da pader Baseli Berther

## 1806

Die 8. Januarii (1806) Cels<sup>mus</sup> ad mensam retulit, advenisse festo S. Silvestri duos Æthuatiensi Vicinitatis Deputatos sc. D. Ministralem Gieriet et Str. Mucli, et Vicinitatis nomine exposuisse, non velle Vicinos denuo ut anno elapso, et prout antiqua ferebat consuetudom cargar ad Alp generalmeing, sed quemlibet privatum, ut per aliquot annos contigerat: ac proinde velle se Harbarium non in natura a 600 cren. Gischiel grass, sed per pecunias solvere, aut curare, ut Monsaterium caseum habeat, licet non iuxta antiquam consuetudinem cum privilegio eligendi locum, ubi vellet incipere etc. aut tandem paratos se esse censem hunc ex toto predimere etc. Quaesivit Cels<sup>mus</sup> quid Æthuatiensibus sit respodendum?

In variis itum est opinones, speciatim vero R. P. Benedictus animadvertisit, Negotium hoc maioris esse nomenti, quam ut absque convocatione tozius ven. Capituli aliquid statui possit. Quare statuta est Dies 15. Jan., et absentibus Capitularibus aut ore tenus, aut scriptores est communicata. Ad praefixam vero diem 15. nemo expositorum adfuit praeter R.P. Gallum, ubi denuo ad mensam hac super re actum est. Mentem suam Revmus Abbas ita aperuit, existimare se optimum factum, si Æthuatiensibus daretur responsio talis ut negotium protraheretur potius, quam per absolutam categoricamque responcionem vel di...imeretur, vel ansam praeverberet litium etc. Autumarunt nonnulli nostrum, fore fortassis occasionem, qua Monsaterium posset liberari al onore Merenda in die s. Martini. Tandem die 19, Januarii Æthuatiensi Vicinitati scripto est Declaratio sequentis tenoris.

## 1806

15 da schaner 1806

Alla ludeivla vischnaunca da **Tujetsch**,

la proposiziun fatga da monsignur avat il di da Silvester, en num dalla ludeivla vischnaunca da **Tujetsch** entras il bein sabi signur mistral Gieriet e signur statalter Mucli, ei vegnida mess avon ad in venerabel capetel dalla Casa da Diu, il qual suenter ver madiramein reflectau sur tala nova proposiziun, en consequenza dalla quala ei vegness buca cargau ad alp en general, ha viu en che tenor exprienza massi quei en pregiudezi dallas olmas, sco ins era da quei avisaus buca mo dad in u l'auter spiritual, sunder er'ina gada d'in entir venerabel capetel dils pasturs dallas olmas staus admonius cun entardar ni tralaschar il survetsch da Diu dumengias e firaus, nua che nies stan spiritual laschi buca tier da concuorer ni cooperar leutier entras novas cunvenziuns che gidassen tier tal intent.

Sche ha in venerabel capetel concludiu buca per siu interess, sonder per buca dar caschun tier talas inconvegnentschas e cheutras sefar participeivels dil mal, da reservar il temps ad uras da consultar ses pli aults superiurs e prender giu da maun da quels en tgei e con lunsch ins sepossi schar en a siu temps e denton garegiar dalla ludeivla vischnaunca il sulet arvè en natira suenter dretg diever ed instrument cun rugar ed augurar, ch'igl altissim Diu vegli era quest onn dar sia grazia e benedicziun sin tuttas alps e schurmegiar igl onn vegnent il s.h. muvel da tut mal e dils tiers nuscheivels, sco el ha preservau gl'onn vargau.

Actum Die et Anno ut supra

P. Basilius Veith Cap. Secret.

Acta Capitularia 1799-1813, pag. 95 e 96.

Notizia da pader Baseli Berther

## 1807

Die 27 Septembbris hujus anni per tres dies tanta nivium copia cecidit, ita ut intras tres hebdomadas nix vix liquefacta ac diffugerit. **Medelli** ac **Aethuaty** incolac ad falcem maturis

aristis supponendam, nivium moles manibus ex agris amoverer ac divellere cogbantur.  
*Acta Capit. pag. 102*

1808

### Unglück von Selva im 13ten Tag des Christmonats 1808

Selva, il secund davos liug dalla **Val Tujetsch** ella **Cadi**, schai odem in plaun-paliu e buca lunsch naven dallas fontaunas dil **Rein Anteriur**. - Siu num deriva dal vegl retic, che vul dir: uaul (selva) e vegn aunc oz numnaus dals **Uranes** tudestgai: „**Zum Holz**”, pertgei quei vitget era baghiaus egl uaul. - Il vitg da **Selva**, ch'era strusch serefatgs dapi il barschament da 1785 e ch'era dapi lu vegnius baghiaus tut da niev, veva ussa 13 casas-lenn e gest tons clavaus cun buns nuegls. Il vitget schischeva sillla riva settentriunala dil **Rein** sin in rieven; el possedeva surasiviars in trit e rar uaulet. **Selva** ei in beneficiat cun baselgia.

Da neueneu ei il vitget staus smanatschaus da duas lavinas; d'ina encunter mesanotg e da l'autra encunter miezdi, da surengiu e da sutensi. Quella dil **Rein** sutensi stremblava e spurlava si il vitg bunamein onn per onn; ella tementava ils vischins e schizun sdernava per tiara quels che vegnevan memia datier; vargava denton il pli savens senza caschunar pli gronds donns che rumper en finiasstras, derscher entuorn chischners e scarplir las slondas dils tetgs. - Quella dalla **Val dil Plaun** encuntercomi, quella da surengiu, mava savens cun baghetgs, cuvreva vi glieud e biestga e quei malgrad ils cugns-crap construi sur ils baghetgs per rumper la lavina, sco igl ei era stau il cass avon dus onns.

Ins sperava denton sillla protecziun da Diu ed essend ch'ei deva gest el liug dil vitg ina bun'aua, bunas pastiras e tut il cumadeivel per in'existenza da glieud e biestga, cartevan ins d'astgar viver en prighel.

Gliez unviern era la neiv in um aulta; ei suflava e cuflava senza fin e misericordia. Stgirezia e sclaridas anetgas sebrattavan giu e la fin finala fageva ei ton da selvadi, ch'ils habitonts han buca ughiau da semuentar ord casa quella sera, gnanc da pver e buentar.

Ei schabegia schiglioc buca darar, cunzun a **Tschamut**, ch'ei sufla e cufla aschi vehement, che las cuflas, pugnond ina cuna l'autra, petgan fiug. Mo quella sera fagev'eit tondanavon, che tgi che leva buca stenscher e vegnir tschochs, steva a casia. La lavina meridiunala, che schulava giud las palas dil **Ruinatsch** e vegneva giu bunamein onn per onn, temevan ils da **Selva** buca quellas caussas, ed ein per quei motiv fugi lezza sera ellas casas giudem il vitg, ch'eran bein pli maneivel da quella, mo pli allontanadas dalla lavina sura, settentriunala.

Per carezia e quitau pil beneficiat dil liug, Peter Weller, han ils vischins supplicau el da vegnir cun els; el sappi gie bein aunc seregurdar, ch'avon dus onns, la lavina hagi cuvretg sia casa, la baselgia e sfraccau la casa vischina. El ha denton snegau quei beinmanegiau invit e replicau zun mudest a sias nuorsas: La divina providentscha hagi destinau quella casa per el; el sappi subir il prighel cun ses vischins e banduni buca siu post.

Tgei sgarschur e stgiraglia notg; ils suffels burlevan e scadenavan cun vehemenza encunter las casas; talmein, che la cufla sefuritygava dalla pli stretga ruosn'en. Ei veva dau las dudisch e stuschava encunter l'ina dalla notg. Ils vischins eran tgi iu a letg, tgi scheva rusari, tgi vegliava - che la disgrazia ei stada cheu!

La zun extendida, profunda e teissa **Val Ruinatsch** sedestacca e sesfuola cun vehemenza giudora - e cun quella era l'aschi numnada lavina da **Benaus (Ils Vanauls)**! Omisduas sederschan giudora cun stermentusa ramur, entochen giuden el **Rein**, e leu s'entupond cun forza e sfraccass nundescrivibel, sesiettan ellas burlend ed urlond dal rieven **Rein** siadora. La davosa dat ina menada nunspitgada all'emprema, enviers mesanotg per liung ora; ellas contonschan domisduas il **Plaun** e sederschan cun vehemenza sul vitg en. Semanond ell'ussa aunc dalla vart meridiunala suranora, ei la catastrofa completa. Tut quei ch'ei en via va en scalgias e vegn el medem temps satrau. La tschaguola dalla tuor-baselgia e la crusch sgolan tras l'aria ensemblamein cun slondas e tetgals, che vegnan purtai entochen si egl uaulet sur il vitg. Sis casas ein sfraccadas ensemens diltuttafatg; ina ei donnegiada ed in'autra ha buca fastigt da tetg pli. Tschun clavaus ein destrui radicalmein e ston vegnir baghiai da niev dal sulom alla crusch-spitg; dus sulets ein restai senza donn. 42 persunas, pia la mesadad dils habitonts ed in affon aunc buca naschiu, 37 armauls e circa 200 tiers manedels ein satrai sut la neiv e las ruinas dils baghetgs.

Il beneficiat cuora immediat giuadura, va vin baselgia e tucca il zenn da stuornas; quei um spir forza e vertit, che fa bunamein miraclas per libeberar sias nuorsas satradas vivas!

Ils Tschamuters che han udiu il rumplanem ed il zenn da stuornas, cuoran sut agen prighel da veta atras l'altezia nevada ed ein ils emprems sillla piazza da disgrazia. Mo tgei ston els veser immediat? Treis da lur vischins cun biestga e tut sturni per plau e senza enzenna da veta.

Plirs umens da **Selva** pervesevan lur muvels silllas aclas da **Caspause**, ina mes'ura sur **Selva** encunter mesanotg ed han udiu nuot. Per l'auter di la damaun han ins pudiu dar sinzur ad els e scochemai ein ei curri tras las nevadas dallas plauncas teissas neu encunter **Selva**, senza schar dar el tgau, che era els pudessen mintga mument vegnir satrai dalla lavina.

Il medem di, che fuv'ina mesjamna, ei il plevon dalla **Val Tujetsch**, sur Luregn Schmed, cun tschuppel umens da leuora, semess sin via encunter **Selva**, mo essend la via stuppada ed aunc adina periclitada dad ulteriuras lavinas, ha er'el stuiu ir a **Caspause**, e per la medema via dils perveseders eis el finalmein arrivaus a **Selva** plein quitau e premura per sias paupras nuorsas. El era in um grev da sisonta onns e suava tut en in'aua, sco dis da stad ella pli gronda calira. Treis umens ed in mattatsch han pudiu sedeliberar da sesez ord la lavina; 13 persunas ein vegnidas excavadas vivas e buca fetg donnegiadas; las otras han ins anflau mortas.

Rest Giusep Riedi, in um sil meglier e sia entira famiglia han stuiu passentlar 15 uras sut neiv e crappa e senza saver magliar la minima caussa. El era mo en camischa. Els fagevan oraziun, seconsolavan, grevan ed udevan in l'auter bein e scoiauda, schebi separai in da l'auter. Plaunsiu han ins udiu lur vuschs, gland tuts el tact tgei ch'ei mo pudevan - ed els sezs en lur fossa udevan uss era ils cavaders. Ed uss han ins entschiet a cavar, mo vonzeivi ein ins stai necessitai da schar ira giuden ina resgia vid in sughet, sinaquei ch'il cau-casa sappi gidar a trer ella per arver ina ruosna, ch'ei possien siadora.

La tradizion raquenta, ch'in buobet muncavi aunc; ins ha clamau el pil num epi hagi ei rispondiu frestgamein: „Ju sun ain pegna ad ai tgaud e bien!“ Il buf veva pia bess il plat-pegnia pli lunsch ed il pign che durmeva sin quella, ei daus lien - e nuota schelaus!

Gion de Plaz, in um da sisonta onns, zugliaus mo en in lenziel, ha luvrau uras ora ella neiv per liberar sesez e sia dunna, mo ha tuttina stuiu schar schelar ella. Anflond el miezmorts, tut steris e senza vusch, semiglionts ad in moribund, han ins purtau el en sia stiva caulda, scaldau si las solas-pei cun plattas-crap bunamein burnidas, epi eis el puspei vegnius neu e vivius. Naven dil mardis endamaun, che la disgrazia ei succedita, entochen il venderdis-sera, han ins excavau 16 morts. Mo co satrar tontas baras, cu ins saveva ni purtar ni menar ellas a **Caspause** e la via anora era serrada e pli prigulusa che mai? La finfinala han ins fulau e cavau via en tut prighel da veta, e lu transportau las baras: tgi zugliai en lenzeuls e tgi mess danter aissas, cargai sin pliras sliusas da maun.

La sonda han ins satrau 19 e la dumengia las davosas 6 baras. Ins po cumprender cun tgei dolur e tristezia els cors dils presents! Cuolms e vals rebattevan dallas lamentaschuns dils zenns ed ils mirs santeri dal bargir e plirar dil pievelun en malencurada. E la ferdaglia era aschi recenta, che las larmas schelavan sin fatscha!

Pader Placi concluda allura sia descripziun cun ils plaids: Vegli po Dieus, il buntadeivel e misericordeivel, emplenir il cor dils concarstgauns cun commiseraziun ed ils habitants dil vitg cun prudentscha, sinaquei ch'ils ins gidien els ed ils auters seresolvien da transportar lur habitaziuns en in liug segir.

## 1808

La stad digl onn 1808 viseta Georg Wilhelm Kessler sin siu viadi atras il **Sid dalla Tiaratudestga**, la **Svizra** e l' era il vitg da **Tschamut** e traversa la **Val Tujetsch**. En sias brevs cumpara 1810 in descripziun cun impressiuns da **Tschamut**.

Sil **Pass Alpu** cunfinescha ina spunda sc'in dies cun la fin dalla val che s'estenda da **Tschamut** viers il pass. En quella regiun nescha il **Rein**. Tut ils dutgs tochen giu **Mustér** nua ch'il **Rein Miez** sbucca el **Rein**, vegnan numnai **Rein**.

**Tschamut** semeglia in vitg d'in pievel selvadi. Las casas ein construidas cun quaders tagliai mal e fermai ensemens malrugalau e representan dalunsch sco tegias ord cazzinas e dascha secca. Negina plonta verda crescha ella vischinonza, negina flur decorescha las casas. Auter che treis gaglinas ed in gat vein nus cattau negina creatira viventa el vitg.

Tut ils habitants dil vitg fuvan quei di giu ella val per assister ad ina messa nuviala. Quei vein nus intervegniu pli tard. (*Ei retracta dalla messa nuviala da sur Gion Evangelist Riedi, fegl da Gion Gaudios e Margreta Deplaz da Tschamut*). Lur techet muvel, il bia cauras, fuvan pils uauls stgirs entuorn.

Fometai e stauchels sesin nus sper in begl che vegn fatgs diever da carstgaun ed animal. Cun paun dir empruein nus da dustar la fom e serinforzar. Sut in tetg d'ina casa catta in ina retscha da ligiongias liungas. Enten rumper dapart ina da quellas, cula neuadora in fried pestilenziau, aschia che nus tergin ella immediat anavos silla gallaria.

Ils suandonts vitgs ein **Selva**, **Sogn Giachen (Rueras)**, **Zarcuns** e **Camischolas** ed aschia vinavon tochen **Mustér** ed ils vitgs ein buca megliers che **Tschamut**. Quels numbs, sco era quels dils cuolms, seniester il **Crispalt**, dretg il **Sertamaduna(?)**, **Badus**, **Curnera** ed auters ein romontschs. Quei ei il lungatg dalla tiara. El ei il rest dil vegl lungatg dils Romans elllas **Alps**. En secret eis el da capir levamenin neu dil latin e talian. A bucca ei il lungatg absolutamein nuncapeivels, principalmein entras la remarcabla spertadad ch'il lungatg vegn tschintschaus. Il tun dil lungatg schai denter la lomezia dil talian e la direzia dils lungatgs dalla **Europa digl Ost**. Dils umens capeschan biars tudestg e quei vegn aunc meglier pli lunsch dalla val giuado. Leu existan scolas che instrueschan il lungatg tudestg. Il pievel ei paupers, tschufs e crius. Las isonzas e tradiziuns ein aschi diversas da quellas dils vers Svizzers.

### **1816**

Die 21<sup>ma</sup> Septembris. *Æthuatiensis cum supplicationibus desertinam venerunt, serenitatem acris petizuri.*

*Acta capit. Ac Cronica 1814-1820; pag. 119*

### **1834**

Tenor quen prius si dil ludeivel magistrat e dau en alla Confederaziun han las vischnauncas dalla **Cadi** pitiu donns vid praus e baghetgs entras la gronda malaura da 1834, odem igl uost sco suonda:

<b>Tujetsch</b>	21'983 renschs grischuns
Medel	20'507 renschs grischuns
Mustér	42'332 renschs grischuns
Sumvitg	24'195 renschs grischuns
Trun	59'608 renschs grischuns
Breil	15'616 renschs grischuns

### **1836**

Ei vegn pli u meins generalmein lamentau dalla gronda penuria da fein; mo si la **Surselva** duei esser tuttavia gronda miseria. Ils avdonts da **Tujetsch** portan fein ch'ei cumpran, naturalmein per in exorbitant prezi, neu dad **Ursera** sur in ruh e da quest temps buca praticau cuolm.

*Il Grischun Romontsch 1836, nr. 11, 10 da matg*

### **1836**

#### **Lavina**

La lavina da **Giuv** digl onn 1836, ils 25 da december. Vegniu per la veta dus giuvens umens, era circa 30 armauls smaccau suten cun ils baghetgs.

*Cronica da Vigeli Giusep Beer, scrinari Sedrun*

### **1837**

... Ei vegn era detg ch'en **Tujetsch** a **Sogn Giachen** hagi la lavina priu dus giuvens. Ei fuss d'augurar, che quella nova seconfirmass buc.

*Il Grischun Romonsch 1836, nr. 45, 3 da schaner*

### **1837**

Ariguard il donn pigliaus a **Tujetsch** entras la lavina, eis ei vegniu ordinau d'entras ils signurs geraus da **Tujetsch** prender si il donn e tarmetter tier il resultat al signur mistral regent e quel duei far public quel ora sin las vischnauncas.

*Protocol dil cumin dalla Cadi*

### **1837**

Sin la tschema dalla **Surselva**, numnadamein en **Tujetsch**, ein las uolps, e bein exprimiu quellas da quater combas, semultiplicadas sin ina moda veramein stermentusa. Ei vegn scret, con bein ch'ei vegni sittau, sturniu e pegliau ina quantitat; tonaton possien ils purs buca secumpentar lur tiers manedels dallas uolps. Trops entirs selaian veser da bi di. Ei quei bein igl effect dil niev tschentament dalla catscha? L'idea ei ussa da sedeliberar da quella calamitad cun metter tissi. Ha aber quei buc'autras perigulusas inconvenienzas?

*Il Grischun Romonsch 1837, nr. 48, 24 da schaner*

### **1837**

En in artechel vegn ei lamentau sur dil schliet uorden dallas scolas dalla **Cadi** e ch'en biaras vischnauncas, priu ora **Tujetsch**, vegnien ils cudasch da scola, dai ora dalla societad catolica per meglieras scolas, buca duvrai etc.

*Grischun Romonsch 1837, nr. 50, ils 7 da fevrier*

### **1838**

**Tujetsch** – En nossa cumionza entscheiva a flurir ina nova frastga d'industria e commerci. Schon dis ed onns ha la patria grischuna tarmess naven grevas summas daners per vischala ed autras facturas da tiaracotga. Ussa aber havessen nus ina fabrica da semeglionts artechels denter nus. Passa in onn ei tscheu in figulant (luvrer da tiaracotga), che ha baghegiau si fuorn e luvratori, e producescha da tuttas sorts facturas da tiaracotga sco vischala, quadrels per pegas etc. Sche sias lavurs tegnan la prova vinavon - sco ins sa ver speranza – e buontad e qualitat da ses artechels ed arrivan adual allas manufacturas jastras: sche per ton pli fuss ei da cuir il gudogn a nossa glieud, ton per patriotissem, sco era per motiv, ch'ils daners restassen en la tiara, e l'industria, la quala ei schiglioc tier nus zun manca, vegness destadada si ed alzada. Ei fuss per quella fin bein ludeivel, sche buns patriots e sez la regenza encuressen da sustener quella e semegliontas interpresas cun ina ni l'autra favur, ed aschia fagessen anim e bien spert tier novas interpresas d'industria; sinaquei che ferton, che novas vias da commerci e communicaziun vegnan planisadas e menadas ora, era commerci ed industria fluressen en nies interiur. Ei muncass a nus buca la situaziun, buca ils duns e buca las materialias tier diversas manufacturas; aber ei maunca per bia loghens gl'emprem impuls, ed il ver spert industrial. Quei dueigien pia savieivels e buns patriots encurir da vivificar e semnar denter nus per promover il beinstar public.

### **1839**

Sie seien von **Disentis** her zwei Stunden durch Kot und Sumpf gewatet und dann an den Fuss des Berges gelangt, den es zu übersteigen galt, um nach **Andermatt** zu gelangen. Zum Glück stehe am Fusse dieses Berges ein armseliger Weiler. Alle Bewohner, der Landamann an der Spitze, seien auf sie zugekommen und hätten sie davor gewarnt, den Berg zu dem Zeitpunkt zu übersteigen, da sie sonst sicher in den Lawinen den Tod finden würden. Sie hätten dies für Aufschneiderei und Wichtiguerei gehalten. Aber auch der Wirt, der französisch spreche, habe das gleiche gesagt. Allerdings habe dieser gegalubt, dass bei warmem Wetter die Lawinen in zwei bis drei Stunden niedegehen würden und sie dann den Übergang wagen könnten. Zugleich habe er sich als Führer anerboten, sie sicher darüber zu führen. Sie hätten diesen Vorschlag natürlich mit Freude angenommen. Um die Zeit totzuschlagen seien sie zu einer Stärkung in seine Wirtschaft gegangen.

*Cumpariu en Claudio Zortea, GR im Spiegel der Reiseberichte, der landeskundl. und topographischen Beschreibungen in der Zeit von 1800 - 1850. Diss. phil. ZH 1987.*

**1840**

### **Emgraziun**

Riedi Johann Anton von **Rueras, Tavetsch**, studierte im Kloster **Disentis**, zog dann nach **München**, wo er Bayerischer Finanzrat wurde. Als solcher findet er sich viele Jahre im bündnerischen Staatskalender. Er starb um das Jahr 1840.

**1840**

**Tavätsch-Thal**, die Wiege des **Vorder-Rheins**, zieht sich von **Disentis** 3 ½ Stunden nach SW und hat mehrere Seitenthaler; reizend und fruchtbar, mit vortrefflichen Alpen und Weiden, leidet aber oft durch Lauinen. Wege: über **Oberalp** nach **Urseren** (entweder durch das Gamenthal zu den Sennhütten Tiarms und zum Oberalp-See, oder über **Selva, Ciamut**, zum Kreuz zwischen den **Calmot** und **Nugallas** und abwärts en den **Oberalp-See**); ein anderer Fussweg führt von **Sedrun** über den **Kreuzlipass** nach **Amsteg** in 8 Stunden. Grossartige Aussicht auf den Bergen **Piz Cocen** (Rothspitz), im N., **Cima di Badus** (Sixmadun), im W, und **Sceina-Mota**.

*Der Begleiter auf der Reise durch die Schweiz J. J. Leuthy, 1840*

**1841**

**Cavorgia** in hof da paucas casas en **Tujetsch** duei haver concludiu da baghegiar ina casa da scola. In exempl che mereta imitaziun. Contas grondas vischnauncas dat ei, nua ch'ins ha negina casa da scola.

*Amitg dil Pievel (I) 1841, nr. 50*

**1842**

Etwas mehr über die Art von Bewirtung ist von Toepffers zweiter Reise zu erfahren. Sie hätten in **Sedrun** nach einem Hotel gefragt, und man habe sie in den Pfarrhof gewiesen. Welch ein überraschendes Bild. In einer Stube, erfüllt von den goldenen Strahlen der Morgensonne, hätte der greise Pfarrherr (*Giusep Antoni Hitz da Tschamut*) mit seinem Kaplan (*Vigeli Venzin II da Gonda*) gesessen und eine Partie Damenbrett gespielt. Wie herrlich stimme doch diese Szene mit dem grossartigen Frieden überein, den diese Landschaft hier vermittelte. Sofort hätten die Geistlichen die Fortsetzung des Spiels verschoben und für sie am alten Tisch das Essen auftragen lassen. Unter ihren Augen habe sie ein junger Sakristan bedient, der jedes Stück Brot, das er ihnen gereicht habe, jeden Tropfen Wein, den er einschenkte, sorgfältig abgemessen habe. Alles sei hier rar, sei teuer, aber nach den Regeln der gewissenhaftesten Gerechtigkeit abgemessen worden, so dass sie nicht klagten und auch nicht hätten markten können.

*Reisebericht Toepffers zweite Reise in Bündner Oberland 1842*

*Cumpariu en Claudio Zortea, GR im Spiegel der Reiseberichte, der landeskundl.*

*und topographischen Beschreibungen in der Zeit von 1800-1850. Diss. phil. ZH 1987.*

**1847**

**Tujetsch** ... Era en **Tujetsch** spetgav'ins in meglier regulament da scolas, denton par'ei ch'ei seigi vegniu refretg .... pia vinavon plaunsiu?!

*Il Romontsch nr. 10 da 1847*

**1847**

La vischnaunca da **Tujetsch** ha ils 30 da matg 1847 unitamein tschentau si in fondo da scola da 11'000 flurins, ditgel endisch melli. In bi e zun legreivel progress e segiramein mai s'udius ellas annalas tuatschinas suenter la mort dil glorijs Pieder de Putnengia.

*Il Romontsch nr. 23, 1847*

**1848**

Sin **Cadruvi** a **Sedrun** duei vegnir baghegiu in stupent casament per las scolas da **Sedrun**. Per treis outras casas da scola, eis ei schon ussa lenna sil plaz. **Tujetsch** sestauscha pia cun honur vinavon.

*Il Romontsch nr. 15, 1848*

## 1850

Avon 15 dis ein 28 persunas (e zuar la tiarza part pigns affons!) dalla vischnaunca da **Tujetsch** emigradas ell'**America**; el **Stadi Ohio** tiegl enconuscent pader Salesius che ha leu gia baghegiau si treis claustras. Quei ein ils emprems Tuatschins; che passan la mar atlantica, ed ins havess pudiu crer, ch'els havessen en lur biala ed en bunas alps e pastiras schi reha val giu ina schi emperneivla existenza sco ella nova tiara d'empermischun, els uauls americans, nua ch'els veggan forsa suenter ils strapazs e prighels d'in schi liung viadi aunc a patertgar bia gadas vid lur bandunada patria, nua che mèl e latg flessegia en abundonza. **Tujetsch** ei segiramein en bein enqual riguard ina dallas pli ventireivlas vischnaunca, e cun ses novissims progress po ella aunc sperar in meglier avegnir. Alla giuentetgna auda igl avegnir e sche la vischnaunca da **Tujetsch** ha dacuort baghegiau ni baghegia 4 casas da scola ed ha presentamein emploiau treis scolasts, gl'emprem cun ina paga da 350 flurins, il secund cun 80 ed il tierz cun 50 flurins (ils dus davos mo pigl unviern), sche sa mintgin concluder, ch'ella hagi il dretg quitau per l'educaziun dils affons. Il magistrat enquera era suenter sias forzas da promover l'economia communal, ferton che sias expensas percibaras custavan aunc avon paucs onns alla vischnaunca tochen 200 flurins fa ella ussa tut sias breigias e lavurs senza indemnisiatiun. Milsanavon patratga la vischnaunca era vid in meglier uorden e pli grond spargn dils uauls. Ses ludeivels conclus pri da quellas varts meretan da vegin surdai alla publicitat per era animar autras vischnaunca cheutier:

1. Pils treis proxims onns astga negin pinar els uauls communals in lenn verd per barschar, sunder ins duei mo seprofitar dalla roma, cuschas, regaus.
2. Mintga nuegl, che vegin baghegiaus, duei dacheudenvi vegin fatgs si da crappa enstagl cun lenn.
3. Medemamein duein ils clavaus vegin baghegiai cun cantunadas da crap e las preits denter en cun aissas, la palaunca duei vegin construida ord lenna resgiada.
4. Novs baghetgs duein vegin fatgs si mo en cass da gronds basegments e cun approbaziun dil magistrat, che dessignescha la leutier necessaria lenna.
5. Tier seivs duein neginas lattas vegin duvradas, sunder mo lenna fendida ord buoras.
6. Scadin che remplazza la seiv cun mir survegn dalla vischnaunca in premi da 30 krizzers per tschuncheisma.

Per ton pli tgunsch puder execuir quels conclus ha la vischnaunca concludiu da baghegiar ina brava via ella duas uras allontanada **Val Pardatsch**, per puder trer ora da leu la necessaria caltschina da baghegiar e lenna da barschar. Vid quella via aunc buca finida ha la vischnaunca gia applicau varga 500 flurins, ultra las numerosas lavurs cuminas, nua che tut la glieud luvravan cun tut anim e tschaffen sut la buna ed activa direczion dils signurs frars Berther che han ils onns vargai giu surpriu da baghegiar in grond toc via da fier el **Württemberg**. Perquei laud ed honur als Tuatschiners!

*Amitg dil pievel nr. 13, 27 da mars 1850*

## 1850

Las vischnauncas da **Tujetsch**, **Mustér** e **Medel** veggan smanatschadas d'ina grondiusa depopulaziun. Ils quest mars emigrai Tuatschins san en lur brevs buca lendar avunda lur tiara dalla cucagna e far lur gomias suls magliatruffels e peis e miulas dalla **Surselva**. Ei maunchi ad els nuot auter che .... pipas e raischa per lur calgie' (?). Mo vegli Dieus, ch'els hagien suenter in per onns aunc il medem meini. Sin talas legreivlas novas eis ei buca da sesmarveglier, che bia glieud vulan uss ir ell'**America**, denton enqueran quels da vender caramein lur funs e cargar lur sacs cun brav daners – segiramein in pign gudogn per nossa tiara.

*Amitg dil Pievel, 1850, nr. 37*

## 1851

Ils Tuatschiners, ch'ein plein premura per scolas, uauls e vias e ch'ein era gia vegin encorunai cun differents premis cantunals, han questa primavera puspei entschiet a midar lur via encunter **Mustér** en in formal stradun, ed igl ei remarcabel, cun tgei tschaffen ed entelgientscha che la glieud lavuran vid quell'interpresa. Ei fuss giavischeivel, che las autras vischnauncas dalla **Cadi** imitassen silmeins empau quei bi exempl; ualvess che lur lavurs stoppien pitir per

mundar empau la crappa ord via, che glieud ed animals sappien ir senza dapertut scarpitschar en e mintga ton toc dar en venter ..

*Amitg dil Pievel 1851, nr. 31, 1. d'uost*

### 1851

Nos auts dueien aunc haver ina grondissima massa neiv, la quala metta en gronda tema ils habitants muntagnards. A **Rueras**, ella **Val Tujetsch**, ei avon pign temps vegniu giu ina gronda lavina e fatg cauld als habitants, nunditgond la fortezia fatga per defensa encunter la lavina.

*Amitg dil Pievel 1851, nr. 16, 18 d'avrel*

### 1854

**Sedrun** oder **Tavätsch** (Wirtshaus und Mineralienhandel beim Pfarrer), an dessen Pfarrturm ein Frescogemälde, Hauptort des Tales, 1400 ü. M., zweigt sich rechts der oben erwähnte Pfad nach **Amsteg** durch das wilde **Strimstal** ab. Über **Camischolas** und **Zarcuns** kommt man in einer Stunde nach **Rueras** oder **St. Jacob**, romanisch **San Giacomo** (Wirtshaus beim Landamann Venzin), in dessen Nähe auf einem vom jungen **Rhein** umschlossenen Hügel die Trümmer der Burg **Pultmenga** (**Pultingen** oder **Pontaningen**) sich erheben, einst Stammsitz des ausgestorbenen Geschlechts der Pultinger.

*Baedeker Karl, Die Schweiz, Handbuch für Reisende, 1854, pag. 302-306*

### 1854

Dem Laufe des **Vorder-Rheines** bergwärts entgegen, nimmt von nun das Rheinthal den Namen des **Tavetsch** an, besonders gerühmt wegen seiner kräuterreichen Alpen und seines trefflichen fetten Käses. **Sedrun** ist der Hauptort im **Tavetschertal**. Man geht hier beim Herrn Pfarrer zum Schoppen; seine Wirtschaft ist die beste im ganzen Umkreis: auch hat er schöne Mineralien zum Verkauf. Durch das hier abzweigende **Strimsthal** über den **Kreuzli-Pass**, zwischen dem **Krispalt** und **Oberalpstock** und **Weitenalpstock** hindurch, führt ein Weg ins **Etzli-** und **Maderanerthal**, durch letzteres nach **Amsteg** an der Gotthardstrasse.

Über eine neue Thalstufe hinauf kommt man nach **Ruäras** oder **St. Giacomo**, dem schon oft durch Lawinen verwüsteten kleinen Bergdörfchen. Die Vegetation wird entschieden alpiner Natur, der Gebirgskessel verengt sich, die Steigung wird stärker. Von **Disentis** bis hierher sind es  $3 \frac{1}{4}$  Stunden. Wohl eine der höchsten gelegenen Schlossruinen ist die von **Pultmenga**, aus welcher dass einst mächtige Geschlecht der Puntinger stammte, deren Einer als Abt von **Disentis** beim Schwur des Grauen Bundes (1424) an der Spitze der Volkspartei stand.

**Selva** und das eine halbe Stunde davon gelegene **Chiamut** (gegenüber dem **Cornerathal**) sind die letzten und höchsten Dörfer des **Vorder-Rheinsthales**. Ersteres hat schon traurige Schicksale unter dem Schrecken der Lawinen erlebt; vom **Ruenatsch** hernieder donnerte im Dezember 1808 unerwartet eine solche Schneemasse dass 42 Menschen und 237 Stück Vieh dabei umkamen und vier Jahr später verloren abermals 27 Menschen ihr Leben durch eine gleiche Lawine.

Es führen zwei Wege über die **Oberalp** hinüber ins **Urserental**, ein Winter- und ein Sommerweg; ersterer ist der längere. Von **Chiamut** bis nach **Andermatt** hat man vier Stunden. Der gefahrlose, bei gutem Wetter nicht anstrengende Pass führt über das Sommerdörfchen **Crispausa** (schöne Aussicht) durchs **Gämmerthal**, an den Alphütten von **Tiarms** (mächtige Blöcke von weissem Marmor) vorüber, durch eine Einsattelung hinaf zu dem schönen dunkelgrünen, fischreichen **Oberalpsee** und von da durch die **Oberalp** ziemlich abschüssig hinab nach **Andermatt**. Dieser Pass hat bei Weitem nicht das Wilde und organisch Erstorbene vieler anderer Hochpässe; vielmehr gehört er zu den freundlichsten und aussichtsreichsten Alpenübergängen, die es gibt. Im Hochsommer braucht man nicht notwendig einen Führer; wer indess an Alpenwanderungen noch nicht gewöhnt ist, wird dennoch wohl tun, mindestens einen Führer für  $1 \frac{1}{2}$  bis 2 Frank auf die Höhe mitzunehmen.

Von **Chiamut** aus können geübte Berggänger unter dem Beistand erfahrener Führer den 9165 Fuss hohen **Badus** oder **Six Madun** ersteigen. Hin und zurück ein Tag; Aussicht gegen den **Montblanc** und **Monte Rosa** über einen grossen Theil der **Berner Alpen**, die ganze **Tödikette** bis hinab zum appenzeller **Säntis**.

Die Quellen des **Vorder-Rheins** sind nicht so wild romantsich, haben keine so schauerliche Geburtsstätte, wie der **Hinter-Rhein**; in drei Thälern liegen sie versteckt. Die erste, nördliche, entspringt an der **Crispaltkette** und durchfliest das felsige **Gämmerthal**, - die zweite, hintere, südliche entquillt unter dem hohen **Badus** im **Maighelsthal** und stösst mit der ersten Quelle oberhalb **Chiamut** zusammen, die dritte, östlichste, kommt aus dem dunkelgrünen **Tomasee** und fliest durch das **Cornerathal** gegenüber **Chiamut** in den durch die beiden ersten Quellen gebildeten Fluss. Dieselben zu besuchen lohnt der Mühe kaum. Beim Heruntergang über **Oberalp** geht man einige Zeit dem Wasser der ersten Quelle entgegen.

*Alpen-Führer 1854*

1857

#### Publicaziuns

Cloms da quen

Concessiun dil Cussegl Pign ils 20 da fevrer. Cumin dalla **Cadi**. Cloms da quen: Sep Antoni Giacomet, retschevider da quen signur assistent Giachen Antoni Schmet, omisdus da **Tujetsch**. *Nova Gasetta Romontscha, 1857, nr. 10, 6 da mars*

1857

La fiera da **Trun** ei stada frequentada da bia glieud e tiers. Vaccas, stiarls e vadials eis ei vegniu vendiu e zuar per bials prezis. Era la mendra caura ei vegnida sin in marenghin. La dretga fiera da cauras vegn denton tenida mardis proxim a **Tujetsch**, nua ch'in sulet pur ha quest matg vendiu cauras per 340 frs. Silla fiera d'**Ursera** eis ei uonn catschau zun paucas vaccas. Ils purs fussen bein narradira, sch'els massen cun lur tiers sur cuolm, cura ch'els san vender quels en nuegl per stupents prezis.

*Nova Gasetta Romontscha, 1857, nr. 23, 5 da zercladur*

1857

Ins ha schon legiu vi e neu da sventiras daventadas cun affons tras tissis da mustgas. Quels dis vess era gleiti in affon da **Tujetsch** saviu vegnir per la veta sin quella moda. Ses geniturs vevan rasau ora en stiva pupi da mustgas che cuntegn era arsenic e per giavinar las mustgas pli fetg vevan els bess empau zucher sissu. Ferton ch'els eran occupai, va la buobetta vid il pupi, pren quel en bucca, il gust dulsch plai, ed ella maglia in ton. Per ventira ha ella cuninaga stuiu render ed entras spert agid medicinal eis ella mitschada dalla mort ed ils geniturs culla tema. In niev exempl ch'ins sa mai esser precauts avunda el survigilar ils affons.

*Nova Gasetta Romontscha, 1857, nr. 30, 24 da fenadur*

1857

Ina descripziun dalla **Val Tujetsch**, sco habitants e products, mira feuilleton: „Impressiuns da viadi I“.

*Nova Gasetta Romontscha, 1857, nr. 38, 18 da settember – Mira pag. 583*

1857

Signur assistent Gion Ludwig Bèr *Beer* da **Tujetsch** ch'ei morts la jamna vargada, ha fatg si als paupers dalla vischnaunca in legat da 1000 frs. Milsanavon duei ei vegnir partiù ora ad els ina buot sal. Per rugalar si ina baselgia ch'era en decadenza ha el per plirs onns testamentau il tscheins d'ina acla. Ultra da quei ha el era seregurdau da dus paupers orfens da siu vischinadi per ton pli tgunsch gidar quels tier in mistregn. *Il cudisch da mortoris noda: 17-9-1857 D.*

*Assistentes Joannes Ludovic Beer, fegl da statalter Jacob Martin Beer e Maria Margarita Rueras e la remarca: fotor pauperum e sut gener da mort: nescio, 37 onns.*

*Nova Gasetta Romontscha, 1857, nr. 39, 25 da settember*

1857

Dallas treis medaglias d'aur partidas ora per products agricols, ha era la societad agricola da **Cuera** survegniu ina per siu grond e bi assortiment da tuttas sorts fretgs, nominativamein eis ei vegniu dau ad ella per puma tosta e per mèl da **Tujetsch** e **Medel**.

*Nova Gasetta Romontscha, 1857, nr. 42, 16 d'october*

**1857**

Las elecziuns dil cusseglier naziunal han dau ella **Cadi** il sequent resultat: ... **Tujetsch:** Dr. Condrau 127, C. Latour 1; ...

*Nova Gasetta Romontscha, 1857, nr. 44, 30 d'october*

**1857**

### **Clom da quens**

Ils quens dil defunct signur assistent Ludivic Bèr *Beer* dueien vegrir dai en a signur assistent Tumaisch Schmet, omisdus da **Tujetsch**.

*Nova Gasetta Romontscha, 1857, nr. 47, 27 da november*

**1857**

La jamna vargada ha finalmein era signur pader Sigisbert Monn da **Mustér**, che veva schon questa primavera survegniu la lubientscha d'extrar ord igl uorden clastral, bandunau per adina la claustra da **Mustér** e surpriu ad interim la caplania da **Sedrun**.

*Nova Gasetta Romontscha, 1857, nr. 48, 4 da december*

**1857**

L'ordinaziun dil Cussegl Pign, che constrenschia ils vitturins dalla **Surselva** dad ir sillia via nova mo cun sliusas d'in bratsch e miez ladezia, ha fatg schliet saung en bia vischnauncas. Ils vitturins dils loghens giud via, sco **Lumnezia** e **Tujetsch** etc. san nunpusseivel duvrar quels maltschecs carpiens sin lur stretgas vias ed aschia stuessen els mintgaga brattar giu sliusa cura ch'els vegrin sillia via nova. Quei fass in grond discumet e caschunass dubels cuosts. ...

*Nova Gasetta Romontscha, 1857, nr. 49, 24 da december*

**1858**

### **Clom da quens**

Bistgaun Deflorin da **Tujetsch** ei concediu il concours ed ils quens dueien vegrir dai en a signur statalter Stiaffen Schmet da leu.

*Gasetta Romontscha 16.1.58 nr. 3*

**1858**

Il marcau da **Glion** ei quellaga buca staus frequentaus sco quel dil december. Ils capomarcadonts da stiarls muncavan, ed aschia eis ei aunc restau dabia da quels tiers sin plazzafiera. Cun quella marcanzia „dalla cuu“ ei lura in da **Trin** serendius a **Tujetsch** per vegrin sura da quels tiers – in cass aunc mai s'udiis!

*Gasetta Romontscha 23.1.58 nr. 4*

**1858**

La tratga da biestga ha el novissim temps fatg bials progress, schegie ch'ils premis cantunals per s.v. bos han calau si e ch'ils geraus da vischnaunca han buca pli in bov per lur honorific uoppen da dignitat. Sco ins auda vegrin ei ussa teniu pli e pli bials bos e la razza da biestga vegrin pli e pli biala. – Era **Tujetsch** ha uonn vuliu far in'emprouva e cumprau in per 14 marenghins. Sch'igl ei uonn vegrin vendiu a **Mustér** in vadi da siat jamnas per 85 frs. – in cass aunc mai s'udiis en quella vischnaunca – sch'ei quei era da prescriver tier al meglier indrez da bos. Tgei grir e selamentar, cura ch'ils geraus han tenor lescha cantunala stuiu vegrin liberai da tener bov, sco sch'igl entir mund bestial stuess cheutras ir sutsura! Ed ussa vesa tut en, che quei ei stau in grond avantatg pella tratga da biestga.

*Gasetta Romontscha 1858*

**1858**

Las medaglias da premi, partidas ora dall'exposiziun industriala ed agricolana a **Berna**, ein arrivadas. Survegniu han: La medaglia d'aur: 1) La societat agricolana da **Cuera** per in beinregulau sortiment da puma, fretgs dil funs, mél da **Tujetsch** e **Medel** etc.

*Gasetta Romontscha 30-1-1858 nr. 5*

## 1858

La vischnaunca da **Tujetsch** survescha per muster d'in bien uorden d'uauls e baghegiar si spirontamein clavaus da crap. Igl ei aschia da capir, che glieud sedattan ora per biala crappa, denton fuss ei tuttina da giavischar, ch'ins schanegiass las venerablas reliquias dil bien temps vegl. Ei fa mal d'udir, che las cantunadas dalla biala ruina dil casti da **Putnengia**, ch'ornescha l'entira val, vegnan disfatgas per duvrar la crappa vid in clavau. Igl ei memia prosaic, gie empau barbaric d'applicar las cantunadas dil casti dil fundatur da nossa Ligia Grischa vid in nuegl! Videant consules ne queid detrimenti capiat res sacra!

Gasetta Romontscha 13-3-1858 nr. 5

## 1858

**Putnengia.** Nossa critica sul disfar la biala ruina da **Putnengia ni Pontaningen** ha provocau reclamaziuns. Buca ch'ins hagi astgau snegar la barbarica commessa, na nus vein cun nos agens egls saviu seperschuader da quella, cun profunda indignaziun observau, che la tuor porscha tuttavia buca pli il romantic aspect da vivon. Bein aber eis ei vegniu pretendiu, che quella ruina derivi dil temps dils Romans, seigi buca stada ina possessiun da Pieder de Putnengia, ed in secreigi buca da meritar il num da barbars per disfar las ruinas, nua che tirans habitavan vivon. Nus dein tier, ch'ils Romans hagien baghiau beinenqual casti per lur garnischuns e per segirezia dallas vias, sco il Spinöl e Maretööl a **Cuera**, mo paucs han surviviu l'emigraziun dils pievels ed umens savieivels declaran da bunamein negliu saver observar il stil roman vid nossas ruinas. Nus dumbrein en nies cantun circa 170 castials ni ruinas ed ins po dir, che quels tuts seigien cun pintg'excepziun vegni fundai en differentas periodas dil temps miez, pli tard vegni construi autruisa e biars puspei alzai ord lur ruinas. Muort sia situaziun denter igl imperi **German** e **l'Italia** veva la **Rezia** da gliez temps in gronda impurtonza militara e buca mo mercantila e schon per quella raschun eis ei vegniu menau si bia castials.

Ins sto buca tertgar, che tut quels castials seigien stai ignivs da tirans che mudergiavan il pievel. En biars habitavan nobels signurs ch'eran en temps da pasch ed uiara babs e menaders dil pievel. Bein enqual niebel baghegiava si da quels forts per porscher alla glieud in asil en temps d'uiara ni invasiuns. Aschia han era plirs uestgs da **Cuera** cumprau ni baghegiau castials per protecziun da lur subdits. Auters ein vegni baghegiai per schurmetg dallas vias e dil traffic, en in temps nua che perfin cavaliers sedevan giu cun engular e sblundergiar, aschia anfl'ins tals monuments en aultas cuntradas, nua che negina noblezia fuss schiglioc sedomiciliada, sco en **Stussavia, Avers** etc.

Las famiglias noblas che vivevan en quellas tuors ein pella gronda part mortas giu ni emigradas. Aschia eis ei era iu culla respecatada famiglia de Putnengia. L'**Acla Putnengia** ch'ei damaneivel dil „casti“, sco ils Tuatschiners numnan la ruina e segiramein porta era quel il num **Putnengia**. Per motiv ch'el era il sulet casti ella val, sche vegnev'el per ordinari numnaus cuortamein mo „casti“, gest sco quei ch'ils habitants da **Mustér** e **Sumvitg** numnan aunc ozildi lur capitalas mo „vitg“. Sch'ei exista en **Tujetsch** in casti de Putnengia e sch'il fundatur dalla Ligia Grischa senumnava Pieder de Putnengia, avat da **Mustér** ed oriunds da **Tujetsch**, sche pon ins tuttina concluder cun buna raschun che quella tuor udevi a sia parentella. Nus pretendin mo quei, che Röder e Tscharner dian, dus umens che han legiu atras tuttas cronicas grischunas. Era Mohr numna en siu archiv quella tuor **Putnengia ni Pontaningen**.

Tuts viandonts che passan tras **Tujetsch** considereschan cun veseivel plascher la ruina da **Putnengia**, igl ei la pli gronda remarcabladad historica, che l'entira val posseda e tier quei pitoresc ornament da quella cuntarda. Legian ils viandonts en lur viadès da quella renomada tuor, duessen ei aber buc anflar pli ella ed udir tgei tresta sort che sia miraglia hagi giu, sche vegnan els segiramein a far curvien sur in tal barbarissem. Il ministeri da **Württemberg** ha dacuort relaschau in avis allas suprastonzas, als plevons e scolasts, ch'els dueien haver quitau che tuttas antiquitads vegnien bein reservadas e sin quei lessan era nus haver fatg attents las valladas romontschas. Denton schein nus suandar cheu in inserat tarmess tier a nus ord la capitala cantunala.

Ils da **Tujetsch** vulan ornar lur val cun bials clavaus da crap e destrueschan denton lur pli bi e renomau ornament – il casti da **Putnengia ni Pontaningen**. Tgei nova revolta eis ei rut ora

encunter las tuors e castials ella **Rezia**? Il temps dils tirans ei vargaus! En nies temps eis ei pintga honur pli da ragischar ora las veglias ruinas, quels monuments sepulcrales, che fan memoria dalla decadenza da tuttas forzas humanas; sunder plitost da mantener e schanegiar ellas schi ditg sco pusseivel. Era en lur decadenza ein ellas aunc adina remarcablas pils historiografs, viandonts e habitonts dil liug, nua ch'ellas existan. Igl ei pia ina enzenna da pauca stema ed honur encunter venerablas antiquitads, sche habitonts dalla tgina dil **Rein** entscheivan en moda vandalica a sespogliar sesez da lur veglias reliquias! Ins duess buca crer d'anflar schi freid patriotissem sco la glatscha dil **Badus**. Ei tutta simpatia per nies renomau avat Pieder de Putnengia svanida? Nus tertgassen, ch'ei fuss adual schi cunvegnent als Tuatschiners d'esser empau loschs sillla miraglia da quei um gigantic per l'entira **Surselva**, che sin in bi clavauet niev, fabricaus da mauns temeraris, che schanegian gnanc las trestas ruinas dil fundatur dalla libertad sursilvana! La glienda sper **Trun** ha tiegl engirament digl onn 1424 viu gl'avat Pieder de Putnengia sco cau dil pievel. Fuss ei pia buca dueivel da tener en honur las davosas reliquias da quei um meriteivel per nossa patria, sch'ins posseda aunc zanua ina sbrenzla senn patriotic e senn d'engraziamenti; pertgei quel san ins mussar encunter las meffas ruinas da quei romantic casti **Putnengia**.

*Gasetta Romontscha 27-03-1858 nr. 13.*

## 1858

Cull'avertura dalla viafier san ins ir tschun gadas a di da **Cuera a S. Gagl**. Il cuors dallas postas vegn mess en connexiun cugl ir e vegnir dalla viafier, taluisa ch'ins sa lu arrivar en in di da **Tujetsch, Mesauc, Giadina Su** etc. a **S. Gagl**.

*Gasetta Romontscha 1-5-1858 nr. 18*

## 1858

Strusch ha ei giu dau la davos'ura digl avrel, sche ha il matg spert bess anavos nus el pli sgarscheivel unviern. Quels che tegnan sin striegn sesmarveglian buca giud la sgarscheivla nevada. L'aura ei gie secavestrada la notg da Walburga, dils 30 d'avrel sigl 1. da matg, nua che las strias tegnan da vegl enneu in solemn barlot cul demuni ... sche ha ei entschiet a never e neviu 55 uras, bunamein treis dis e duas notgs!

A **Mustér, Medel e Tujetsch** seregordan umens da siatonta onns e varga onns buca da quellas nevadas. Egl emprem liug er'ei 9 – 10 quartas neiv, ella **Val Medel e Tujetsch** 11 – 12 quartas. Ellas vischnauncas da **Sursassiala** ei tutta communicaziun stada interruttta per treis dis, als perveseders er'ei in grond sforz per arrivar en nuegl e tiella scartezia da fein, stuevan ei aunc semudergiar per survegnir aua. Per ventira ha igl Altissim pertgirau da grondas disgrazias. Ils habitonts da **Selva** ein fugi a dretg temps en **Novaselva**, la lavina da cauld ei vegnida giu, mo senza far donn al vitget. La bun'aura luenta la neiv cun ualtri bien ried ed aschia eis ei da sperar ch'ins possi scappentar ils tiers.

*Gasetta Romontscha 08-05-1858 nr. 19*

## 1858

### Publicaziun

La fiera da **Tujetsch** vegn tenida mardis proxim, ils 15 da quest e zuar a **Sedrun**.

**Tujetsch**, ils 10 da zercladur 1858

Igl actuaridad da vischnaunca

*Gasetta Romontscha 12-06-1858 nr. 24*

## 1858

La fiera da **Tujetsch** ei stada la pli viva da tuttas fieras ch'ein vegnidas tenidas questa primavera en **Surselva**. Dil cumin da **Rueun** e dalla **Cadi** eis ei vegniu catschau bia biestga, ch'ei vegnida vendida per bials prezis, schegie ch'ils d'**Uri** fagevan la fiera d'**Ursera** mo beffas cun quellas. Igl ei era vegniu schau via da bia cavals per tscheins als Tudestgs. Els han pagau 24 – 30 talers per cavagl, aber enviau anavos il rufid. Il bia han ils numerus Tudestgs marcadau, ils marcadonts da **Tujetsch**, ch'ein schiglioc plein fiug, miravan mo tier, sulet el consum dil gustus bier da **Glion**, han ils Tuatschiners fatg concurrenza culs jasters. – Las nuorsas da piazas han

uonn tratg mal e biars manegian perquei tenor in vegl proverbi, ch'era ils stiarls veginen d'atun buc a trer bein.

*Gasetta Romontscha* 19-6-1858 nr. 25

### 1858

Trest'aura. Dumengia vargada (22-08-1858) eran las muntognas vestgidas en alv, ed ella **Cadi** era la neiv tschentada tochen viers **Trun**. Tras quei ein ils èrs vegni terrai aschizun sco sch'ins vess zulau els. Tier tutta sventira han ins silmeins giu la ventira, ch'igl ei vegniu neginas scheltiras sissu, sco ins vess pudiu temer sillla serenezia da dumengia sera. Oz venderdis, ein ils cuolms puspei nevi giu e sillla dracca da quels dus dis eis ei strusch da sperar pli, ch'ils èrs levien puspei si. Igl ei da temer ch'els encaglien e ch'en bia loghens vegn ins a far pauc graun ni nuot diltut, tonpli ch'ei sedi: „Gl'uost mett'il paun en canaster“. Ils truffels vevan aunc biala pareta, mo ins auda tscheu e leu, principalemin a **Trun**, a selamentond sulla veglia malsogna. Ellas alps, nua ch'ei flessegiava uonn tschelluisa pauca latgira, pon ins cumprender ch'en tala ruha aura „mondi il latg els corns“. Schi grondas ruhas egl uost han ins da bia onns enneu mai giu; duess aunc la biestga buca trer bein, sche vein nus in onn da miseria avon esch, ed il stupent avrel ha menau nus egl avrel.

*Gasetta Romontscha* 28-08-1858 nr. 35

### 1858

Era dus catschadurs da **Tujetsch** han sittau igl emprem di da catscha quater camutschs e zuar era dus cun in siet. Ei vegn selamentau, ch'ils catschadurs dil **Tessin** ed er'enqual d'**Uri**, hagien fatg catscha da camutschs sin territori grischun e lu aunc d'in temps scumandau. Il meglier fuss ei, sch'ei vegness dalla Confederaziun anora scumandau diltut la catscha per entgins onns.

*Gasetta Romontscha* 11-9-1858 nr. 37

### 1858

La cumissiun federala ch'urenta ils uauls ei ier arrivada tochen **Tujetsch**, ella ha aunc d'inspectar la **Lumnezia**, **Valrein**, **Mesauc** e **Calanca**. Sco ins auda renconusch'ella, ch'ei seigi ils davos onns vegniu empau meglier cul regulament da nos uauls, mo deplorescha, che quels vegnan aunc adina buca cultivai scosauda. Tuccont tier la correcziun dil **Rein**, duei ella esser dil meini, ch'ei tuchi d'entscheiver quella ellas valladas grischunas e buca per giu **S. Gagl**, sco nos vischins da leu vulan catschar atras sin quen dalla Ligia.

*Gasetta Romontscha* 11-9-1858 nr. 37

### 1858

En **Surselva** vegn la tratga d'aviuls pli e pli impuronta e rendabla; il renomau mèl da **Tujetsch** e **Medel** vegn da fetg biars viandonts prius egl jester sco per ina raritad.

*Gasetta Romontscha* 25-09-1858 nr. 39

### 1858

Ina vacca taissa cun in fildirom ell'ureglia dretga e corna agradora ei sepiarsa la fiera da **Trun**. Tgi che sa novas da quei armaul vegn supplicaus da far da saver a Giachen Martin Curschellas a **Tujetsch**.

*Gasetta Romontscha* 30-10-1858 nr. 44

### 1858

Statalter Sigisbert Monn da **Tujetsch** ei sedeclaraus insolvents e sin quei ei il concuors vegnius concedius. Ugau signur gerau Stiaffen Monn da **Sedrun**.

*Gasetta Romontscha* 11-12-1858 nr. 50

### 1859

Ugadai ein ils treis affons da signur mistral Venzin p.m: Rudolf, Duri Battesta e Lisabet Venzin da **Tujetsch**, ugau: signur capitani Tumaisch Condrau a **Mustér**.

*Gasetta Romontscha* nr. 6 1859

## 1859

Las vischnauncas dalla **Cadi**, che han da pagar alla claustra da **Mustér** il tscheins fier datier da 1000 frs., vessen cumprou ora quel, mo insistend il convent sissu da far pagar ils 25avels dil tscheins annual, ein las contractivas puspei interruttas.

*Gasetta Romontscha nr.14, 1859*

## 1859

Il cumin dalla **Cadi**. .... ed aschia ein elegi ora (*sco derschaders*) ils signurs dr. Decurtins da **Trun**, actuar Cajacob, Lucas Cavegn da **Tujetsch**, T. Condrau, assistent Caduff da **Breil**, assistent Pali da **Medel**. .... Sco deputai per dus onns ein vegni numnai: 1. Il president regent, 2. signur dr. Decurtins, 3. signur actuar Cajacob, 4. signur statalter Gion Andriu Berther da **Tujetsch** e 5. ils signurs dr. Condrau e professer Condrau, in onn per in.

*Gasetta Romontscha. 12-05-1859 nr. 20*

## 1859

Collectas pil Ritli.

A. Ellas scolas dil district Reinsu.

<b>Rueras</b>	contribuents	21	1.71 frs.
<b>Selva</b>		18	2.85 frs.
<b>Cavorgia</b>		13	0.95 frs.
<b>Sedrun</b>		45	1.90 frs.

## 1859

### Avis

Ei vegn cheutras fatg da saver che la fiera da **Tujetsch** vegni tenida gievgia proxima, ils 16 da quest e zuar a **Rueras**.

La suprastanza da **Tujetsch**.

*Gasetta Romontscha nr.24, 1859*

## 1859

La fiera da **Tujetsch** ei uonn stada frequentada da bia glieud e tiers. Digl **Uri** era ei vegniu neu ina massa umens e femnas. Las cauras – il capoartechel da quella fiera – mavan l'entschatta tut el luft per aults prezis, mo cura ch'il cavrer da **Medel** ei arrivaus sin plazzafiera, han ei entschiet a dar sut en e tgi che ha buca vuliu turnentar, ha stuiu vender in taler pli bienmarcau ch'avon. Era da bia vaccas eis ei vegniu marcadau per fetg andants prezis. – Il davos han Tudestgs perfin giu commiseraziun culs cavals e priu si enzacons a tscheins, bein aber per pauc pli che pella mesadad dils prezis d'onn.

*Gasetta Romontscha nr. 25, 1859.*

## 1859

Sco remarcabladad dalla presenta vegetazion remarchein nus, ch'ei duei da s. Antoni, ils 13 da quest, esser vegniu anflau spigias salin a **Tujetsch**. (?)

*Gasetta Romontscha nr. 25, 1859*

## 1859

Dumengia vargada ein sis teologs grischuns vegni benedi ora a **S. Pieder**, numnadamein ils revendissims signurs: .... Monn *Giachen Antoni* (1829-1872) da **Tujetsch** ....

*Gasetta Romontscha nr. 35, 1859*

## 1859

Nus havein schon relatau ch'ils selvadis secumentien zun fetg culla raccolta dils fretgs. Denter quels ventireivels ei era la **Val Tujetsch**, che seregorda darar d'in aschi fritgeivel onn. Siu glin, renomaus ell'entira **Surselva**, para da dar ina splendida rendita. In particular ha giu semnau ina curtauna semmlin e fatg 27 curtaunas e mesa. El ha giu mess stubla e fretg suravia cultem da tiers manedels. Tiella reha fenada e risdivada han ils Tuatschiners aunc fatg – sco ei vegn

segirau – da mellis buordis fein a pastg ellas muntognas, ed aschia pon ins spitgar, ch'ils stiarls veggan quest unviern ad esser tschercai sils marcaus da **Glion**. – Tuccont tier la fiera da **Ligiaun** vulan ei pretender, ch'ei seigi ussa buca pli schi bunas tunas.

*Gasetta Romontscha nr. 38, 1859*

**1859**

Nus vein en in da nos davos numers giu fatg menziun dil destinguui glin da **Tujetsch**. In um da fei ord quella vischnaunca ha ussa raquintau a nus ina secunda raritad sur da quei fretg. El hagi giu en siu iert ina teglia ni plonta da glin che vevi 137 borlas! Da quintar sco solit per ina borla 11 cauls, vess pia quella teglia purtau ina raccolta dils 1507 dubels.

*Gasetta Romontscha, nr 40, 1859*

**1859**

**Clom da quens**

Statalter Giachen Martin Biart da Tujetsch, **Cavorgia** ei puspei el concuors; ses quens ein da tarmetter tier a signur gerau Duri Venzin da **Rueras**.

*Gasetta Romontscha, nr 41, 1859*

**1859**

Marcadonts da Tujetsch ein i cun vaccas sillla fiera da **Meiringen** e cun quellas, che els han buca saviu vender ad **Altdorf**, ein els sembarcail pil cantun **Lucerna**. Beinenqual renconuschiu pretenda ch'ei seigi buca schi grond gudogn, sco ins manegi, da vender ora tontas dallas bialas vaccas, schegie ch'ellas paghien bein, per motiv che la razza piteschi memia fetg cheutras; mo speronza che las vaccas, che restan anavos, veggien tenidas ton meglier e ch'ins hagi da quellas la dubla rendita.

*Gasetta Romontscha, nr. 43, 1859*

**1859**

In stierl culla marca P. A. ei sepiars; tgi che sa novas da quel, ei supplicaus da schar saver signur Paul Schmet a **Tujetsch**.

*Gasetta Romontscha, nr. 43, 1859*

**1859**

Ier ei veginu satrau a **Tujetsch** igl aultreveriu sur Giusep Deplaz, ch'ei staus varga 40 onns caplon egl isolau e per la lavina prigulus vischinadi da **Selva**. El er'in um d'ina exemplara conduita ed in fideivel survient dil Segner, che veva da far zun pauc cul mund. R. I. P.

*Gasetta Romontscha, nr. 44, 1859*

**1859**

**Annunzia da mort**

En profunda dolur fan ils suftascrets da saver a parents ed enconuschents, ch'ei hagi plaschiu agl Altissim da clamar ord questa veta, speronza tier ina megliera, nies car frar

**Sur Gion Giusep Deplaz**

Caplon a **Selva**

El ei morts la notg dils 25 sils 26 da quest suenter ina malsogna da 15 dis, en ina vegliadetgna da 73 onns, provedius culs s. sacraments. Ins recamonda il defunct alla pia memoria da tut ses enconuschents, cunzun allas s. oraziuns da ses confrars spirituals.

**Tujetsch**, ils 26 d'october 1859

Ils fargliuns en malencurada

*Gasetta Romontscha, nr. 44, 1859*

**1859**

**Cadi**. Ugadadas ein sequentas persunas: 1) Gion Martin Peder (vegl) ugau statalter Stiaffen Schmet, omisdus da **Tujetsch**. ...

*Gasetta Romontscha, nr 44, 1859*

**1859**

### **Clom da quens**

Ils quens digl emigrant sechelmeister Gion Banadetg Deragisch da **Tujetsch** ein da dar en a signur assistent Giachen Antoni Schmet da leu.

*Gasetta Romontscha, nr. 48, 1859*

**1859**

### **Altezia dils divers vitgs en Surselva**

En pign temps vegn ei puspei a cumparer in niev blatt dalla gronda carta federala da general Dufour; quel cuntegn l'entira **Surselva** cun pliras parts cunfinontas. Sco nus vein schon remarcau inaga, ei quei la pli gronda, bial'ed exacta carta, ch'exista sulla **Svizra**, gie neginas autras tiaras han da mussar si ina semeglionta. Quei stupent blatt vegn a far plascher a scadin Sursilvan. Nus vein denton copiau giu las altezias dallas vischnauncas sursilvanas, per far veser il successiv sbassament da nossa vallada. L'altezia ei dada en meters sulla mar, in meter ei  $3\frac{1}{2}$  peis ni 5 bratscha nova.

<b>Pass d'Ursera:</b>	sur <b>Tiarms</b>	2154 meters
	sur <b>Tschamut</b>	2052 meters
<b>Pass sul Crizli</b>		2350 meters
<b>Tschamut</b>		1660 meters
<b>Selva</b>		1540 meters
<b>Rueras</b>		1360 meters
<b>Camischolas</b>		1424 meters
<b>Sedrun</b>		1398 meters

*Gasetta Romontscha, nr. 49, 1859*

**1859**

### **Clom da quens**

Gion Florin Riedi da **Tujetsch** fa da saver ch'el paghi dacheudenvi negins deivets da siu fegl Gion Rest. Tgi che ha d'haver dil fegl duei dar en a signur gerau Duri Venzin.

*Gasetta Romontscha, nr. 53, 1859*

**1860**

### **Pauperesser**

.....**Tujetsch**, nua ch'ils paupers pudevan vivon mirar tier co il terment muvel dils beinstonts sbutlava giu las stupentas pastiras ed alps cuminas, ha ussa encuretg da bonificar ils „murdius“ cun dar ora ad els tocs pastira per schar semnar truffels e graun. Cun quellas sorts han gia bia vischnauncas segidau, ed aunc biaras savessen far il medem.

*Nova Gasetta Romontscha nr. 1, 1860*

**1860**

Quels dis ha la nunmisericurdeivla mort separau a **Tujetsch** ina letg da 62 onns, 2 meins e 2 dis. Probabel la pli veglia letg dall'entira **Cadi**, sche buca dall'entira **Surselva**. Igl um ch'ei ussa morts, veva varga 88 onns e la dunna che viva aunc, ha cumpleniu ils 93 onns. Sch'enatzagi duess dumandar co quels seigien vegni vegls, sche san ins rispunder: cun viver en pasch e buna veglia, esser activs, setener vid la broda e tschagrun fiers e buca cun tudi sevilar, esser lischents e slavidrar caffè. *Ei retracta da Simon Fidel Decurtins fegl da Gion Antoni e Riedi Margreta Catrina, Rueras, remarca: Senilites, vegliadetgna: 88 onns; naschius 1773; maridau 1798 Maria Catrina Berther (1767-1860)*

*Nova Gasetta Romontscha nr. 1, 5 da schaner*

**1860**

### **Uauls**

Per ina emprova, che nos meinis cheu allegai selaschien tgunschamein exequir, alleghein nus igl exempla dalla vischnaunca da **Tujetsch**, che ha segiramein in dils megliers uordens forestals, ch'ei dat tier nus e nua ch'il quitau e l'energia dalla suprastanza spargna tut cumandar e dictar

dils bostgers. En quella vischnaunca vegn ei pagau per in lenn tochen 20 francs. Quels onns eis ei vegniu baghegiau leu in grond diember da stupents clavaus da crap e vid sias classenas vesan ins spirontamein lenna fendida enstagl lattas. Persuenter aber ei la cassa da vischnaunca en bien stan ed ils uauls serefan ch'igl ei in plascher.

*Nova Gasetta Romontscha nr.2, 1860*

## 1860

Questa jamna eis ei stau per la **Surselva** si marcadonts da vaccas tochen **Medel** e **Tujetsch**. Ei han cumprau si dabia tiers e pagau fetg bein. Vaccas danvons eis ei zuar fetg paucas, mo ils bials prezis caztgan da vender.

*Nova Gasetta Romontscha nr. 5, 4 da fevrer*

## 1860

Ils 23 d. q. eis ei serimnau a **Mustér** 22 amaturs d'aviuls, spirituals e seculars ord las vischnauncas da **Tujetsch**, **Mustér**, **Medel**, **Sumvitg** e **Trun** ed han concludiu da constituir ina societad per promover la cultivaziun d'aviuls. Sco president ei signur farrer Durgiai da **Sedrun** vegnius numnaus.

*Nova Gasetta Romontscha nr. 8, 25 da fevrer*

## 1860

Ugadai ein: Ils dus absents affons dad Alois Decurtins p. m., ugau: signur gerau Duri Venzin, omisdus da **Tujetsch**. Onna Maria Berther, feglia da Martin Felici p.m., ugau signur Giachen Antoni Giossi, era da **Tujetsch**.

*Nova Gasetta Romontscha nr. 8, 25 da fevrer*

## 1860

Il fevrer ei vargaus e satraus. El ei buca mo staus pli liungs ch'igl ordinari sonder era pli ruhs. El ha entschiet cun cufla ed ha ballistrau tochen il davos di. Gie, bia casas e clavaus vessen negin tetg pli, sche quel fuss buca staus fermaus giu entras ina brava neiv. El ha fatg siu duer cumpleinamein e tonaton parev'ei ch'el lessi aunc far bien ils davos dis, sch'el vess giu schau muncar enzatgei. Da plirs mauns aud'ins da sgarscheivels suffels dils 27 e 28. Enta **Medel** ha el buca mo rut en l'escha e bess las grundas da tetgs-slondas pli lunsch, sonder perfin ruinau ina grunda da tetg cun plattas. .... Calonda mars ha purtau stupenta serenezia da 4 grads calira e favugh.

*Nova Gasetta Romontscha nr. 3, 3 da mars*

## 1860

Essend ch'il secretari ella canzlia cantunala, signur Cristian Muggli da **Tujetsch**, ei morts il fevrer vargau, sch'ei sia plazza scretta ora el Fegl Ufficial. .... *Il cüdisch da mortoris noda: 20-02-1860 D. assistentes Gion Cristian Muggli, fegl da statalter Martin e Degonda Maria Cristina, Rueras, 38 onns.*

*Nova Gasetta Romontscha nr. 10, 10 da mars*

## 1860

### Clom da quens

L'absenta Cristgina Andriuet da **Selva**, ugau gerau Gion Andriu Berther, fegl, era da **Tujetsch**.

*Nova Gasetta Romontscha nr. 16, 21 da mars*

## 1860

Ugadai ein: ... Giachen Mudest Deragisch, ugau gerau Lucas Cavegn, omisdus da **Tujetsch**.

*Nova Gasetta Romontscha nr. 23, 9 da zercladur*

## 1860

Ils 12 e 13 d. q. ei stada la fiera d'**Ursera**. Cumpraders eis ei stau zun negins auters che Uranès. Sin las vaccas ha nossa glieud gudignau pauc. Era cun las nuorsas han ei fatg pintgas

fatschentas, schegie ch'ins sa dir che 22 – 23 frs. il pèr seigi pagau pial e quagl dallas nuorsas, sche han ils marcadonts gudignau nuot. Il pli fetg eran ils cavals tschercai. In da **Tujetsch** dueigi ver vendiu in cavagl da siu tratg per 35 marenghins, per da nos cavals in prezi maisudiu. A tscheins per treis meins prendevien ei si cavals per 30 – 35 talers. – Ils 19 ei la fiera da **Tujetsch**, la davosa tier nus avon cargar ad alp.

*Nova Gasetta Romontscha nr. 24, 16 da zercladur*

#### 1860

Questa jamna ei vegniu satrau a **Tujetsch** ina femna da 94 onns e 3 meins. Ella gudeva tochen il davos buna sanadad corporala e bien appetit, era aber totalmein sespiarsa dil spért e mava fetg en fanzegna. Veva ella per exempl gentau bravamein, sch'era ella suenter in'ura puspei el stan da dumandar il gentar e sesmarvegliava, cura ch'ins scheva ch'ella hagi schon gentau. Essend siu um morts quest unviern, vegn ei in temps suenter fatg ad ella la damonda dad ina femna jastra, sche siu um seigi morts ed ella rispunda sissu: "Po schon esser, ch'el seigi morts." *Il cudisch da morts noda: 29-6-1860 Maria Catrina Berther, feglia da Gion Giachen e Berther Maria Elisabeth, Rueras, remarca: senilites, 93 onns,*  
*Nova Gasetta Romontscha nr. 27, 6 da fenadur*

#### 1860

Il fenadur ei staus in ruh gast, pli adattaus pigl unviern che per la stad. In'alp da **Tujetsch** ei vegnida cargada da s. Giachen, *ils 25 da fenadur*, ed ha ils emprems otg dis mintga damaun giu la neiv el stavel. Fein vess ei dau pli bia che quei ch'ins manegiava, mo igl ei gleiti da temer ch'el fetschi catschar pauc latg igl unviern.

*Nova Gasetta Romontscha, nr. 31, ils 4 d'uost*

#### 1860

Il pugn da recapitulaziun pervia da sminuir il temps dalla catscha sin camutschs ei ella **Cadi** vegnius enviaus anavos cun in grond pli e zuar a **Tujetsch**, **Medel** e **Trun** unanimamein. Ils catschadurs ein sedustai sco liuns e declarau per ina malgiustia da vuler scursanir ad els il temps da catscha per schar vegnir neu ils Tudestgs e Taliens e sittar naven nos camutschs. Ins vesa denton con necessari ch'igl ei da s'entelgir cun nossas vischinontas tiaras sur dad ina generala fermada dalla catscha per enzacons onns.

*Nova Gasetta Romontscha nr. 31, 4 d'uost*

#### 1860

Ugadai ein: ... Ils dus absents Alois e Gion Antoni Gieriet, ugau gerau Duri Venzin, tuts da **Tujetsch**.

*Nova Gasetta Romontscha nr. 31, 4 d'uost*

#### 1860

La gronda malaura dils 17 d.q. ha caschunau gronds donns ella **Cadi** ed egl **Uri**. Sil **Lucmagn** ein treis armauls vegni pella veta, denter auter ei in bov vegnius menaus leu dil **Rein** giu e satraus enzanua en ina buola. Las punts da **Perdomat** e **Surrein-Sumvitg** ein dadas pell'aua ora. A **Sedrun** savevan ei buca qual'ura ch'il **Run** menassi naven ils morts en santeri.

*Nova Gasetta Romontscha nr. 34, 25 d'uost*

#### 1860

Ina vegetaziun mai sudida! Ins temeva schon ch'il fein, ch'ins ha mess en uonn pudessi selevagar, mo dil sequent cass daventaus en **Tujetsch** vess negin semiau. Sin tut ils ladretschs dil **Dulezi** eis ei carschiu ord il fein bulius (parisols) dua, trei detta liungs! Il fein era suren ell'altezia d'ina mesas quarta tut bletschs e marschs.

*Nova Gasetta Romontscha, nr. 37, ils 15 da settember*

**1860**

... Las auas ein carschidas, cunzun ils reins da **Tujetsch** e d'Acletta. ...

*Nova Gasetta Romontscha nr. 39, 29 da settember*

**1860**

Per quella gada han ei aunc segidau cun brevs, che han lu mess ella **Cadi** en grond moviment ils marcadonts dalla secunda classa; perfin Tudestgs ein vegni neu da **Ursera** e han cumprau si stiarls a **Tujetsch** e **Medel**. ...

*Nova Gasetta Romontscha nr. 40, 6 d'october*

**1860**

Tenor novas metereologicas da **Medel** eis ei stau leu 8 grads ferdaglia ed oz 8 zolls neiv, mo per ventira fan ils selvadis da **Medel** e **Tujetsch**, inaga ch'il temps ei neutier, buca aschi ditg baselimann culs fretgs, sco ils da **Mustér**.

*Nova Gasetta Romontscha nr. 42, 18 d'october*

**1860**

L'elecziun dil cusseglier naziunal ha dau ella **Cadi** sequent resultat:

**Tujetsch:** 136 votants      per Latour 14;      Toggenburg: 122;      Vieli: 0

...

*Nova Gasetta Romontscha nr. 44, 1 da november*

**1860**

**Clom da quens**

Agl absent Giachen Martin Deflorin, fegl da Giachen Plazi, eis ei dau assistent ella persuna da statalter Vigieli Jagmet da **Sedrun**, omisdus da **Sedrun**. Per Giachen Plazi Deflorin da **Sedrun** ei gerau Duri Venzin da **Rueras** numnaus sco assistent.

*Nova Gasetta Romontscha nr. 48, 11 da december*

**1860**

Posterioramein remarchein nus ch'ei seigi quest atun tras Tuatschiners vegniu catschau en duas gadas circa 130 vaccas sursilvanas ella **Baviera Bassa**. Schon avon in per onns vevan ei catschau giu leu dabia vaccas ord la **Partsura**, ils cumpraders ein fetg cuntents da quellas e laudan ch'ellas dettien bia latg inaga ch'ellas hagien tuchiau il strom grischun.

*Nova Gasetta Romontscha nr. 49, 8 da december*

**1860**

Il resultat definitiv dalla votaziun sul pugn da recapitulaziun ariguard la viafier e las vias da communicaziun ei a nus aunc buc enconuschents, mo carteivel vegn el ad esser acceptaus tras la maioritad dils votants. ... Ella **Cadi** han **Medel**, **Mustér**, **Sumvitg**, **Breil** e **Schlans** acceptau el, **Tujetsch** (muort il manteniment) e **Trun** refusau. En tut en quei circuit 484 vuschs persuenter e 187 encunter.

*Nova Gasetta Romontscha, nr. 50, ils 15 da december*

**1860**

**Cadi.** Ugadai ein: Statalter Gion Rest Monn ei ugau da Gion Antoni Deflorin, omisdus da **Tujetsch**.

*Nova Gasetta Romontscha, nr. 51, ils 22 da december*

**1861**

Ord la dumbraziun dalla populaziun grischuna. **Cadi.**

	casas	casadas	habitonts	umens	femnas	burgheis
<b>Tujetsch</b>	132	206	863	417	446	827

*Nova Gasetta Romontscha, nr. 1, ils 5 da schaner*

## 1861

El novissim temps eis ei vegniu alla glisch in project per ina fusiun dallas rivalisontas viasfier sul **Gottard** e **Lucmagn**. Tenor quel duessen ins menar la viafier alpina naven dil **Lag da Lucerna** tochen sur **Amsteg**, da leu ella **Val Maderana** e tras in tunnel da 7-8 kilometers, circa in'ura e mesa, sut il **Pass Krüzli** a **Sedrun** e da leu sul **Pass Lucmagn**. Sin quella moda savessi ins unir la **Svizra Meridiunala** e **Centrala** cull'**Italia** tras ina viafier che custassi 14 millioni pli pauc che quella sul **Gottard**. Ei para ch'ils Tuatschins, che vulan „nuet“ survegnan tut: la via sul **Cuolm d'Ursera** e la viafier cun in stupent „bahnhof“ el **Plaun Sedrun**.

*Gasetta Romontscha 1861, nr. 1*

## 1861

### Tscho ei nairas

Ina gasetta raquenta, tge la regenza vagi era tarmess tier a nossa vischnaunca in formular per far suittascriver da surprender l'expropriaziun dil sulom ed il manteniment dalla via ad **Ursera**. Ella segirescha che quei seigi per nus bluttamain ina formalitad, per raschun che nus hagien schon duas gadas suittascret claramain e nuncondiziunadamain da surprender il manteniment tochen sil cuolm e di alla fin: "Quei ei lu uschè!"

Bien, sche quei ei aschia, sche drov'ei buca da suittascriver quater gadas la medema caussa; ins laschi cun quei che ei schon suittascret, ni ei quei buc avunda?? Al gasettist cussegliassen nus da far suittascriver igl emprem a **Bern** ils 12 tschien melli francs, ch'el maniava da ver enta pugn, suenter duei el vegnir tiels da **Mustér** e pér il davos tiels Tuatschiners, che han fatg nuot e teman nuot. Capeschas. Denton nuota per mal.

**Tujetsch** a **Sumsassi**, nua che las uolps dattan ina l'autra la buna notg

Giachen dallas Stgellas

*Nova Gasetta Romontscha, nr. 1, ils 5 da schaner*

## 1861

### Publicaziuns

Tiers jasters.

La suittascreta suprastonza fa cheutras enconuschent ch'ella vischnaunca da **Tujetsch** sesanflien ils sequents tiers jasters:

- 1) Ina ansola che ha tagliau giudasum l'ureglia dretga e duas furclettes davos en ella senistra.
- 2) Ina ansola nera che ha dus snezs davos en ella dretga.

3) Ina ansola che ha ina furcletta ora sum l'ureglia dretga ed in snez davos en ella senistra.

En termin da 15 dis ein ils proprietaris da quels tiers supplicai da vegnir e retscheiver quels en lur mauns.

**Tujetsch**, ils 30 da schaner 1861

J. A. Berther, gerau

*Nova Gasetta Romontscha, nr. 5, ils 2 da fevrer*

## 1861

### Clom da quens

Giachen Plazi Deflorin da **Sedrun**, ugau gerau Duri Venzin a **Rueras**.

*Nova Gasetta Romontscha, nr. 5, ils 2 da fevrer*

## 1861

Dumbrada dalla biestga ella **Cadi**:

	<b>Tujetsch</b>
Vaccas	401
Genetschas	191
Stiarlas e muias	72
Bos	-

Stiarls	236
Taurs	4
Vadials	190
Cavals	35
Cauras	1420
Nuorsas	1060
Pors	259

*Nova Gasetta Romontscha, nr. 6, ils 9 da fevrier*

### 1861

Sco igl ei enconuschenet ha il davos Cussegl Grond concludiu da mintg'onn applicar 4000 frs. vid premis a s.h. taurs per cheutras megliurar la razza armentiva. ... Per reparter ils premis che vegnan sin 50 – 120 frs. in, legia il Cussegl Pign ora ina cumissiun da treis experts. ... Il davos Fegl Ufficial cuntegn quellas nominas: ... pella **Cadi** ils signurs: mistral Jacob Casura a **Falera**, capitani Mucli a **Tujetsch** e gerau Pl. Derungs a **Breil**. ...

*Nova Gasetta Romontscha, nr. 7, ils 16 da fevrier*

### 1861

#### Sventiras

En **Tujetsch** seglian dus umens vid ina buora per retener ella. In carga cul maun, l'auter vul fitgar en la sigir e taglia giu dus dets agl emprem.

*Nova Gasetta Romontscha, nr. 8, ils 23 da fevrier*

### 1861

Gion Fidel, Giusep Antoni ed Onna Maria Peder, affons da Gion Martin Peder han ugau assistent Giachen Antoni Schmet, tuts da **Tujetsch**.

*Nova Gasetta Romontscha, nr. 9, ils 2 da mars*

### 1861

Tujetsch 149 votants.

*Nova Gasetta Romontscha, nr. 11, ils 14 da mars*

### 1861

Ella **Val Tujetsch** eis ei rut ora ina gronda emigraziun – aber mo denter la biestga armentiva. Per munconza da fein han ei leu stuiu tarmitter tschiens armauls pella **Cadi** giu “ell’ustria”. Il pli frequentau ei il grond hotel da **Laus**, nua ch’in brav pur ha vendiu fein per varga 800 frs. e zuar mo per 7 frs. il fiertel, ferton ch’ei vegn pagau en auters loghens tochen 10 frs. ... Malgrad tutta bun’aura va ei aunc in per gievgias avon ch’ils stiarls sappien pastgar en **Tujetsch**. Ei era leu avon 8 dis ina nevada da varga 10 quartas altezia, gie ina part pretendan ch’ei eri ual aschi bia neiv sco il matg 1858. Per ventira han neginas lavinas fatg donn. Denton san ils Tuatschiners seconsolar cul vegl proverbi: “Dad ina gronda nevada e numerusa casada duei negin sestermentar”.

*Nova Gasetta Romontscha, nr. 13, ils 30 da mars*

### 1861

Pertucccont ils bos. ... Ils da **Sursassiala** vessen pli bugen che l’urentada dils bos daventassi amiez liug dalla **Cadi**, a **Sumvitg**, buc a **Trun**. Tschelluisa ston ils bos da **Tujetsch** e **Medel** far in viadi da 5 uras, ch’ei per els in pregiudezi da trer premi.

*Nova Gasetta Romontscha, nr. 15, ils 13 d'avrel*

### 1861

Il Tagblatt cussegliia allas femnas da tener en honour la pera tosta, las sneclas e zuescas, essend ch’ei selaschi spitgar pauca puma uonn. Bia pumera veglien buca flurir ed il matg vegnien ils

laus a far grond donn vi dad ella. – Nus stuein denton remarcar, ch'il tscherscher da **Tujetsch** fetschi ina ludeivla excepziun, quel ei ussa decoraus cun tschereschas e zuar – tostas!  
*Nova Gasetta Romontscha, nr. 15, ils 20 d'avrel*

### 1861

Sco ei tuna ha il pievel dalla **Surselva** buca grond tschaffen da separticipar vid la viafier cun in milliun francs, schegie ch'el ha cun resalva da 5 vischnauncas giu offeriu 1853 da schenghegiar tut ils funs e pastiras, ch'il sulom dalla viafier drovi! Ferton che **Tujetsch** ha secartiu da nuot entrar en quella damonda, ha la vischnaunca da **Mustér** concludiu da prender aczias pellas pastiras, pil material ch'ella sa dar e pella indemnisiun dils donns ch'ella sco tala savess pigliar. Sco ins auda eis ei pliras vischnauncas che vulan far las medemas offertas.

*Nova Gasetta Romontscha, nr. 22, igl 1. da zercladur*

### 1861

Per il barschament dil marcau da **Glaruna**, l'emprema dumengia da matg 1861, ha la vischnaunca da **Tujetsch** dau 105 frs. en daner.

*Nova Gasetta Romontscha, nr. 23, ils 8 da zercladur*

### 1861

Fuss ei buca pli adattau da destinar la fiera da **Tujetsch** sin in di fix che da mintg'onn stuer leger el calender, ch'ella crodi 8 dis suenter quella dad **Ursera**, dalla quala negin sa cura ch'ella vegn tenida tochen ch'ella ei buca neutier? Era l'alteraziun da quella fiera denter **Sedrun** e **Rueras** savess calar si senza che la **Val Tujetsch** pitess cheutras il minim donn. Ins duei mirar sin la cunvegnientscha dils biars jasters che vegnan sin fiera e cheu sa scadin seperschuader che **Medel**, **Mustér** e **Sumvitg** furneschan pli bia glieud e tiers ch'ils Tudestgs e per quella raschun duess la fiera vegnir tenida a **Sedrun**. Tgei lessan ils Tuatschiners far encunter, sch'ils vischins da quellas treis vischnauncas declarassen, nus mein buca pli lunsch che **Sedrun**. Nus lessen lu uardar, nua che la gronda fiera vegeness tenida, schebein ils da **Rueras** vegnessen buc o **Sedrun**, ni silmeins tochen **Camischolas**, nua ch'ins vess ina pulita plazza-fiera, ustrias e caffès en abondonza. Denton veies nuota per mal vus da **Rueras**.

*Nova Gasetta Romontscha, nr. 23, ils 8 da zercladur*

### 1861

#### Avis

Ei vegn cheutras fatg da saver al respectiv publicum che la **fiera da Tujetsch** vegni tenida ils 18 d.q. a **Rueras**.

#### La suprastanza da **Tujetsch**

*Nova Gasetta Romontscha, nr. 23, ils 8 da zercladur*

### 1861

La fiera da **Tujetsch** ei stada frequentada ualti bein da glieud e tiers ed igl ei vegniu marcadau pli bia vaccas e cauras per pli bials prezis che la fiera da **Trun**. Tudestgs eis ei stau neu da biars ed ein turnai envi cun ina roscha cauras, mugias e da bia cavals pri si per tscheins. Els han cheu pagau meglier che sch'ins fuss ius leuora culs tiers. Al scribent che ha giu fatg tscheidi beinfundadas remarcas en nossa gasetta sur da quella fiera, stuein nus rapportar la legreivla nova, che siu giavisch pervia da tener inaga e per adina quella fiera a **Sedrun** vegni fetg probabel ademplius. Ils Romontschs eran malidis da stuer ir a catschergnond lur tiers en tutta calira pli lunsch che necessari. Ils Tudestgs han medemamein declarau, ch'els seigien fetg cuntents da vegnir a **Sedrun**. In Romontsch ha a nus expressivamein supplicau da notificar, ch'el hagi spendiu 4 frs. dapli cun ir pli lunsch e sper pli bia ustrias ora, che sch'el vessi stuiu ir mo tochen **Sedrun**. Sco ei vegn detg vulan ils da **Rueras** sez semussar generus e meriteivels pil publicum e sill'emprema vischnaunca voluntariamein resignar sin lur plazza-fiera.

*Nova Gasetta Romontscha, nr. 25, ils 22 da zercladur*

## 1861

A Sedrun ei il **Drun** da biars onns enneu mai staus aschi vehements sco quei di, numnadamein ils 13 d'uost 1861.

*Gasetta Romontscha, 1861, nr. 33*

## 1861

... Ils mises ni cuolms han dau bia fein ed ultra da quei han las vischnauncas sco **Tujetsch** e **Medel** fatg ina gronda quantitat fein a pastg, taluisa ch'ils avdonts da leu ston speronza igl unviern proxim buc ir ord vischnaunca cun lur muvels. Ei vegn quintau ch'in um pudevi far in fiertel fein a pastg a di e che sia schurnada pertavi aschia in taler.

*Nova Gasetta Romontscha, nr. 36, ils 6 da settember*

## 1861

Ils 22 d.q. ein nos marcadonts da **Tujetsch** e **Medel** semess sin via pella fiera da **Ligiaun** cun lur tiers cumprai si la primavera. Els han per ventira pintgas roschas e buca sefidau da comprar si enzatgei da num. Ils Glarunes ch'ein uonn stai s'entardai per 2 dis muort il sbagl dil calender culla fiera da **Glaruna**, han passau il **Lucmagn** ils 25 d. q. cun circa 400 tgaus, era cumprai si il bia la primavera.

Plirs famus marcadonts dalla **Cadi** prefereschan uonn da star a casa enstagl frequentar l'emperma fiera da **Ligiaun**. Ils mulissiers han aunc mai tarmess aschi schliatas novas sco uonn. In da quels ha giu secret, ch'ins dueigi nuota veginr uonn cun tiers, ni cun biars ni cun paucs. Speronza che la pintga catschada seigi empau scompa.

*Nova Gasetta Romontscha, nr. 39, ils 27 da settember*

## 1861

### Publicaziun

La ludeivla vischnaunca da **Tujetsch** tscherca in **spazzatgamin** sut fetg favoreivlas cundiziuns per el.

Da s'adressar tier la suprastonza.

*Nova Gasetta Romontscha, nr. 39, ils 27 da settember*

## 1861

La neiv dil davos settember ha tut anetgamein dau a nossa tiara gl'aspect d'unviern. Igl ei stau ina nevada da quei temps mai sudida da regurdientschas da glieud.

*Nova Gasetta Romontscha, nr. 40, ils 4 d'october*

## 1861

### Nuorsas jastras

Tiel suittascret sesanflan las suandontas nuorsas vanzadas ella zavrada da nossa vischnaunca da **Tujetsch**.

- 1) In alv che ha ell'ureglia dretga ina furcletta davos en ed aunc 3 strehs sil nas barschau.
- 2) Ina grischa, ella ureglia dretga ina furcletta ed in snez davon en ed in davos en, la seniastra tagliau giudasum e fess.
- 3) In alv, ella ureglia dretga in snez davos en, la seniastra duas ruosnas, ina ei aber fessa ora, ed aunc ella medema in snez davos en.
- 4) Ina furcletta orasum l'ureglia dretga ed in snez davos en, la seniastra ina furcletta orasum l'ureglia, era in alv.
- 5) Ina tgigisch alva, che ha ell'ureglia dretga dus snezs davos en, la seniastra tagliau giu mesa l'ureglia.
- 6) In ner grond che ha tagliau giudasum dall'ureglia dretga e dus snezs davos en.

Ils proprietaris dallas sura numnadas nuorsas san quellas prender tier sesez cun pagar las spesas idas si e quei tochen ils 12 d'october. Da leu naven veginr ellas a veginr vendidas.

**Tujetsch**, igl emprem d'october

Duri Wenzin, gerau

*Nova Gasetta Romontscha, nr. 40, ils 4 d'october*

## 1861

Nossa Wochenzitung setegn si sul pareri dalla cumissiun dil stan pervia dil manteniment dallas vias. Ella sa denter auter buca capir, co il cantun selaschi en da mantener il **Cuolm d'Ursera** schon naven da **Sedrun**. Mo nus savein capir aunc bia meins, cun tgei dretg ch'il cantun vul far pagar **Mustér e Tujetsch** l'entira expropriaziun ed el lu metter en sac las duas tiarzas che la Confederaziun paga da quella summa, sco da tuts auters cuosts che van si per quella via. Ei quei giustia e dueivladad?

*Nova Gasetta Romontscha, nr. 42, ils 19 d'october*

## 1861

### Clom da quens

Hans Giachen Berther da **Tujetsch** ei en concuors; ugaus da massa ein: assistent Giachen Antoni Schmet (giuven) e Tumaisch Huonder, omisdus da **Tujetsch**.

*Nova Gasetta Romontscha, nr. 43, ils 25 d'october*

## 1861

Il november 1861 figurescha **Tujetsch** cun ina facultad da 941 300 frs. ... Cun dar en igl avanzament da quels 5 onns eis ei generalmein iu vess tier, tuttina dat ei bravs purs a **Tujetsch** e **Medel** che han en quels onns recaltgau lur facultad per 4 – 10'000 frs. Respect da tals casarins!

*Nova Gasetta Romontscha, nr. 44, igl 1. da november*

## 1861

La projectada via sul **Cuolm d'Ursera** vegn da miez october enneu stagiada giu e prida si da plirs inschigniers sut direcziun da signur Depuoz; ella survegn ina munta da 5 procent.

*Nova Gasetta Romontscha, nr. 44, igl 1. da november*

## 1861

### Clom da quens

Ils quens da Greta Catrina Caduff da **Tujetsch** ein da dar en a siu ugau scarvon Benedetg Rothmund a **Schlans**.

*Nova Gasetta Romontscha, nr. 46, ils 16 da november*

## 1861

La nova via sul **Cuolm d'Ursera** vegn naven dil vitg da **Mustér** tochen sils cunfins d'**Uri** 20'926 meters liunga ni 4 uras e 20 minutias. Da **Tschamut** munta ella sil cuolm mo cun 8 procent.

*Nova Gasetta Romontscha, nr. 46, ils 22 da november*

## 1861

In per plaids a **Mustér e Tujetsch** ariguard la via sull'**Alpsu**.

Silla fin december sto nossa Regenza declarar al Cussegl Federal, schebein nus laien surprender da baghegiar la via sull'**Alpsu** ni **Cuolm d'Ursera** encunter ina bonificaziun federala da 200'000 frs. Nies Cussegl Grond ha da sia vart acceptau quella generusa offerta e per levgiar ed animar las vischnauncas da **Mustér e Tujetsch**, ha el aunc concludiu, che quella nova via dueigi en sia entira extensiun dil vitg da **Mustér** tochen sils cunfins d'**Uri** vegnir mantenida dil cantun anora. Essend che quei cuolm sto buca vegnir tenius aviarts gl'unviern, sche han las duas vischnauncas mo da menar la galera, che vegn preparada e bess ora sin quen cantunal. Il manteniment dalla via – la pli gronda grevezia – ei aschia prida giu ad ella ed ei resta mo aunc l'expropriaziun, quei ei il pagament pils beins, ch'ins drova tiel sulom dalla via. Ellas han ussa en cuort da rispunder al ludeivel Cussegl Pign, sche era elllas veglien da lur vart ir en la cunvenziun ni buc.

Aunc buca daditg vegneva ei insinuau da far surprender **Mustér e Tujetsch** duas grevezias: L'expropriaziun ed il manteniment. Sut quellas condiziuns vessen nus buca saviu cussegliar da retscheiver la via, dapi aber che la pli greva condiziun ei curdada naven, essan nus decisivamein per l'acceptaziun da quella biala offerta.

Ei sedamonda ussa mo: *Vus da Mustér e Tujetsch leis surprender l'expropriaziun, sch'ei vegn*

*baghegiau e mantenui a Vus ina stupenta via che porscha a Vus ina tut pli avantagiusa communicaziun denter Vossas duas vischnauncas e la Svizra Interiura?* Sch'ins ponderscha ils avantatgs ch'in stradun porta als vivents ed allas suandontas generaziuns: **gie**. En mintga cass ponderei e turnei a ponderar avon che dir na, pertgei quella favoreivla occasiun vegn forsa mai a turnar pli e gronda ei en quei risguard Vossa responsabladad visavi a vos vognentsuenter.

...

Vus da **Tujetsch** aber che smuldis ton sulla schliata via sil territori dils da **Mustér** e smanatscheis da tgisar els alla Regenza, patertgei ch'ei seigi il mument da survegnir ina oreifra via. Patertgei ch'il cantun stoppi baghegiar e mantener las punts e vias sur vos prigulus druns e vegni perquei ad encuirir da tener quels empau meglier a frein, duront ch'els smanatschan ussa d'ir cun vossa baselgia e vos morts. Vus che scheis adina, che vus survegnessies ad **Ursera** la rauba bia pli bienmarcau ch'ensi, sch'ei custassi mo buca ton da purtar neu. Bien, quellaga vegn ei fatg a vus ina via che vus saveis menar neu ella cun pintga spesa. Co sa l'expropriaziun tementar giu vus che saveis dar ora pastira per in grond capital e senza pregiudezi. Contas muschnas vegnan a vegnir schubergiadas giud ils praus denter **Mustér** e **Tschamut**; tgei reha resursa da fadigias arva la construcziun dalla via nova?

Visavi aschi considerabels avantatgs svanescha la summa da 30 – 40'000 frs. che l'expropriaziun po custar a **Mustér** e **Tujetsch**. Quella tucca ei da pagar mo inaga, ferton ch'ils avantatgs cuozan adina. Meditei madiramein la caussa senza piissiuns e pregiudezis, patertgei buca mo vi da vus, sonder era vid vos affons, beadis e sutbeadis; reflectei che l'entira **Surselva** giavischia l'avertura dil **Cuolm d'Ursera** e seigi spanegiada sin vossa decisio e prendei lu vossas conclusiuns vengonzas ad in liber e savieivel pievel.

Sco ins auda duei il niev prelat *avat* da **Mustér** esser fetg importaus per la via dall'**Alpsu** e la claustra prompta da purtar tuttas dueivlas unfrendas.

*Gasetta Romontscha, nr. 48, ils 29 da november*

## 1861

La via sill'**Alpsu** avon la vischnaunca a **Mustér** e **Tujetsch**.

Allegrai tras il bien success a **Mustér** ein ils signurs cumissaris aunc il medem di serendi a Tujetsch. Essend pli datier dils glatschers e la contrada, priu ora las suleglivas spundas da **Sedrun** e **Camischolas**, aunc cuvretgas cun neiv, han ei gleiti sentiu ch'ei seigi cheu in pli ruh clima che a **Mustér** e ch'ei drovi perquei gronda forza per sgarglientar ils pregiudezis e che lur vuschs vegnien bia pli tgunsch raucas che quellas dils Tuatschins. Gliendisdis – nua che l'entira val ei vegnida inundada da bulletins che purtavan igl unanim conclus da **Mustér** ed il plaid da monsignur avat, - eis ei vegniu tier fermas debattas en repetidas conferenzas. Ferton che plirs respectai vischins han cheu plidau e luvrau en favor dalla via ed in per fin offeriu da garegiar negina indemnisiun pils orts ni funs che quella prendi naven ad els, era ei denteren da quels che levan saver nuot dil grond schenghetg ch'ins offereva ad els. Il success era aunc dubius e buca senza tema e passadetgna han ils signurs delegai spitgau silla vischnaunca fixada sin s. Leci, 2 da december.

Igl impurtont e decisiv mument ei arrivaus. Ils umens da **Tujetsch** ein serimnai sin publica plazza, serrada en dil prigulus **Drun**, dalla periclitada baselgia cun santeri, dalla casa da scola e dalla via imperiala ed ual en fatscha al bi **Cuolm d'Ursera** – tut facturs che plidavan cun aulta vusch en favor dalla via. Dentuorn era ei plirs vischins da **Mustér**, ch'eran oz ual aschi plein marveglias sco las feglas dad Eva che formavan in bi rudi entuorn la radunanza. Il president arva la vischnaunca cun relatar l'impurtonta questiun pella quala ei retracti oz e cun recumandar ruaus e prudentscha, senza aber cheutras vuler pregiudicar il liber votum. Sin formala invitaziun dalla vischnaunca cumparan ils cumissaris dalla regenza, dalla **Surselva** e dalla **Cadi** enamiez il pievel, buca senza grevadetgna che lur aulta missiun vegni oz buc a reussir. Il cumissari guvernativ, signur Latour pren il plaid. El fa attents il pievel sil legreivel resultat a **Mustér**, co il niev monsignur avat hagi leu cooperau cun el, tgei la harmonia denter spiritual e secular vegli dir, el vegni a far il pusseivel pil manteniment da quella e dalla claustra. El hagi cheu encounter era speronza che **Tujetsch** vegni oz tras siu conclus a consolidar quella biala harmonia. Il Cussegli Grond hagi fatg tut pusseivel per levgiar la vischnaunca da **Tujetsch** cun prender giu il manteniment. El alleghescha ils gronds avantatgs che la via sull'**Alpsu** porti

e per ton pli tgunsch gudignar il pievel per quella idea lai igl oratur aunc leger avon il plaid da monsignur avat.

Tut nunspitgadamein e senza ch'enzatgi a **Mustér** e **Tujetsch** vessi saviu, arriva cheu monsignur avat, *Paul Birker (1861-1877)* el vitg da **Sedrun**. Ina honorifica deputaziun envida en el da prender part dalla deliberaziun. Sia cumparsa e siu discuors han fatg buna impressiun: „Jeu vevel questa damaun negin ruaus a **Mustér**,“ di el denter auter, „tochen che jeu sun buca seresolvius da vegrir tier Vus en Vossas bialas muntognas e da dir a Vus ch'ei retracti cheu d'ina impurtonta questiun per quella vallada.“ El fa attents sin lur responsabladad visavi agl avegnir e di lu, ch'el vegli aunc dir in per plaids en romontsch, essend ch'ils biars capeschien buca siu lungatg. „Jeu prendel la libertad da vegrir tier Vus e supplicar Vus, da ariguard il generalbeinstar purtar ina unfrenda pella realisaziun dalla projectada via. Il tschiel benedeschi vus persuenter!“

Il plevon ed il conventional che veva accumpaignau gl'avat, sustegnan ils plaids da quel e sin quei plaidan ditg e bein signur cusseglier naziunal Toggenburg e bundsstatalter Seeli. Els fan attents che las vischnauncas da sut hagien suttascret da surprender il manteniment e la expropriaziun sin lur territori mo cun la speranza, che ils cuolms vegrinen aviarts. Il mument seigi ussa cheu ed ins spetgi che **Tujetsch** vegrni buc a resister al general giavisch – **Tujetsch** che hagi quels onns tras sias bialas reparaziuns da vias mussau, ch'el sappi prezziar tgei ch'ina buna comunicaziun vegli dir. Suenter ch'il signur president dalla **Cadi** ha aunc giu fatg attents sillas ligiontas cunvenziuns, vegrnan ils ufficials dalla vischnaunca dumandai si per lur meinis. Gl'emprem gerau, *Hans Giachen Beer, Gonda*, e secund gerau, *Gion Andriu Berther, Camischolas (1805 - 1887)*, recamondan al pievel da prender si la via; il tierz, *statalter Duri Venzin, Rueras*, – gl'um dalla buorsa – vul saver nuot da quella. Ils purs dueien mirar bein tgei ch'ei fetschien, las taglias seigien schon ussa grevas e vegrinen tras la via nova a vegrir nunsupportablas, il sulegl, che seigi oz levaus bials, pudessi ir giu stgirs. Quels plaids han dau anim all'opposiziun che seregheliava pir che mai. Mo suenter quei fegl dat siu bab, *statalter Paul Wenzin, Rueras*, giu il meini – in respectau um da 68 onns – „Jeu sun pella via, mo buca tonta tema per quei deivet, ei va schon, mo curascha, curascha ed uniun!“

Quels plaids ein pli u meins vegrni susteni dils suandonts votums, priu ora in ex-gerau, che ha bugen ses meinis aparti. Suenter ditg haver plidau vi e neu e segirau ch'ins vegrni a far tut pusseivel per vegrir culla via giu el vitg da **Rueras**, vegrni ei finalmein priu si il pli – circa duas tiarzas han votau pella via ed ina tiarza encunter. Deplorabel eis ei stau d'observar ch'ils mats che han il pli grond avantatg dalla via, eran fetg biars encunter e remarcabel ch'era las bia femnas, che van tschelluisa buca nuidis per las vias, eran cun peis e mauns encunter la via, gie ina feglia ha cun sia malaveglia declarau da buca dar tscheina al bab che veva plidau en favur dalla via. – Speranza che quellas antipatias vegrnan tuttas a svanir cul temps.

*Nova Gasetta Romontscha, nr. 49, ils 6 da december*

## 1861

Sco ins auda ei la fiera da s. Andriu, *dils 30 da november*, a Ligiaun buc ida bein. Ei seigi stau fetg bia tiers, mo vegrni vendiu pauc, perquei han plirs stuiu vargar giu. Tuttina han dus stiarls da **Tujetsch**, ils pli bials ch'ein i sul **Lucmagn**, in favega 7 quartas en massa m.v. pagau 8 dublas in sur tuttas spesas.

*Nova Gasetta Romontscha, nr. 49, ils 6 da december*

## 1861

### Clom da quens

Vigieli Josef Walier da **Tujetsch (Bugnei)** lai ir scussiun. Tut ses quens ein da dar en agl ugau da massa assistent Giachen Antoni Schmet da **Tujetsch**.

*Nova Gasetta Romontscha, nr. 50, ils 14 da december*

## 1861

Havend in marcadont da **Tujetsch** ed in da **Medel** instradau la jamna targada ina roscha vaccas da maz per passar il **Lucmagn**, han ei dadens **Varghera**, il cuolm denter **Mustér** e **Medel**, schau ir surengiu duas da quellas, ina ei stada ventschida cun inaga, l'autra han ins

l'auter di stuiu far giu. Il miserabel pass denter **Mustér** e **Medel** ha schon laguttiu bia unfrendas ed igl ei bien ch'igl onn 1864 ei gleiti neutier, nua ch'ei sto vegnir baghegiau ina viafier sul **Lucmagn** ni in stradun che vegn baghegiaus e mantenius sin quen cantunal. L'expropriaziun vegn cheu franc buc a dar tontas difficultads sco igl ei il cass tiel **Cuolm d'Ursera**.

*Nova Gasetta Romontscha, nr. 51, ils 20 da december*

## 1861

Las petiziuns da **Mustér** e **Tujetsch** pervia dalla direcziun dalla via ein surdadas al signur capoinschignier per schar dar in pareri.

*Nova Gasetta Romontscha, nr. 52, ils 24 da december*

## 1862

---

Culla vegnida dil tscheiver ha era gl'unviern vuliu dar in segn da veta. La cufla dils 6 da schaner ha interrutt il regular cuors da posta ed era enviau bia cauras en nuegl, ch'eran digl atun naven manidas ora. En **Tujetsch** eran ils bufs schi stermentus ch'els han pudiu fierer entuorn femnas, per ventira pertavan ellas neginas crinolinas, tschelluisa havess ei pudiu dar tut pli grondas sventiras.

*Nova Gasetta Romontscha, nr. 2, ils 6 da schaner*

## 1862

### Publicaziun

Ei vegn cheutras fatg da saver ad in ludeivel publicum ch'ei vegni ils 15 dil meins current mess egl ingant a **Rueras** la casa, ils funs e baghetg, sco era igl entir mobiliar digl ustier Hans Giachen Berther. Tuts che han plascher d'in ni l'auter da quels effects, ein evidai en da cumparer sin quei di a **Rueras**.

**Tujetsch**, ils 4 da schaner 1862

La cumissiun pella liquidaziun da massa

*Nova Gasetta Romontscha, nr. 2, ils 6 da schaner*

## 1862

### Tiers jasters a **Tujetsch**

1. In'ansola alva fess l'ureglia dretga ed in snez davon en.
- 2-5. Treis ansolas ed in buc culla sequenta noda: fess l'ureglia dretga e dus snezs davos en.
6. In'ansola nera, l'ureglia dretga tagliau giudsum e fess anenagiu, dapli en mintga ureglia in snez davos en entraviers.
7. Ina nuorsa nera buca tundida, ell'ureglia dretga orasum in dent-resgia ed in snez davos en, ed ella seniastra ina furcetta orasum l'ureglia.

Ils proprietaris da quels tiers, dueien s'addressar tier signur gerau Duri Venzin a **Rueras**.

*Nova Gasetta Romontscha, nr. 2, ils 6 da schaner*

## 1862

Tenor novas d'ina gasetta dall'America, dil „Wahrheitsfreund“, ei ils 27 da schaner spartius el Segner igl aultreveriu pader Lucas Cavegn, gesuit, el marcau **Buffalo ell'America**. Tuts catolicks da quei grond marcau, cunzun la vischnaunca da s. Michael, fundatur dalla quala el ei staus, condoleschan zun fetg la sperdita da lur carezau pastur. El rauassi en pasch. – Pader Lucas Cavegn ei naschius a **Tujetsch** igl onn 1806 ed igl onn 1830 intraus egl uorden dils Gesuits, nua ch'el ha operau gl'emprem el cantun **Sviz** e lura el cantun **Valeis** cun gronda premura ed era perquei zun carezaus. Igl onn 1847 eis el vegnius tarmess ell'America sco missiunari, ha operau leu cun premura quater onns en **Canada Su** ed igl auter temps eis el sin desideri digl uestg staus a **Buffalo** sco missiunari. Cheu ein duas bialas baselgias (s. Michael e s. Onna) sco permanents mussaments da sia premura apostolica.

*Nova Gasetta Romontscha, nr. 11, ils 14 da mars*

## 1862

### Cadi

Tuts quens dil defunct sechelmeister Gion Antoni Wenzin da **Tujetsch** ein da dar en ad assistent Giachen Antoni Schmet da leu.

*Nova Gasetta Romontscha, nr. 11, ils 14 da mars*

## 1862

Ugadai ein ils quater affons da Hans Giachen Berther: Hans Giachen, Gion Antoni, Maria Liberata e Barla Catrina ella persuna da Gion Antoni Schmet, tuts da **Tujetsch**.

*Nova Gasetta Romontscha, nr. 16, ils 18 d'avrel*

## 1862

Ils vischins da **Rueras** – la residenza dils vegls diplomats tuatschins – ein era malcuntents che la via mondi sul vitg ora. Sin lur instanza ha la vischnaunca da **Tujetsch** medemamein concludiu da far da quellas varts novs pass tier las autoritads. Ella ha semussau aber pli mala e pli carina ch'ils da **Mustér**; ella vul ch'ei vegni midau giu quella direcziun senza che la cumissiun vegni sin in'uatga e caschunassi considerabels cuosts alla vischnaunca. Ch'ei va vess da vegrin ora culla buorsa per da quels fatgs, ei da capir, denton manegein nus, ch'ils Tuatschins vegrinien ad envidar en tier els la cumissiun dil stan, inaga ch'ella ei tochen a **Mustér**, per schar ver quels signurs lur stupenta vallada e schigiar lur gustus magnuc caura e lur famus mèl alpin. Ne betg? Gie, lu pon las bialas da **Rueras** sefar si e clamar tier a quels signurs sisum il vitg: „Vegrin giu tscho, tscho ei nairas!“ Nus agurein bien success e ventira als da **Rueras**, mo ei para bunamein sco sch'ei smanatschass in castigt ad els, perquei ch'els han vertiu da schar metter maun vid il venerabel monument da lur renomau convischin, dil fundatur dalla Ligia Grischa, Pierer de Putnengia, e schau menar si nuegls e clavaus cul material da quella respectabla antiquitad.

*Nova Gasetta Romontscha, nr. 17, ils 25 d'avrel*

## 1862

Ils da **Rueras** eran vegni cuntentai tras ina nova lingia e levan perquei schar quels signurs mo als da **Mustér**.

*Nova Gasetta Romontscha, nr. 19, ils 9 da matg*

## 1862

Gliendisdis eis ei succediu a **Selva** in trest cass. In mat carschiu ch'ei avon entgins onns vegnius menaus anavos ord la **Germania** sco in stuorn, e semussava era a casa beinduras sco tal, schegie ch'el saveva leu luvrar dis ora sco in um da giudezi, ha mazzau siu agen frar – in affon en tgina, ch'el veva tschelluisa il pli bugen da tuts ils auters fargliuns. Suenter haver fatg ora lenna, fa el dar la mumma ina cut per mular la sigir, lu va el en stiva, nua ch'ei era negin perpeis, priu ora in affon en tgina che durmeva. Cun siu uaffen mulau dat el a quel in terribel tagl tral culiez, che quel sto esser morts agradiju. Il stuorn tuorna lu ora tiella mumma cun ina fatscha pleina suadetsch e di ad ella, ch'ella dueigi i en stiva e mirar co il pop mieri. La mumma va dabot ed ins po cumprender cun tgei dolorus sentiment ch'ella anfla siu carin affon en ina sanganada. Sin siu grir e bargir dat ei neutier glieud, il stuorn vegrin ligiaus e serraus en. El lai far quei senza sedustar e sillia damonda, pertgei ch'el hagi commess quei terribel mazzament, rispunda el cun saung freid: „Sinaquei ch'il car frar vegni enta parvis e daventi buc in schliet prè, sco quei che jeu sun.“ Dus umens ein silsuenter vegni cun el a **Mustér** en casa cumin. Schigleiti sco el vesa leu il schendarm di el a quel: „Jeu vess cheu dus umens da schar metter en perschun.“ – Quei deplorabel schabetsch ei in serius avis, ch'ins dueigi haver precauziun cun glieud stuorna. *Cudisch da morts sut il datum dils 5 da matg 1862: Vigeli Venzin, 1 onn, da statalter Giachen Fidel Venzin e Maria Monica Condrau; remarca: necatus a fratre suo fatuo.*

*Nova Gasetta Romontscha, nr. 19, ils 9 da matg 1862*

## 1862

### Alp da cavals

La vischnaunca da **Tujetsch** pren si la stad 5 cavals jasters sin pastira u alp da cavals. Pella jarva vegrin ei pagau 20 frs. per cavagl e lu aunc ina indemnisiun pil pustretsch edauter. Tgi che vul tarmetter cheu cavals, duei schar saver sigl emprem da zercladur.

## La suprastonza da Tujetsch

*Nova Gasetta Romontscha, nr. 21, ils 25 da matg*

**1862**

### Via principala

Finalmein ei la via sul **Cuolm d'Ursera** scretta ora cun quella sulla **Bernina**. Quei che vegn baghegiau uonn, ei partiu en duas secziuns, l'emprema dil vitg **Mustér** tochen sils cunfins da quella vischnaunca, ina lunghezia da 6400 meters ni 21'333 peis svizzers. La secunda secziun va dils cunfins da **Tujetsch** tochen en **S. Brida**, dador **Selva**, 6500 meters, ni 21'800 peis. Tochen ils 10 da zercladur ston quels, ch'han tschaffen da surprender da baghegiar quella via dar en lur offertas al signur capoinschignier Salis.

*Nova Gasetta Romontscha nr. 22, 29 da matg 1862*

**1862**

### La fiera da Tujetsch

vegn tenida gievgia, ils 12 da zercladur a **Sedrun**

La suprastonza

*Nova Gasetta Romontscha nr. 23, ils 7 da zercladur*

**1862**

La malsogna bestiala dils peis e dalla bucca ei ussa era rutta ora a **Selva** e perquei ha **Uri** serraу encunter **Tujetsch**, il qual ei in grond donn per l'entira **Cadi** e fa ir en nuot la fiera da **Tujetsch**, nua ch'ei vegneva tschelluisa cumprau si bia tiers dils Tudestgs. ... Cun ina part vegn ei meglier en 4 – 5 dis, cun auters pér en 8 – 10 dis. Las vaccas dattan pauc e schliet latg. Denton eis ei tuttina meglier che la malsogna grasseschi ussa e buca per d'atun.

*Nova Gasetta Romontscha nr. 22, ils 13 da zercladur*

**1862**

### Via Alpu

... l'emprema secziun dalla via sull'**Alpsu**, naven da **Mustér** tochen tiels cunfins da **Tujetsch**, baghegia Leon. Frik da **Cazas** e Giovanni Pattista Ghilmetti dalla **Lombardia**, la secunda secziun, che va tochen **S. Brida** han ils frars Berther da **Tujetsch** e comp. da baghegiar. Gl'uost 1863 dueien quellas duas secziuns esser finidas. Las lavurs vegnan ad entscheiver aunc quest meins; per direger e survigilar quellas ei signur inschignier Depuoз destinaus.

*Nova Gasetta Romontscha nr. 25, 18 da zercladur 1862*

**1862**

La zoppina serasa ora pli e pli ella **Cadi** e grassescha ussa ell'entira **Sursassiala**, **Mustér**,

**Tujetsch** e **Medel**. Il mender eis ei per las alps, nua ch'ei deva uonn fetg bia latg.

*Nova Gasetta Romontscha nr. 26, ils 27 da zercladur*

**1862**

### Via Alpu

Vid la via nova sull'**Alpsu** ein ussa circa 300 luvrers occupai, bunamein tut Taliens. Schigleiti sco quels han udiu da quell'interpresa, ein els dai neutier sin tuts mauns; ins ves'aschia ch'ei maunca nuota luvrers, mo donn ch'ils Romontschs fan pintga concurrenza ed ein ella cuntentientscha cullas tschaveras ed ella perseveronza da luvrar fetg anavos als Tessines e Lombards. Ferton che la via en **Surselva** vegneva ils davos onns baghegiada digl interprendider cun parders e buca tras sutaccordants, han ils impressaris dalla via sull'**Alpsu** dau vi quasi tuttas lavurs en accords. Denter ils sutaccordants eis ei mo ina cumpignia romontscha.

*Nova Gasetta Romontscha nr. 28, 10 da fenadur 1862*

**1862**

Ferton ch'ins ha a **Mustér**, **Tujetsch** e **Medel** teniu ils tiers malsauns mo schuber e cauld ed

applicau pauc ni neginas medischinas per quella malsogna, ha **Sumvitg**, aschigleiti che la zoppina ei leu passada si, spert telegraftau pil miedi da biestga a **Glion**. Vedremo la differenza digl effect.

*Nova Gasetta Romontscha nr. 29, ils 18 da fenadur*

## 1862

Cul mèl alpin, che vegn tschercaus pli e pli fetg, stat ei uonn mal; sez las principalas cuntradas da quei dultsch product, **Tujetsch** e **Medel**, nua che latg e mèl flessegeian tschelluisa en abundonza, survegnan uonn zun pauc mèl. La schliat'aura dil zercladur e las purginas dil fenadur han ruinau la biala speranza ch'ins veva aunc il davos dil matg sils aviuls.

*Nova Gasetta Romontscha nr. 34, ils 23 d'uost*

## 1862

(Tarmess en) Las lavurs vid la via nova a **Tujetsch** van spert vinavon ed ein schon avanzadas aschi lunsch, che nus purs pudein era enconuscher tgei figura, che quella nova signura vegni a far. Enstagl aber che quella biala dama fetschi sin nus purs ina emperneivla sensaziun, (*Tedlei tscho. Remarca dalla redacziun.*) sch'eis ella per nus in trest mussament, co nus essan puspei vegni menai miserablamein davos la cazzola. (*Betga la verdad!*) Patertgein nus anavos sur da nossa vischnaunca fatga quest atun davart il surprender l'expropriaziun vid questa via, sch'eis ei vegniu figurau e perdegau, ch'ils praus che mondien vid questa via, sco era las lennas, cuostien pressapauc 15 tochen 20 melli francs, dapli eis ei vegniu segirau als purs, ch'ella mondi ton sco pusseivel per la via vedra ed era atras ils vitgs e cheutras era spargnau bia praus ed auters cuosts dalla vischnaunca. Entras quei ed aunc bia auter figurem havein nus tras il pli dalla vischnaunca surpriu sin nossas costas l'expropriaziun e dar la lenna e crappa leutier. -

Aber co va ei ora ussa? Ei vegn fatg ina via bunamein 8 quartas (*lu han ils da Tujetsch buca aschi liunga detta sco ils Svizzers*) pli lada che quella naven da **Mustér** engiu, ella va per esser biala atras ils megliers funs (*cheu dat ei gie da menar la pli biala grascha ed il pli bia fretg*), enstagl mirs vegn ei fatg scarpas sco las pli grondas crinolinas (*quei ei ussa halt la moda, la scarpa ei mai aschi scuada sco ils mirs e sa aschia survir per moda-schurnal allas finas mattauns da Tujetsch*), tras il qual ei vegn priu ina tiarza, sche buc aunc dapli terren. Cuort, scadin vesa, scadin sto palpar, ch'ei vegni zuar fatg ina biala, mo era ina via da luschezia e cheutras mirau memia pauc sin donn dalla vischnaunca. Eis ei aber stau dueivel da dir a nus: Ei vegn aschia, ei va aschia ed ussa tut autruisa. (*Era la via buca schon stigiada, che tut veseva nua ella massi?*). Nua eis ei pusseivel ad ina paupra vischnaunca da pagar in deivet da 30 entochen 40 melli francs (*ils Tuatschins teman buc ils deivets, ed han en sac pli bia marenghins, che quei ch'auters han centims*), sco quei che la via vegn a custar, sche buc aunc dapli. Entras questas gestas lamentaschuns lessen nus mo refrestgentar empau la memoria als nos babs dalla patria (*gliez fa nuet*) e cun quei aunc enzatgei dapli, essend che lur ureglas han udiu e lur lieunga ha plidau. Denton vegn ei matei ad ir cun nus paupers purs sco cun tut quels, che ein enzacuras stai ella falla – els han stuiu mirar co mitschar ord quella ed aschia era nus – leu gida nuota pli schemer e plirar, aunc bia meins smuldir e zachergiar (*Bravo!*), ei muossa a nus, bugen ni nuidis, da patertgar co saver pagar e sur da quella dira nusch lessel era schar sentir mes sentiments mes cars vischins e purs e quei ina autra gada. (*Gliez ben!, gliez plai a nus meglier*)

In sempel pur da **Tujetsch**

*Nova Gasetta Romontscha nr. 37, ils 12 da settember*

## 1862

(Tarmess en) Per far si deivets dat ei a nus purs buca grond studi, vein era per ordinari en nies tenercasa pign quitau da sepertgirar da quels, pertgei che nossas femnas han da tuttas sorts basegns, inaga in bi scussal merino, l'autra gada in bi fazal, lura pézs da seida sin ina schlappa e suren in mantel alla moda pendius vid franzlas, la bucca, sinaquei ch'ella schiri buc, sto ver in bien caffe, ed il nas bein pervesius cun ina presa tubac holender etc. etc. Era nus purs havein sco nossas femnas nossas cusseidas e nos gronds basegns senza basegns per era vuler far sco ils auters e cun quei crescha nies cudisch da quen, sche nus havein in, aber buca sillia posta dil dabien, sunder dil daschliet. Cheu dat ei lura a nus pli grond studi, cheu panzein nus ed

entschavein a selamentar sur da discletgs, sur da schliats onns e carischias, pertgei che nus temin s. Martin cun siu scalin, nus stuein lu patertgar bugen ni nuidis vid il co pagar, pertgei ch'ils cumpars deivets van buc ord stiva mo cun lamentaschuns, sunder vulan marenghins. Aschia stuein nus era far cun nossa signura spusa, la via nova. Nus havein cun ella teniu casa senza quitau ed ussa splunta ella en nossas costas cun 30 – 40'000 frs., co lein nus cuntentar ella? Vus, mes cars vischins e purs, vegnesses, sche jeu savess a vus mussar ina **California** en **Tujetsch**, nua ch'ei fuss buca mo d'anflar sablun dad aur, mobein bials sitgets marenghins, mo quei, quei per donn sai jeu buca far, ni per vus ni per mei ed aschia tucca ei d'encurir ensemens las miulas d'aur sternidas ora per nies **Tujetsch** entuorn. Gie per grazia da Diu savein nus dir, che nus havessen aunc enqual graun d'aur, sche nus mo vegnissen perina d'encurir ensemens quels. Havessen nus il spért da nos buns vegls, sche anflassen nus era; pertgei che cura che quels havevan da basegns da daners per basegns generals, sco per exemplu cura ch'ei han cumprau ora la dieschma dalla claustra, sche han els giu priu ord ils interess generals, e zuar senza allienar quels. Els han aschia pagau il deivet ed aunc schau artar nus ils beins generals. Lein pia era setener vid quella regla dils vegls, ed encurir da pagar il deivet dalla via primarmein culs beins generals.

Fuss ei buca pusseivel, gie buca mo dueivel, mobein aunc gest, da metter sin tuts s.v. tiers che pasculeschan en nossa vischnaunca ina taxa a proporziun da qualitat da tiers. Cheutras pagassen tuts tuttina, reh e pauper il medem; il reh che ha tiers pagass e gudess pastiras ed alps, il pauper pagass pauc e schass guder sia purziun da gudiment, ch'el havess vid pastiras ed alps. Caussa fetg gesta, sch'ins considerescha che alps e pastiras ein beins communals. Vegness ei pia mess si inton per scadin cavagl, che pasculescha en nossa vischnaunca, per scadina vacca, genetscha, stiarls e vadials, sco era cauras, nuorsas e tierscasa, mintgamai suenter proporziun, sche dess quei in bi capital sigl atun da trer en. Era duess ei vegnir fixau in cert temps cu schar ora ils tiers d'armal la primavera, sco per exemplu ils 10 da matg; quel denton, che schass ora avon stuess era pagar in ton per tgau.

Lura sevessen nus era trer in bi avantatg ord nos feins a pastg, nua ch'il **Cuolm Bass** duess vegnir partius giu en sorts suenter fiugs e dau da guder 5 – 6 onns, pagond ina annuala taxa. Era quei fuss buca mo gest, mobein era in remedii encunter bia malveglia, scuidonzas e dispetas. Il **Cuolm Ault** duess denton vegnir gudius sco tochen ussa. Finalmein duessen nus mintga onn metter en aucziun 50 – 60 lenns bein madirai ora ad onn, per ils quals ei vegness senza dubi fatg bials pagaments. Ord quellas fontaunas secrei vies beinmanegiond convischin e pur da trer ora buca mo igl annual tscheins dil deivet dalla via, mobein era aunc in surpli entras il qual ins savess annualmein pagar giu in ton dil capital sez.

Alla fin stuein nus aunc far attents sin nies bien crap scalegl si **Calmut**. Quel ei datier dalla via nova e savess plaunsiu dar in biala resursa alla vischnaunca. Considerai inaga l'enorma massa crappa che **Mustér** meina ora mintga onn ed il danerun ch'ei tilan en leu. Nus secartein che **Calmut** savessi plaunsiu dar ina pintga **California** per **Tujetsch** e gidar a finir a pagar giu il deivet dalla via nova.

Mettend pia quei en tutta carezia e buna veglia avon a vus, mes cars vischins, per schar reflectar, lessel aunc dar in cussegli duront che vus veis da sedecider da numnadamein sclauder ord vies miez dus fetg schliats vischins, ils quals ein la caschun da bia caneras, dispetas e malveglia e quels dus vischins fussen la *scuidonza* e la *engurdientscha*. Ein quels dus schliats vischins bandischai ord vies miez, sche vegn ei a reger denter nus pasch, carezia e bien spert per il beinstar communabel! Prendeit en pasch per quellaga, in'autraga enzatgei per nossas caffetieras.

In sempel pur.

*Nova Gasetta Romontscha nr. 39, ils 26 da settember*

## 1862

### Remarca dalla redacziun

Nus essan quels dis vegni honorai cun ina brev d'in Tuatschin che ha buca astgau suittascriver siu num e che manegia ch'il vegl proverbi „donn e gomias van ensemens“ severificheschi cumpleinamein ord il nummer 37 dalla Nova Gasetta Romontscha. Mo co astga **Tujetsch** plidar sul donn caschunaus dalla via nova, sch'ins patratga vid ils gronds avantatgs che quella porta

alla vallada. Sch'ins enconuschess buca la pussonza e tschoccadad dils pregiudezis, sche pudessen ins crer, ch'ei seigi nunpusseivel, ch'in sulet Tuatschin astgassi aunc selamentar, cura ch'ins di ad el: Nus fagein a vus ina oreifra via tras vossa biala mo isolada vallada, mettein vus d'ina vart en buna communicaziun cun **Mustér**, respectiv cugl entir cantun e da l'autra vart cun vos buns vischins digl **Uri**, culs quals vus veis in onn ora in grond traffic, aunc dapli, nuslein sez mantener quella via e cheutras aunc dar fadigia a vossa glieud, vus stueis far nuot auter che dar neu gratis il necessari sulom. Ei quei buc in'offerta, che meritass da bitschar il maun enstagl da gir e smuldir sur quels che han cussegliau a vus d'acceptar quei grondius schenghetg. Sch'ei ventscher ora la via nova e cura che vus veis empruau ella inaga, lein nus lu dumandar vus: Schei inaga sinceramein, leis turnar a schar ir en il stradun, sche nus turnein a vus ils cuosts per vossa expropriaziun? Ils da **Tujetsch** che han tutts 5 senns vegnan lu a dir: Mai e pli mai; il diember dils suords e tschocs vegn ad esser pigns. Per far ver la malraschuneivladad da tals pregiudezis lein nus aunc allegar ina anecdota. Nus vein dacuort entupau a **Medel** in marcadont tuatschin cun sia biestga da fiera, in dils capoadversaris dalla via nova. Vagnend vitier el, ei stau siu emprem salid, ch'el ha smuldiu sullas schliatas vias da **Medel**. Nus vein pudiu rir e detg: „En **Tujetsch** smuldis vus sulla buna via e cheu sullas schliatas vias.“ Mo nies bien um veva raschun da zacheriar sullas schliatas vias, pertgei cu la via nova, sull'**Alpsu** ei fatga, sche sa quei marcadont far dus cuolms en in di cun sia biestga, l'**Alpsu** ed il **Gottard**. Avunda per glieud raschuneivla; culs malraschuneivels e malcuntents ston ins haver pazienzia, tochen ch'els san inaga palpar lur avantatgs.

*Nova Gasetta Romontscha nr. 39, ils 26 da settember*

## 1862

### Notizias sul commers da biestga

Ils marcadonts dalla **Cadi** han aunc cumprau si dabia biestga e pagau biebein, per vadials entuorn 4 marenghins in e per mutgs 6 – 7 marenghins. Questa jamna ein ils marcadonts da **Sursassiala** i cun lur biestga sul **Lucmagn**, en tut circa 7 – 800 tgaus, la flur da quella formavan ils mutgs da **Tujetsch**, che han aunc buca giu la malsogna. La fiera da **Mustér** ei per denton vagnida refretga sigl october, nua che las serradas pervia dalla malsogna tschessan speranza e vegnan cullas bunas novas da **Ligiaun** a dar pli gronda impurtonza e vivacitad alla fiera da **Mustér**, che veva quels onns da muntar pauc, essend ch'ei era cheu negins marcadonts da fiera pli. ...

*Nova Gasetta Romontscha nr. 39, ils 26 da settember*

## 1862

### Barschament d'in clavau a Sedrun

El vitg **Sedrun** eis ei ussen sonda barschau giu in clavau; gia eran ils tetgs da duas casas pigliai fiug, mo ils umens da leu ed ils numerus luvrers dalla via, ch'ein spert dai neutier, han pudiu far resistenza al serasar dil fiug ed aschia prevegnir ad ina terribla sventira. Per sanadeivla admoniziun da geniturs remarchein nus, ch'il fiug seigi ruts ora entras affons, che fagevan tremagls cun zulprins.

*Nova Gasetta Romontscha nr. 40, ils 9 d'october 1862*

## 1962

Questa jamna eis ei puspei vegniu fatg pass per far arver il **Cuolm d'Ursera** ed ins ha speranza che la serrada vegni a calar si aschigleiti sco las vischnauncas dalla **Cadi** han varghentau la curontina.

*Nova Gasetta Romontscha nr. 41, ils 10 d'october*

## 1862

### Tiers jasters a Tujetsch

1. In barbaisch ner cun corna che ha ell'ureglia dretga tagliau giudasum, ina furcetta davon en, ed in snez davos en.
2. In tschut gagl, ureglia dretga onsum ina furcetta ed in snez davos en.

3. Ina tgigisch alva, ureglia dretga in mugrin davon en ed ella senistra giu dasum e fess.  
Ils proprietaris da quellas san en termin da 10 dis retrer ellas tier  
Duri Wenzin, gerau  
*Nova Gasetta Romontscha nr. 41, ils 10 d'october*

## 1862

La malsogna dils peis e dalla bucca denter il s.h. muvel ha gia cugl uost giu sia fin ellas vischnauncas da **Medel**, **Tujetsch** e **Mustér**, essend che da quei temps naven han negins tiers pigliau la malsogna, quei ch'era aunc buca saun, era mo consequenzas dalla malsogna. Aschia han quellas vischnauncas finiu la curontina avon ils 20 da settember.

*Nova Gasetta Romontscha nr. 43, ils 14 d'october*

## 1862

### La via sull'Alpsu

ei schon uonn en sia construcziun s'avanzada buca mal. Vid las duas sezioni pridas a mauns en ina lunghezia da circa 13'000 m da **Mustér** tochen **S. Brida**, pon ins dir che varga la mesadad dalla lavur seigi fatga, cunzun sil territori da **Mustér**; entirs tocs via ein fini diltut. Tenor tuts aspects selai ei spitgar che sigl uost 1864 seigi la via ventschida sin nies territori, sco igl ei fixau dalla Confederaziun. In'autra damonda eisi denton, schebein **Uri**, che ha aunc ussa fatg nuot ed ha tier quei da baghegiar la via da **Flüela** a **Brunnen** e sulla **Furca**, seigi sin lu era sin siu territori alla fin culla via sull'**Alpsu**, duess quei buca esser il cass, sche vegn il cantun **Grischun** bein ad haver regress tiella Confederaziun, per far pagar ella in ton tscheins pils daners applicai vid la via, entochen che **Uri** ha finiu siu toc via. Tschelluisa vess nies cantun in schliet engraziament per sia gronda premura e stenta el catschar vinavon las lavurs per vegnir suenter allas ordinaziuns dallas autoritads federalas.

Las lavurs vid la via ein ussa caladas si ed ils luvrers sbrigai. Il maximum dil diember dils luvrers ei stau circa 420, en quei 60 Romontschs. Ins ha danovamein saviu seperschuader, che senza agid dils Taliens savessen nus mo cun nossa glieud buca baghegiar vias. Buca per nuot sesanflan en nies cantun ina aschi gronda quantitat luvrers jasters, vid vias circa 1000, parders (*sitgurs*) 100, fumegls e fumitgasas 700, brischacotgla 380, luvrers da lenna 360, pasturs 350, melli mistergners, insumma en tut circa 7000 luvrers jasters.

Nossa glieud han halt buca la premura e perseveranza da fadigar sco ils Taliens; mo ils davos ein era buca aschi custeivels el viver e sevestgir. Sch'ins considerescha il sempel cuost da quels activs luvrers taliens, che magliavan la damaun in toc paun, da miezdi ina pulenta cun empau caschiel e la sera mo ina minestra, sche pon ins bein dir, ch'il magliar bia seigi in ton mo disa. – Caracteristic eis ei era ch'ins veseva duront la lavur mai a fimond tubac ils luvrers taliens, bein aber ils romontschs. – Sch'ins umens romontschs han buca fatg stretg cun lur lavurs vid la via nova, sch'eis ei era buca da far curvien, che las femnas han nuota vuliu saver da quellas. Ferton ch'ins veseva vid la viafier roschada luvreras, han ins viu mo ina vid la via dall'**Alpsu**; mo quei era ina ton pli activa che luvrava stediamain ed en tutta aura per sustener ses vegls geniturs. – Malgrad il grond diember da luvrers ha ei dau neginas sventiras, priu ora in che ha fatg mal in egl cun sittar crappa.

Sche la primavera ei biala, sco ina part vulan comprender ord il bi atun, sche vegnan ils interprendiders gl'avrel puspei a schar entscheiver cullas lavurs per finir ellas il zercladur sil territori da **Mustér**. La principala lavur ei lu las 7 punts, il fundament dallas qualas ei per part schon mess. Nus vein giu relatau, ch'il departement militar a **Berna** hagi ordinau ch'ei duei vegnir construui cumahs da puorla tier quellas punts, per en cass da basegns siglentiar ellas ell'aria ed impedir il pass agl inimitg. Mo silla inspecziun fatga quest october digl expert federal vegnan ins a desister da quels cumahs da puorla, essend che per siglentiar quellas punts pudess gl'inimitg aunc adina maneivlamein passar las respectivas auas. Ils avdonts da quellas punts pon aschia durmir ton pli ruasseivlamein. Plidond digl expert federal, remarchein nus aunc posteriuramein, ch'el hagi schau plascher zun pauc, che la cumissiun dil stan hagi saviu concluder dad el vitg da **Mustér** ir naven mo cun ina casa e far ina aschi macorta stretga storta. Denton savess quei tut vegnir midau ed embelliu, sche quei signur expert procurass per in credit supplementar, ils quals ein tschelluisa fetg en moda tier nossas autoritads federalas.

Daventa quei buc, sche stat ei tiel conclus dalla cumissiun dil stan, che ha custau alla vischnaunca 956 frs.

Tuts ils jasters ch'ein uonn passai sull'**Alpsu** han declarau, che quei pass vegni a vegrir frequentaus tut autruisa dils viandonts inaga che la via seigi finida. Mo ei vegr aunc a semussar auters avantatgs, cunzun per **Tujetsch**; en scadin cass san ins pretender, ch'ils funs, tras ils quals la via nova va, seigien schon ussa tenor las damondas dils proprietaris carschidas bia en valeta.

*Artechel en nr. 45, ils 8 da november*

## 1862

Aschia ha la vischnaunca da **Tujetsch**, che sa preziar e schanegiar il meglier la lenna, pudiu trer anavos tiella presenta revisiun 15'000 frs. giud la summa stada dada en pils uauls.

*Nova Gasetta Romontscha nr. 47, ils 21 da november*

## 1862

Finalmein ha il cantun **Uri** tenor in telegram arrivaus a **Mustér** aviert il **Cuolm d'Ursera**, mo ils pors tuatschins vevan schon anflau ina via egl **Uri** senza passar il **Cuolm d'Ursera**. Schon avon 15 dis era ei las tunas ch'ei vegnessi aviert e sin quei han marcadonts uranès e tuatschins giu cumprau si en **Tujetsch** circa 150 pors. Quels ein lu avon entgins dis marschai pella **Surselva** giu, han priu a **Cuera** la viafier tochen **Lucerna** e vegnan ussa ad haver passau il lag ed esser debarcai a **Flüela** e serendi ella capitala **Altdorf** per far giu pil nas alla regenza. L'avertura dall'**Alpsu** vegr denton ad alzar ils prezis dils tiers casa ella **Cadi**, sils quals ils Uranès spitgavan fetg vess.

*Nova Gasetta Romontscha nr. 47, ils 21 da november*

## 1862

### **Nuorsas jastras a Tujetsch**

tier signur gerau Wenzin a **Rueras**:

1. In'alva, l'ureglia dretga giudasum e fess.
2. A **Surrein** tier vieua Giossi: in'alva, ureglia dretga in snez davon enagiu ed in davos en, in mugrin e fess la seniastra.

Ein da retrer enteifer 15 dis, bonifcond las spesas.

*Nova Gasetta Romontscha nr. 47, ils 21 da november*

## 1862

La stad s. Martin para da seprolunghir. Priu ora ils selvadis da **Tujetsch** e **Medel** eis ei en **Surselva** tochen si encunter la regiun alpina bi schetg terrein.

*Nova Gasetta Romontscha nr. 49, ils 5 da december*

## 1862

Posteriuramein remarchein nus aunc ch'ei seigi buca iu bein culla gronda roscha s.h. pors che seigi per far giu pil nas alla regenza d'**Uri**, che leva mai arver il **Cuolm d'Ursera**, ida dalla **Surselva** giu, priu a **Cuera** la viafier tochen **Lucerna** e da leu navigada vi egl **Uri**. Ad **Altdorf** – la veglia residenza da Gessler – ei l'entira roscha vegnida messa en perschun per 8 dis; ils perschuniers ein sinquei vegni vendi cun ina gronda sperdita; ils cumpraders han lu dau buns plaids als signurs d'**Altdorf** e quels han suenter 3 dis dau amnestia als s.h. tierscasa. – Cun in'autra roscha da quels tschins, instradada egl **Uri** sul **Cuolm d'Ursera**, che ha suenter gronds strapazs piars 10 tgaus sil cuolm, eis ei era vegniu fatg pign profit, ed aschia eis ei da capir ch'il traffic da pors rauissa empau ella **Cadi**. Mo ton pli tschercai ein ils vadials giuvens; pils maschels grad naschi vegr ei pagau 30 frs.

*Nova Gasetta Romontscha nr. 50, ils 11 da december*

## 1863

### **Clom da quens**

Ugadai ein: 1) Sep Antoni Giacumet da **Surrein/Tujetsch**, ugau gerau Duri Venzin. 2) Gion

Bistgeun Giriet, ugau signur Gion Antoni Monn dalla Turtè, tuts da **Tujetsch**.  
*Nova Gasetta Romontscha nr. 1, 1. da schaner*

### 1863

Era denter il s.h. muvel para ei da buca reger la dretga sanadad, ella **Cadi** ventschan bia vadials giuvens, mo il vitg da **Camischolas** ha piars uonn circa 15 da quels.

*Nova Gasetta Romontscha nr. 2, 10 da schaner*

### 1863

#### **Nuorsas piarsas a Tujetsch**

- 1) In tschanc ner entir cun corns, ureglia dretga ina furcletta davon en, ina ruosna davos en.
- 2) Ina tgigisch alva, ureglia dretga in snez davos en ed in davon en.
- 3) In anugl ner entir cun corns, in mugrin davon en ed in davos en ell'ureglia dretga e dus snezs davos en ella senistra.
- 4) Ina tgigisch alva cun corns, tigliau giudasum ed ina ruosna ella dretga; ella senistra in snez da mintgamaun entraviers enagiu.

Ils proprietaris dueien en termin da 15 dis s'adressar tier

Gion Andriu Berther, gerau

**Tujetsch**, ils 8 da schaner 1863

*Nova Gasetta Romontscha nr. 2, 10 da schaner*

### **Selva**

Era a **Selva** eis ei vegniu giu la lavina ed ha priu dus clavaus; en in, nua ch'ei era en animals, ha ella per ventira mo splanau surora il clavau e schanegiau il nuegl. Essend serrau giu tutta communicaziun han ils da **Selva** stuiu salvar si plirs dis ina bara en baselgia.

*Nova Gasetta Romontscha nr. 3, 17 da schaner*

### 1863

#### **Tiers jasters a Tujetsch**

- 1) Ina ansola grischa, ureglia dretga ina ruosna, ella senistra in snez davos en.
- 2) In anugl ner chisträu, fess l'ureglia senistra e dus snezs davos en.
- 3) Ina caura alva, ureglia dretga tagliau giudasum ed in snez davon en; senistra in snez davon en entraviers enagiu ed in davos en.
- 4) In'ansola cun scalin, ureglia dretga giudasum ed ina ruosna, ella senistra era ina ruosna.
- 5) In buc entir alv, ureglia senistra in tarden osum ed in snez davon en.
- 6) In anugl ner chisträu, ureglia dretga giudasum e dus snezs davos en, ella senistra in snez davon en.
- 7) In anugl, ureglia dretga giudasum e fess ed ina furcletta davos en.

Nua che quels tiers sesanflan en nossa vischnaunca dat il suttascret sclarament ed ils proprietaris dils sura tiers duein en termin da 15 dis far da saver al suttascret.

**Tujetsch**, ils 11 da schaner 1863

Pella vischnaunca da **Tujetsch**

Duri Venzin, gerau

*Nova Gasetta Romontscha nr. 3, 17 da schaner*

### 1863

En **Tujetsch** era ei gievgia 4 baras e plirs malmalsauns. *Numnadamein: Onna Maria Scolastica Monn, Surrein, 77 onns; Cresenzia Riedi, Selva, 39 onns; Barclamiu Gieronimo, Selva, 1 onn; Onna Maria Peder, Selva, 1 onn.*

*Nova Gasetta Romontscha nr. 5, 31 da schaner*

### 1863

#### **Remarcabladad**

Sco remarcabladad ed emprova dalla veta dallas nuorsas, relatein nus ch'ei seigi miez fevrer vegniu anflau ell'alp **Curnera** a **Tujetsch** quater nuorsas. Malgrad la gronda nevada e las cuflas,

ch'ellas han stuiu star ora quest unviern, sesanflan ellas en bien stan, e muort la liunga launa semeglian ellas gest quater uors pigns, vegn ei scret a nus.  
*Nova Gasetta Romontscha nr. 9 ils 28 da fevrier*

### 1863

#### **Nuorsas jastras a Tujetsch**

Quest meins ei vegniu anflau en in'alp quater nuorsas cun sequenta noda:

- 1) Ina nuorsa cun bransina, ureglia dretga ina ruosna ed in snez davon en, ella senistra in snez davos en.
- 2) La secunda ha fess l'ureglia dretga e dus snezs davos en ed in fildirom. Entuorn la cua ha ella ina penda materia che ha si ina crusch ed in streh atras.
- 3) La tiarza ha ella dretga in fildirom ed in snez davon en. Entuorn la cua era ina penda materia cun ina crusch sempla.
- 4) La quarta ha in fildirom ell'ureglia dretga, la senistra ha ella fess.

Ils proprietaris dallas sura nuorsas dueien sil pli tard entochen ils 15 da mars far da saver a Duri Venzin, gerau

*Nova Gasetta Romontscha nr. 9, 28 da schaner*

### 1863

#### **Ils fondos da scola ella Surselva catolica**

#### **Vischnaunca da Tujetsch cun 3 scolas**

1847 ha la vischnaunca fundau tras arvers ellas alps e fein a pastg	3400 frs.
Premi cantunal pella sura fundaziun	680 frs.
Priu cun lubientscha episcopala ord la facultad dallas capluttas, capitals, che vegnan aunc administrat dils respectivs ugaus da quels	6596 frs.
Premi cantunal per 3 casas da scola, a <b>Sedrun, Rueras e Cavorgia (Camischolas)</b> ha ussa era sia atgna casa da scola ed a <b>Selva</b> vegn uonn medemamein baghegiau ina.)	425 frs.
La caplania da <b>Sedrun</b> paga annual alla scola 51 frs. che representa in capital da	1020 frs.
En bonis dalla scola ha il ludeivel obercheit resignau sin ina annuala usitada gastaria tiel signur plevon, persuenter paga quel annuala alla scola 11. 90 frs. che representa in capital da	238 frs.
1863, schaner, purtava aschia l'entira facultad	12'279 frs.
Ultra da quei fondo general ha il vischninadi da <b>Camischolas e Zarcuns</b> mess ina entschatta tier in fondo per lur atgna scola tras ina voluntaria collecta, che ha purtau en	393.63 frs.

*Nova Gasetta Romontscha nr. 11, 12 da mars*

### 1863

#### **In memorial pella Cadi ord l'uiara dils Franzos**

Tras in buntadeivel maun ei a nus vegniu communicau ord igl archiv da **Tujetsch** sequenta scartira:

Cuorta memoria tgei nies ludeivel cumin dalla **Cadi** hagi pitiu entras l'uaira ed entras las potenzas, ton Keisers, Russers e Franzos igl onn 1799, ton cun engular, barschar ed auters donnas generals da tuttas sorts etc., sco era tut il furniu, il qual suonda primarmein specificadamein en numer e suenter fatg en pagament, tut en sia valur e buc alterau il prezi.

#### **Furniu**

		flurins e kr.
1'160	centners fein	2'320.04
258	vaccas	23'220.00
66	tgaus tiers manedels	396.00
139'323	quatiers	6'956.05
15'000	pauns	3'000.00

660	crenas pischada	330.00
13'023	crenas caschiel	2'472.48
940	crenas carn	470.04
5'326	stèra truffels	5'681.00
142	stèra graun	568.00
	vin e vinars	623.00
	autras expensas ch'il cumin ha giu per speias, landsturm, Kriegsrath, express etc.	17'000.00

Porta flurins e krizzers 63'037.01

### Suonda igl engulau

184	vaccas	16'560.00
2'297	tgaus tiers manedels	13'782.00
15'000	pauns	3'000.00
80'400	crenas pischada	40'050.00
20'000	crenas caschiel	1'333.20
28'000	crenas carn	14'000.00
12'000	stèra truffels	12'080.00
10'000	centners fein	25'000.00
12'068	stèra graun	18'272.00
	mobilias per	10'800.00
	barschau per	668'243.00
	donns generals	6'000.00
	per munizun als Franzos	5'780.00
	purtau sur cuolm 12 000 buordis	8'000.00
	menau fuor 5000 vaultas	5'000.00
	daner blut cumpigliau vin e vinars	3'000.00
	dau contribuziun als Franzos	23'000.00
	32 cavals per	6'000.00

Summa totala 962'936.11

**Tujetsch**, ils 14 da fevrer 1800

Da mei Ulrich Battesta Monn, mp. p. gerau

*Nova Gasetta Romontscha nr. 12, 19 da mars*

### 1863

A **Tujetsch** ei miert tschella jamna in um da 91 onn. *Statalter Gion Andriu Berther, Camischolas, fegl da statalter Andreas Berther e Margarita Caschalk.*

*Nova Gasetta Romontscha nr. 13, 27 da mars*

### 1863

A **Medel** e **Tujetsch** ei aunc 6 quartas neiv els plauns, a **Mustér** 3 ed els cuolms 12 quartas, aschia ch'ei vegn uonn buca d'ir baul a cuolm, schegie ch'ei semuossa els bia loghens scartezia da fein.

*Nova Gasetta Romontscha nr. 13, 27 da mars*

### 1863

#### Avis

Il suittascret ha giu empermess da clamar en plirs loghens avon che turnar ell'**America**, mo stuend el da gleiti semetter sin viadi, fa el cheutras da saver a tuts enconuschents, che han da surdar brevs ni commissiuns per l'**America** da schar vegnir tier quellas sin Pastgas a **Tujetsch** a signur gerau Gion Andriu Berther, a **Mustér** all'ustria dalla Cruna, a **Sumvitg** a signur bannerherr Cajacob, a **Glion** all'ustria digl Oberalp ed a **Cuera** a bundsveibel Berther. Prendend

comiau dalla **Surselva** offerescha cun quella caschun a tuts enconuschents siu cordial salid.

**Tujetsch**, 26 da mars 1863

J. Gieriet

*Nova Gasetta Romontscha nr. 13, 27 da mars*

### 1863

La via nova para schon ussa da promover la communicaziun ed il commers denter la glieud a **Tujetsch**. Ils firaus Pastgas eis ei vegniu clamau ora 5 pera nozzas en inaga – enzatgei mai s'udiu en quella val, nua che latg e mèl flessegia en abundonza. En tut quellas sontgas allianzas ein vegnidas serradas giu cun bien giudezi, essend che tuttas 5 spusas dumbran intrasglauter 35 onns. Salit e liunga veta a quels ventireivels. *Ils 5 pérs: Gion Antoni Beer e Maria Turtè Monn, Camischolas; Giachen Antoni Berther e Naria Barbara Catrina Beer, Gonda; Giachen Adalgott Monn e Rosina Monn, Rueras; Gion Giachen Caduff e Maria Barbara Monn, Rueras; Nicolaus Thomas Deflorin e Maria Dominica Monn, Rueras; tuts sur 30 onns!*

*Nova Gasetta Romontscha nr. 15, 11 d'avrel*

### 1863

Finalmein ha il ludeivel Cussegl Pign relaschau sia sentenzia da castitg allas vischnauncas dalla **Cadi** che han quest atun tiella malsogna dalla bucca e dils peis buca observau sco s'auda gl'uorden sanitaric ... **Medel, Tujetsch e Schlans** ein mitschai senza castitg.

### 1863

#### **Clom da quens**

Gerau Duri Venzin retscheiva ils quens dalla defuncta giuvna Maria Francescga Berther, omisdus da **Tujetsch**.

*Nova Gasetta Romontscha nr. 16, 17 d'avrel*

### 1863

Las lavurs vid la via dall'**Alpsu** han puspei entschiet en **Tujetsch**; a **Mustér** vegn ei per il matg dau sia entschatta.

*Nova Gasetta Romontscha nr. 17, 24 d'avrel*

### 1863

#### **Paun zart**

fatg alla moda talianera san ins da tut temps cumprar tier Felix Huonder a **Segnas (Mustér)** e tier Vigieli Mon a **Sedrun**.

*Nova Gasetta Romontscha nr. 19, 8 da matg, nr. 21, 22 da matg*

### 1863

#### **Tresta nova!**

A **Tujetsch, Zarcuns** ei puspei rut ora la malsogna dalla bucca e dils peis. En consequenza da quei ei la vischnaunca da **Tujetsch** serrada giu.

*Nova Gasetta Romontscha nr. 21, 22 da matg*

### 1863

La zoppina en **Tujetsch** para da buca serasar pli lunsch, aunc ussa eis ella rutta ora mo en in nuegl a **Zarcuns**, ch'ei serraus giu da tutta communicaziun cun auters tiers. .... **Uri** ha serrauf ferm encunter il **Grischun** e quei ei ina mala pella proxima fiera da **Trun** e da **Tujetsch**, nua ch'ils Tudestgs vegnevan neu e cumpravan si ina massa cauras e da bia vaccas.

*Nova Gasetta Romontscha nr. 22, 29 da matg*

### 1863

#### **Alp da cavals**

Cheutras vegn ei fatg da saver ch'ei vegni priu si ell'alp da cavals a **Tujetsch** 10 cavals jasters per in arvè da 20 frs. Igl ei da remarcar che en quella alp seigi ei era in grond e bi cavagl mascal

per cavallas, ch'ins vul schar curdar; per quei e pli pustretsch vegn ei lu da pagar circa 5 frs. Ina cavalla cun pulein paga mo per in cavagl. Ils 8 da zercladur vegnan ils cavals pri si. Ulteriur sclarament dat

Giusep Antoni Mucli, gerau

*Nova Gasetta Romontscha nr. 22, 29 da matg*

### 1863

La zoppina en **Tujetsch** – ch'era gl'emprem rutta ora mo en in nuegl e sco ei vegn pretendiu cun dar als tiers flucs stai anavos onn dallas vaccas malsaunas, serasa nunspitgadamein pli fetg. Els cuolms ni mises ein plirs muvels infectai ed essend che varga la mesadad dils armauls en **Tujetsch** han onn buca giu la malsogna, sche desiderassen ils Tuatschiners che tuts quels survegnessen ella ton pli spert.

*Nova Gasetta Romontscha nr. 24, 12 da zercladur 1*

### 1863

#### Stradun

La davosa secziun dalla via sulla **Alpsu**, da **S. Brida** tochen si tiels cunfins uranès ei surdada da baghegiar a signur Plattner da **Cuera**, che ha construiu la via da **Trun** tochen **Mustér**. Finalmein han era ils Uranès dau ina entschatta culla via da lur maun. (8100 meters liunga)

*Nova Gasetta Romontscha nr. 25, 19 da zercladur*

### 1863

La fiera da **Tujetsch** ch'ei muort la zoppina vegnida tenida uonn a **Mustér**, eis ei vegniu catschau bia cauras, mo paucs e schliats armauls. Ils prezis vegnevan teni ault e perquei eis ei vegniu marcadau pauc, schegie ch'ei era dabia glieud. Ils numerus cavals pri si uonn en **Surselva** dils Uarnès a tscheins, ein puspei vegni pagai ualti bein.

*Nova Gasetta Romontscha nr. 25, 19 da zercladur*

### 1863

#### Sventira a Rueras

En **Tujetsch** ei sonda vargada, ils 20 da zercladur, succediu ina sventira. In buobet da 9 onns, *Casper Giusep Antoni Muggli*, che mava cun duas vaccas sulla punt da **Rueras** vi, ha tras ina da quellas survegniu in stausch, ch'el ei daus giu ell'aua. Spert ein curri neutier glieud, mo per sut **Sedrun** giu eis ei reussiu da trer igl affon miert ord il **Rein**. Ei era in affon d'admirabels dunns, sia spiritusa sorella dad endisch onns funcziunescha sco telegrafista a **Mustér** - dus orfans dil defunct secretari guvernativ Mucli.

*Nova Gasetta Romontscha nr. 26, 26 da zercladur*

### 1863

Per unir las respectivas tendenzas dalla **Svizra Centrala** cun quellas dalla **Svizra Orientala**, manegia era el (*La Nicca*) ch'ei seschassi menar la viafier naven dil **Lag da Lucerna** tochen ad **Amsteg**, da leu tras la **Val Maderana** cun in tunnel dad in'ura e mesa sut il **Crizli** ella **Val Mila** tochen tiel venerabel casti **de Putnengia** sper **Rueras**, nua che la viafier da **Cuera** suness cun ella per communablamein formar la viafier sul **Lucmagn**.

*Nova Gasetta Romontscha nr. 27, 3 da fenadur*

### 1863

Sillas reclamaziuns fatgas tiel Cussegl federal pervia dil scamond da frequentar la fiera tessinesa a **Quint**, ha quella autoritat rispondiu, ch'il **Tessin** hagi giu raschun da serrar il pass, sch'ei seigi ver, che la zoppina grasseschi en **Tujetsch** sco la regenza grischuna detti sezza tier.

*Nova Gasetta Romontscha nr. 29, 17 da fenadur*

### 1863

#### Annunzia da mort

En profunda dolur e tristezia notifichein nus cheutras al venerabel clerus sursilvan, a tuts parents ed amitgs, ch'ei hagi plaschiu agl Altissim da clamar ord questa veta speronza tier ina megliera nies car sur fegl e frar, igl

### Aultreveriu signur Josef Anton Durgiai plevon a Tujetsch

Provedius cun tuts ss. sacraments dils moribunds eis el spartius oz allas 3 dalla damaun suenter ina malsogna da mo 10 dis en ina vegliadetgna da 51 onn. Nus recumandein sia olma alla pia memoria da tut ses parents, amitgs ed enconuschents

**Sedrun**, ils 30 da zercladur 1863

Lezi Anton Durgiai, bab

Era en num dallas feglias e dils schienders.

*Nova Gasetta Romontscha nr. 31, 31 da fenadur*

**1863**

### La sepultura d'in plevon

**Sedrun**, 1. d'uost 1863.

Giud la aulta tuor cloman tut ils zenns tiella fossa, la baselgia porta malencurada, ed en santeri sesarva ina nova fossa, che para da clamar cun aulta vusch: "Patratga o carstgaun, che tiu tgierp ei formaus ord tiara e vegn puspei a semidar en quella!" L'entira vischnaunca, ils datier e damaneivel, umens e femnas, giuvens e vegls ein en gronda passadetgna e tristezia serimnai en ed avon casa parochiala – ina numerusa famiglia spirituala, che plira giud la dolorusa sperdita da siu car bab e spiritual. Cheu compara sia bara purtada da 4 spirituals e 4 geraus ed ornada si cun flurs e ghirlandas. Quei trest aspect rumpa il cor als parochians, dapertut flessegian larmas, biars lamentan e bragian. Sut il melanconic, mo edificont cant d'in numerus clerus, vegn la bara purtada entuorn baselgia e tschentada sco unfrenda dalla mort avon gl'altar, leu nua ch'il pietus defunct veva sco secund mediatur denter Dieus ed ils fideivels purtau bia dis ed onns agl Altissim la pli aulta unfrenda ed a quel la pli plascheivla. Ei vegn intonau gl'uffeci da morts; las imposantas melodias dil Benedictus e Miserere muentan bia cors tier novas larmas.

En solemna tgeuadad cumpara lu in jester predicator silla scantschala orfanila. Igl ei buca pli il vegl pastur, che schava cheu resonar sia migeivla vusch per instruir, admonir ed edificar sias caras nuorsas; na igl ei igl aultreveriu decan dil venerabel Capitel Grond, che ha oz la tresta da surdar al stgir ravugl dalla tiara in dils pli stimai e premurai confrars. Cun eloquenza faviala sclarescha el si igl operar e l'impurtonza d'in bien plevon; el fa ver ora, ch'il defunct eri in amitg dils affons, pella giuventetgna in aunghel Rafael sin viadi cun Tobias, in tgamun pils maridai, in miedi pils malsauns e la consolaziun dils moribunds. El consolescha la deprimida pleiv, animescha da tener il defunct en buna memoria cun era dacheudenvi suandar sias sontgas ductrinas e siu bien exemplar, ed agurescha ad ella ladinamein in vengonz successur ella plazza dil defunct. En suffragi per quel vegn ei silsuenter celebrau il pli ault sacrifici – la sontga messa. L'impressiun da quella vegn aunc engrondida tras il commuentond cant dil maiestus Requeim e Dies ire dies illa. Finalmein vegn la bara purtada ord baselgia tiella fossa sut il sun dalla orgla ed il cant coral, che vegnan gl'emprem accumpaignai mo beingleiti totalmein interruts dil plirar e bargir dall'entira pleiv. Nus vein cumpignau bia trestas baras, mo aunc mai ina da schi gronda e generala tristezia e condolenza, da schi profunda impressiun sco questa digl aultreveriu signur plevon Joseph Antoni Durgiai. Cheu han ins sillia megliera moda saviu seperschuader tgei spiritual ch'el seigi staus e tgei ch'in vengonz plevon hagi da muntar. Il defunct ei naschius a **Mustér** il fevrer 1812 e tratgs si el ravugl d'ina pietusa famiglia ... Gl'onn 1846 vegn el numnaus plevon da **Tujetsch** sco successur digl erudit decan Hitz, ed anfla cheu ina nova e pli extensiva sfera d'operaziun. Muort sia edifonta pietad, sia exemplarica conduita, sia ludeivla premura per tuttas bunas caussas, muort siu real e sincer caracter, sia cordialitat e bien humor, era el generalmein stimaus e carezaus. Tut steva haver bugen el e perquei veva el negins inimitgs.

El era buca mo in premurau pastur dallas olmas, mobein era in amitg dil ver sclariment e progress. Perdetga da quei dat il considerabel fondo da scola e las treis casas da scola ch'ein

vegnidas si sut siu presidi dil cussegli da scola. Setractond schebein ils vischins da **Tujetsch** veglien acceptar l'offerida via sull'**Alpsu**, ha el sin publica vischnaunca recumandau da prender si ella e mess avon ils avantatgs, che quella porschi. L'expropriaziun dils funs dattan presentamein empau da far alla vischnaunca, mo nus essan perschuadi, ch'en paucs onns veggien leu tuts ad esser bein cunents culla via nova. Il grondius rempar e la punt da **Sedrun** formeschan schon ussa ina ferma ustonza per la baselgia e santeri, vivon pereclitai dalla furia dil nausch **Drun**. El ha era sedau gronda breigia da liberar ils vischins da **Selva** orasut il prighel da lavina cun instradar lur translocaziun a **Novaselva** tras baghegiar si leu ina nova baselgia e casa da caplania. Pil pauperesser eis el principalmein sefatgs meriteivels cun gidar els tiella cultivaziun d'in toc pastira, vesend che la megliera almosna seigi da procurar ad els lavur e fadigia. Insumma tuttas bunas ideas che semanifestaven per ameglieraziun en fatgs communals, anflavan tier el susteniment entras plaid e cussegli. El era dasperas in grond amatur da biala lectura e senuspeva buca giud sias considerablas annualas expensas per quella. In da ses principals divertiments era l'apicultura, el capeva quella e veva bien cletg, aschia ch'el ha schau anavos 50 schaumas aviuls. Il stupent mèl da ses aviuls ei tiell'exposiziun agricolana a Paris veginus premiaus cun ina medaglia d'argien.

Varga 17 onns ha il defunct operau cun tut laud sco plevon a **Tujetsch** ed acquistau la stema ed affecziun da tut ses parochians.

*Nova Gasetta Romontscha nr. 32, 7 d'uost*

### 1863

Dacuort ha la vischnaunca da **Tujetsch** vendiu ora entgina lenna a ses vischins, che han pagau persuenter bials prezis, gie per in pèr lenns eis ei veginu dau varga 40 frs. in. Cheu para ei ch'ins sappi stimar la lenna e trer ordlunder in grond profit pella vischnaunca, buca sco en bia auters loghens, nua ch'ei vegin ultra dallas sorts communalas aunc cuntuadamein dau ora lenna a privats per pauc ni mo per cagnas. Nus vein repetidamein fatg attents, che sch'ins vegli far spargnar lenna e cultivar ils declinonts uauls, sche seigi ei il meglier mettel da schar pagar biebein per tutta lenna che vegin dada ora a parti.

*Nova Gasetta Romontscha nr. 32, 7 d'uost*

### 1863

La malsogna animalica dalla bucca e dils peis ei ussa totalmein svanida en **Tujetsch**. **Medel** e **Mustér** han retratg lur custeivlas gardas (*guardias*). ... Essend ella **Cadi** abundonza da s.h. pors, sch'eis ei culla avertura dil pass veginu catschau ina brava roscha da quels egl **Uri** nua ch'ei eran tschercai.

*Nova Gasetta Romontscha nr. 33, 14 d'uost*

### 1863

La vischnaunca da **Tujetsch** ha unitamein legiu ora per plevon igl aultreveriu signur canoni Darms, presentamein plevon a **Breil**.

*Nova Gasetta Romontscha nr. 33, 14 d'uost*

### 1863

Nunspitgadamein survegn il vitg da **Sedrun** in grond renomé ellas afferas dalla viafier alpina. Nus vein schon menziunau che nies signur colonel La Nicca hagi encuretg d'unir ils interess dalla **Svizra Centrala** e **Svizra Orientala** tras ina viafier naven da **Lucerna** ad **Amsteg** e da leu tras il **Crizli** a **Sedrun** per s'unir a **Tujetsch** culla viafier dil **Lucmagn**. La gasetta da **S. Gagl** porta ussa in artechel titulaus "Ina vusch da reconciliaziun" tras il qual ella recamonda cauldamein la lingia **Lucerna-Sedrun**; quella sligi si il nuv gordonic el present viriveri dalla viafier alpina; per quella lingia duei tut scriver e plidar, mo quella sappi puspei unir las partidas dalla **Svizra**, aschia che nos cars babuns veggessien aunc en fossa a selegrar lundergiu etc.

*Nova Gasetta Romontscha nr. 34, 21 d'uost*

1863

**Novas collectas per Seewis**

... da **Tujetsch** 80 frs. ...

*Nova Gasetta Romontscha nr. 35, 28 d'uost*

1863

**Clom da quens**

Per saver rugular giu en uorden ils quens dil defunct plevon Joseph Antoni Durgiai a **Sedrun**, dueien tuts crediturs e debiturs da quel dar en lur quens a bundstatalter A. Condrau a **Mustér**. *Nova Gasetta Romontscha nr. 35, 28 d'uost*

1863

Naven da **Mustér** meina in reschniev stradun en la **Val Tujetsch**, la pli biala cuntrada, che jeu hai viu en **Surselva**. Glieud viva sco furniclas, cun oreifras vuschs silmeins per far canera. Ils discours, che jeu hai udiu, consistevan per la pli part ord lamentaziuns e lamentaschuns; ina observaziun che jeu hai fatg en l'entira **Surselva**. **Tujetsch** selamenta presentamein encunter la via nova, che duei esser tscheu memia aulta, leu mamia bassa. Quella malcontententscha vegn a svanir aschigleiti sco **Mustér** fa la projectada carrotschada per celebrar festivamein l'avertura dalla via nova.

Cun il Segner ein ils da **Tujetsch** era buca cuntents, principalmein perquei ch'el ha ad els avon cuort temps priu naven lur signur plevon. Sche tuts plevons dalla **Surselva** ein da lur parochians aschi carezai sco signur Giusep Antoni Durgiai per miert, para d'esser staus a Tujetsch, sch'ein els fetg ventireivels. Dapresent eis ei buca gronda abundonza da plevons catolics en la **Surselva**, ei maunca tals a **Tujetsch**, a **Trun**, a **Glion** ed a **Val**. Sche quellas pleihs vegnissen provedidas cun spir canonics, sche restass ei en la residenza episcopala grad aunc il necessari diember

*Il Grischun nr 35 dils 28 d'uost*

1863

Quels dis ei l'emprema secziun dalla via sull'**Alpsu**, numnadamein dil vitg **Mustér** tochen sils cunfins da **Tujetsch** e **Mustér** vegnida collaudada.

La construcziun dalla secunda secziun, ch'ei pli liunga e sestenda tochen **S. Brida**, va ussa era encunter la fin, mo ton pli plaun va ei culla davosa secziun, nua ch'igl impressari ha fatg plaunsiu da vegnir neutier cun bia luvrers ed ei pli tard vegnius impediuss dalla schliata aura. Ils Uranès han catschau vinavon cun tutta forza, aschia ch'els fineschan uonn bunamein l'entira via sil cuolm e ch'il **Grischun** po in auter onn seduvrar da buca restar anavos ad els. – Cun quella caschun remarchein nus ch'igl inserat el Tagblatt hagi tschaffau si nies artechel sull' "estetica e matematica" dalla storta dalla via tral vitg **Mustér** tut autruisa, che quei che nus vein giu maniau. Quel cuntegn neginas malignas reproschas visavi ad emploiai ni autoritads, nus vein mo detg che quella storta prendi ora mal – il qual tut vegn a stuer dar tier. La davosa remarca el respectiv inserat dil Tagblatt sa pia buca vegnir applicada sin nus. Era nossa metafra da schar ir il cavagl e tener il cavester ei vegnida tschaffada si autruisa. Nus vein mo vuliu dir, che cura ch'ins hagi buca temiu da decretar da bia mellis, dueien ins era buca senuspir da decretar enzacons tschiens; nus vein plidau e secret en favur da quella via e secartein ch'ella seigi profiteivla per **Mustér** e cunzun per **Tujetsch**. Nus supplicassen nies signur collega dil Tagblatt da prender notizia da quellas duas remarcas.

*Nova Gasetta Romontscha nr. 38, 18 da settember*

1863

Schegie che la fiera da **Ligiaun** ei avon esch, sche fan nos marcadonts plaunsiu da cumprar si biestga. In pèr Uranès, che han schon la primavera giu cumprau si ina gronda roscha tiers, ein dacuort vegni sull'**Alpsu** e marcadau enzacons stiarls per bials prezis. Sch'ils marcadonts sedattan buc ora pli fetg, sche ston ins silmeins buca temer ina surcatschada e cheutras ina schliata fiera. Il magistrat da **Ligiaun** ha denton publicau ellas gassetas, ch'ei seigi semtgau leu tut tgei ch'ins sappi garegiar: oreifers pastgs, cumadeivlas stallas, bunas ustrias etc. e zuar tut per in fetg dueivel prezzi. Sco ei vegn detg, lessan ils da **Ligiaun**, ch'ils marcadonts setenessen

buca si aschi ditg a **Sebiastg Giubiasco** e sin via, mobein fagessen fiera a **Ligiaun** dils 4 – 15 d'october. Nos marcadonts han zuar gronda furtina da semetter sin viadi a **Ligiaun**, mo fan plaunsiu dad ir giu en quei marcau; la megliera fiera fan ei il bia a **Sebiastg**.

*Nova Gasetta Romontscha nr. 38, 18 da settember*

### 1863

Ils marcadonts da **Tujetsch** e **Medel** che han ils davos dis aunc cumprau si empau stiarls, ein en tut aura passai il cuolm avon ch'ils **Glarunès**.

*Nova Gasetta Romontscha nr. 39, 25 da settember*

### 1863

Silla stupenta aura dalla jamna vargada eis ei suandau ina ton pli macorta questa jamna. Mardis veva l'entira **Surselva** tratg en il vestgiu d'unviern, a **Glion** era ei tonta neiv sco a **Mustér** ed a **Tschamut** buca pli biara che a **Mustér**, mo ad **Ursera** negina neiv, persuenter ha ei cuflau leu mesjamna suentermiezdì. En consequenza da quella neiv han tuttas alps stuiu vegnir descargadas ils 22 d.q.

*Nova Gasetta Romontscha nr. 39, 25 da settember*

### 1863

Sillas fieras sursilvanas ... Ils Tuatschiners domiciliai en **Baviera** han puspei cumprau si circa 150 vaccas; e zuar il bia armauls da quella colur, stampa e vegliadetgna, che tilan pauc tiels auters marcadonts. Schia ch'els ein in grond gudogn pella **Surselva**.

*Nova Gasetta Romontscha nr. 43, 23 d'october*

### 1863

#### **Clom da quens**

Tumaisch Huonder ei curatur pigl absent Placi Monn, omisdus da **Tujetsch**.

*Nova Gasetta Romontscha nr. 44, 30 d'october*

### 1863

Ferton che la vischnaunca da **Tujetsch** ha tochen sin duas vuschs unanimamein refusau il pugn da recapitulaziun pervia da dismetter la pasculaziun cumina, ha **Sursaissa** tudestga acceptau quel, aber mo encunter ina ferma minoritad.

*Nova Gasetta Romontscha nr. 45, 8 da november*

### 1863

#### **Enguladetsch**

Il medem cass ei avon enzacons onns schabegiaus cun in marcadont da **Tujetsch** damaneivel da **Ligiaun**, che tschapitschava era buca mal per sia tschenta; per cletg era in auter Tuatschin ius en secret bingleiti suenter el ed anflau ses daners.

*Nova Gasetta Romontscha nr. 46, 14 da november*

### 1863

S. Martin han ils da **Tujetsch** cun crusch e cafanun benediu en la nova via en optima fuorma. Cun quei ch'els han giu da visitar neginas capluttas o pella via, han els tier lur processiun duvrau in'uretta meins ch'antruras. Sco solit han tut quels, ch'ein stai ina ga ni l'autra ufficials da vischnaunca survegniu il gentar en claustra per engrazionta memoria, pils buns survetschs ch'ils da **Tujetsch** han giu prestau all'abbazia en in cumbat cun ses renitents subdits dalla **Val d'Ursera**.

*Nova Gasetta Romontscha nr. 46, 14 da november*

### 1863

#### **Nuorsas jastras en Tujetsch**

- 1) Ina nuorsa nera, l'ureglia dretga in snez davon en ed in davos en, la senistra era sco la dretga.
  - 2) In barbeisch (*tschut castrau*) ner cun corns dalla medema noda.
  - 3) In barbeisch grisch grond entir, ureglia dretga ina furcetta gronda davos en, fess ed ina ruosna.
  - 4) In ner entir, ureglia dretga giudasum, fess, duas furclettes davos en, la senistra dus snezs davon en.
  - 5) In ner entir, la dretga osum ina furcetta quadra ed in snez davos en, la senistra tagliau giudasum.
  - 6) In barbeisch gagl entir, la dretga ina furcetta davon en, la senistra ina ruosna.
  - 7) In barbeisch alv, ella dretga in snez davos en, la senistra era in snez davon en.
- Ils proprietaris dils sura tiers dueien entochen ils 20 da november far da saver al suttascret e san quels retrer suenter haver pagau las spesas idas si.
- Rueras**, ils 11 da november 1863  
Duri Wenzin, gerau  
Milsanavon sesanflan aunc tier Tumaisch Schmet a **Cavorgia** duas nuorsas jastras cun sequenta noda:
- 1) In anugl ner, la dretga giudasum ed ina furcetta davos en, in snez davon en ed ina ruosna.
  - 2) In secund anugl ner, la dretga ina furcetta davon en e fess.
- Enteifer 10 dis dueien ils proprietaris vegnir per ellas.
- Nova Gasetta Romontscha nr. 46, 14 da november*

### 1863

#### Resultats dallas elecziuns pils cussegliers naziunals

**Tujetsch**: 128 per Toggenburg ed in per inschignier Bavier. ....

*Nova Gasetta Romontscha nr. 47, 20 da november*

### 1863

#### Clom da quens

Maria Luzia Wenzin ha per ugau gerau Duri Wenzin, omisdus da **Tujetsch**. - Gerau Duri Wenzin ei era ugau dils affons da mistral J. J. Gieriet p.m. cun num: Margreta Cristgina, Celestina, Barla Catrina, Josefa, Geronimi e Jacob Anton.

*Nova Gasetta Romontscha nr. 48, 27 da november*

### 1863

Las vischnauncas da **Mustér**, **Sumvitg**, **Tujetsch** e **Medel**, e sco ins auda era pliras dil district **Glogn**, han concludiu da protestar encunter il conclus dil Cussegl Grond, che prescriva il salari pils scolasts. **Mustér** ha da quellas varts tarmess al Cussegl d'educaziun sequenta protesta: ...

*Nova Gasetta Romontscha nr. 48, 27 da november*

### 1863

Sull'**Alpsu** eis ei iu ils davos 15 dis 4 tropz ord la **Cadi**, ils dus lunsch ora ils pli bials eran da **Breil**. .... Era ils pors entscheivan ussa a trer sull'**Alpsu**, mo donn ch'igl unviern ei finalmein da s. Leci tenor vegl proverbi semess en sessel e serrau giu ils cuolms.

*Nova Gasetta Romontscha nr. 49, 5 da december*

### 1863

Al marcau da s. Andriu a **Glion** ei stau bia glieud, mo buca ton bia tiers. Il caponegozi ei status quel dils stiarls; Taliens e marcadonts da **Tujetsch** e **Medel** han cumprau si biars e zuar per pli bials prezis che quei ch'ei vegniu vendiu a **Ligiaun**.

*Nova Gasetta Romontscha nr. 50, 12 da december*

### 1863

#### Clom da quens

Tumaisch Huonder retscheiva sco assistent ils quens digl absent Gion Rest Monn, omisdus da **Rueras**.

*Nova Gasetta Romontscha nr. 51, 18 da december*

**1864**

### **Duas nuorsas jastras a Tujetsch**

Ina tgigisch nera cun corns e tgau alv, ureglia dretga duas furclettes davon en e fess, la seniastra in mugrin davos en.

Ina tgigisch cun tgau alv che ha mo fess l'ureglia seniastra.

Ils proprietaris dueien enteifer 20 dis s'adressar tier signur Mucli a **Cavorgia**.

*Nova Gasetta Romontscha nr. 4, 22 da schaner 1864*

**1864**

Calonda mars va la posta sursilvana buca pli mo tochen **Mustér**, mobein direct a **Sedrun**, ed in auter onn sull'**Alpsu**. Sco ins auda ha ei dau in ferm cumbat, schebein la posta duei ir mo a **Sedrun** ni tochen **Rueras**, mo finalmein ha la capitala purtau la victoria.

*Nova Gasetta Romontscha nr. 6, 5 da fevrier*

**1864**

### **Statistica dils tiers**

#### **Tujetsch**

vaccas / genetschas	477
stiarlas / mugias	240
stiarls	188
armauls	1131
cavals	25
cauras	1413
nuorsas	1103
pors	307

*Nova Gasetta Romontscha nr. 11, 11 da mars*

**1864**

Il favugn ha quels dis scadenau ora la neiv taluisa, ch'igl ei ussa en **Surselva** terrein tochen **Mustér** e ch'ins savess, sch'ei fuss buca da temer pli neiv e ferdaglia, schon ussa sillas spundas da **Selva** e **Tschamut** entscheiver cullas lavurs pella via sull'**Alpsu**.

*Nova Gasetta Romontscha nr. 11, 11 da mars*

**1864**

### **Clom da quens**

Duri Berther ei assistent digl absent Giachen Antoni Beer, omisdus da **Tujetsch**.

*Nova Gasetta Romontscha nr. 14, 1. d'avrel*

**1864**

Il negozi da biestga ei ualtsi vivs en **Surselva**. Questa jamna ei in Tudestg che ha ina gronda meria cun varga 100 vaccas ad **Ebersberg** en **Baviera**, staus tochen **Tujetsch** per grondas e vaccas giuvnas che han aunc da far vadi, en tut ha el cumprau si 30 per bials prezis.

*Nova Gasetta Romontscha nr. 17, 22 d'avrel*

**1864**

### **Collecta per Riom**

**Tujetsch** 150 frs.

*Nova Gasetta Romontscha nr. 18, 29 d'avrel*

**1864**

### **Clom da quens**

Assistent Giachen Antoni Schmid ei ugau dalla dunna ed affons dil defunct Giachen Antoni

## Soliva, tuts da **Tujetsch**

*Nova Gasetta Romontscha nr. 20, 13 da matg*

### 1864

Vid la via nova sull'**Alpsu** vegn ei presentamein luvrau cun tutta forza; sil territori grischun ein circa 400 luvfers ed ei vegn aunc adina novas roschas umens ord l'**Italia**. – La posta sursilvana ei uonn vegnida honorada cun ina nova, gronda biala crotscha, mo sche quella entaupa denter **Tavanasa e Zignau** ina menadira da cavals a pèr, sche resca ella da buca puder speras ora. Igl ei in conclus dil Cussegli Grond, che quellas tendas vias da communicaziun, fatgas all'entschatta pli graschlas, dueien vegnir slargadas, schi gleiti sco il basegns semuossa. Cheu ei ussa quella urgenza evidenta e sch'il cantun vul buc ademplir sia empermischun, sche vegn la ligia muort la posta a sunar si el. Sco ins auda, vess la via da **Portenza** tochen **Grüschi** zun da basegns dad ina slargada.

*Nova Gasetta Romontscha nr. 21, 20 da matg*

### 1864

#### Alp da cavals

La vischnaunca da **Tujetsch** pren si ad jarva 9 cavals a 17 francs in; in cavagl cun pulein paga aber cun quel 20 frs. Ultra da quei vegn ei aunc da bonificar il pastur. Per quei, sco per ulteriur sclariment, san ins s'adressar tier signur gerau Sep Antoni Mucli a **Sedrun**.

*Nova Gasetta Romontscha nr. 23, 3 da zercladur*

### 1864

#### La fiera da **Tujetsch**

vegn tenida quest mardis proxim ils 14 da quest a **Sedrun**.

#### La suprastanza da **Tujetsch**

*Nova Gasetta Romontscha nr. 24, 11 da zercladur*

### 1864

Sillas fieras sursilvanas dil zercladur, tenidas a **Trun, Glion, Ursera e Tujetsch** ei generalmein buca stau biara e biala biestga, tuttina han las vaccas e mugias pagau andants prezis; sco raritad pella **Cadi** relatein nus, ch'ei seigi la fiera da **Tujetsch** vegniu vendiu ina mugia tumpriva sin d'atun per 277 francs e miez. Las cauras han pagau per miezvia, mo il mender ei iu ad **Ursera** cullas nuorsas dalla **Cadi**, ton pli che plirs marcadonts vevan cumprau si quellas caramein. Il meglier esit han ils cavals giu, che vegnan schai via la stad per tscheins egl **Uri**; igl ei vegniu pagau 8 – 13 marenghins per cavagl; mo ord la frequenza da viandonts, che semuossa schon ussa ad **Ursera**, pon ins concluder, ch'ils ustiers fetschien aunc cun quels lur bien gudogn.

*Nova Gasetta Romontscha nr. 25, 18 da zercladur*

### 1864

Ils 27 da quest ei la crotscha gronda postala da 4 cavals, ornada cun matgs, ida per l'emprema gada a **Tujetsch** cun dus postigliuns, in conductur dall'emprema classa e cun ina representazion dil biro postal, dil telegraf e dils hotels a **Mustér**. Remarcabel che la crotscha, respectiv ils cavals, levan buca passar l'enconuschenta storta, che meina ord il vitg **Mustér**, mo aunc pli remarcabel che quels herolds che han fatg da saver als Tuatschiners la vegnida d'in niev temps, ein damaneivel dalla classica ruina **de Putnengia** casualmein s'entupai cun in tipus dil temps vegl – in vegl diplomat, che ha enamiez nies tschentaner, 1850, cun sias caultschas cuortas, priu cumiau dalla sala dil Cussegli Grond e viva ussa retratgamein en siu eremitasch. Quella sentupada dil temp niev e vegl vess dau caschun tier bein enqual seriusa reflexiun, mo ei era ina legra cumpignia, che ha els hotels da **Tujetsch** schau viver il temps niev ed il vegl e reconciliau las duas rivalas **Sedrun e Rueras**.

*Nova Gasetta Romontscha nr. 27, 1 da fenadur*

### 1864

La fiera leventinèsa da s. Pieder 29 da zercladur a **Quint**, che vegn era frequentada da **Medel e**

**Tujetsch**, ei buc ida bein e zuar principalmein pellas tunas ch'ei seigi tras nuorsas pigurèras e vaccas talianas rut ora la malsogna ella **Val Blegno** ed ella **Leventina**. Ils aspects pil negozi da biestga ell' munglassen semidar sin d'atun, tschelluisa pudessen las fieras buc ir ton bein.  
*Nova Gasetta Romontscha nr. 27, 1 da fenadur*

#### 1864

Ils 30 da zercladur ei il **Pass Lucmagn** vegnius serraus muort la zoppina el vischinont **Tessin**.  
(*Puspei aviarts tenor la gasetta dils 8 da fenadur.*)  
*Nova Gasetta Romontscha nr. 27, 1 da fenadur*

#### 1864

La zoppina ei ussa era rutta ora denter la biestga d'**Ursera** sill'**Alpsu**, aschia che quei pass ei serraus per tiers che vulan vegnir digl **Uri**. Speronza ch'el vegni d'atun puspei aviarts, tschelluisa pudessen sin d'atun bia Sursilvans ir ad **Ursera** e mazzar lur engarschauns, ch'els han tenor il solit tarmess questa stad leu ell'alp. Sut tals aspects vegnan las patrunas da quels s.h. tiers ad esser fetg engrazieivlas alla regenza, ch'ella ha ussa decretau, che la serrada pervia dalla zoppina duei buc impedir il transport da carn frestga. Speronza ch'ellas vegnan a mussar lur renconuschientscha cun far a nos treis caus cantunals in present da treis famus schambuns sursilvans, ch'ein buca mo beinvesi a **Cuera**, mobein perfin ell'.

*Nova Gasetta Romontscha nr. 29, 15 da fenadur*

#### 1864

Schegie che la stagion pils viandonts ella **Svizra** alpina ha schon daditg entschiet, sch'ein aunc ussa zun paucs jasters passai atras la **Surselva**. La posta arriva aunc adina il bia vita a **Mustér** e perfin ils conducturs, che han uonn entschiet a far lur tur tochen **Sedrun** enstagl mo a **Glion**, per dar cheutras empau pli gronda splendor alla ruta sursilvana, ein tutteninaga stulli. Ei para, ch'ils jasters veglien refierer da mirar giu la maiestusa **Surselva** entochen in auter onn, che l'**Alpsu** ei aviarta per crotschas. Il viadi a pei, che fuss schi avantagius pil spert e pil tgierp, vegn tier nossa declinada generaziun pli e pli ord moda. Dad in temps, nua ch'ins veseva aunc neginas crinolinas, vegnevan bia damas frestgamein sull'**Alpsu**, armadas cun in fest alpin, mo ussa ei quei ina gronda raritad.

*Nova Gasetta Romontscha nr. 30, 22 da fenadur*

#### 1864

Uonn pon ils catschadurs da camutschs spitgar ina biala catscha. Ella alp **Nalps** (**Tujetsch**) han ins viu ina roscha da 45 camutschs ed era dad auters mauns audan ins da bialas cumpignias; mo donn ch'ils Tessines pon dar a dies a quellas selvaschinas in meins avon che nos catschadurs.

*Nova Gasetta Romontscha nr. 33, 12 d'uost*

#### 1864

La schitgira digl uost ha catschau vinavon ils èrs, mo anavos ils risdivs ch'eran serefatgs tras ils temporals dil fenadur. Remarcabla ei stada la midada dalla temperatura denter ils 9 e 10 d'uost. La steppadad da mardis vargau veva alzau il thermometer a **Mustér** sin 23 grads, l'auter di era ei aber in suffel, che la glieud schelava e gievgia damaun neveva ei a **Tujetsch** e **Medel** ella bassa. Per entgins dis san aschia ils avdonts da **Surrein** esser senza tema pervia dil tun. Nus stuein mo mal, che bein enqualin vul aunc adina fierer sil pauper telegraf la cuolpa, ch'il tun detti ussa era giu ellas vals, enstagl mo sils cuolms e sch'in da quels ha detschartamein declarau, che pli da vegl seigi era stau fatg si in da quels telegrafs en **Surselva**, mo ins hagi muort il tun puspei stuiu dismetter el, sche stuein nus declarar, ch'el mondi empau en fanzegna.

*Nova Gasetta Romontscha nr. 33, 12 d'uost*

#### 1864

Denter ils luvrers lombards sill'**Alpsu** ei quels dis succedi in cass dublamein trest. Suenter haver buiu bravamein ensemble dumengia vargada a **Rueras**, ha in cert Mainetti, in um rabiau e

temius da ses camerats, maltractau la notg sin gassa siu cusrin *Biaggio Cantalupi* taluisa, che quel ha piars la schientscha ed ei l'auter di morts. Tenor la secziun fatga veva el survegnui fridas mortalas el tgau. Il tribunal dalla **Cadi** ha concludiu da surdar il delinquent alla dertgira cantunala e schau transportar el a **Cuera**. A mesavia ha el vuliu fugir dalla giustia humana, mo ha persuenter spert stuiu cumparer avon il suprem tribunal, la divina giustia. Arrivaus a **Glion** la sera dils 16 d.q. han ils schendarms serrau en el en ina combra si ault el Hotel Lucmagn e priu naven ad el la vestgadira, sinaquei ch'el sappi buca fugir. Mo il delinquent ha buca senuspiu da fugir sco sanscullottes, allas 11 dalla notg selai el ord finiastra, duvrond ils batlinis per tretscha, mo in nuv da quels disnua, el dat giu, scarpa il fildirom dil telegraf e rumpa en il tgau vid in baun crap spella casa. In vischin ha viu quei, fa canera, ils schendarms dattan neutier, cadeinan el miez morts, mo sias plagas eran mortalas, aschia ch'el ei spartius la damaun. Il mazzau ed il sesturniu han in tschuppel petschens affons; la dunna da Mainetti ha aunc dacuort giu secret ad in enconuschent, ch'ei duessien pell'amur dar bein adatg sin siu um, sinaquei che quel fetschi en sia gretta neginas disgrazias.

*Nova Gasetta Romontscha nr. 34, 19 d'uost*

#### 1864

Cristgina Sievi ha per ugau gerau Paul Schmid, omisdus da **Tujetsch**.

*Nova Gasetta Romontscha nr. 34, 19 d'uost*

#### 1864

Denter ils luvrers sill'**Alpsu** ei ils 19 d.q. daventau ina nova sventira; in Tirolès *Caspar Alexandri* ha piars la veta cun siglientar crappa. Nunvulend il "schutz" ir suenter haver mess fiug silla puorla, va el vi sul crap en cun in schuaun evidau, mo enaquelle peglia la puorla spert fiug e siglienta um e crap en in'altezia d'ina casa. Il disgraziau era schizun plagaus, ch'el ei morts schi gleiti sco el ei staus purtaus en casa a **Tschamut**. Perfin siu cunti en sac era ius tut en tocs.

*Nova Gasetta Romontscha nr. 35, 26 d'uost*

#### 1864

La cumissiun taliana pella viafier ei ils 26 d'uost arrivada a **Mustér** suenter haver fatg quei di in'excursiun ella **Val Sumvitg**, per mirar empau il terren dalla lingia sulla **Greina**. Ils 27 eis ella serendida sil **Lucmagn** tochen **S.Gion** ed ils 28 a **Tujetsch** per considerar con bein ch'ins sappi sviluppar da leu en la lingia dil **Lucmagn**.

*Nova Gasetta Romontscha nr. 36, 2 da settember*

#### 1864

**Mustér**, ils 7 da settember, allas 3 suentermiezd. Victoria! Ual quest mument arriva cheu l'emprema crotscha dad **Ursera**. Era en via sull'**Alpsu** ein oz ils signurs inschigniers Cuonz e Depuoz i per l'empremagia cun crotscha.

*Nova Gasetta Romontscha nr. 36, 2 da settember*

#### 1864

Ferton ch'ils marcadonts da biestga mavan auters onns da quei temps sin tuts mauns a cumprond si tiers,stattan els uonn aunc ussa grad eri. Las schliatas tunas ord l'**Italia**, la zoppina el **Tessin**, la seida fallida, il pauc pavel ell'aulta **Italia** dattan pign anim da cumprar si stiarylamenta. Nus stuein denton remarcar, ch'il pavel seigi mo fallius ellas muntognas e buc ella Bassa sco Taliani han segirau a nus; la reha raccolta da graun ella **Italia** furnescha daners ed empau tiers drova l'**Italia** en scadin cass. Esser precauts ei endreg, mo buca memia temeletgs. Capito, "voi Croaron, che cacciate via la roba col baston?" (sco ils Taliani dian dils marcadonts romontschs). Ils puleins paran denton da pagar bein. A **Tujetsch** eis ei vegniu Tudestgs, che han cumprau si ina roscha puleins da questa primavera per 8 e 9 marenghins in. Sco ins legia ellas gasettas, ein ils cavals era stai fetg tschercai sillas fieras bernèses. Per cavals giuvens d'in onn e miez seigi ei vegniu pagau 400 – 600 frs. il tgau.

*Nova Gasetta Romontscha nr. 38, 16 da settember*

## 1864

Sco schon enconuschent ha il Cussegli Grond da quest onn, sin giavisch dalla vischnaunca da **Tujetsch**, concediu a quella ina fiera sin ils 12 d'october, ch'ei a nies manegiar fetg nizeivel, principalmein pella **Cadi**, aber ina remarca fuss forsa adequata da metter el public ariguard quella fiera, per leutras sentir ils meinis dad auters bein manegionts burgheis. ... Ord las sura allegadas raschuns fagessen nus bugen la sequenta remarca sur dalla fiera da **Tujetsch** digl october. Fuss ei buca meglier per il general traffic da biestga da metter quella fiera sin ils 27 ni 28 d'october, aschia amiez temps denter quella da **Trun** e quella da s. Martin a **Mustér**. Ils tiers che fussen cumprai sin las fieras avon fussen mess giu damaun dils marcadonts e lura savessen ei aunc cumprar e dismetter ina gada avon quella da s. Martin. Quei ei nossa idea, nus havein vuliu metter quei el public ed havein speranza che persunas che capeschien quei pli bein, vgnien a schar udir lur meinis sur da quei impurtont fatg.

In pur ella **Cadi**

*Nova Gasetta Romontscha nr. 39, 23 da settember*

## 1864

En tutta aura ha la posta fatg dumengia vargada siu tur ad **Ursera** culla nova crotscha per quella rutta e cun 5 cavals, ella ei arrivada leu las 10 dallas sera e la damaun denter las 7 e las 8 eis ella en tutta neiv puspei vgnida a **Mustér**. En 4 uras selai ei tgunschamein far la crotschada da **Mustér** ad **Ursera**, aschia che la posta sa en in di ir cumadeivlamein da **Cuera** ad **Ursera**.

*Nova Gasetta Romontscha nr. 39, 23 da settember*

## 1864

Ils 12 e 13 d.q. ha la collaudaziun federala dalla via sull'**Alpsu** naven da **Mustér** tochen **S. Brida** giu liug tras signur inspectur federal Cuonz ed il signur cusseglier guvernativ Wassali e capoinschignier Salis. El medem temps ha il cantun era collaudau la davosa secziun, la tenda naven da **S. Brida** tochen sils cunfins cantunals spel lag, la quala signur Plattner ha giu surpriu da baghegiar. Mo donn ch'igl ei ariguard la construcziun-su (Oberbau) buca vgnien observau la medema conformitad denter il **Grischun** ed **Uri**, cheutras vgn la pareta dalla via sigl intschess **Grischun** pregiudicada. Il **Grischun** ha baghegiau fetg solid, mo en consideraziun dils gronds cuosts ha el buca vuliu far ella pli luxuriusamein, che quei che la Confederaziun veva prescret. **Uri** encuntercomi ha viu en, ch'el seigi vgnius bein a part culla partizun dil subsidi federal per l'**Alpsu** e sin siu territori era la construcziun ultra da quei buca schi custeivla, cun quei ch'ei era da far neginas punts etc., perquei ha il guvern uranès schau a siu inschignier Diethelm cumpleina libertad e quel ha lu vuliu far semussar ils Uranès renconuscheivels visavi la Confederaziun, cun construir la via pli lada e luxuriusa, che quei che quella veva prescret. **Uri** ha dils 350'000 frs. destinai dalla Ligia pell'**Alpsu** survegni 150 000 e cun metter vitier mo aunc 30'000 frs. cuviera el tut sias expensas, priu ora l'expropriaziun. Aschia vess il **Grischun** buca riscau bia d'era surprender la construcziun sigl intschess uranès sut las offertas fatgas a siu temps. La muntogna dall'**Alpsu** ha tras la via nova survegni ina tut pli emperneivla vesta, ella ha piars empau da siu caracter selvadi e la nov' aveina da traffic denter la giganta pezza dil **Badus** e **Crispalt** vgn en paucs onns a purtar ad ella gronda vivacitad cunzun inaga che la via sulla **Furca** ei finida. Schegie scaffidas e battegiadas sco straduns militars,lein tuttina sperar che quellas novas vias laschien buca schi spert encorscher lur caracter guerril, mobein surveschan per promover il traffic, la beinstonza, la concordia ed uniun denter avdonts dalla **Svizra Centralalpina**.

*Nova Gasetta Romontscha nr. 42, 14 d'october*

## 1864

Nos marcadonts, returnai dalla fiera da **Ligiaun**, dattan aunc mendas novas da quella ch'ils Glarunès e zuar per raschun, ch'ils sez vevan bia vaccas, las qualas han pagau bein. Sco raritat remarchein nus, ch'ina genetscha tuatschina hagi pagau 17 marenghins, probabel la pli cara vacca ch'ils Tuatschins han vendiu enzacu. Ils stiarls e mutgs encuntercomi han tratg mal, 12 pulits stiarls ein vegni sgavignai per 6 marenghins il pèr! In auter marcadont ha dau via 5 mutgs ed in stierl per 23 marenghins, in tierz ha schau ir dus mutgs per 9 marenghins! Aschia

eis ei buca da sesmarveglier, che nos marcadonts vulan pagar pauc pils stiarls restai cheu anavos, e che bia purs tschercan da vender vaccas ed envernar ils stiarls. A **Ligiaun** eis ei aunc restau anavos da quei da melli tgaus, ch'ein vargai ni restan sin l'autra fiera, en tut possi ei esser stau 4 – 5000 armauls. Ils cavals han buca pagau sco ei vegneva detg, perquei eis ei vegniu turnentau puleins. Il pastg era caraschia e tras quei las expensas pli grondas che ordinari. Cun tut ir mal vess ei aunc saviu ir mender, sch'ei vess muncau la bialaura. Conclusivamein aunc ina remarca. Sch'igl ei ver, quei ch'in marcadont ha a nus segirau, numnadamein ch'ils mutgs da **Medel** hagien uonn valiu silmeins miez marenghin dapli ch'ils da **Tujetsch** e zuar per raschun, ch'ils emprems hagien giu sust las ruhas dil settember, ferton che quels da **Tujetsch** hagien stuiu star ordaviert, sche duess quella circumstanzia esser ina buna stimulaziun per ranschar suschnas ellas alps.

*Nova Gasetta Romontscha nr. 42, 14 d'october*

#### 1864

La nova fiera da **Tujetsch** ha giu da muentar pauc, ei era empau biestga mo bunamein negins marcadonts cun quei ch'ils Uranès e biars da **Tujetsch** eran schon sin viadi ad **Altorf**. Duei la fiera da **Camischolas** prosperar, sche sto ella vegnir fixada sin gliendisdis avon la fiera d'**Altorf**, che croda sillla gievgia avon s. Gagl. Ins ei spanegiaus co ei vegn ad ir sillla frequentada fiera ad **Altorf**, nua ch'igl ei vegniu catschau grond muagl, cunzun ord il **Tessin**. Ins tema che quella surcatschada pudessi efectuar ina sbassada dils bials prezis dallas vaccas.

*Nova Gasetta Romontscha nr. 42, 14 d'october*

#### 1864

##### Nuorsas jastras en **Tujetsch**

- 1) In tschanc alv, fess la dretga ed ina furcletta davon en, la seniastra tagliau giudasum fetg.
- 2) In tschanc alv, la dretga in snez davon ed en in entraviers davos en.
- 3) Ina nuorsa alva, la dretga fess duas gadas ed ina furcletta davos en.
- 4) Ina nuorsa, che ha tagliau giudasum la dretga, in snez davon ed in davos en, la seniastra ina ruosna.
- 5) In anugl alv grond, giudasum la dretga, la seniastra dus snezs davos en e sco slusel ella medema davon ora giu.
- 6) Ina nuorsa, tagliau giudasum la dretga, ina furcletta davon en, la seniastra ina furcletta davon en.

Ils proprietaris da quels tiers dueien enteifer 15 dis s'adressar tier la suprastonza da **Tujetsch**

**Tujetsch**, ils 10 d'october 1864

*Nova Gasetta Romontscha nr. 42, 14 d'october*

#### 1864

La direcziun postala ha scret ora en libra concurrenza, tgi che vegli menar dil zercladur 1865 naven la posta sursilvana silllas staziuns **Cuera-Rehanau**, **Rehanau-Flem**, **Flem-Glion**, **Glion-Trun**, **Trun-Mustér** e pils treis meins da stad fenadur, uost e settember la posta dall'**Alpsu** silllas satziuns **Mustér-Tschamut** e **Tschamut-Ursera**. Las cundiziuns san ils aspirants mirar suenter sillbs biros postals a **Cuera**, **Glion** e **Mustér** e ston dar en sillbs 15 da december. Tgei uras che la posta dall'**Alpsu** vegn a partir a **Cuera** ed **Ursera**, nua ch'ella vegn a prender il gentar – sil qual ils ustiers dalla **Surselva** ein spanegiai – quei ei aunc nuota fixau, bein aber, che la posta sursilvana duei quels meins, ch'ella va buca sull'**Alpsu**, ir naven da **Cuera** per las 7 enstagl sco sut il present uorden schon las 6 dalla damaun.

*Nova Gasetta Romontscha nr. 48, 25 da november*

#### 1864

Per cumpletar e per part era rectificar nossia davosa notizia ariquid la futura posta sull'**Alpsu**, savein nus ussa notificar, che quella parti da **Cuera** allas 7 dalla damaun, arrivi a **Glion** allas 11 e 5, laschi leu 25 minutias temps da gentar, mondi las 11 e 32 a **Trun**, arrivi leu l'ina e 30, a **Mustér** las 15, a **Tschamut** las 17 e 25 ed ad **Ursera** las 19 e 30. Allas 5 dalla damaun banduna

ella **Ursera**, vegn a **Tschamut** las 7 e 30, a **Mustér** la 9 e 10, a **Trun** las 10 e 20 ed a **Glion** las 12 e 10, leu stat ella 25 minutias e vegn a **Cuera** las 16 e 35.

*Nova Gasetta Romontscha nr. 49, 2 da december*

#### 1864

##### **Annunzia**

La vischnaunca da **Tujetsch** ei intenziunada da schar plantar en seiv viva suenter la via nova, leu nua ch'ina classena ei necessaria per schurmetg dil funs. Tgi che ha tschaffen da surprender quella lavour, duei tochen ils 20 da december, onn current, dar en alla suttascretta, con ch'el pretendi pella tschuncheisma da quella seiv, la quala el sto garantir. Ulteriur sclariment dat la suprastonza da **Tujetsch**.

*Nova Gasetta Romontscha nr. 49, 2 da december*

#### 1864

Alla via nova sull'**Alpsu** han ins d'engraziar, ch'era entgins Uranès ein vegni a **Glion** e cumprau si enzatgei vaccas. ...

*Nova Gasetta Romontscha nr. 51, 17 da december*

#### 1864

##### **In stierl brin**

cun ina corda enta culiez, ell'ureglia dretga davon en in vinchelmess (*squadra*), ina ruosna ed in snez davos en ei il davos marcau da **Glion** suentermiezdi ius a piarder. Tgi che sa dar novas da quel ei grondamein supplicaus da schar saver Gion Antoni Curschellas a **Tujetsch (Bugnei)**.

*Nova Gasetta Romontscha nr. 51, 17 da december*

#### 1864

##### **Tier jester**

A **Sedrun** tier Vigieli Josef Monn ina caura nera cun tachels alvs, ureglia dretga in snez davon e davos en, in encunter l'auter en tiel tgau.

Il proprietari duei vegnir pil tier enteifer 10 dis.

*Nova Gasetta Romontscha nr. 52, 24 da december*

#### 1864

Ferton ch'ins auda, ch'ils prezis dils funs veglien sbassar tscheu e leu, ei quei buc il cass ella **Cadi**. Las vischnauncas da **Mustér** e **Tujetsch** han tier l'expropriaziun pella via sull'**Alpsu** fatg interessantas exprientschas. Dacuort ei egl ingant vegniu vendiu egl isolau uclaun da **Mompe Medel** roschada frustets, dils quals il pli grond mesirava mo 100 tschuncheismas, per 1 fr. 50 la tschuncheisma – ferton ch'ins vess avon 14 onns saviu cumprar leu pli bials funs per 50 raps la tschunchesima.

*Nova Gasetta Romontscha nr. 53, 31 da december*

#### 1864

##### **Dus anseuls jasters**

In stral ed in tgietschen, noda: ureglia dretga tagliau giudasum, fess, ina furcletta davon en ed in snez davos en, sesanflan tier Fidel Anton Gamboni a **Sedrun**.

*Nova Gasetta Romontscha nr. 53, 31 da december*

#### 1865

##### **Tiers jasters**

A **Sedrun** tier Vigieli Jagmet: ina tgigisch alva muota, ureglia dretga tagliau giudasum, fess e dus snezs davos en, ed ella senistra in snez davos en.

*Nova Gasetta Romontscha nr. 3, 20 da schaner*

#### 1865

Statalter Paul Riedi ei assistent da M. Catrina Riedi, feglia d'Augustin Riedi, tuts da **Tschamut**.

*Nova Gasetta Romontscha nr. 3, 20 da schaner*

**1865**

Il menar la posta denter **Mustér** e **Rueras** cun ina schesa ni schletra da dus plazs mintgadi, priu ora ils treis meins stad che la posta va sull'**Alpsu**, ei scret ora en libra concurrenza. Las cundiziuns san ins leger suenter el document deponius el biro postal a **Mustér**, nua ch'ins sa era retrer ils formulars per dar en da menar quella posta, il qual sto daventar entochen ils 4 da fevrer. Gl'accord entscheiva cun calonda mars. Essend che **Tschamut** vegn ussa honoraus cun in depot da posta, sche san ils vischins aspirar sin quella piazza. Per tener leu la posta ed ir treis dis ad jamna a **Rueras** pils effects da posta – quei temps che la posta va buca sull'**Alpsu** – survegnan ei 100 frs. ad onn. Tochen ils 4 da fevrer ston era quels aspirants s'adressar tiel signur postdirector a **Cuera**. Curascha pia vus speculants giudapeis al **Culmatsch** e **Badus**. Vus aber, avdnts dalla venerabla **Putnengia**, che essas stai aschi disgraziai ariguard la via nova e la piazza fiera, seconsolei e fagei fiasta, a vus ei finalmein daventau salit! Vus survegnis ussa mintgadi las nuvialas digl entir mund e veis era oreifra caschun da mintgadi ir en crotscha ni en schletra.

*Nova Gasetta Romontscha nr. 4, 27 da schaner*

**1865**

**Tiers jasters**

A **Tujetsch (Cavorgia)** tier Gion Antoni Schmet ina ansola muota, ureglia dretga da sum, dus snezs davos en, seniastra ina ruosna.

*Nova Gasetta Romontscha nr. 4, 27 da schaner*

**1865**

Silla libra concurrenza scretta ora per menar la posta sursilvana e la stad quella dall'**Alpsu** eis ei stau plirs che han dau en e suenter ch'igl ei als aspirants danovamein stau vegniu insinuau dad ir pli bass cun lur pretensiuns, ei la menadira tenor usit vegnida surschada a quels, che han fatg il bienmarcau: da **Cuera** a **Glion** a signur Kündig da **Turitg**, che ha avon entgins onns era giu surpriu da menar la posta engiadinesa, da **Glion** tochen **Tschamut** als signurs frars Berther a **Mustér** e sull'**Alpsu** als signurs Meier ad **Ursera**.

*Nova Gasetta Romontscha nr. 5, 2 da fevrer*

**1865**

A **Selva** – el liug classic dallas lavinas, nua che pliras cruschs fan endamen las disgrazias succedidas e la cadicitad dalla veta humana – ei sonda vargada in ferm e curaschus giuven, Florin Venzin, vegnius ella lavina, *4 da fevrer 1865*. Malgrad la ruha aura ha el vuliu esser ius alla catscha si pellas spundas vi da tschei maun dil **Rein**. Nunvegnend el la sera a casa, han sia glieud entschiet a temer e fatg sedar ora per el. Cheu vegn ei lu raquintau, ch'ins hagi entuorn las 4 udiu a vegnend in squatsch lavina vi da tschei maun, duront che la nebla eri en. Spert van lu leu encunter umens cun petgs e palas, vesan la lavina, anflan gl'emprem la buis e lu era il disgraziau, in bratsch sut la neiv en. El era morts ed ord tut quei, ch'ins ha fatg stem dad el, pon ins comprender, che la lavina seigi rutta ora sur ses peis sin ina teissa spunda. Dieus hagi fatg grazia cun sia olma!

*Nova Gasetta Romontscha nr. 6, 10 da fevrer*

**1865**

**In s.h. bov entir**

da bi peil e beinfatgs ei venals a **Tujetsch**. Tier tgi san ins endriescher ella stamparia dalla Nova Gasetta Romontscha.

*Nova Gasetta Romontscha nr. 6, 10 da fevrer*

**1865**

Vigieli Valier ei assistent dall'absenta Liberata Valier, omisdus da **Tujetsch**.

*Nova Gasetta Romontscha nr. 6, 10 da fevrer*

## 1865

Sco rectificaziun dalla nuviala purtada ariguard il menar la posta sull'**Alpsu**, remarchein nus, che la staziun da **Tschamut** ad **Ursera**, seigi vegnida suradada a signur dr. Christen ad **Ursera** e buca als frars Meier da leu.

*Nova Gasetta Romontscha nr. 7, 17 da fevrier*

## 1865

Ina Tuatschina ch'ei vegnida tarmessa sco pintga buoba tiels Schuobs ed ei leu plaunsiu sedomiciliada a **Minca**, ha nus leu plirasga remarcau: "Ella sappi nunpusseivel capir, co geniturs possien tarmetter lur pigns affons en ina tiara jastra, senza mirar pli lunsch co ei vegnien cavegliai giudamaun; ella hagi zuar giu la ventira da vegnir tier bien patrun, mo ella seigi biaga stada mal, vesend co auters affons seigien vegni tarschinai."

*Nova Gasetta Romontscha nr. 7, 17 da fevrier*

## 1865

Tochen oz, ils 10 da matg, ha ei en quest meins aunc finadin di neviu pauc ni bia, ed aschia eis ei buca da sesmarvegiar, sche las gassetas raquentan da grondas nevadas e cuflaus da tscheu e leu. **Tujetsch** ha da 15 dis enneu era giu neiv, cuflas e lavinas en abundonza; mo per ventira eis ei succedi neginas disgrazias. Ils Tuatschins sesanflan denton temps da grondas neivs en ina fatala situaziun cun lur via nova, essend che negin vul cheu seschar neu da tener aviert ella. Las vischnauncas da **Mustér** e **Tujetsch** han pervia dil manteniment surpriu neginas autres obligaziuns che da menar la galera, mo era il cantun vul saver pauc da better ora la neiv ed ha leusuenter dau sias instrucziuns al viè cantunal a **Tujetsch**. La posta federala ei obligada da far mintgadi siu tur denter **Rueras** e **Mustér**, mo co duei ella passar tras cuflaus da 12 peis altezia, sco igl ei stau quels dis ella **Val Bugnei?** **Tujetsch** less buca sepregiudicar cun porscher memia bia agid; **Mustér** tratga, sch'ils Tuatschins vulan buca vegnir ora, sche san ei star leuen, ed il cantun para da prender si lev pils habitonts da quella tiara dall'empermischun, nau che mèl e latg flessegian en abundonza. Il respectiv protocol dil Cussegl Grond di zuar, che pervia dad arver la via denter **Mustér** e **Tujetsch** temps d'unviern, duei vegnir s'entelgiu pli tard, mo sin tgei congress che quella questiun duei vegnir decidida, san ins aunc nuot. Essend ch'ei retracta cheu per ina via militara, sche savessen ins ad interim liberar la recluta da **Tujetsch** e **Mustér** dil survetsch sil **Rosrboden** sut la cundizion, ch'ella tegni aviert temps d'unviern quella via e retili persuenter la schulda dalla Confederaziun.

*Nova Gasetta Romontscha nr. 10, 10 da mars*

## 1865

Silla communicada fatalitat pervia da better ora la via silla via dall'**Alpsu** denter **Mustér** e **Tujetsch**, consolescha ussa il Bund quellas duas vischnauncas cun segirar, che la medema questiun vegni era a nescher silla via dalla **Furca**, inaga che quella seigi finida.

*Nova Gasetta Romontscha nr. 11, 17 da mars*

## 1865

### Ina caura

ner gaglia, strala, ureglia dretga fess, seniastra in tarden, ei ida a piarder. Tgi che sa novas da quella, ei supplicaus da schar saver Lucas Cavegn a **Sedrun**.

*Nova Gasetta Romontscha nr. 11, 17 da mars*

## 1865

Giachen Antoni Berther, ei ugau da Duri Battesta Monn, omisdus da **Sedrun**.

*Nova Gasetta Romontscha nr. 11, 17 da mars*

## 1865

Ferton che la fiera da **Trun** dils 20 d.q. ha giu pauca e cara biestga (per ina vacca tuatschina eis ei vegniu pagau 13 marenghins) eis ei stau sil marcau da **Glion** dils 24 in grond biestgam ed ei vegniu vendiu per prezis buc aults. ... Stiarls era ei muntanera e bienmarcau, per 80 – 85 frs. in,

eis ei vegniu cumpbau si biars bials e grass stiarls; ils da **Tujetsch** e **Medel** vessen perquei bugen fatg si pli gronda roscha, mo ei maunca ad els il pavel.

*Nova Gasetta Romontscha nr. 12, 24 da mars*

### 1865

Suenter las fieras da **Trun** e **Glion** ei in Bavarès staus tochen **Medel** e **Tujetsch** e cumpbau si dabia vaccas per andants prezis. Ferton ch'ils auters marcadonts van il bia mo suenter vaccas giuvnas e bialas, laian ils Bavarès stgisar vaccas veglias e macortas, sche mo ellas ein pleinas vadi e bunas da latg e da peil alv. Aschia pon ins cumpreder, che quels marcadonts ein adina fetg beinvegni ella **Surselva**, cunzun uonn ella presenta scartezia da fein. Quellas vaccas van en ina gronda campagna ad **Ebersberg**, nua ch'ei sesanfla circa 200 vaccas – las biaras da razza grischuna – e 12 Sursilvans che miran tier quellas. Quels han lu pli bi far, che nos paupers perveseders, fein e risdiv, sec e verd, malz e frina, rebas e rabas, maunglan ei buca spargnar, els catschan si taluisa las pompeluseras, che nos purs enconuschessen nuota pli lur vaccas, ch'els han vendiu, mo ei dattan era latg persuenter – tochen 16 mesiras a di. Tgei legreivla midada per bia da quellas vaccas veglias, ch'ein quels dis instradadas ad **Ebersberg**; ord nuegls da tgerlentaders vegnan ellas ella tiara dalla cucagna. Possi far bein! Ch'ils Bavarés tschercan principalmein vaccas che han aunc da far vadi, deriva da cheu, ch'ils vadials giuvens pagan leugiu schi bein; per bialas vadialas alvas da 15 dis pagan ils purs bugen 50 frs. ed aunc dapli. Il latg cumpba in Tuatschin giu, e venda lu ora il pieun e caschiel.

*Nova Gasetta Romontscha nr. 13, 31 da mars*

### 1865

Ils Uranès ein i sulla **Alpsu** cun dabia tiers e muossan cheutras, che quella nova via seigi buca mo profiteivla pella **Cadi**, sonder pil negozi da biestga dall'entira **Surselva**.

*Nova Gasetta Romontscha nr. 19, 12 da matg*

### 1865

#### Clom da quens

Vieua Maria Barla Turtè, nata Beer, dunna dil defunct statalter Giachen Fidel Livers da **Segnas**, ed affons han per ugau Vigieli Giusep Beer a **Sedrun**, a quel ni ad assistent Giachen Antoni Schmid a **Sedrun**, dueien tut ils quens da quella famiglia vegnir dai en.

*Nova Gasetta Romontscha nr. 19, 12 da matg*

### 1865

Ils 25 da matg ei ina famiglia engiadinesa ida uonn cull'emprema crotscha sull'**Alpsu**, schegie ch'igl ei stau vegniu bess ora negina neiv. Plira signaria passada tras **Ursera**, mo meins curaschusa che l'indicada engiadinesa, vess fatg la medema ruta, sch'ei vessen buca giu tema dalla neiv.

*Nova Gasetta Romontscha nr. 22, 2 da zercladur*

### 1865

Il matg ei stulius, mo ha schau anavos stupenta pareta els aults, duront che sias plievgias han ella **Bassa** buc pudiu restabilir diltut quei ch'ils funs han giu pitiu dalla schitgira avrela. Schegie ch'igl ei stau il matg ualti frestg, sch'ei la calira tonaton muntada il davos temps sin 24 grads Reaumur a **Mustér**. Remarcabel, gie darar s'udiu eis ei ch'ils aviuls han a **Selva**, en ina altezia da 1538 meters, schamnau e stuschau schon il matg.

*Nova Gasetta Romontscha nr. 22, 2 da zercladur*

### 1865

#### La fiera da **Sedrun**

vegn uonn excepziunalmein tenida gliendisdis proxim, ils 12 da zercladur.

La suprastonza da **Tujetsch**

*Nova Gasetta Romontscha nr. 23, 9 da zercladur*

**1865**

La fiera da **Sedrun** ei uonn buca stada frequentada sco auters onns. Las vaccas cumparidas eran da pauca vaglia ed han perquei era pagau leusuenter. Tiella cumpra da stiarls han ils Tudestgs fatg concurrenza als Romontschs e perquei han quels pagau biebein. Tgauram han ils Uranès cumprau si dabia per andants prezis, il mender han las nuorsas pagau. – Cun quella caschun notifichein nus al ludeivel publicum, ch'il pacific vischinadi da **Camischolas** hagi cediu sia fiera digl october al vitg da **Rueras** – ton per respectiva correcziun dallas fieras dadas en el Calender Romontsch.

*Nova Gasetta Romontscha nr. 24, 15 da zercladur*

**1865**

**Clom da quens**

Tgi che ha quens culla concursanta vieua Lisabet Loretz da **Tschamut**, duei dar en agl ugau statalter Gion Paul Riedi da leu.

*Nova Gasetta Romontscha nr. 24, 15 da zercladur*

**1865**

Vieua Margreta Cristgina Beart ed affons han sco ugau Giachen Giusep Decrusch, tuts da **Tujetsch**.

*Nova Gasetta Romontscha nr. 25, 23 da zercladur*

**1865**

Premis fixs per casas da scola ni alzament dil fondo ei vegniu partiu ora 5240 frs. ... denter auter a **Selva** 400, **Camischolas** 350.

*Nova Gasetta Romontscha nr. 27, 7 da fenadur*

**1865**

La posta dall'**Alpsu** ha entschiet siu cuors da stad sonda vargada, mo aunc ussa era ella il bia ualts vita. Per correcziun dil plan da tur, communicaus da nus quest unviern, relatein nus, ch'ella parti dad **Ursera** tenor midada fatga pli tard per las 7 dalla damaun, arrivi a **Tschamut** las 9 e 35, a **Mustér** las 11 e 15, a **Trun** las 12 e 35 e setegni si leu pil gentar tochen l'ina e 40 min ... a **Cuera** vegn ella las 19 e 30. Naven da **Cuera** va ella las 6 e 15 dalla damaun ... vegn a **Mustér** allas 15 e 15, a **Tschamut** las 17 e 35 ed ad **Ursera** las 19 e 35.

*Nova Gasetta Romontscha nr. 27, 7 da fenadur*

**1865**

Sch'il proverbi: "Sco ils dis tgaun van anen, aschia van els ano", duess sevirificar, sche cuoza quell'aura plievusa aunc ditg. Tschella jamna ha ella lavagau bia fein; en **Tujetsch** era ei da quels, che vevan tochen 50 ponns strësa *fein sil prau*. Schi desiderada sco la plievgia era vivon, ual aschi beinvegnida fuss ussa la bialaura per tut ils fretgs.

*Nova Gasetta Romontscha nr. 31, 4 d'uost*

**1865**

In temporal dalla notg dils 29 sils 30 dad uost ei staus in dils pli horribels, ch'ins seregora a **Mustér**. Il cuntuau camegiar e tunar, il suffel e la dracca ella snueivla stgiradetgna nocturna fageva veramein sgarschur. En plirs logs ha ei dau tempiesta, a **Tschamut** vesevan ins la damaun entirs mantuns ed a **Danis** e **Tavanasa** duei haver manizzau si bia feglia pumera e rabetscha truffels. ...

*Nova Gasetta Romontscha nr. 35, 1. da settember*

**1865**

**Clom da quens.**

La facultad da Madleina Kindli, nata Bigliel, dunna da Mat. Anton Kindli da **Tujetsch**, vegn segirada, perquei dueien tuts quens da quels dus consorts vegnir dai en ad assistent Jacob Anton Schmid da leu.

*Nova Gasetta Romontscha nr. 35, 1. da settember*

**1865**

### **La fiera da Rueras**

Ei vegn cheutras fatg da saver ad in ludeivel publicum, che la fiera da **Rueras** vegni tenida ils 9 d'october, quei ei gliendisdis proxim enstagl per ils 13 d.q.

**Tujetsch**, ils 3 d'october 1865

La suprastanza

*Nova Gasetta Romontscha nr. 40, 6 d'october*

**1865**

Nies cantun ha quels dis piars in fideivel survient, il salter cantunal (Bundsweibel) Anton Berther da **Tujetsch**, che ha da 1834 enneu surviu ella casa dalla regenza. Purtond ina depescha el biro telegrafic survegn el la daguota, dat per tiara via e negins remiedis han saviu far revegnir el, - en in per dis er'el ina bara. El rauassi en pasch!

*Nova Gasetta Romontscha nr. 44, 3 da november*

**1865**

Unviern. A **Tujetsch** ha ei ier dau 3 quartas neiv ed a **Mustér** circa miez bratsch.

*Nova Gasetta Romontscha nr. 44, 3 da november*

**1865**

### **Clom da quens**

Dunna ed affons dil defunct Francesg Berther a **Tujetsch** han per curatur assistent Schmid, il giuven, che retscheiva tuts quens dil defunct per liquidar la facultad da quel.

*Nova Gasetta Romontscha nr. 44, 3 da november*

**1865**

### **Aunc in exempl d'ina biala raccolta**

Il selvadi da **Tujetsch** ei adina staus renomaus per siu bi glin e schegie che quel ei uonn ellas biaras valladas buca gartegiaus, sche ha in pur tuatschin tuttina fatg dad ina curtauna streha semgl 18 curtaunas tgembadas. Sin in sulet glin ha el anflau 105 borlas, ditgel tschien e tschun, glins da 60 e 70 borlas fuv'ei plirs. Il medem econom ha era fatg bials truffels essend che plirs da quels pesavan 1 glivra *fun in*.

*Nova Gasetta Romontscha nr. 46, 17 da november*

**1865**

### **Annunzia**

La vischnaunca da **Tujetsch** ei intenziunada da schar via da guder l'aschinumnada alp da **Tschamut** per 1 onn ni per 6 onns entschavend 1866.

Per quella fin fa ella enconuschen a tuts amaturs da quella alp, che quella vegni a **Sedrun**, ils 15 da mars 1866, dada via da guder a quel che porscha il pli grond tscheins. Quella alp porta 140 – 160 armauls gronds cun in grond diember da nuorsas vitier. Ei mereta da vegrin menziunau, ch'il stradun ad **Ursera** va sper l'alp ora, aschia ch'igl ei zun cumadeivel d'ir e vegrin.

Ulterior sclariment san ins da tut temps promptamein obtener tras

la suprastanza da **Tujetsch**

**Sedrun**, ils 20 da decembre 1865

*Nova Gasetta Romontscha nr. 51, 22 da decembre*

**1865**

### **Annunzia e recumandaziun**

Il suittascret ligiacudischs fa cheutras da saver, ch'el seigi setabilius a **Mustér** ella stizun spella stamparia en casa dils signurs Frars Monn e serecamonda cheutras ad in ludeivel publicum per tuttas lavurs da siu mistregn, ch'el vegn a far spert, solid e per in raschuneivel prezi.

En sia stizun ha el era da vender differents cudischs d'oraziuns, d'uffeci, da doctrina e calenders.

Emanuel Deragisch

*Nova Gasetta Romontscha nr. 59, 29 da decembre / Nova Gasetta Romontscha nr. 2, 12 da schaner 1866*

**1866**

### **Saltè cantunal**

Sco salte cantunal ei signur Anton Berther da **Tujetsch**, fegl dil vegl „Bundesweibel“ Berther, legius ora; igl ei stau varga 20 aspirants per quella piazza.

*Nova Gasetta Romontscha, ils 12 da schaner 1866*

**1866**

### **Resultat dalla votaziuns**

**Tujetsch** ha cun 174 vuschs unitamein fiers tuts 9 artechels ella fontauna dil **Rein** e votau pils 50'000 frs.

*Nova Gasetta Romontscha nr. 3, 19 da schaner*

**1866**

Ei para che la fiera da **Ligiaun** da quest atun vargau seigi buca curdada ora aschi mal sco ins manegiava, essend ch'ils principals marcadonts da **Tujetsch** e **Medel** han secartiu da far leger tscheiver communabel e zuar alla moda veglia, cun hoppers senza polcas e schottischs.

*Nova Gasetta Romontscha nr. 6, 9 da fevrier*

**1866**

### **Alp Tschamut**

#### **Annunzia**

La vischnaunca da **Tujetsch** ei intenziunada da schar via da guder l'aschinumnada alp da **Tschamut** per in onn ni per sis onns, entschavend 1866. Per quella fin fa ella enconuschenet a tuts amaturs da quell'alp, che quella vegni a **Sedrun**, ils 15 da mars 1866, dada via da guder a quel che porscha il pli grond tscheins. Quell'alp porta 140 – 160 armauls gronds cun in grond diember da nuorsas vitier. Ei mereta da vegrir menziunau, ch'il stradun ad **Ursera** va sper l'alp ora, aschia ch'igl ei zun cumadeivel d'ir e vegrir. Ulteriur sclariment san ins da tut temps promtamein obtener tras la suprastonza da **Tujetsch**.

**Sedrun**, ils 6 da mars 1866

*Nova Gasetta Romontscha nr. 10, 9 da mars*

**1866**

Vieua Barla Turtè Berther, nata Wenzin e sia feglia a **Camischolas** han per ugau Giachen Antoni Berther da **Gonda**.

*Nova Gasetta Romontscha nr. 14, 6 d'avrel*

**1866**

### **Lavina**

Malgrad la nevada dils 2 e 3 d'avrel ei ussa puspei terrenau aschi lunsch sco vivon; dad ina nevada luada ora aschi spert seregorian ins buca grad, perquei eis ei era tscheu e leu rut ora bovas. Era en **Tujetsch** ei iu sill'a spunda meridiunala grondas lavinas la notg dils 2 sils 3 d'avrel, che han empleniu en la **Val da s. Brida** tscheu a **Selva** sin ina stermentusa moda ed otg dis reteniu il **Rein**. Fuss ei stau ina lavina da freid enstagl da cauld, sche fuss ei stau finiu cul vitg da **Selva** . . .

*Nova Gasetta Romontscha nr. 15, 13 d'avrel*

**1866**

### **Clom da quens**

Vieua Onna Maria Degonda, nata Mugli, ed affons han per ugau gerau Sep Antoni Mugli, al qual ins duei per saver liquidar la relaschada facultad dil defunct statalter Gion Antoni Degonda, tuts da **Tujetsch**, dar en tut ils respectivs quens.

*Nova Gasetta Romontscha nr. 17, 27 d'avrel*

**1866**

### **Annunzia**

Ils 9 da matg suentermiezdi, vegn a **Selva** en casa dalla caplania mess en ingant duas schaumnas aviuls ed auters objects.

*Nova Gasetta Romontscha nr. 18, 4 da matg*

**1866**

### **Tschamut**

**Tschamut**, quei ei tschema dil mund, entscheiva a secivilisar. Tiella staziun da posta vegn ei leu baghegiau si in hotel e quei vitget duei ussa aunc daventar la residenza d'in schendarm per trer en il dazi da consum sin bubrondas spirituosas che veggan retratgas dil **Grischun** sur **Ursera**. Mo donn che quei niev emploiau cuosta al cantun dabia e vegn a trer en zun pauc.

*Nova Gasetta Romontscha nr. 22, 31 da matg*

**1866**

### **Clom da quens**

1) Gion Antoni Beer ei assistent per Barla Catrina Beer, omisdus da **Camischolas**. Al davos dueien tuts quens dall'emprema e da siu frar p.m. Vigeli Beer, vegin dai en.

3) Ils quens digl emigrant scarvon Wenzin da **Rueras** ein da dar en a siu assistent gerau Hans Giachen Beer a **Sedrun**.

4) Assistant Giachen Antoni Schmid ei numnaus assistent pils fargliuns Lisabet, Duri e Rudolf Wenzin.

*Nova Gasetta Romontscha nr. 22, 31 da matg*

**1866**

### **Elecziuns**

**Rein Anterior**. ... assistent Schmet da **Tujetsch**, ...

*Nova Gasetta Romontscha nr. 23, 9 da zercladur*

**1866**

### **Clom da quens**

Gerau Duri Wenzin ei numnaus assistent per vieua Barla Turtè, nata Wenzin, tuts da **Tujetsch**.

*Nova Gasetta Romontscha nr. 24, 16 da zercladur*

**1866**

### **Clom da quens.**

Giachen Antoni Berther ei ugau da feglia Barla Turtè Berther, omisdus da **Tujetsch**.

*Nova Gasetta Romontscha nr. 26, 29 da zercladur*

**1866**

### **Tschamut**

Il Fegl ufficial dils 6 da fenadur fa da saver, ch'en consequenza dalla nova via sull'**Alpsu**, seigi ussa ranschau en ina duana a **Tschamut** per trer en il dazi cantunal da consum sigl import da raubas spirituosas e surdau l'incassaziun da quel a statalter Gion Paul Riedi da leu.

**1866**

### **Tempiasta**

Ils 19 da fenadur, il medem di ch'igl ei dau tempiasta e dau giu il tun egl **Uaul Cavorgia**, ein tenor il Tagblatt era ils habitonts da **Flem** tras in temporal stai en gronda tema... .

*Nova Gasetta Romontscha nr. 30, 27 da fenadur*

**1866**

### **Clom da quens**

Assistant Giachen Antoni Schmed ei curatur e liquidatur dalla facultad da Barclamiu Berther, omisdus da **Tujetsch**.

*Nova Gasetta Romontscha nr. 30, 27 da fenadur*

**1866**

### **Clom da quens**

Ils quens digl absent Hans Giachen Berther da **Rueras** ein da dar en a siu assistent e liquidatur gerau Stiafen Monn da **Sedrun**.

*Nova Gasetta Romontscha nr. 34, 24 d'uost*

### 1866

Sco onn, aschia ha era uonn, la fin d'uost purtau gronda dracca, sulettamein ei quella vegnida ina notg avon. Las grondas auas dalla notg dils 28 sils 29 *d'uost* han tscheu e leu fatg considerabels donns. Da **Mustér** ha il **Rein** menau naven 3 – 400 tschuncheismas pledra dalla fabrica da glas a **Domat**. A **Sedrun** ei il **Drun** vegnius in per ga schi ferms, che las casas stremblavan. Nuotatonmeins ha leu la gronda e biala punt pitiu negin donn, bein aber las ustonzas sper la punt da **Camischolas**.

*Nova Gasetta Romontscha nr. 35, 31 d'uost*

### 1866

#### **Caschiel grass da Tujetsch e Cristallina**

san ins retrer da J. J. Condrau a **Mustér**. Essend che la temperatura da questa stad ei stada favoreivla pellas cascharias, sche vegn ei garantiu pella buna qualitad.

*Gasetta Romontscha nr. 36, 7 da settember*

### 1866

#### **Treis nuorsas jastras**

vegnidas neutier dil maun da **Nalps**, ureglia dretga giudasum, seniastra priu ora in vinchel davonora, in snez davos en, tier ina maunca quei snez, tuttas treis nudadas cun titgira cotschna si dies. Sesanflan tiella suprastonza da **Tujetsch**, nua ch'il patrun sa retscheiver ellas el termin tschentamental pagond las spesas, autruisa vegnan ellas vendidas.

*Gasetta Romontscha nr. 36, 7 da settember*

### 1866

Schei ha uonn dau pauc fein grass, sche enqueren pliras vischnauncas che han bialas alps e pastiras da trer ton pli bia pavel ord ils cuolms. Aschia ha **Tujetsch** vendiu uonn fein a pastg per 2000 frs. Mo giu dad in toc pastira ei en sorts ina vid l'autra vegniu segau 80 tschuncheismas fein!

*Gasetta Romontscha nr. 37, 14 da settember*

### 1866

#### **Clom da quens**

Assistant Schmed da **Tujetsch** ei curatur dalla massa dil concursant Barclamiu Berther a **Tschamut**.

*Nova Gasetta Romontscha nr. 39, 28 da settember*

### 1866

En **Tujetsch** ei quels dis vegniu vendiu duas pulitas vaccas mo per 110 frs. ensemens!

*Nova Gasetta Romontscha nr. 42, 19 d'october*

### 1866

Sin repetida instanza dil ludeivel Cussegl Pign e Cussegl Federal ha il cantun **Tessin** aviert ils 30 d'october il pass, aber denton mo quel dalla **Greina**, dil **Lucmagn** e dall'**Alpsu**, aschia che mo la **Surselva** ha cun el liber traffic, ferton ch'il **Bernardin**, respectiv la **Val Mesauc**, ei auc serrada. ... **Uri** vegn ussa era immediat ad arver l'**Alpsu**. Sco nus havein udiu ord buna fontauna, eran ins ad **Altorf** semtgai dad arver encunter la **Surselva**, schi gleiti sco **Tessin** dessi l'iniziativa.

*Gasetta Romontscha nr. 44, 1 da november*

### 1866

**Tujetsch:** 143 per Condrau, 114 per landrehter Vieli e 14 per redactur Gredig.

*Nova Gasetta Romontscha nr. 44, 1 da november*

**1866**

**Tujetsch:** 186 per Condrau ed 1 per Latour.  
*Nova Gasetta Romontscha nr. 46, 16 da november*

**1866**

... Sull'**Alpsu** ei vegniu catschau ina gronda massa vaccas a **Lucerna**, nua ch'ei era secret ora sin tutz mauns ina nova e gronda fiera sils 22 d.q. Schon avon eran marcadonts da **Tujetsch** stai cun da nossas vaccas tochen **Aarau** e **Zofingen**, nua ch'ellas han tratg biebein, per motiv ch'ei vegn cheuora tschercau vaccas da buca gronds prezis. ...

*Gasetta Romontscha nr. 47, 23 da november*

**1866**

**Tiers jasters a Tujetsch**

- 1) Ina nuorsa grischa, ureglia seniastra in snez davon en.
- 2) Ina tgigisch alva, dretga giudasum e fess in snez davon en.
- 3) In anugl grisch cun corns, seniastra snez davon en.
- 4) Anugl entir cun corns, dretga giudasum e dus snezs davos en, seniastra dus snezs davos en.
- 5) Ina tgigisch alva, dretga dus snezs davos en.
- 6) Anugl ner cun corns, dretga in mugrin davos en, la seniastra dus snezs davos en.
- 7) Nuorsa alva buca tundida, colur cotschna si dies, fess omisduas ureglies e priu ora empau, ella dretga in snez davos en.
- 8) In ansiel ner, dretga e seniastra ina furcletta orasum ed ella seniastra aunc ina ruosna.
- 9) In ansiel grisch, dretga in mugrin davon en orasum, la seniastra giudasum.

Pagond las spesas san ils proprietaris retrer quels tiers tier  
la suprastanza

*Nova Gasetta Romontscha nr. 47, 23 da november*

**1866**

Marcadonts bavarès ein questa jamna stai pela **Surselva** si tochen **Tschamut** e cumprau si ina biala roscha vaccas per prezis mesauns.

*Gasetta Romontscha nr. 48, 30 da november*

**1866**

El commers da vaccas ei aunc adina gronda vivacitad en **Surselva**. In marcadont bavarès ha la jamna vargada cumprau si 50 vaccas ella **Cadi**. Schegie che quellas vessen giu pign esit sin auters mauns, stevan ellas tuttina 160 frs. intragliauter. Mo la vischnaunca da **Tujetsch** duei haver vendiu ora quest atun circa 240 vaccas e tonaton eis ei aunc dapertut venal vaccas. La davosa fiera da **Ligiaun** ei ida mal, aschia era la fiera d'**Altorf** dils 29 da november. In marcadont da **Medel**, che ha frequentau quella, ha stuiu schar sill'**Alpsu** duas vaccas ella lavina, duas ha el pudiu liberar, mo stuiu schar ventscher ellas la notg sil cuolm. El sez e siu cumpogn da viadi ein dalla lavina vegni fiers vi el lag, mo ein mitschai culla tema e cun schar anavos ella neiv caput e capetscha.

*Gasetta Romontscha nr. 49, 7 da december*

**1866**

Sil davos marcau a **Glion** ei vegniu marcadau pir che mai. ... Ils marcadonts talians pagavan per stiarls ners e maghers sis marenghins e miez, aschia ch'ils da **Tujetsch** e **Medel**, ch'ein aschi gronds amaturs da quei rom, han fatg ad els pintga concurrenza. ...

*Gasetta Romontscha nr. 50, 14 da december*

**1866**

Ils 16 da december ei igl aultreveriu signur canoni Jacob Franz Gieriet, beneficiat a **Nossadunna** sper **Trun**, il senior digl entir clerus grischtun, spartius da quest mund ella aulta vegliadetgna dad 87 onns. El ei naschius a **Tujetsch**, ils 4 da schaner 1780, vegnius benedius ora ils 14 da december 1806 ed ei aschia staus 60 onns spiritual. Gl'emprem ha el surviu 4 onns sco caplon a

**Medel**, ei lura vegnius 1811 sco plevon a **Trun**, nua ch'el ha pastoraу tochen 1858. Quei onn ha el dau si quella pleiv, nua ch'ei existeva pli neginas lètgs buc enzinadas en dad el, ed ei sereratrats el tgeu pelegrinatsch si **Nossadunna**. Schon 1828 eis el vegnius numnaus canonii e vicari episcopal. Pli tard ha el era funcziunau sco inspectur da scola e dau ora in adattau cudisch d'oraziuns per promover la cultivazion religiosa dils affons. El ha acquistau l'affecziun e carezia da tut ses parochians e la stema da tut ses enconuschents. El rauassi en pasch!

*Gasetta Romontscha nr. 51, 21 da december*

## 1866

### Annunzia da mort.

Cun profunda dolor notifichein nus cheutras a tuts parents, amitgs ed enconuschents, ch'ei hagi plaschiu agl Altissim Diu da clamar ils 16 da december ord questa veta temporalia tier la gloria celestia nies carezau signur aug  
il reverendissim signur canoni

### Giachen Francesg Gieriet

vicari episcopal e beneficiat a **Nossadunna** dalla glisch a **Trun**, provedius cun ils sontgissims sacraments dils moribunds, senza malsogna e senza dolurs, ell'autla vegliadetgna dad 87 onns, recumandond l'olma dil revendissim defunct alla pietusa memoria dils fideivels, serecumandein nus vinavon alla cuntuada beinvulentscha da nos amitgs e vischins.

**Trun**, 18 december 1866

Ils cumbrigiai nevs e niazas

*Gasetta Romontscha nr. 51, 21 da december*

## 1866

### Clom da quens

2) Giachen Martin Berther a **Camischolas** ha l'ugadia digl absent Gion Giusep Decrusch, da sia dunna ed affons.

4) Gl'absent Gion Benedetg Deragisch, sia dunna e siu sir Sep Maria Hendri, tuts da **Bugnei**, han sco curatur assistent Giachen Antoni Schmet da **Sedrun**.

5) Il medem ei era assistent digl absent Luis Jagmet, da sia sora Margareta e siu bab Gion Antoni Jagmet, tuts da **Surrein-Tujetsch**.

Per saver liquidar las respectivas facultads dils sura mess sut ugadia ni curatella, dueien tuts quens da quellas varts vegni dai en als respectivs ugaus ni assistents.

*Nova Gasetta Romontscha nr. 51, 21 da december*

## 1866

### Publicaziuns

#### Tiers jasters a **Tujetsch**

1) In tschanc, ureglia dretga tagliau giudasum ed in snez davos en, seniastra treis snezs davos en (sa vegnir consignau mo la pial).

2) Ina starleglia nera, ureglia dretga ina furcletta orasum, seniastra medemamein ina furcletta orasum, fess ed ina ruosna.

3) Ina nuorsa alva cun corns, dretga giudasum, ina furcletta davos en, seniastra giudasum, spezia da furcletta e dus snezs davos en.

4) In buc entir gagl, ureglia dretga nuot, seniastra giudasum e fess entraviers ed in snez davos en.

5) Ina ansola nera strala, ureglia dretga ina furcletta orasum e duas ruosnas.

6) Ina starleglia nera, in tac alv sin las costas, dretga in snez entraviers davon en e seniastra scurselau davororasi.

Ils proprietaris da quels tiers san beneficond las spesas retscheiver quels tras la suprastanza

**Tujetsch**, ils 23 da december 1866

*Nova Gasetta Romontscha nr. 52, 28 da december*

**1866**

### **Clom da quens**

Tuts quens da vieua Onna Maria Felicia Quinter da **Tujetsch** ein da tarmetter tier al liquidatur da sia facultad assistent Giachen Antoni Schmid da leu. – Al davos numnau dueien era tuts quens digl emigrant Vigieli Josef Deragisch da **Tujetsch** vegnir dai en.

*Nova Gasetta Romontscha nr. 52, 28 da december*

**1867**

Essend ch'igl ei ussa il temps, nua che padrins e madretschas ston muort ils biemauns passar la mustra cun lur figliols e figliolas e ch'in ni l'auter pudess forsa gleiti entscheiver a senuspir sur siu grond diember da cumpars e cumars, schelein nus consolar els cun allegar, ch'il defunct signur canoni Gieriet vevi 111 figliols ni figliolas.

*Gasetta Romontscha nr. 01, 4 da schaner*

**1867**

A motiv che sillastad vegn era ranschau en in cuors postal dil **Valleis** si sulla **Furca**, sche ha il departement postal el senn da sin lu menar en in secund cuors sull'**Alpsu**, aschia, ch'ei passass la stad mintgadi tras la **Surselva** duas postas giuviars e duas siviars.

*Gasetta Romontscha nr. 02, 11 da schaner*

**1867**

Quest unviern para ei da dar neginas bischas, sunder mo nevadas. Silla nevada dil december, ch'era schon stulida per gronda part, ha ei ils emprems dis da questa jamna puspei dau ina sgarscheivla neiv, aschia ch'ins ha mesirau a **Mustér** el plaun ina altezia neiv da varga 5 peis. Naven dalla renomada nevada dil matg 1858 vulan ins buca seregurdar pli d'ina tala neiv. Igl ei bien ch'il proverbi di: "Ina gronda nevada, ina numerusa casada ei gleiti scarsada." Denton ein ins en tema, ch'ei possi tscheu e leu haver dau disgrazias tras lavinas.

*Gasetta Romontscha nr. 03, 18 da schaner*

**1867**

### **Lavina**

Notizias sur las lavinas en **Surselva**, che han caschunau donns, ei vegniu tier a nus las sequentas: A **Selva** ha la lavina priu dus mulins e treis clavaus cun dabia pavel.

*Nova Gasetta Romontscha nr. 4, 25 da schaner*

**1867**

### **Clom da quens**

Ils 4 affons dil defunct Stiafen Monn a **Tujetsch** han per ugau lur aug Gion Battesta Monn da **Sedrun**, als quals era tut ils quens dil defunct dueien vegnir tarmess tier per liquidaziun da sia facultad.

*Nova Gasetta Romontscha nr. 4, 25 da schaner*

**1867**

Ferton ch'ins auda per l'entira **Svizra** entuorn, ch'ils prezis dils funs seigien ussa memiaaults per obtener ina buna rendita, ei quels dis vegniu vendiu en **Tujetsch** ina acla da varga 5000 tschuncheismas per 2.55 frs. la tschuncheisma! – buns funs mo aunc buca dils megliers, ch'ins anfla leu. Avon circa 50 onns han plirs cumprau si en quella medema vischernaunca massa praus grass per 2 – 3 bazs la tschuncheisma. Tgei midada!

*Gasetta Romontscha nr. 5, 1 da fevrer*

**1867**

En preschientscha d'in numerus publicum han ils frestgs giuvens da **Tujetsch** dau ils 25 da fevrer ina legra ed instructiva producziun teatrala a **Sedrun**. „Il fabricant dall'aura“ *translatata da pader Baseli Berther*, ei in tema fetg pratic ed interessant pil pievel. Il versau translatur ha dasperas buca schau muncar da cungir la translaziun cun saladas remarcas per tuts stans e

saluteivlas presas per umens e femnas. Ord las vehementas debattas dils umens e dallas femnas ha ei sufficientamein semussau, ch'il vegnir perina tgei aura schar far, seigi ual aschi difficil sco il fabricar l'aura. Ils acturs han per la gronda part giugau lur rolla en uorden, aschia che sez finas actrissas leu presentas, han dau ad els unanim laud. Ins vess denton giavischau ch'ei fuss buca vegniu perorau tut en fin romontsch, sunder era empau dialect tuatschin, silmeins en quella interessanta scena, nua che las femnas sescagnavan e sepitgavan. Ina honorifica menziun mereta era il bi cant producias dils medems giuvens.

*Gasetta Romontscha nr. 9, 1 da mars*

### 1867

Il favugn dil fevrer ha ussa il mars stuiu ceder all'aurasut. Il freid retegn la vegnida dalla primavera ed ell'entira **Partsura** para la generala scartezia da fein da vegnir pli prigulusa che mai. Ina excepziun fa uonn la vischnaunca da **Tujetsch**, quella ha savens stuiu tarmetter entirs muvels giuviars, mo uonn ha ella fein per dabia muvels jasters – ina remarcabladad dalla quala ils pli vegls san buca seregurdar. Siu cletg ei stau, ch'ella ha gl'onn vargau vendiu fein a pastg per 2000 frs., aschia ch'ils purs han mo ord las pastiras tratg ina fenada da 10'000 frs. valeta.

*Gasetta Romontscha nr. 10, 8 da mars*

### 1867

#### Clom da quens

Ils quens digl emigrant Lezi Antoni Monn da **Tujetsch** ein enteifer treis jamnas da dar en a statalter Gion Andriu Berther da leu.

*Gasetta Romontscha nr. 11, 15 da mars*

### 1867

#### Clom da quens

Tumaisch Riedi da **Tujetsch** fa da saver, ch'el detti ni plaid ni fatg pils deivets da sia feglia Maria Agata.

*Gasetta Romontscha nr. 14, 5 d'avrel*

### 1867

Ferton ch'ils da **Medel** vevan da miez avrel in bi schierm sin bia èrs, eran ils plauns da **Tujetsch** intragliauter aunc cuvretgs cun in bratsch neiv.

*Gasetta Romontscha nr. 16, 19 d'avrel*

### 1867

Gl'avrel ei miert a **Galgenen**, cantun **Sviz**, il giuven scolast *Giachen Martin Muggli (1842-1867)* da **Tujetsch**, maridau *Catharina Rochs, ed in fegl*, nua ch'el veva dau treis onns scola cun bien success. Sco la gasetta da **Glaruna** scriva, era el leu generalmein stimaus e carezaus sco bien e fideivel instricter e bab da famiglia.

*Gasetta Romontscha nr. 18, 3 da matg*

### 1867

Silla caravana tuatschinèra da 18 persunas ch'ein il davos da mars s'embarcadas pell'**America**, ha ils 28 d'avrel ina tut pli gronda caravana d'emigrants bandunau **Cuera**.

*Gasetta Romontscha nr. 18, 3 da matg*

### 1867

Sco derschaders ord 14 proponi vegniu legiu ora: il president „cass“ Lucas Cavegn da **Tujetsch**, dr. Berther e president J. Condrau da **Mustér**, gerau Martin Pali da **Medel**, gerau Franz Decurtins da **Trun**. Sco suppleants: gerau G. M. Capaul da **Breil**, capitani Fr. Vincens e gerau Al. A. Huonder da **Mustér**, gerau Beeli da **Medel**, capitani *Sep Antoni Mucli* e gerau Gion Andriu Berther da **Tujetsch**.

*Gasetta Romontscha nr. 20, 16 da matg*

**1867**

... Era sull'**Alpsu** duei ei vegnir construiu ina lingia telegrafica cun biros a **Sedrun** e **Tschamut**. Per ils renomai marcadonts da biestga en **Tujetsch** e per quels che meinan la posta sull'**Alpsu** ei quell'interpresa d'impurtonza, ed ins spetga perquei susteniment pecuniar da quels. Per scadin biro vegn ei pagau per 10 onns 1000 frs. ad onn.

*Gasetta Romontscha nr. 20, 16 da matg*

**1867**

Tgi che va la stad culla posta da **Mustér** ad **Ursera**, da **Cuera** en **Engiadina** paga la taxa alpina dad 1 fr. per ura.

*Gasetta Romontscha nr. 22, 30 da matg*

**1867**

### **Annunzia**

En l'alp **Tschamut** vegn ei priu si circa 20 – 30 armauls: vaccas, stiarls ni vadials. Tgi che ha tschaffen da metter en quella alp, sto s'adressar tier gerau Paul Schmet a **Camischolas**.

*Gasetta Romontscha nr. 23, 8 da zercladur*

**1867**

### **Clom da quens**

Gion Rest Caduff ei ugau dil caplon Vigieli Venzin, omisdus da **Tujetsch**.

*Gasetta Romontscha nr. 24, 14 da zercladur*

**1867**

### **Publicaziun**

Nossa vischnaunca ei intenziunada da schar via per in ni plirs onns il crap scalegl da **Calmuota Calmut**, sut raschuneivlas cundiziuns; aspirants ein supplicai da s'adressar tochen dumengia proxima, ils 30 da zercladur da miezdi, tier la suprastanza da **Tujetsch**.

**Sedrun**, ils 26 da zercladur 1867

*Gasetta Romontscha nr. 26, 29 da zercladur*

**1867**

### **Annunzia**

Il suittascret fa cheutras enconuschent ad in ludeivel publicum, ch'el hagi baghiau si **Tschamut** ina nova ustria „Zu den Rheinquellen“ e recamondi quella a tut quels, che passan leu atras empermettend in bien e dueivel tractament.

Lucas Cavegn a **Sedrun**

*Gasetta Romontscha nr. 26, 29 da zercladur*

**1867**

La posta dall'**Alpsu** va mintga sera tochen **Tschamut**, mo sil cuolm ei aunc bia neiv en via e negin che fiera ora ella. Ils ustiers sursilvans e d'**Ursera** savessen suandar gl'exempel da lur collegas spel **Stelvio**, che han schau far quella lavur sin lur quen e cheutras survegniui schon baul gronda frequenza dad jasters.

*Gasetta Romontscha nr. 27, 5 da fenadur*

**1867**

Finalmein ei la neiv en via sill'**Alpsu** spelada ora e la posta ha ils 8 da *fenadur* entschiet siu tur d'**Ursera** a **Cuera**. Ei ha duvraru liungas tractativas e la smanatscha da nos deputai a **Berna** da vegnir culla questiun avon la radunanza federala per perschuader il guvern uranès da far quei stradun alpin carregiabels. Spender in miez milliun per ina via e gnanc saver duvrar ella da mesa stad fuss stau enzatgei remarcabel ...

*Gasetta Romontscha nr. 28, 11 da fenadur*

**1867**

### **Annunzia e recumandaziun**

Il suttascret fa cheutras da saver ad in ludeivel publicum ch'el hagi midau giu siu depot da vischala a **Mustér** e translocau quel en casa nova da signur gerau Sep Antoni Maissen, nua ch'ins sa da tut temps cumprar da quella vischala per in dueivel prezi. Engraziond pella confidanza mussada tochen uss serecamonda per numerusas empustaziuns

Deragisch, hafnermeister a **Tujetsch**

*Gasetta Romontscha nr. 30, 26 da fenadur*

**1867**

Suenter ch'il sulegl ha gliendisdis (23 *da settember*) vargau rut atras il gries nebel e tut selegrava puspei dalla bialaura, ha ei schon la notg sissu viult cassacca, ed il mardis ha ei dau tals bufs d'aria ch'el ha purtau naven dad entirs frusts la stubla ed il glin stemnau entuorn il vitg **Sedrun**. Sch'ils da **Mustér** possedessen vegnas sin lur plauncas, fussen ei vegnidas lavagadas la notg dils 24 sils 25 *da settember* tras ina bischetta ch'ei seschluitada tochen giu sur il vitg da **Segnas**.

*Gasetta Romontscha nr. 39, 27 da settember*

**1867**

### **Nuorsas jastras en Tujetsch**

tier la suprastonza:

- 1) Nuorsa gaglia cun tschut, ureglia dretga in mugrin davon en osum l'ureglia.
- 2) In barbeisch gagl cun corns, dretga ina furcletta rodunda orasum ed in snez davon e davos en, ed ina furcletta rodunda davon en entatier il tgau.
- 3) In barbeisch (*tschut castrau*) grisch, dretga in tarden osum e dus snezs davon en; seniastra furcletta rodunda orasum.

*Gasetta Romontscha nr. 42, 18 d'october*

**1867**

### **Clom da quens**

Hafner Sep Antoni Deragisch ei ugau da caplon Vigieli Venzin, omisdus da **Bugnei**.

*Gasetta Romontscha nr. 45, 8 da november*

**1867**

### **Cauras jastras**

Tier la suprastonza da **Tujetsch**: ina gaglia cun in rentamugl enta culiez, ureglia dretga giudasum ed in snez davonenagiu orasum la dretga, seniastra ina furcletta rodunda orasum.

*Gasetta Romontscha nr. 46, 15 da november*

**1867**

### **Tiers jasters**

A **Sedrun (Gonda)** tier Giachen Antoni Berther, sesanfla ina ansola nera mesalva, che ha tagliau giudasum omisduas ureglias.

*Gasetta Romontscha nr. 47, 22 da november*

**1867**

### **Clom da quens**

Sin declaronza dad insolventedad ei il concuors renconuschius sur sequent persunal: Hans Giachen Decurtins a **Rueras**, curaturs da massa: president G.G. Condrau a **Mustér** ed assistent Schmet da **Tujetsch**.

*Nova Gasetta Romontscha nr. 49, 6 da december*

**1868**

### **Tiers jasters**

Passond quest atun in jester cun ina roscha nuorsas tralla **Partsu** ei, sco ins ei pli tard sefatgs en, vegniu vitier duas nuorsas jastras, ch'ein vegnidas vendidas cullas outras egl jester. Il

marcadont ha tarmess tier las nodas alla suprastanza da **Tujetsch** per intervegnir ils proprietaris e surdar il pagamento. Mo las nodas ein tagliadas ora en pupi senza determinar ureglia dretga ni seniastra, davon ni davos, aschia ch'ins sa ord scadina far sequentas quater nodas

- 1) mugrin davos ora ella ureglia dretga, seniastra tagliau giudasum;
- 2) dretga mugrin davon en, seniastra giudasum;
- 3) dretga giudasum, seniastra mugrin davon en e
- 4) dretga giudasum e seniastra mugrin davos en.

L'autra noda sa esser:

- 1) dretga mugrin davon en, seniastra giudasum e mugrin davos en;
- 2) dretga mugrin davos en, seniastra giudasum e mugrin davon en,
- 3) dretga giudasum e mugrin davon en, seniastra mugrin davon en e
- 4) dretga giudasum e mugrin davos en, seniastra mugrin davon en.

Tgi che secrei d'esser proprietari da quellas nuorsas sa cun ufficial certificat da sia noda s'addressar tier la suprastanza da **Tujetsch**.

*Gasetta Romontscha nr. 1, 3 da schaner*

## 1868

### Disfortuna

In pauper giuven da **Tujetsch**, Anselm Muggli (1827-1901), ei avon plirs onns emigraus ell'**America** per encuirir sia fortuna. Suenter esser staus ditg e liung a **S. Paul (Minnesota)** e fadiau giu ils daners pil viadi, eis el ius cun in auter camerat en **California**, e para leu duront entgins onns d'haver fatg bunas fatschentas. Siu camerat ei avon dus onns arrivaus ventireivlamein a casa; el che ha buca saviu vender sia possessiun suenter giavisch, ei perquei restaus anavos. Il settember vargau eis el s'embarcaus per vegnir a casa, ei aber sil viadi per mar ord **California** cumpatg fruntaus sin in bastiment da pirats e vegnius sblundergiaus totalmein; aschia ch'el ei ussa in pauper um, ed ha a **New York** stuiu serender el spital dils paupers. Tenor las smanatschas, las qualas tuts matros e passagiers dalla nav fagevan si per el, sco tons liuns e tighers, cun vuler mazzar, pender, fierer ell'aua el ect., eis ei aunc ina miracla, ch'el ei mo mitschaus culla veta. – Quella sventira ei ton pli da deplorar, essend che duas soras dil sventirau **Onna Maria** (1938-1920) ed **Onna Maria Ursula Muggli** (1841-1913) – spitgavan el cun gronda legria, e tuts treis fargliuns fussen forsa per adina stai ord tuttas miserias. Aber il carstgaun propona e Dieus dispona.

*Gasetta Romontscha nr. 3, 17 da schaner*

## 1868

Las producziuns teatralas, da cant e musica tenidas quest meins a **Laax**, **Glion**, **Ladir**, **Rabius**, **Mustér** e **Sedrun** ein sco ins auda ualti dapertut curdadas ora per cuntentientscha digl auditori.

*Gasetta Romontscha nr. 9, 28 da fevrier*

## 1868

Nus havein tscheidi fatg menziun d'in cert Anselm Mucli (1827-1901) da **Tujetsch**, ch'ei sin siu viadi marin da **California** a **New York** vegnius sblundergiaus e maltractaus. Havend el scret als ses, ch'ei seigi denter auter vegniu priu ad el in «wechsel» da 3200 frs. sin ina casa mercantila dalla **Svizra**, ei nossa regenza s'informada a **Basel** e **Genevra**, ed el davos liug ha ina casa rispundi, ch'ella hagi da **S. Francisco** survegniu gl'avis, ch'ella duei sin in wechsel mess ora sin Anselm Mucli pagar al presentader da quel 3200 frs. La casa a **Genevra** ha aschia aunc a dretg temps saviu vegnir visada da buca pagar ora, entochen ch'ei arrivi buca in niev wechsel. Mucli survegn ses 3200 frs. anavos, ed ins vesa ord quei exempl, ch'igl ei sin in liung viadi pli segir d'haver in wechsel che daners.

*Gasetta Romontscha nr. 12, 19 da mars*

## 1868

Ina femna a **Tujetsch** **Maria Cristina Sievi a Selva**, naschida 25-03-1775 ed in um a **Tavau** ein vegni 94 onns. ...

*Nova Gasetta Romontscha nr. 15, 10 d'avrel*

**1868**

### Bien e real vinars d'ansauna

circa 40 mesiras san ins retrer tier Lezi Antoni Balzart a **Cavorgia (Tujetsch)** per 4 frs. la mesira. Cumpraders, che vulan prender tut ni mo in ton ston far da saver enteifer 15 dis.

*Gasetta Romontscha nr. 17, 10 d'avrel*

**1868**

Dacuort duei cumparer ina descripziun dalla **Surselva** en ina dallas empremas gassetas illustradas germanas, concepida da signur professer Theobald, cun fotografias da **Glion, Trun, Mustér e Sedrun**, pridas si da signur pictur Darms. Per giavinar neutier pli bia viandonts ella **Surselva**, ch'ei per biars aunc ina terra incognita, manegian plirs, ch'ins fetschi bia memia pintga canera cun publicaziuns e reclamas, perquei tucca ei da midar proverbi e dir: „Gronda bahaultscha e bia en caultscha“.

*Gasetta Romontscha nr. 18, 1. da matg*

**1868**

### L'alp da Tschamut

pren si la stad biestga schetga ord vischnaunca (per munconza da tiers en vischnaunca) e zuar per in fetg raschuneivel prezi. Ins sa da quellas varts s'addressar tier il cautegia, gerau Sep Antoni Mucli a **Sedrun**.

*Gasetta Romontscha nr. 18, 1. da matg/nr. 19, 8 da matg*

**1868**

Silla schitgira dil matg ha il zercladur schon purtau entgins buns e zun desiderai radis. Sch'il zercladur smarschenta la tastga giu dil dies als pasturs, sche pudess ei tenor in vegl proverbi aunc dar in bien onn per las cuntradadas aultas. Sco remarcabladad relatein nus ch'ins hagi il davos matg schon anflau farbuns madirs a **Medel** e ch'il medem di seigi en quest onn era passau gl'emprem carr sur gl'**Oberalp**.

*Gasetta Romontscha nr. 23, 5 da zercladur*

**1868**

Silla fiera da **Tujetsch** era catschau pauca biestga armentiva; il pli encurriu eran stiarls e vadials, quels pagavan biebein. Era vaccas vessen ils Uranès tschercau, mo da vaglia eran paucas ed ils prezis teniu fetg ault. Ton mender steva ei cun las cauras, in temps avon pagavan quellas 24 – 30 frs. ina e sillla fiera vegnevan las meglieras vendidas per 20 frs., las mendras da 15 frs. ensi; vanzau eis ei ina gronda quantitat. En tut eis ei vegniu vendiu pauc. Certs marcadonts sisum la **Surselva** vevan tras lur concurrenza catschau ensi ils prezis, principalmein dallas nuorsas, mo ils Uranès vevan buca tschaffen da magliar ora la buglia schi ensalada. Sch'ins cumpra rauba, sto ins era mirar ch'ei seigi pusseivel da puspei survegnir ton sco ins dat. Capito?!

*Romontscha nr. 23, 5 da zercladur*

**1868**

(Correspondenza dil **Badus**) Gliendisdis vargau han ils signurs professers e students dalla scola claustral a **Mustér** sut favoreivla aura fatg ina idillica spassegiada atras la biala e pitoresca val da **Tujetsch**. A **Tschamut** ella nova ustria „Zur Rheinquelle“ ei vegniu surviu ad els per solver in bien caffè cun il renomau aromatic mèl tuatschin. A **Sedrun** el Hotel Cruna ha in gustus gentar cun in bien glas **Vulcliner** legrau ils cors giuvenils e dau faviala alla lieunga.

Cuntuadamein ei il beinpreparau gentar aunc vegnius cungius emperneivlamein cun bialas melodias canzuns pertadas avon nunschenadamein e cun precisiun en tschun lungatgs. Honur als beinmeriteivels sgnurs professers, che sedattan tonta breigia da mischedar il dultsch cun il nizeivel e preparar a lur scolars schi bialas recreaziuns. Ei para senza dubi, che la scola claustral hagi entras las novas forzas, acquisitadas da monsignur avat igl atun vargau, fatg in ludeivel progress e mo da sesmarvegliar eis ei, ch'ils geniturs en nossas vischnauncas romontschas dalla **Cadi** tarmettan buca pli numerusamein lur fecls ella scola da **Mustér**, nua

ch'els savessen cun pintgas annualas expensas duront dus tochen quater onns emprender particularmein il lungatg tudestg aschi bein sco en autras scolas ord nies cantun.

*Gasetta Romontscha nr. 28, 10 da fenadur*

**1868**

### **Barschament**

La jamna vargada ei da mesanotg barschau giu en in mises da **Tujetsch** ina tegia e dus clavaus, ch'eran naturalmein buca segirai.

*Gasetta Romontscha nr. 28, 10 da fenadur*

**1868**

### **Mo plaun vus d'Engiadina**

Il Fegl d'**Engiadina** renfatscha milsanavon, che la **Surselva** seigi pli baul semussada inimitga dallas vias, la via dall'**Alpsu** hagi 1860 giu bia adversaris a **Mustér** e **Tujetsch**, ed era en **Lumnezia** hagi ei duvrau cumissaris per perschuader quella buna glieud d'acceptar ina via cantunala. Cheu encunter remarchein nus, ch'ei vessi dau a **Mustér** negina opposiziun 1860, sch'ei fuss retractau da baghegiar l'impurtonta via dil **Lucmagn** enstagl la via militara sur gl'**Oberalp**.

*Gasetta Romontscha nr. 36, 4 da settember*

**1868**

La stupenta bialaura favorisescha la catscha sin camutschs, ed ins pudess aschia spitgar sin ina favoreivla raccolta dils numerus catschadurs, ton pli che quella selvaschina ei semultiplicada ualti bein ils davos onns. Il pigrer da **Nalps** ella **Val Tujetsch** ha viu gl'uost pliras ga ina roscha da varga 70 camutschs che vegnevan en siu stavel e litgavan las plattas, nua ch'el deva sal a sias nuorsas. Els eran leu aschi endisai, ch'els fagevan pauc stem dils pasturs, cura che quels vegnevan d'entuorn, setergevan ei empau, mo turnavan lura puspei anavos.

*Gasetta Romontscha nr. 37,11 da settember*

**1868**

En **Tujetsch** ei rut ora la virola entras in mattatsch turnaus tscheidi da **Regensburg**. El ei mitschaus, mo ha infectau ina femna da 50 onns *Maria Barbara Rothmund*, ch'ei morta. Entginas casas che han giu communicaziun cun quellas duas personas, ein ufficialmein serradas giu per far curontina.

*Gasetta Romontscha nr. 38, 18 da settember*

**1868**

Nunditgond la repetida e fundada lamentaschun, ch'ins duessi buc ir aschi baul alla fiera da **Ligiaun**, ein ils marcadonts da **Tujetsch** e **Medel** schon semess ils 20 da settember sin viadi. Tut che vul esser ordavon per saver vender meglier, buc aber per survegnir ils 200 frs. premi ch'il magistrat da **Ligiaun** ha destinau per l'emprema roscha da 100 tgaus che arrivi a **Ligiaun** e cumpari schon ils 30 da settember sin plazza fiera. Igl ei quei ina speculaziun dils Lusanès da giavinar pli baul la biestga naven da **Sebiastg**, nua ch'ils marcadonts fan per ordinari las meglieras fatschentas e seterglinan leu perquei bien e ditg. La catscha da biestga per quella fiera para da buca esser gronda, cunzun da vart glarunèsa; sch'ei fa uss aunc bialaura, sche pon ils marcadonts selegrar, schegie ch'els han stuiu pagar bials prezis per lur tiers.

*Gasetta Romontscha nr. 39, 25 da settember*

**1868**

Correspondenza dil **Badus**. Per far da saver che la Societad da Pius ella **Cadi** mieri tuttavia buca dalla pleronza, notificein nus, ch'ei seigi ella ludeivla vischnaunca da **Tujetsch** seconstituiu ina secziun locala, la quala ha il 27 da settember teniu sia emprema radunanza a **Sedrun**. Presents ein stai 22 commembers, ils quals ein cun entusiassem sedeclarai pella fundaziun dad ina secziun locala. Auters ein stai impedi da cumparer, ein aber medemamein entrai ella secziun, aschia che quella dumbra schon ussa varga 30 commembers. En ina viva e caulda

allocuziun ha il president, signur caplon Casanova, declarau ils statuts generals e particulars dall'Uniun da Pius e fatg attents ton sillas interpresas generalas da quella societad svizra, sco era sin ils quater roms dad operaziun en special, proponi e dilucidai ella radunanza districtuala a **Sumvitg**. Il signur farrer dil liug ha en siu votum encuretg da far l'Uniun da Pius populara, cun bandischar ils spuentegls e pregiudezis, ch'il cumin pievel pudess haver encounter quella societad e quei intent para d'esser reussius ad el, essend ch'ils presents mo deploravan, che la buna tendenza da quell'uniun seigi buca enconuschenta, aunc biars vegnessien schiglioc a prender viva part da quella. Denton vegn ins cul temps a procurar la caschun, nua quei ludeivel iffer sa semanifestar nunschenadamein. – Alla fin dalla sessiun ei vegniu legiu ora il respectiv directori local, e concludiu da tarmetter ina numerusa deputaziun silla radunanza da **Sursassiala a Mustér**.

*Gasetta Romontscha nr. 40, 2 d'october*

### 1868

Fiera a **Mustér**. ... Ils stiarls vessen pagau bein, mo ei era negins e sinquei ein ils marcadonts da **Tujetsch** e **Medel** serendi giuviars.

*Gasetta Romontscha nr. 40, 2 d'october*

### 1868

Ferton che las gassetas engiadines rapportan che sin las fieras el **Tirol** ed ella **Valtrina** creschien ils prezis dalla biestga pli e pli, stuein nus relatar il cuntrari dallas fieras en **Surselva**. La fiera da **Trun**, dils 10 d'october, ha ei buca muncau marcadonts, mo priu ora tiella cumpra da stiarls, levan quels buca morder en, ins po dir ch'il prezi dallas vaccas eri naven dalla fiera da **Mustér** sbassaus per in marenghin. La fiera da **Rueras a Tujetsch**, nua ch'igl ei cumpariu dabia biestga ed ualti biala, ein ils prezis puspei scurdai per in marenghin. Sin quella moda han in per marcadonts bavarès saviu cumprar si buca car ina roscha vaccas ella **Cadi**.

*Gasetta Romontscha nr. 42, 16 d'october*

### 1868

#### Inspecziun dil Grischun.

Suenter haver conferiu cul guvern e visitau ils terribels donns da **Haldenstein** ein els ils 27 serendi a **Mustér**, han da leu anora visitau **Tujetsch** e **Medel** e van ussa anoragiu. L'observada cunscienciusadad e moderaziun da vart dallas suprastonzas en dar en e stimar il donn, levgiescha considerablamein la missiun da quels signurs.

*Gasetta Romontscha nr. 44, 30 d'october*

### 1868

Ils donns dall'aua ella **Cadi** ha la cumissiun federala stimau sco suonda: **Medel** 17'000 frs, **Tujetsch** 9000 frs., **Mustér** 21'000, **Sumvitg** cun **Surrein** 115'000 frs., **Trun** e **Zignau** 50'000 frs., **Breil** 6000 frs., total 218'000 frs.

*Gasetta Romontscha nr. 45, 6 da november*

### 1868

#### Tiers jasters

Tier frars Hitz ina ansola gaglia, ureglia dretga giudasum ed in snez davon en, seniastra fess.

*Gasetta Romontscha nr. 46, 13 da november*

### 1868

#### Nuorsas jastras a **Tujetsch**

- 1) In barbeisch (*tschut castrau*) ner cun corns, ureglia dretga giudasum, ina furcletta davos en, orasum ina ruosna, seniastra ina ruosna.
- 2) Ina nuorsa nera, dretga in mugrin, in snez davon en ed ina ruosna, seniastra in mugrin ed in snez davon en.
- 3) Ina nuorsa alva, dretga furcletta orasum e furcletta davos en, seniastra il medem.
- 4) Ina nuorsa alva, dretga furcletta orasum, in snez davon ed ed ina ruosna, seniastra in snez

davon en.

- 5) In barbeisch ner, dretga giudasum, seniastra giudasum ed in snez davos en entatier il tgau.
- 6) Ina tgigisch grischa, ureglia dretga ina furcletta quadra davon ora e sum entraviers enagiu, seniastra dus snezs davon en entatier il tgau.

Ils proprietaris dils sura tiers san ton pli spert retrer quels bonificond las spesas.

**Tujetsch**, ils 7 da november 1868

Per la suprastanza

Lucas Cavegn

*Gasetta Romontscha nr. 46, 13 da november*

## 1868

Sil marcau da **Glion** dils 16 da november ei stau grond biestgam cun roschada marcadonts ed ei era vegniu marcadau dabia. Ils prezis dallas vaccas eran pli aults che da s. Martin a **Mustér**; in marcadont tudestg, che veva fatg si ina roscha vaccas, ha declarau, ch'ellas stettien ad el circa 11 marenghins ina. Il traffic da stiarls era buca schi vivs sco otras ga, mo ei muncava era lur capomarcadonts da **Tujetsch** e **Medel**. La piazza da fiera da pors era fullanada, mo quels tiers vevan quellaga pign esit e biars purs ein turnai a casa cun lur purschals.

*Gasetta Romontscha nr. 47, 21 da november*

## 1868

**Tiers Jasters**

**A Tujetsch**

- 1) tier la suprastanza in barbeisch (*tschut castrau*) alv, dretga giudasum ed in snez, seniastra giudasum ed in snez davos en entatier il tgau
- 2) tier Tumaisch Huonder a **Rueras** ina tgigisch alva, ureglia dretga in snez davon en.

*Gasetta Romontscha nr. 47, 21 da november*

## 1868

Las novas scolas per la giuentetgna buc obligada pli da frequentar la scola elementara, per las qualas il davos Cussegl Grond ha decretau in subsidi cantunal, han ils vischinadis da **Rueras**, **Sedrun**, **Segnas**, **Mustér-S. Gions** e **Surrein** entschiet a menar en.

*Gasetta Romontscha nr. 48, 28 da november*

## 1868

**Clom da quens**

Tuts quens da Sep Antoni Brugger a **Rueras** e da sia dunna Margreta ein da dar en a lur ugau Tumaisch Huonder da leu.

*Gasetta Romontscha nr. 49, 3 da december*

## 1868

**Tiers jasters**

Tier la suprastanza a **Tujetsch**: ina caura cotschna gaglia, ureglia dretga ina furcletta davon en, seniastra furcletta davon en ed in snez davon en sper la furcletta, dapli barschau sin in tgiern in G.

*Gasetta Romontscha nr. 50, 11 da december*

## 1868

**Clom da quens**

Statalter Sep Antoni Mucli ei ugau e retschevider da quens per Cresenzia Casparin, nata Curschellas, omisdus da **Tujetsch**.

*Gasetta Romontscha nr. 50, 11 da december*

## 1869

---

Il menar il carr dalla posta sursilvana sillas staziuns da **Glion** a **Trun**, da **Trun** a **Mustér** e da **Mustér** a **Tschamut** ei screts ora en libra concurrenza.

*Gasetta Romontscha nr. 1, 1. da schaner*

**1869**

### Anflau

enzatgei daners sin via gronda denter **Mustér** e **Tujetsch**. Pli datier san ins s'informar ella stamparia a **Mustér**.

*Gasetta Romontscha nr. 1, 1. da schaner*

**1869**

### Tiers jasters

Tier Tumaisch Huonder a **Rueras**: ina tgigisch alva, ureglia dretga in snez davon en ed ina ruosna pintga.

Tier Giachen Fidel Berther a **Rueras** in tschanc ner, ureglia dretga fess e dus snezs davos en.

*Gasetta Romontscha nr. 2, 8 da schaner*

**1869**

### Tiers jasters

Tier Giachen Fidel Berther a **Rueras** in tschanc ner, ureglia dretga fess e dus snezs davon en.

*Gasetta Romontscha nr. 3, 15 da schaner*

**1869**

Il fein ei en consequenza dalla stupenta aura, nua ch'ils tiers manedels seviventan cun pauc ni negin pavel, buca cars, denton dependa tut dalla primavera che fa. Tut ch'ei spanegiaus sin quella, cunzun era quels marcadonts, che han tier lur vaccas schon ussa cumprau e pagau varga 20 stiarls sco igl ei il cass en **Tujetsch**.

*Gasetta Romontscha nr. 8, 19 da fevrier*

**1869**

La fin dil carneval passau ei vegniu dau en **Surselva** pliras producziuns da cant e declamatoricas. La societat da cant dil **Badus** ha Gliendisdis Tscheiver divertiu ils Tuatschins cun sias bialas canzuns e siu legher declamatori cungius cun bein enqual remarca sullas femnas ed il traffic d'ozildi. ...

*Gasetta Romontscha nr. 8, 19 da fevrier*

**1869**

Il menar la posta da **Glion** a **Tschamut** ei puspei surdau als signurs frars Berther a **Trun** e **Mustér**.

*Gasetta Romontscha nr. 10, 5 da mars*

**1869**

Nies stimau American dil **Péz Badus** ha puspei schau vegnir tier a nus ina humoristica correpondenza, nua ch'el scriva denter auter: «Jeu sai buca far cunmeins ch'entras in per lingias schar saver nos cars compatriots el **Grischun**, ch'ils emigrants romontschs emblidien buca via las isonzas romontschas ed hagien perquei era celebrau il tscheiver da purs e da signurs, mo culla differenza che quel ei vegnius celebraus en in di. Nunhavend en disposziun il fravi da **Medel**, han ins stuiu sesurvir d'ina musica americana, che fageva alzar las combas, schegie ch'enqualina ein ussa empau da veglias. In brav puschein ha ei buca muncau e cun enqualin eis ei iu cheu sco cun il fumegl dalla claustra da **Mustér**, ch'era ius a mises e magliau memia digl emprem, ch'el ha buca pudiu schigiar diltut. Ils Romontschs eran tier quella biala stiva representai bein da **Tujetsch** tochen **Cazas**.

Appartenet tier ils Romontschs tscheu, va ei bein ed ei ha legrau els da puder beneventar in niev emigrau sursilvan, sgr. scarvon Wieland da **Sumvitg** cun sia biala e numerusa famiglia. Speronza che l'**America** plagi ad els! Culla dretga curascha e bunaveglia sa ei tscheu nuota fallir. Il da viver ei dapresent empau da cars, mo en in per meins semida quei grad entuorn, nua che tut fadigia 7 – 15 frs. a di. – Culla religiun vegn ei era mintga di meglier e meglier. Nus cheu el pign marcau da **Stillwater** havein duas baselgias catolicas, ina irlandèsa ed ina tudestga, ed omisduas ein mintga dumengia pli che pleinas. Nus Romontschs mein el survetsch divin

tudestg, mo desiderassen zun fetg in Romontsch. Jeu sai da dir che la schlattina romontscha va cheu zun bein vinavon, aschia ch'ins vesa, ch'ils vents americans ein tuttavia buca schliats per ils Romontschs, gie in spiritual romontsch vess tscheu gleiti ina biala caplania.

Nus havein in stupent unviern, grad neiv avunda per ina buna via da schletta e buca freid, mesjamna dalla tschendra mavan stellas sco da mesa stad. – Cun grond plascher retschevein nus la Gasetta Romontscha, sulet che nus deplorei ch'ella ei buca pli gronda. Nus recumendassen grondamein a mintgin egl jester e dumiesti da prender quella, lura speranza ch'ella vegness gleiti a s'engrondir ed aunc purtar pli bia novitads da nossa veglia patria. Bein enqual caussa tertgavel menziunar, mo essend cureisma e temps d'urar e giginar vi schar tochen in'autraga. Denton salidein nus l'entira **Surselva».**

*Gasetta Romontscha nr. 11, 12 da mars*

## 1869

### Clom da quens

Medemamein han ils nevs Giachen Fidel e Sep Antoni Beer supriu da trer via lur aug Martin Beer, tuts da **Tujetsch**, perquei dueien tuts quens dil davos vegrin dai en a siu ugau Giachen Antoni Schmid e las excepziuns encunter quei contract ein da schar vegrin tier agl Uffeci circuital.

Gion Paly ei assistent da Barla Cresenzia Beer, omisdus da **Camischolas**.

*Gasetta Romontscha nr. 12, 19 da mars*

## 1869

Il proverbi: „Nadal sin gassa e Pastgas sin pegna“ (ni sco tschel scheva „en pegna“) ei uonn severificaus; ella **Val Tujetsch** vul negin seregurdar d'ina semeglionta cufla sco quella dalla fiasta da Pastgas (28 da mars). Suenter la stupenta aura dils treis meins d'unviern, december, schaner e fevrer, ha igl entir mars ora neviu e fatg ruh ed ussa da calonda avrel havein nus a **Mustér** aunc tschun quartas neiv els plauns.

*Gasetta Romontscha nr. 14, 2 d'avrel*

## 1869

Tier la premiaziun dils taurs a **Trun** ein compari 13 bials stiarls. Ils da **Breil** che han quest atun giu cumprau treis distingui taurs a **Sviz** per circa 50 marenghins, han era uonn giu la plema. Gl'emprem premi da 70 frs. ha il taur da Cavegn a **Breil** tratg a raschun ch'el possedeva tenor declaranza dil president dall'expertisa tuttas qualitads prescrettas per il premi; il secund premi 60 frs. ei vegnius renconuschius ad in stierl da landrechter Alois Latour, il tierz 60 frs. al taur dalla claustra a **Mustér**, il quart 55 frs. ad in stierl da Gion Petschen a **Schlans**, il quint e sisavel als taurs d'assistant Caduff a **Breil** e da capitani Placi Rensch a **Zignau**, 50 frs. per in. **Medel** e **Tujetsch**, nua ch'ins metta pli bia peisa sin biestga mascla che sin bialas vaccas, han tenor solit fatg negina concurrenza tier quella premiaziun.

*Gasetta Romontscha nr. 16, 16 d'avrel*

## 1869

... **Tujetsch** ha per tema d'ina tarda primavera giu bess tiara per ses funs entuorn, nua ch'ins leva arar, e quella laver ei uonn stada corunada d'in stupent effect. Ils funs ch'eran cuvretgs cun ina nevada da 7 quartas, cura ch'ins ha bess tiara, ein en 10 dis stai terreins, aschia ch'ins ha schon entschiet ad arar leu. La tema da gronda scartezia da fein ei stulida, denton havein nus per miez avrel, ed a raschun ch'ins duei buca ludar il di avon la sera, lein nus era buca glorificar memia il discretau avrel, entochen ch'el ei buca finius.

*Gasetta Romontscha nr. 16, 16 d'avrel*

## 1869

### Clom da quens

Gerau Jacob Antoni Schmed da **Tujetsch** ei assistent da Martin Peder a **Cavorgia** e retscheiva ils quens da quel per ina liquidaziun tutelara.

*Gasetta Romontscha nr. 17, 23 d'avrel*

**1869**

### Plontaziun

Quels dis ha la vischnaunca da **Tujetsch** plantau en in niev uaul sillla biala spunda dado **Selva**, nua ch'ella veva gia onn semnau in bi toc uaul. Sut atgna direcziun dil signur inspectur forestal Coaz, ha ella mess ora 5000 larischs, 2000 schiembers, 2000 pegns da duas sorts lenn. Quei ei la medema vischnaunca che ha dau 3400 francs per ranschar tier classenas petgasrap enstagl petgas da lenn, e che ha quels dis puspei vendiu enzatgei plontas veglias per tochen 30 francs l'ina. **Tujetsch** sa preziar e schaniar ses uauls, schegie ch'ina gasetta svizra ha cun caschun dalla davosa malaura columniau quella vischnaunca cun vuler pretender, ch'ella hagi sfraccau giu uauls sin moda devastonta. Cun raschun ei signur inspectur forestal publicamein seschaus si encunter quella totalmein faulsa reproscha, ed ha declarau, ch'ei detti buca ina vischnaunca, che schanegi pli fetg ils uauls e spargni schi fetg lenna sco **Tujetsch**, quella mereti da vegnir ludada e buca blasmada.

*Gasetta Romontscha nr. 18, 30 d'avrel*

**1869**

La canzlia dil cussegli d'educaziun fa da saver ch'ins sappi dad ussa naven tochen ils 31 da fenadur, retrer tier ella ils subsidis cantunals che vegnan dai:

- 1) sco supplement da paga per scolasts patentai ed admissiunai,
- 2) per gidar vischnauncas paupras a pagar la paga minimala,
- 3) per scolas da lavur manilas e
- 4) per las scolas, ch'ein vegnidias dadas quest unviern a quels ch'eran buca pli obligai d'ir a scola.

Sco ins auda ei ranschau en uonn 27 da quellas, en quei 5 che vegnevan dadas mintgadi e che han obtenui 100 frs. ina, ferton che quellas da duasga ad jamna han survegnui 30 – 35 frs. La **Cadi** ha a proporziun giu las pli biaras, ina da mintgadi a **Sedrun** e lu aunc 7 autras. Ils subsidis per quels scolasts, che tegnan scola da repetiziun firaus e dumengias ni in auter di da quei temps, ch'ei buca scola, flessegian per in auter onn primavera. Speronza che quei futur subsidi promovi quei institut, schi necessari per buca schar emblidar via memia ils affons, cunzun per quels dallas classas inferiuras.

*Gasetta Romontscha nr. 20, 13 da matg*

**1869**

### Survesta dils cuosts

La via sur l'**Alpsu**, da **Mustér** tochen tier ils cunfins uranès ha custau 362'360 francs. Subsidi dalla Confederaziun per l'**Alpsu** 200'000 francs. La via en **Surselva** da Rehanau a **Mustér** ha custau 617'503 francs.

*Gasetta Romontscha nr. 21, 21 da matg*

**1869**

Ord l'**America** havein nus retschiert da **Stillwater**, el stadi **Minnesota**, ina correspondenza anonima, che setegn si sugl artechel dil schinumnau „American dil Péz Badus“ cumparius en nr. 11 da nossa gasetta. Correspondenzas, nua ch'ils inserents astgan buca dar en lur num alla redacziun, prendein per principi buca si en nies fegl e stuein aschia era enviar anavos quella correspondenza americana. Nus savein denton segirar al tschelau correspondent, ch'igl American dil Péz Badus, hagi tuttavia buca manegiau schi mal cun sia humoristica descripziun dil tscheiver e biala stiva dils Romontschs, e cunzun buca vuliu renfatschar, ch'els seigien cheu buca secunteni „galantamein“.

*Gasetta Romontscha nr. 23, 4 da zercladur*

**1869**

La fiera d'**Ursera** vegn uonn tenida ils 9 e 10 d.q., pia il di suenter quella da **Sedrun**.

*Gasetta Romontscha nr. 23, 4 da zercladur*

**1869**

Elecziuns districtualas. District **Reinsu**: J. J. Condrau, president, president Cajacob, dr. Berther, assistent Schmid, assistent Caduff, gerau Fidel Decurtins e dr. Decurtins.  
*Gasetta Romontscha nr. 24, 12 da zercladur*

**1869**

La fiera da **Tujetsch**, dils 8 da zercladur, ei stada frequentada da bia glieud ed era da bia tiers, e zuar da tuttas sorts, ils Uranès han cumprau la pli part dils tiers ch'eran sin fiera e zuar per enorms prezis, las vaccas per 220 – 340 frs. Ils schinumnai tachis vevan grond esit, marcadonts da **Tujetsch** e **Medel**, che vevan cumprau vaccas il di avon sin il marcau da **Glion**, han saviu vender tuttas e zuar cun in bi bien gudogn e la tschontscha generala era, che sin quellas vaccas ch'ei vendien l'auter di sin la fiera d'**Ursera** gudognan ei aunc in bienton, schegie ch'ellas ein cumpradas carischia, essend sin la fiera da **Tujetsch**, era ein negins marcadonts auter che dad **Uri**. Era vadials tumprivs eis ei vendiu da biars, las cauras havevan uonn generalmein mo tets e buca iver, mo pagavan denton aunc biebein. La sera eis ei aunc dau ina buna plievgia da bunaura e lavau giu las purginas stadas ils dis vargai, ed ha fatg bein, quei tut ei aura pils purs.  
*Gasetta Romontscha nr. 24, 12 da zercladur*

**1869**

Ils 21 d.q. ei stau in di dublamein liungs, pigl emprem eis ei il di pli liung tenor la regla dalla natira, e secundo eis el staus in snueivel liung muort l'aura ch'el ha purtau. Perdetga da quella verdad ein bia perveseders, che stuevan star sper lur muvels en nuegl senza haver da dar enzatgei vivonda a quels paupers animals e tedlar sin il burlir da quels tierets, aschia ch'ils tiers stuevan secuntentar cun esser silmeins schurmegiai dalla neiv giu pil dies. Per cletg eran paucas alps cargadas e quels che havevan cargau han stuiu vegnir a casa. Ils biars da quels tiers han stuiu secuntentar cun survegnir in nuegl cauld e sco ei sedi leger gassetas. Per cletg ei la neiv buca stada gronda, aschia ch'il mardis han ins saviu schar magliar la biestga. Il mender ein las nuorsas matei stadas, las qualas eran generalmein cargadas ed eran en ina neiv dad in bratsch ault. Denton para ei, che ariguard tussegadas purginas, mondi ei forsa ora biebein. Lein haver speronza ch'ei vegni ton pli spert a semidar e far in'aura pli fritgeivla dacheunaven, aschiglioc savein nus strusch cargar las alps. La pli pauca neiv eis ei stau a **Mustér** e **Tujetsch**, a **Mustér** era ei terrein che a **Sumvitg** era aunc tut alv. Sco ei para, era la neiv vegnida digl aschi malemperneivel **Crap Ner**, sco ei sedi e buca dil maun dil **Lucmagn** ni fagugn. A **Cuera** ha ei neviu quater uras senza puder tschentar sin via. Il donn vid las vegnas, il fein e garnezi ei gronds. Ei era leu ils 21 da zercladur, il pli liung di, schi freid sco ils 21 da december 1868, il pli cuort di, numnadamein 5 grads. La notg dils 21 e 22 ein a **Cuera** pliras schualmas ventschidas dil freid.

*Gasetta Romontscha nr. 26, 26 da zercladur*

**1869**

### **Grischun**

Il til dils jasters entscheiva ad esser ualti ferms en pliras valladas grischunas, oravontut en **Engiadina** ... Ella **Surselva** encuntercomi ei la frequenza da jasters aunc lunsch anavos en cumparaziun cullas allegadas cuntradas e quels che passan atras setegnan si pauc, silpli ch'els fan da **Glion** anora ina excursiun sil **Mundaun** ni naven da **Mustér** sil **Muraun** per guder leu ina maiestusa vesta el mund alpin. Sulettamein **Sedrun** ha il cletg d'in diember gasts che fan leu ina cura d'aria frestga.

*Gasetta Romontscha nr. 30, 23 da fenadur*

**1869**

### **Disgrazia**

In pastur da **Tujetsch** ha sur il lag da **Tuma** sper il **Badus** anflau l'ossa d'in carstgaun, carteivel d'in mistergner che ha avon entgins onns falliu la via sur l'**Alpsu**.

*Gasetta Romontscha nr. 33, 13 d'uost*

## 1869

Sco ei tuna sin tuts mauns para ei che nus haveien en general in bien onn da fretg ed oravontut in oreifer onn per raccolta da mèl. Gasettas tudestgas han el davos riguard cartiu da rapportar in pèr remarcabels exempels. Cun caschun d'ina radunanza d'apiculturs seigi egl **Appenzell** vegniu presentau ina schaumna, che pesavi datier da 100 liras (*glivras*): in apicultur dil **Toggenburg** hagi giu ina schaumna da 84 liras ed obtenuiu da 14 schaumnas 230 liras mèl. Ei legra nus da saver rapportar dalla cuntrada dil **Badus** aunc pli splendids resultats. In pur da **Tujetsch** veva ina schaumna, che pesava 132 liras, ed ha da sias duas schaumnas tratg ora 70 livras mèl. In auter che possedeva 7 schaumnas, ha medemamein fatg questa stad la biala raccolta da 140 liras flur da mèl. Ins vesa aschia che las flurs dil **Badus** han uonn era giu en mèl e ch'ils aviuls tuatschins stattan en activitat buc anavos als aviuls d'auters cantuns, els rendan bien quen a tgi che tractescha els en uorden. Ins vesa ch'ei maunca buca mèl e latg, sche mo nos marcadonts da fiera vegnan ussa aunc cun bravas buorsas marenghins.

*Gasetta Romontscha nr. 39, 24 da settember*

## 1869

### Annunzia e recumandaziun

Il suittascret che ha empriu il mistregn da ligiar en cudischs tier il defunct Stehli a **Glion** ed ei silsuenter sepraticaus en quel cun viagiar per la **Svizra** entuorn, fa da saver ch'el seigi turnaus a casa e sedetti era giu leu cun ligiar cudischs. El serecamonda cheutras per lavur ad in ludeivel publicum empermettend da survir cun promta e solida lavur e per in dueivel prezi.

Emanuel Deragisch

Ligiacudischs a **Bugnei (Tujetsch)**

*Gasetta Romontscha nr. 42, 15 d'october*

## 1869

### Tiers jasters

Tier la suprastonza da **Tujetsch** sesanflan quater nuorsas culla sequenta noda:

1. In barbeisch (*tschut castrau*) alv, ureglia dretga da sum fess e dus snezs davos en, seniastra in snez davos en.
2. In tschanc alv, dretga ina furcetta ed in snez davos en.
3. Ina nuorsa nera gronda, ureglia dretga ina furcetta davon enagiu orasum, seniastra il medem.
4. Ina nuorsa nera, ureglia dretga in M orasum ed in fildirom, si dies colur cotschna.

Ils proprietaris da quels tiers ein supplicai da vegnir per els ton pli spert.

*Gasetta Romontscha nr. 42, 15 d'october*

## 1869

### Elecziuns dils cussegliers naziunals

**Tujetsch:** Toggenburg e cusseglier guovernativ Condrau 122 vuschs.

*Gasetta Romontscha nr. 45, 4 da november*

## 1869

### Tiers jasters

Tier Giachen Martin Giger: in tschanc grisch, ureglia dretga ina furcetta orasum, seniastra in ruosna amiez l'ureglia ed in snez davos enagiu.

*Gasetta Romontscha nr. 46, 11 da november*

## 1869

### Elecziun da cusseglier naziunal

**Tujetsch** 160 per A. Condrau.

*Gasetta Romontscha nr. 47, 19 da november*

## 1869

### Tiers jasters

A **Tujetsch** tier Vigeli Beer „Vig“ in barbeisch alv cun corns, ureglia dretga giudasum e fess ed in snez davos en, senistra fess.

Tier Giachen Martin Giger: in tschanc grisch, ureglia dretga ina furcletta orasum, senistra ina ruosna amiez l'ureglia e dus snezs davos enagiu.

*Gasetta Romontscha nr. 48, 26 da november*

## 1869

Resultats dallas elecziuns dils dus cussegliers naziunals. **Tujetsch**: 219 Condrau ed 1 Caflisch.

*Gasetta Romontscha nr. 49, 3 da december*

## 1869

Avon che serrar la sessiun ei aunc vegniu mess avon ina petiziun dalla vischnaunca da **Tujetsch**, nua ch'ei vegn detg: ella hagi unitamein acceptau la nova constituziun, buca senuspiu giud ils artechels che prescrivien allas vischnauncas in bien uorden, ina ludeivla indemnisaizun per la gudida dils beins communals, e cristianeivel secuntener visavi ils domiciliai, mo a raschun che la constituziun seigi vegnida fierfa, duegi ins scriver ora ils dretgs dil pievel a partir sco els stattan egl emprem capetel dalla refusada constituziun. Cheutras vegnien las cumpetenzas dil pievel e dil Cussegl Grond determinadas scosauda ed ils cuntuai cumbats el Cussegl Grond sur tgei che seigi da scriver ora e tgei buc, calien si. Sin proposiziun da Gadmer ei il Cussegl Grond buc entraus en quella petiziun, ferton che A. Condrau veva proponiu da surdar quella petiziun al Cussegl Pign e cumissiun cantunala per schar rapportar el proxim Cussegl Grond. Sche nus selegrein che la damonda dalla banca ei vegnida scretta ora sil pievel, sche stuein nus da l'autra vart grondamein deplorar che quella impurtonta petiziun da **Tujetsch** ha anflau schi pign susteniment.

*Gasetta Romontscha nr. 50, 11 da december*

## 1869

La menadira dil sal da **Mustér** e **Tujetsch** ei el davos Fegl Ufficial scretta ora en libra concurrenza.

*Gasetta Romontscha nr. 50, 11 da december*

## 1870

### Correspondenza americana

Cun plascher legin nus las novitads, che la Gasetta Romontscha porta a nus ord nossa veglia patria grischuna. Cheuencunter vi jeu era comunicar enzatgei ord nossa nova patria americana. Ils Romontschs ein tscheu, ton sco jeu sai, tuts ualts taffers e dil rest va ei era cun ils biars ualts bein, enqual excepziun dat ei segiramein era. Nus havein tscheu in schliet onn pervia dils daners, ch'ein fetg scarts, gie ei vulan 15 – 25 per tschien tscheins, ferton ch'ins deva avon 5 – 8 procent. La vivonda ei buca cara ed ils biars survegnan quella senza daner blut. Ei dat schon era da quels, che han pauc criedi e per igl unviern empau da trit, il bia da quella glieud, che maglian oz si tut e fan buca cass da damaun. Nus havein tscheu fetg freid ed in pèr zolls neiv; las auas ein tuttas scheladas si 4 zolls gries, aschia ch'ins sa dapertut ir sur las auas ora cun cavals e cargas. Buna via da schletta per il tscheiver maunca ei aschia buc, savessen nus sin ina schlittada vegnir ensemen cun nos Sursilvans el Grischun, fuss ei per nus fetg emperneivel e materia da conversaziun muncass ei cheu betg per umens e femnas.

Mo nunsavend quei daventar vi jeu raquintar dad in auter viadi, che vegn ussa fatgs bia ell'**America**, il viadi en **California** sillla viafier pacifica. Vivon duvrara ins per ir cun il vapur da posta navem da New York a S. Francisco 25 dis, ussa fan ins quei tur da 4000 miglias en 8 dis per 50 talers tut sin viafier. Dacuort ha nies compatriot Tias Decurtins, vivon ustier a **Trun**, fatg quei viadi cun aunc in auter Romontsch. Sco els han quels dis scrit a **Minnesota** ein els arrivai saunamein an **California** ed han en quella allontanada tiara anflau dabia Romontschs. Ton per quels che vessen tschaffen d'ir ella tiara d'aur, mo ils biars Romontschs en **Minnesota** han buca grond tschaffen cheutier.

Co stat ei cul stradun sur il **Lucmagn**? Luvrei brav e dei buca suenter! Co stat ei cun nos vegls trochists da **Sursassiala**? Viva il bagat aunc ni ei mo il narr pli en veta? Tscheu veva il bagat era

priu in'entschatta, mo el ei gleiti stulius e schau anavos mo il narr e quel ha pauc da far cullas troccas, sonder plitost cun ils daners.

Agurond in legreivel niev onn a tuts Romontschs salida sia veglia cara patria  
**Stillwater**, ils 6 da december 1869

In nativ dil **Péz Badus**

*Gasetta Romontscha nr. 1, 6 da schaner*

**1870**

A **Regensburg** en **Baviera** ei ils 6 da schaner vegniu satrau in stimau um, nua ch'ins ha viu 42 Romontschs el til da sepultura. Ei era la bara da Joseph Deplazes *Deplaz* da **Tujetsch**, ch'ei en sia giuventetgna setratgs ella **Baviera** ed ha leu cun siu negozi da latg acquistau gronda rihezia. Mo el fuva era rehs en bunas ovras encunter ses numerus cumpatriots grischuns, che vegnevan schi savens tier el per encuir survetsch. La cumparsa da varga 40 Romontschs, che han vuliu render la davosa honur a lur benefactur, dat perdetga da sia beneficienzia. El rauassi en pasch!

*Gasetta Romontscha nr. 3, 21 da schaner*

**1870**

**Annunzia da mort**

Cun profunda tristezia fagein da saver a tuts nos parents ed enconuschents ella **Surselva**, ch'ei hagi plaschiu agl Altissim da clamar naven da questa veta tier la veta perpetna nies carissim mariu e bab

**Joseph Deplazes Deplaz (\*9-9-1793)**

da **Tujetsch**, stabilius a **Regensburg**

Provedius cun ils sogns sacraments dils moribunds eis el morts ils 4 da schaner en ina vegliadetga da 77 onns. Nus recumandein l'olma dil car defunct alla pia memoria da tuts enconuschents.

**Regensburg**, 10 da schaner 1870

La combrigiada consorta:

Barla Deplazes *Deplaz*, nata Monn (\*10-6-1824)

En num dils affons:

Vigilius J. Deplazes

*Gasetta Romontscha nr. 3, 21 da schaner*

**1870**

**Grischun**

La lescha da rempars ei acceptada dil pievel. ... La **Cadi** ha votau sco suonda: **Medel** 75 pro, 8 contra; **Tujetsch** 61 per refusar e 7 per acceptar (Quella vischnaunca hagi vuliu suandar gl'exempel dil Cussegl Grond, che hagi dacuort era quasi unitamein enviau anavos la petiziun da **Tujetsch** per far scriver ora danovamein ils dretgs dil pievel.), **Mustér** 101 per la lescha e 61 encunter, **Sumvitg** 109 pro e 12 contra, **Trun** encuntercomi ha refusau cun ina vusch, a **Breil** ein 30 stai per acceptar e 60 per enviar anavos.

*Gasetta Romontscha nr. 6, 11 da fevrer*

**1870**

El davos Fegl Ufficial vegn ei communicau extracts ord ils rapports dils experts per la premiazion dils bos. ... ella **Foppa** e **Lumnezia** seigi il progress ella tratga da biestga medemamein veseivels, ferton ch'ins sappi buca secuntentar cullas prestaziuns da **Tujetsch** e **Medel**.

*Gasetta Romontscha nr. 6, 11 da fevrer*

**1870**

**Clom da quens**

1) Capitani Mucli da **Tujetsch** ei ugau dils affons minorens Gion Rest e Genoveva Mucli da **Tujetsch**.

2) Barla Sievi ha per assistent Sep Antoni Deragisch, omisdus da **Bugnei**.

*Gasetta Romontscha nr. 6, 11 da fevrer*

**1870**

El cussegli grond d'**Uri** ei vegniu signalisau ch'ei vegni sull'**Alpsu** menau en roschada buots vin vulclin senza pagar il dazi da consum e sin quei ei vegniu concludiu da schar intercurir quei pli datier. Il daziè grischun a **Tschamut** vess buna peda d'era trer en il dazi per **Uri**, ton pli che las respectivas entradas d'omisdus cantuns tonschan buc da cuvierer siu salari.

*Gasetta Romontscha nr. 9, 4 da mars*

**1870**

**Cloms da quen**

Statalter Gion Paul Berther a **Rabius** ha l'ugadia da Barla Cresenzia Beer da **Camischolas**.

*Gasetta Romontscha nr. 10, 11 da mars*

**1870**

**Clom da quens**

Tuts quens dils conjugals Gion Fidel Maculin e da sia defuncta dunna Maria Ursula Maculin, nata Schmed, ein da surdar a lur curaturs assistent Schmed a **Sedrun** e gerau Duri Wenzin a **Rueras**.

*Gasetta Romontscha nr. 11, 18 da mars*

**1870**

Donaziuns per **Domat**: ... **Tujetsch** cun 100 frs. ...

*Gasetta Romontscha nr. 15, 14 d'avrel*

**1870**

Tier l'inspecziun dils taurs dalla **Cadi a Trun** ein cumpari 19 da quels armauls. ... Nus considerein per in progress che tuttas siat vischnaucas eran uonn representadas, era **Tujetsch** e **Medel**, che vevan onns ora priu negina part pli da quella premiazion. ... L'honur che **Medel** ha giu uonn per l'emprema ga, lein nus sperar che **Tujetsch** hagi in auter onn, da ver a returnond dall'inspecziun da **Trun** in da ses taurs corunaus cun flurs e tschupials.

*Gasetta Romontscha nr. 17, 29 d'avrel*

**1870**

La banca cantunala ei fetg probabel acceptada dalla maioritad dil pievel **Grischun**. Dumengia vargada ha **Tujetsch** acceptau quella unitamein cun 114 vuschs. ...

*Gasetta Romontscha nr. 21, 28 da matg*

**1870**

En **Surselva** fa la zoppina progress. Tras nuorsas jastras eis ella arrivada tochen sil **Lucmagn** e tras ina vacca cumprada sil davos marcau **Glion** eis ella rutta ora en in mises da **Tujetsch**.

Sinquei ha **Uri** serraу encounter il **Grischun**, aschia che las proximas fieras da **Trun** e **Tujetsch** piteschan cheutras grond donn.

*Gasetta Romontscha nr. 21, 28 da matg*

**1870**

L'expertisa federala per repartiziun dils subsidis per uors, consistenta ord sis personals, ei ils 30 da matg vegnida sull'**Alpsu** tochen **Mustér**. Ils 31 eis ella partida per **Glion** inspectond las devastaziuns dil **Rein** e dils runs.

*Gasetta Romontscha nr. 22, 3 da zercladur*

**1870**

**Ina buorsa cun entgins daners**

ei vegnida piarsa denter **Mustér** e **Tujetsch**. Gl'anflader vegn supplicaus da render quella al pot da **Tujetsch**.

*Gasetta Romontscha nr. 22, 3 da zercladur*

## 1870

Dapi che la posta sursilvana va sull'**Alpsu** drovan las brevs dalla **Cadi**, che van a **Rueun, Uors, Andiast, Pigniu, Siat, Ruschein, Ladir e Sevgein** 24 – 72 uras dapli per arrivar el liug da lur destinaziun, e quellas da **Lumnezia e Sursaissa** 24 uras. Tgisa sche la Confederaziun pudess buca star ora da dar als respectivs curriers, che fan lur tur mo treis gadas ad jamna, entgins frangs dapli pagaggia e far spitgar els a **Glion** entochen che la posta dall'**Alpsu** arriva?  
*Gasetta Romontscha nr. 27, 8 da fenadur*

## 1870

Signur colonel La Nicca ha dau ora ina broschura sur la questiun dalla viafier alpina, nua ch'el dilucidescha siu enconuschen project cun bia tabellas e cartas. Tenor quei duessen las viasfier dil **Lucmagn e Gottard** s'unir ella **Val Tujetsch**. Enstagl da construir il colossal tunnel gottardistic, menass ins la viafier dad **Amsteg** naven ella **Val Maderana**, tras il cuolm **Rizli** a **Tujetsch** e da leu ensemblamein culla viafier da **Cuera** sur il **Lucmagn**. Al **Grischun**, che vesa ch'igl ei da far nuot cul **Spilia**, fuss quei plan favoreivels ed ei pudess schabegiar ch'era ils Gottardists, curdond sin ferms incaps tiella construcziun da lur tunnel, schassen plascher quella idea fusionistica.

*Gasetta Romontscha nr. 28, 15 da fenadur*

## 1870

### Correspondenza dil **Badus**

Silla generala calamitad e lamentaschun d'ina magra raccolta da fein en quellas cuntradas, nua ch'ins ha buca saviu luvrar cull'aua da schuar, savein nus relatar ord il bi selvadi da **Tujetsch** aunc in ualti favoreivel resultat. Segir ch'il fein grass e magher ha era tier nus pitiu zun fetg en consequenza dalla gronda schitgira, schegie buca en quei grad, sco ellas cuntradas enviers giu il **Rein**. Tonaton po ins calcular, ch'ei hagi calau pli ch'ina tiarza visavi ad ina mediocre raccolta. Igl ei stau uonn ina da quellas snueivel raras excepziuns per nossa vallada, ch'il sulegl ei staus stagn caulds, schiglioc buca tgunsch che lez fetschi donn a nus, anzi pil gartetg dil garnezi, sco igl ei uonn il cass, munglassen nus schar barschar empau fein. Pil cal dil fein ha **Tujetsch** ina remedura, ina resursa en ses bials cuolms, pil cal dil garnezi aber sto ins prender il refugi tiels magasins ed arcuns – buca dall'**Egipta** – sunder dils hermès e negoziants.

Enconuschen eis ei en nies **Grischun**, tgei enormas massas fein **Tujetsch** recava mintga onn ord ses cuolms, ord ses beins communals, persesez encunter tutta dueivla indemnisiatiun visavi la cassa da vischnaunca. Sil cal general e penuria da fein da casa egl onn present, ha nossa ludeivla suprastonza concediu e stigiau ora els cuolms in'enorma quantitat sorts per il schinumna fein a pastg. En publica radunanza ha gl'ingant da quellas sorts furniu alla cassa da vischnaunca varga 2000 frs., senza quintar las tschuncheismas fein, ch'ils paupers han saviu segar gratis. Ils particulars han uonn retratg ord las pastiras ina tala massa fein, che biars pretendan da haver en clavau schi bia mesira fein, sco in onn da buna raccolta. Remarcabel fuss ei, da vegnir sissu il diember da blahs u ponns fein, che **Tujetsch** ha uonn runau ord ses cuolms, e valetar quels tenor carischia, sco il fein sto uonn probabel vegnir. Quei quen vegness a figurar in resultat, il qual giustificass cumpleinamein la sbursada da 2000 frs. en cassa da vischnaunca, tonpli che quels mellis pagan era deivets communals. Intervegnin nus quella rendita, sche vegnин nus medemamein a comunicar ella als lecturs dalla Gasetta Romontscha.  
– Duess il negozi da tiers quest atun aunc trer mo empau, sche ha **Tujetsch** giu raschun, da celebrar uonn la fiasta federala d'engraziament cun in particular entusiassem.

Sur in auter rom d'industria dils Tuatschins vegnин nus cul temps a far nies rapport.

*Gasetta Romontscha nr. 38, 22 da settember*

## 1870

### Tiers jasters

En mauns da statalter Josef Anton Deragisch a **Tujetsch** sesanflan sequentas nuorsas jastras:

- 1) Ina nuorsa alva cun corns pigns, ureglia seniastra dus snezs davon en.
- 2) In tschanc ner entir cun corns, ureglia dretga in mugrin orasum davon en, seniastra fess.
- 3) Ina nuorsa alva, seniastra orasum davosenagiu in snez e davon 3 snezs entraviers enagiu.

- 4) In tschanc alv entir culla noda da nr. 3.
  - 5) In tschanc alv entir, ureglia dretga ina furcletta davos en.
  - 6) Ina tschutta alva cun tachels ners e noda sco nr. 5.
- Gasetta Romontscha nr. 42, 21 d'october*

## 1870

Ella cufla dils davos dis d'october havess in Cavegn da **Breil** gleiti anflau la mort sill'**Alpsu**. Venderdis vargau ha el bandunau **Ursera** per allas duas suentermiezdi. Veggend sisum il lag, er'ei stgir ed el veseva buca pli ils parricars sco fastitgs dalla via. Per buca rescar dad ira surengiu ella stgiraglia, seresolva el da restar grad eri. El batta in toc buna via e va cheu a spass en tutta aura dallas sis dalla sera entochen las sis dalla damaun. Lura anfla el il stradun e va in toc vinavon. Nunpudend rumper via po el susentar umens da **Tschamut**, che vegnevan encunter ad el. Ella Rheinquelle a **Tschamut** pren el sin sia aventura in bien solver e dorma lu 24 uras e sededesta viscals e da bunaveglia.

*Gasetta Romontscha nr. 44, 4 da november*

## 1870

La fiera da s.Martin a **Mustér** ei ida meglier che quei ch'ins spitgava. Ina truppa marcadonts tudestgs e romontschs han fatg concurrenza e plirs ein i in grond toc encunter als tiers, che vegnevan menai sin fiera, giuviars entochen **Sumvitg** e siviars encunter **Tujetsch** e **Medel**. Sin quella moda ei vegniu vendiu bia vaccas per ualts bials prezis, gie ellas han pagau cheu circa 3 marenghins dapli che silla lavagada fiera da **Trun** digl october. ... Ils capomarcadonts da **Tujetsch** e **Medel** han semtgau in per bravas roschas stiarls per la tiarza fiera da **Ligiaun**.

*Gasetta Romontscha nr. 46, 18 da november*

## 1870

### Annunzia da mort

Cun profunda tristezia fan ils suttascrets enconuschen ch'ei hagi plaschiu agl Altissim da clamar ord questa veta tier la veta perpetna nies car frar

### Statalter Giachen Antoni Berther

El ei morts ils 2 d.q. provedius cun ils sogns sacraments e perduns dils moribunds en ina vegliadetgna da 58 onns. Nus recumandein sia olma alla pia memoria da tut ses parents ed amitgs.

**Camischolas (Tujetsch)** ils 8 da december 1870

Ils fargliuns en malencurada

*Gasetta Romontscha nr. 50, 16 da december*

## 1870

### Clom da quens

Tuts quens cul defunct statalter Giachen Antoni Berther da **Tujetsch** dueien vegnir dai en al curatur da massa Vigeli Josef Berther a **Rueras**.

*Gasetta Romontscha nr. 52, 30 da december*

## 1870-1880

Baghegiau il sontget da **Dieni** entras Duri Battesta Berther da **Dieni**; las duas statuas da s. Giusep e da s. Vendelin ein vegnidas tschentadas en da Vigeli Giusep Berther da **Dieni**. – El sontget sesanflan duas cruschs, ina da fier culla inscripziun Giusep Maria Peder, 53 onns, il matg 1843 vegnius per la veta entras in squatsch lavina enasi sut il **Draus**. Ina crusch lenn si per la preit culs bustabs J. F. C. R. = Giachen Fidel Cavegn da **Rueras**, ch'ei vegnius per la veta da cavar cristallas enasi **Val Giuv** odem la stad 1872.

*Notizia da pader Baseli Berther*

## 1871

### Publicaziuns ord il Fegl Ufficial

3) Tumaisch Huonder da **Rueras** ei ussa ugau da viewa Tresa Berther nata Jehli a **Pardomet** e da

siu fegl Franz a **Cuera**.

*Gasetta Romontscha nr. 3, 20 da schaner 1871*

**1871**

**Publicaziuns ord il Fegl Ufficial**

Tuts quens dil defunct Vigeli Valier da **Tujetsch** dueien veginr dai a siu liquidatur gerau Gion Andriu Berther, fegl, a **Camischolas**.

*Gasetta Romontscha nr. 2, 13 da schaner 1871*

**1871**

(Correspondenza dil **Badus**) Denter las 10 – 11 dalla notg dils 12 sils 13 da fevrer ei vegniu observau a **Tujetsch – Sedrun** in extraordinari fenomen. Dil maun encunter mesanotg, sco nus numnein: **Strem, Caschlè e Mila**, s'estendeva vid il firmament, schiglioc tut sereins e stellius, ina maiestusa tarlischur semeglionta ad in schinumnau „nordlicht“. Igl observatur, secartend ch'ei seigi zanua el vischinont cantun **Uri** in grond barschament, cloma neutier auters aspectaturs ils quals eran dalla medema opiniu. Mo nunsavend nus novas, ch'ils proxims dis passai seigi stau barschament egl **Uri**, sch'eis ei evident, che quella glisch vegin dil nord, era sch'ella duess derivar mo dacheu, perquei che **Berlin** ha buca daditg sittau victoria sulla curdada da **Paris**. Ils perderts astrologi tscheu a **Sedrun** ein aber aunc en dispeta, schebein quei nimbus derivi da **Berlin** enneu, ni sch'el fuvi schiglioc schon el contuorn da **Cuolm de Vi** e da **Caschlè**. Pertgei tenor ina veglia detga fussen las strias serimnadas ualti stedi entuorn la platta dil barlot sil **Cuolm Caschlè**, essend cheu in oreifer bi prospect e favoreivel liug da saltar. Surschein pia alla madira ponderaziun da scadin lectur, da lignar sche quella glisch sura allegada seigi naturala ni sch'ei fuss mo stau las scuas da fiug dallas strias, che tenevan da quellas uras lur tscheiver.

*Gasetta Romontscha nr. 7, 17 da fevrer 1871*

**1871**

La vischnaunca da **Tujetsch** ha dils 5 pugns da recapitulaziun acceptau mo la taglia e taxa sin tgauns.

*Gasetta Romontscha nr. 7, 17 da fevrer 1871*

**1871**

**Assicuranza da fiug**

Naven da 1800 – 1870 vein nus il sequent resultat:

**Tujetsch** cun 132 casas ei barschau en 70 onns 17 casas. ... Il pli grond barschament ein staus: 1822, ils 11 da fenadur, ei igl entir vitg da **Camischolas** a **Tujetsch** barschaus giu cun 14 casas.

*Gasetta Romontscha nr. 11, 17 da mars 1871*

**1871**

**Annunzia da mort**

Cun dolur e tristezia fagein nus cheutras da saver a tuts nos parents, amitgs ed enconuschents, ch'ei hagi plaschiu agl Altissim da clamar ord questa veta speranza tier la gloria celestiala nies pli vegl e car fegl

**Lucas Cavegn**

El ei morts a **Friburg** dalla virola nera, la sera dils 10 d.q. provedius culs s. sacraments e perduns dils moribunds en ina vegliadetgna da 15 onns. Nus recumandein l'olma da nies car affon alla pia memoria da nos enconuschents e nus sez a lur cuntuonta beinvulentscha.

**Sedrun**, ils 13 da mars 1871

Lucas Cavegn, bab

Onna Maria Cavegn, nata Wenzin, mumma

*Gasetta Romontscha nr. 11, 17 da mars 1871*

**1871**

**Publicaziuns ord il Fegl Ufficial**

Vieua Madleina Schmid e sias treis feglias laian ir scussiun e lur quens ein da dar en a statalter Gion Battesta Monn.

*Gasetta Romontscha nr. 12, 24 da mars 1871*

### 1871

La jamna vargada ein ils prezis e la tscherca dils stiarls carschi zun fetg tut anetgamein. In marcadont uranès ei vegnius ella **Val Tujetsch** ed ha entschiet a cumprar si stiarls per bials prezis, el medem temps ei lura arrivau brevs dalla **Italia**, ch'ins spetgi leu sin d'atun tscherca da tiers. Quei ha dau fiug, marcadonts dad **Uri**, da **Tujetsch** e **Medel** ein spert dai dalla **Surselva** giu ed han cumprau si sfraccada stiarls e pagau tochen 8 marenghins il tgau, ferton ch'igl ei sillla fiera da **Ligiaun** dil davos october vegniu vendiu per 7 marenghins il pèr. Tgei miadada! In marcadont ha denton remarcau: In asen fa biars asens!

*Gasetta Romontscha nr. 14, 7 d'avrel 1871*

### 1871

Quest atun havein nus fatg attents sil bi capital che la vischnaunca da **Tujetsch** hagi tratg ord igl ingant dil fein a pastg, ussa savein nus relatar, che tenor ina exacta statistica hagi la vischnaunca da **Medel** retratg igl onn vagau 1258 faschs fein a pastg ord sias muntognas; sch'ins quenta che scadin fasch vali 7 frs. obtegn ins in capital da 8800 frs.

*Gasetta Romontscha nr. 15, 14 d'avrel 1871*

### 1871

L'inspecziun da taurs a **Trun** ha cuntentau ils experts. Tratg premi per lur bos han: ... 6) Gion Battesta Monn a **Tujetsch** 50 frs.

*Gasetta Romontscha nr. 16, 21 d'avrel 1871*

### 1871

#### **Annunzia da mort**

Cun profunda dolur notifichein nus cheutras a tuts nos parents, amitgs ed enconuschents, ch'ei hagi plaschiu agl Altissim da clamar ord questa veta terrestre speranza tier la gloria celestiala nossa cara mumma, sora e quinada:

#### **Misterlessa Barla Condrau, nata Cavegn**

Suenter ina liunga malsogna da ½ onn eis ella morta ils 22 d'avrel – 17 meins suenter siu mariu e 2 meins suenter siu pli giuven affon da 5 onns – en ina vegliadetgna da 41 onn e 23 dis, provedida cun tuts s. sacraments e perduns dils moribunds. Nus recumandein la defuncta alla pia memoria da tuts parents ed amitgs.

**Mustér**, ils 25 d'avrel 1871

Placidus Condrau

en num dils dus orfens e dils quinai.

Lucas Cavegn, frar

*Gasetta Romontscha nr. 17, 28 d'avrel 1871*

### 1871

#### **Elecziuns circuitalas**

Sco derschaders ein vegni numnai: ... assistant Schmed da **Tujetsch**, ...

*Gasetta Romontscha nr. 20, 18 da matg 1871*

### 1871

#### **La fiera da Sedrun**

che curdass uonn sillla fiasta da Sontgilcrest vegn tenida il di avon q.e. mesjamna, ils 7 da zercladur.

*Gasetta Romontscha nr. 20, 18 da matg 1871*

### 1871

#### **Uniun da Pius dalla Cadi**

Ord la cassa dall'uniun vegn ei tenor conclus dau uonn in subsidi per il cant ecclesiastic a **Surrein** ed in per la biblioteca locala da **Tujetsch**.

*Gasetta Romontscha nr. 21, 26 da matg 1871*

**1871**

**Publicaziuns ord il Fegl Ufficial**

Barla Catrina da Josef Antoni Gieriet ha per ugau gerau Stoffel Riedi, omisdus da **Tujetsch**.

*Gasetta Romontscha nr. 21, 26 da matg 1871*

**1871**

**Sterschau**

sin via orda **Medel** tochen **Tujetsch** sis nuorsas bergamascas. Tgi che anfla quels tiers ei supplicaus da metter a mauns quels a gerau Lucas Cavegn a **Sedrun** encunter ina bonificaziun da 3 frs. il tgau.

*Gasetta Romontscha nr. 24, 16 da zercladur 1871*

**1871**

**Clom da quens**

Tuts quens dil defunct Thomas Schmed da **Tujetsch**, morts (57 onns) el bogn da **Bormio**, ein d'admetter a gerau assistent Schmed da **Tujetsch**.

*Gasetta Romontscha nr. 32, 11 d'uost 1871*

**1871**

Ils 10 d.q. ei miert el **S. Gagl** in spiritual grischun, bein enconuschen ad ina troppa discipels ord tuttas valladas catolicas da nies cantun, igl ei signur professer Jacob Josef Hitz da **Tujetsch**, nevs digl enconuschen erudit decan Hitz p. m. El era naschius ils 6 da matg 1806. Sco bia auters da nos spirituals catolics da sia generaziun ha el fatg il gimnasi a **S. Pieder** ed ils studis liceals a **Solothurn**, la quala scola gudeva da quei temps tier ils catolics meglier criedi ch'ozildi. La teologia ha el studiau el seminari a **Cuera** ed ei vegnius benedius ora 1834. Gl'onn suenter eis el vegnius numnaus instructer dalla scola cantunala catolica, che flureva da quei temps ella abbazia a **Mustér**. El e siu amitg e collega Martin Durgiai eran denter ils professers da quei institut, quels che levan nuota saver da translocar la scola a **Cuera**, prevedend che quella translocaziun seigi igl emprem pass tier l'uniun dallas scolas cantunalias. Da 1842 – 1846 ha el professorau a **Cuera** ed ei in onn vegnius honoraus culla plazza da rectur. Igl onn 1846 ha el obtenu ed acceptau in clom ella scola cantunala **S. Gagl**; da leu eis el 1857 setratgs egl institut a **Sviz**. Suenter in professorat da 18 onns, nua ch'el sedestingueva tras diligenza, premura e bien dun da communicaziun, eis el sereratrags silla caplania a **Kaltbrunn**, cantun **S. Gagl**, nua ch'el era stimaus e carezaus da tut ses parochians. Nunspitgadamein survegn el ina greva malsogna e miera schon il tierz di. El ruasssi en pasch!

*Gasetta Romontscha nr. 33, 18 d'uost 1871*

**1871**

**Annunzia da mort**

Cun profunda dolur fan ils suttascrets cheutras da saver, ch'ei hagi plaschiu agl Altissim da clamar ord questa veta tier la veta perpetna

**igl aultreveriu signur J. J. Hitz da Tujetsch**

Caplon a **Kaltbrunn**

El ei morts ils 10 d'uost provedius cun ils s. sacraments e perduns suenter ina malsogna da modus dis en ina vegliadetgna da 65 onns.

Nus recumandein l'olma dil defunct alla pia memoria da tuts parents ed amitgs.

Ils parents ed amitgs dil defunct

*Gasetta Romontscha nr. 33, 18 d'uost 1871*

## 1871

Dacuort vegnan dus Englès giu dal **Badus** el Hotel Rheinquelle a **Tschamut** e spetgan leu sin lur tierz cumpogn, che fuva restaus empau anavos sul **Lag da Tuma** si. Ei vegn notg ed igl Englès selai aunc buca ver. Ses camerats plein tema, ch'el hagi falliu la via, ni ch'ei seigi schabiau zatgei, tarmettan umens cun latiarnas e proviant sil **Cuolm** per encuir el. L'entira notg traverseschan quels plirs cuolms e **Vals**, greschan e schulan, mo anflan negin fastitg dil sepiars. Allas treis arrivan els anavos a **Tschamut** e declaran, che sch'el sesanfli aunc sil cuolm, seigi el buca pli en veta, tschelluisa havessien ei cun dar sinzur stuiu anflar el. En mesa desperaziun van allura ils dus Englès culs dus umens sin nova tscherca, ferton ch'ei vegneva a **Sedrun** patertgau vid il cavar fossa per il disgraziau. La nova expediziun ei buca stada s'avanzada ton lunsch, ch'ella entaupa igl Englès cartius morts. Quel di, ch'el vevi falliu la via e nunsavend nua semenar el stgir, seigi el sefiers sin ina meidia fein a pastg e durmiu stagn e bein tochen per la damaun vi. En triumf meinan ei el el hotel, nua ch'el ha dustau siu appetit englès cun in brav solver "alla savetscha" e pagau generusamein ils umens, che vevan encuretg el. Ina tala aventura vala bia marenghins els egls d'in Englès.

*Gasetta Romontscha nr. 35, 1. da settember 1871*

## 1871

Ils 29 d.q. ei arrivau ina banda da 22 zagrenders sur l'**Alpsu** entochen **Tschamut**, en quei plirs affons en vestgadira paradisica. Mo ina roscha naziunalgardists tuatschins sut commando dil schendarm Hosang, ha la damaun dils 30 turnentau quels gasts danunder ch'els eran vegni. Natural ch'ei ha buca muncau protestas, reclamaziuns e smanatschas da vart dils vagabunds.

*Gasetta Romontscha nr. 35, 1. da settember 1871*

## 1871

Sut favoreivla aura ein ils marcadonts da **Tujetsch** e **Medel** ils 22 d.q. semess sin via cun lur bialas roschas per frequentar la fiera da **Ligiaun**. Schon da bia onns enneu han quels buca giu schi numerosas roschas. Essend ch'els han cumprau quels tiers, cunzun la primavera, bienmarcau e che las novas dall'**Italia** ein bunas, pon ins sperar ch'els fetschien uonn ina buna campagna.

*Gasetta Romontscha nr. 38, 22 da settember 1871*

## 1871

### Clom da quens

Sur la relaschada facultad digl aultreveriu Josef Hitz da **Tujetsch**, morst a **Kaltbrunn**, ei vegniu enconuschiu il beneficium inventari. Tuts crediturs e debiturs dueien dar en lur quens agl ugau Lucas Cavegn a **Sedrun**

*Gasetta Romontscha nr. 38, 22 da settember 1871*

## 1871

Ils 19 d.q. ei sin ina excursiun militara sut direcziun da colonel Hofstetter arrivai a **Mustér** sur l'**Alpsu** 60 officiers ed aspirants ord la scola centrala a **Thun** cun 70 cavals. Ils 20 serendan els a **Glion**, ils 21 a **Cuera**, nua che la cumpignia pren sia fin.

*Gasetta Romontscha nr. 42, 20 d'october 1871*

## 1871

### Nuorsas jastras

Tier la suprastanza a **Tujetsch** san ins dumandar suenter sequentas nuorsas restadas anavos tier la zavrada:

1. In anugl ner cun corns, treis snezs ell'ureglia dretga davos en.
2. In tschanc alv cun corns, dretga tagliau giudasum, fess ed in snez davos en; seniastra in snez davos ed in davon en.
3. In anugl alv, tagliau giud la cua, ureglia seniastra tagliau giudasum ed in snez davon en osum e colur cotschna si dies.
4. In tschanc alv, seniastra in tarden osum e dus snezs davon en.

5. In barbeisch, seniastra dus snezs davon en e duasga fess.
  6. In barbeisch, dretga furcetta osum e dus snezs davos en, seniastra fess.
- Gasetta Romontscha nr. 42, 20 d'october 1871*

**1871**

### **Correspondenza dil Badus**

Essend ussa, entras scuder ora il garnezi, la laver annuala dil pur finida, resalvond il pagar ils deivets, sche sa igl agricolant far il meglier la bilanza da sia raccolta. Jeu senuspeschel da vuler dumbrar e quintar ora si per la detta a nos purs la rendita d'uonn, quei quen san els sez excellent; jeu riscass mo da far errurs, las qualas els vegnissen buca ad approbar. Dad ina caussa fetschel jeu cheu menziun sin miu agen risico. Igl ei enconuschent daditg, ch'ei dat a **Tujetsch** bi glin e daried sem. Ina vieua cun numerusa famiglia ha questa primavera semnau mesa curtauna semmlin e fatg da quei sem gl'atun 16 curtaunas, che ha pia dau 8 curtaunas per minal e vegness 32 curtaunas, ni 8 stèra per curtauna, - ina raccolta aunc mai s'udida! Quella caussa ei aber factum. Speronza ch'ina tala benedicziun vegni buca a schar schigiar en il briec dad ieli da quella vieua, grad sco il profet Elias ha annunziau alla vieua da **Sarepta**, ch'igl ieli vegni buca muncar el vischi, entochen ch'ei detti plievgia.

*Gasetta Romontscha nr. 44, 3 da november 1871*

**1871**

La stupenta aura gida era empau tier il viv commers da biestga. Buca mo ella **Bassa** era a **Trun** vesan ins in pirer che flurescha. Sill'**Alpsu** han ins il november anflau flurs ed umens che han dacuort passau quei pass e che audan tuttavia buca denter ils ferms e robusts, han dil cauld stuiu trer ora geppa e viu a pasculond leu roschada armauls sco da mesa stad. Quei era in di, nua che la nebla alla **Bassa** rendeva leu ualti freid.

*Gasetta Romontscha nr. 45, 10 da november 1871*

**1871**

### **Tiers jasters**

Tier statalter Hans Giachen Decurtins, **Rueras**, in barbeisch alv cun corns, ureglia dretga fess ed in snez davos en.

*Gasetta Romontscha nr. 48, 1. da december 1871*

**1872**

### **Prezi da tiers**

A **Tujetsch** ei quels dis vegniu vendiu ina vacca per 20 marenghins – in schi ault prezi ei leu aunc mai vegniu pagau per ina vacca.

*Gasetta Romontscha nr. 1; 5 da schaner 1872*

**1872**

### **Tiers jaster**

Tier Sebastian Poltera a **Bugnei** in'ansola cotschna, ureglia dretga tagliau giudasum, fess, ina furcetta davon en ed ina ruosna amiez l'ureglia.

*Gasetta Romontscha nr. 1; 5 da schaner 1872*

**1872**

Sco ins auda dat ei ina midada cul cuors postal sur l'**Alpsu** pil temps da stad, aschia che la posta dad **Ursera** e quella da **Cuera** arrivan per la sera a **Mustér** e restan leu sur notg per l'autra damaun beinmarvegl partir per **Cuera** ed **Ursera**.

*Gasetta Romontscha nr. 3; 19 da schaner 1872*

**1872**

### **Correspondenza dil Badus**

La jamna vargada, ils 11 d.q., era scret ora la conferenza parziala dils scolasts per **Sursassiala** a **Tujetsch/Rueras**, la quala ei vegnida frequentada fetg fallombramein. Il signur inspectur, il

qual saveva muort sufficients motivs buca cumparer sez, ha per quei di giu surdau il presidi ad in versau e permurau persunal. Ton pli schliata impressiun ha ei fatg sils presents scolasts ed auters amitgs dalla scola, ch'il signur referent cun auters da ses collegas ord la medema vischernaunca, han quei di vuliu tarlischar entras lur absenza, malgrad ch'ils absents sezs vevan proponiu **Rueras** per liug da conferenza. Nuotatonmeins ha la conferenza giu liug ed ei stada interessanta muort la viva discussiun, sco era muort il collegial tscheiveret suren, il qual ils separatists han buca saviu turbelar. Quella sempla caussa ha zuar negina muntada europeica; aber en in temps, nua ch'ei vegn fatg uiara da tuttas autoritads encunter la scola dil pievel ed era schon fatg la proposiziun da metter tuts garmadis scolasts cantunals sut la bitgetta controlla ed inspecziun dall'omnipotenta ligia, lessan nus per beinmanegiar e beinvuler a tuts educaturs dils affons e schar il quet, l'ambiziun, la schalusia en cucagna, nua ch'ei retracta da luvrar cun forzas unidas communablamein per ina aschi impurtonta e sontga caussa. E viva pia l'uniu e contralisaziun dils scolasts sursassials!

*Gasetta Romontscha nr. 3; 19 da schaner 1872*

## 1872

### Clom da quens

Cadi. Tuts quens dils emigrants da **Tujetsch**: Vigeli Giusep Beer cun sia famiglia e siu sir Giachen Martin Schmed, Giachen Antoni Beer e statalter Sep Antoni Muggli (**Cavorgia**) ein da surdar al generalliquidatur gerau Giachen Antoni Schmed da leu.

*Gasetta Romontscha nr. 3; 19 da schaner 1872*

## 1872

(Tramess en) Sch'il scolast criticau ella corrispondenza dil **Badus**, el nr. 3 dalla Gasetta Romontscha, il qual dueva esser referent tier la conferenza da scolasts a **Rueras**, ei buca cumparius tier quella, sch'ei quei daventau ni per vuler esser separatist, ni per quet, ni per ambiziun, ni per schalusia, mobein per outras raschuns. El auda denter quels scolasts che han entochen ussa frequentau tuttas conferenzas.

Sch'il correspondent digl ault **Badus** temeva ch'ils absents, numnai separatists, havessien giu turbelau il collegial tscheiver dils presents, sche stuein nus per ussa gratular ad els ed a nus, che nus essan stai absents.

Era nus schein culla corrispondenza dil **Badus**: Ei vivi il spert d'uniu denter ils scolasts, - e mettein vitier: E pireschi il spert da malfundada critica che metta disuniun!

*Gasetta Romontscha nr. 4; 26 da schaner 1872*

## 1872

La cumissiun da taglia el districst **Reianteriur** ha anflau sequent resultat cun prender si leu la rauba ed industria (*rendita*) suttaposta alla taglia, schend tenor ordinaziun la facultad communalia sco quei ch'ella fuva dada en vivon.

	Facultad	Carschament	Rendita	Taglia totala
<b>Tujetsch</b>	1 032 200	<b>136 450</b>	9900	1877
Medel	554 000	42 100	1900	1012
Mustér	1 937 100	111 500	40 900	3799
Sumvitg	1 328 100	71 800	6900	2441
Trun	1 141 200	44 000	21 200	2233
Schlans	160 400	-	600	299
Breil	854 400	103 200	6500	1793
	7 152 500	504 550	87 900	13 456

La plema dil progress economic ella **Cadi** auda aschia a **Tujetsch**, nua che latg e mèl flessegian en abuldonza.

*Gasetta Romontscha nr. 5; 2 da fevrier 1872*

**1972**

Tier Gion Battesta Monn a **Sedrun** sesanfla ina caura jastra cun stgalin, ureglia seniastra giudasum ed ina furcetta davon en.

*Gasetta Romontscha nr. 5; 2 da fevrer 1872*

**1872**

### **Fiug a Sedrun**

Tenor ina nossa correspondenza dil **Badus** ei era il vitg da **Sedrun**, ils 26 da fevrer, staus en grond prighel da veginr intschendraus per ina gronda part. Duront in ferm suffel ha suentermiezdi via ella aschinumnada „Casa alva“, in baghetg da quater cussadents, il fiug entschiet a fugar cun vehemenza ord ils quater uni tgamins. Alla curaschusadad d'entgins umens, che han stuppuu ils tgamins ordado e cun dar in lavatgau sutsi culla sprezza ei reussiu d'allontanar il prighel, che duess esser in niev spieghel per procurar in bien cundrez da fiug.

*Gasetta Romontscha nr. 9; 1. da mars 1872*

**1872**

### **Clom da quens**

**Cadi.** Ell'America van Giachen Martin Beer e sia famiglia da **Tujetsch**, retschevider da quen ei assistent Schmed da leu.

*Gasetta Romontscha nr. 9; 1. da mars 1872*

**1872**

### **Emigraziun**

Questa jamna han puspei circa 120 emigrants bandunau nies cantun per serender ella tiara dalla cucagna americana. Per nies cantun ei quella sperdita da forzas da lavour e da facultad da donn, e che plirs dils emigrants anflan buca la gronda fortuna, ch'els spetgan da tschei maun dalla mar, ei era ualtri probabel. Ei legra nus, cura che vivon emigrai Grischuns veggan puspei ord l'**America** sin viseta tier nus, mo ei displai grondamein, ch'els dattan caschun tier novas emigraziuns. El davos transport era ei 50 dalla **Cadi** ed en quei 28 da **Tujetsch** cun in um da 70 onns, che han intrasglauter purtau naven quasi 1000 francs perin. En 20 onns ha quella vischnaunca, schegie ch'ei flessegia leu latg e mèl en abundanza, furniu 160 emigrants.

*Gasetta Romontscha nr. 15; 12 d'avrel 1872*

**1872**

### **Act d'engraziament**

Nus suittascrets passagiers da Brown e comp. a **Basel** e **Havre**, tuts ensemens 117, secartein ch'ei seigi nossa obligaziun d'exprimer a signur J. Paul Balzer, agent a **Cuera**, che ha accordau e cumpignau nus entochen tier la mar, nies profund engraziament per il bien quitau ch'el ha giu per nus en scadin riguard, per siu ludeivel tractament e sias sacrificatas breigias duront igl entir viadi, cullas qualas el ha encuretg da levgiar a nus quel. Perquei recumandein nus grondamein signur Balzer a scadin che vegg suenter nus ell'**America**.

**Havre**, ils 12 d'avrel 1872

Jacob Antoni Beer cun famiglia

Vigilius Josef Beer

Gion Venzin

Josef Antoni Muggli

Gion Fidel Muggli

Jacob Martin Beer

Gion Antoni Hendry

...

*Gasetta Romontscha nr. 17; 28 d'avrel 1872*

**1872**

### **In bien nurser**

per circa 1300 nuorsas vegg per la proxima stad, encunter buna pagaglia, encuretgs dalla

vischnaunca da **Tujetsch**. Ulteriur sclariment dat la suprastanza.  
*Gasetta Romontscha nr. 17; 28 d'avrel 1872*

**1872**

**Votaziun dalla revisiun**

**Tujetsch** 228 encunter!

*Gasetta Romontscha nr. 20; 16 da matg 1872*

**1872**

Ils 24 d.q. ei l'emprema crotscha vegnida sull'**Alpsu**, sils 25 veva il viè grischun empustau umens per arver scosauda la via da nies maun. A raschun ch'il cantun ei s'obligaus da pagar la mesedad da quels cuosts, vegn ins a saver s'accordar da procurar per igl avegnir ina pli presta avertura culla speronza ch'ils Uranès porschien maun tier quei progress.

*Gasetta Romontscha nr. 26; 28 da zercladur 1872*

**1872**

**Cloms da quens**

1) Gerau Lorenz Jacumet a **Camischolas** ei ugau dalla vieua Barla Beer ed affons a **Rueras** e retscheiva ils quens dil defunct mariu da quella, Tumaisch Beer. 2) Gion Paul Berther ei ugau da Martin Beer, omisdus da **Tujetsch**. 3) Assistant Jac. Antoni Schmed ha l'ugadia da Vigeli Josef Monn e da ses affons minorens.

*Gasetta Romontscha nr. 29; 19 da fenadur 1872*

**1872**

Il negozi da stiarls e mutgs per la fiera da **Ligiaun** ei ualti vivs ella **Cadi**. Ils biars marcadonts da **Tujetsch** e **Medel** han schon ussa fatg buna fiera, essend ch'els han vendiu lur roschas - en tut circa 450 armauls, quasi tut mutgs, ad in ferm marcadont dad **Ursera**, s'entelli cun far in bien gudogn.

*Gasetta Romontscha nr. 34; 23 d'uost 1872*

**1872**

**Cristallas**

Ils cavacristallas a **Tujetsch**, **Mustér** e **Medel** han uonn fatg buna fadiglia. Els ein stai ventireivels egl anflar ed han era saviu vender bia ed ualti car. Igl ei vegniu discuvretg fuorns che han dau ora cristallas per varga melli francs in, in sulet toc vess ins saviu vender per 250 francs. Ad **Ursera**, nua ch'ei dat bials cabinets da mineralias, per part oriundas dalla **Cadi**, ei vegniu purschiu 800 francs per in cristagl, mo il vendider vul buca dar quel per meins che 1000 francs.

*Gasetta Romontscha nr. 35; 30 d'uost 1872*

**1872**

**Annunzia da mort**

En profunda dolur e tristezia fagein nus cheutras da saver a nos parents ed amitgs, ch'ei hagi plaschiu agl Altissim da clamar ord questa veta tier la veta perpetna nossa cara feglia

**Barla Catrina Cavegn**

Ella ei morta suenter ina liunga malsogna e provedida cun tuttas consolaziuns dils moribunds, en ina vegliadetgna da 17 onns e 7 meins. Nus recumandein l'olma dalla cara defuncta alla pia memoria da tuts nos enconuschents.

**Tujetsch**, ils 28 d'uost 1872

Lucas Cavegn, bab

Onna Maria, nata Venzin, mumma

*Gasetta Romontscha nr. 35; 30 d'uost 1872*

**1872**

En **Tujetsch** e contuorn han vagabunds selubiu plirs enguladetschs. Ina dumengia duront ch'ils da **Selva** fuvan a messa, ei leu vegniu engulau in schambun ord la vanaun e tier quei aunc fatg ina viseta alla cobra da carn. A **Camischolas** veva in milissier semtgau siu resti necessaris ella presenta campagna, turnond el ord baselgia, vevan ei priu ad el las caultschas dall'uniforma ed entginas bunas camischas

*Gasetta Romontscha nr. 36; 6 da settember 1872*

**1872**

Il cavar cristallas ella pezza ei sco la catscha da camutschs ina pissiun, omisdus han lur emperneivladads, mo era lur prighels. Igl emprem enconuschider e negoziant da cristallas, Giachen Fidel Cavegn da **Rueras**, che steva en relaziun mercantila cun mineralogs da differentas tiaras, ha ils 12 d.q. stuiu schar la veta cun encuir crappa. Semtgaus cun siu camerat per turnar a casa, va el aunc vi si per in grep per mirar ina raschera. Strusch ha el entschiet a marclar, rump'ei ora sidault crappa, che vegnan giu sin el, smaccan en las costas ed il tgau e fieran el carteivel schon morts giu denter il glatscher e la greppa, nua ch'el ei l'autra damaun prius siado e purtaus a casa. Siu fegl, ch'era staus tier la concentraziun dalla truppa a **S. Gagl** ed era sco ses camerats leds da puder turnar tier ses cars da casa, ha tras telegraf retschiert quella trestissima nova tier siu retuorn dil **Rossboden**.

*Gasetta Romontscha nr. 38; 20 da settember 1872*

**1872**

### **Annunzia da mort**

Ella pli profunda dolur fan ils suttascrets da saver a lur parents, amitgs ed enconuschents, ch'ei hagi plaschiu agl Altissim en siu inscrutabel (*nunperscrutabel*) decret da tut anetgamein clamar ord questa veta, speronza tier ina megliera nies carissim mariu e bab

**Giachen Fidel Cavegn**

El ei spartius la sera dils 12 da settember en ina vegliadetgna da 61 onns e 7 meins. Nus recumandein cauldamein l'olma dil defunct alla pia memoria da tuts nos enconuschents.

**Rueras**, ils 16 da settember 1872

La combrigiada consorta ed ils contrastai affons

*Gasetta Romontscha nr. 38; 20 da settember 1872*

**1872**

Silla magnifica aura dallas duas empremas jamnas settember ei suandau ina ruha, che ha purtau dumengia vargada ina ferma scheltira. Il termometer da Reaumur, che mussava enzacons dis avon aunc 19 grads calira, era quella damaun sbassaus sin null. Sils cuolms era il tratsch schelaus sco in fier e tschep e leu vesevan ins gronds glatschs vid ils buntaduirs. Ils grauns egl ault, ch'eran aunc buca madirs, han pitiu fetg. Dad ina schi ferma purgina el settember seregorda negin, denton ei quella tuttina buca stada schi nuscheivla sco quella ch'ei, tenor igl urbari da **Tujetsch**, stada in settember el 17avel tschentaner ed ha giu ruinau leu tut ils èrs, aschia che 80 persunas, babs da famiglia cun dunna ed affons han stuiu emigrar ell'**Ungaria** per buca murir dalla fom.

*Gasetta Romontscha nr. 39; 27 da settember 1872*

**1872**

### **Annunzia da mort**

En profunda tristezia notificein nus a nos parents ed enconuschents, ch'ei hagi plaschiu agl Altissim da clamar ord questa veta speronza en ina megliera nies car mariu e bab

**Giachen Martin Berther.**

El ei spartius ils 19 d.q. suenter ina liunga malsogna en ina vegliadetgna da 62 onns e 10 meins, provedius cun tuts s. sacraments dils moribunds.

Alla pia memoria da nos parents ed enconuschents recamondan l'olma dil defunct.

**Tujetsch** ils 21 d'october 1872

La combrigiada consorta:

Barla Catrina Berther, nata Schmed ed ils contristai affons  
*Gasetta Romontscha nr. 43; 25 d'october 1872*

**1872**

### **Tiers jasters**

Tier la suprastonza da **Tujetsch**:

1. Ina nuorsa alva, dretga tagliau giu miez, seniastra duas ga fess, inaga tochen miez l'ureglia.
2. Ina nuorsa grischa culla medema noda sco nr. 1.
3. Ina nuorsa grischa cun corns, dretga in mugrin davon en e dus snezs speras era davon en, dapli in fildirom blau.
4. In tschanc ner, ureglia dretga ina ruosna, ina furcetta davon en ed in snez davos en.

*Gasetta Romontscha nr. 43; 25 d'october 1872*

**1872**

### **Annunzia da mort**

Cun profunda dolur notifichein nus a nos parents, amitgs ed enconuschents, ch'ei hagi plaschiu agl Altissim da prender naven da questa tier ina speronza megliera veta nossa cara consorta e mumma

### **Mariuschla Balzart, natta Decurtins**

Ella ei spartida ils 5 d'october a **Piqua ell'America** en ina vegliadetgna da 69 onns provedida cun tuts ss. sacraments dils moribunds.

Nus recumandein l'olma dalla cara defuncta alla pia memoria da nos parents, amitgs ed enconuschents.

**Piqua** ils 10 d'october 1872

Gion Antoni Balzart, mariu

Ludovina, feglia

Lezi Antoni Balzart, en num dils fargliuns

*Gasetta Romontscha nr. 44; 1. da november 1872*

**1872**

### **Tiers jasters**

A **Rueras** tier Vigeli Schmed ina caura jastra strala nera, ureglia dretga osum in mugrin ed in snez davon ora, seniastra tagliau giudasum.

*Gasetta Romontscha nr. 47; 22 da november 1872*

**1872**

L'aura ei snueivel variabla. Sin bials dis da stad sogn Martin, ha ei dau tribels suffels, dracca e neiv. Tutteninaga ha ei lura la sera dils 2 da december entschiet a camegiar e tunar e cuntuau ditg sco da mesa stad. Silla neiv, ch'era a **Tujetsch** e **Medel** in bratsch aulta, rendevan las camiadas imposanta clarezia. Dad enzatgei semegliont san biars buca seregurdar.

*Gasetta Romontscha nr. 49; 6 da december 1872*

**1872**

A **Tujetsch** ei la zoppina rutta ora cun quei ch'igl ei vegniu turnentau in taur dalla davosa fiera dad **Altorf**.

*Gasetta Romontscha nr. 50; 13 da december 1872*

**1872**

Sin reclamaziuns tuatschineras stuein nus en rectificaziun da nies davos numer rapportar, ch'ei hagi l'entschatta december dau a **Tujetsch** buca mo in bratsch neiv, mobein 7 quartas! Aschia eis ei da capir, ch'igl ei a **Tschamut** e **Selva** vegniu lavinas da tuts mauns, mo per ventira han quellas buca fatg considerabel donn. A **Tschamut** ei il hotel Rheinquelle mitschaus cun ina brava pugnada, a **Selva** era ina casa cuvretga en dalla lavina. Particulara ventira ha leu in affon giu, ch'era la sera s'entardaus empau da vegnir ord casa da scola, che schai sin in ault dadens il vitg. Sin siu retuorn vegn el surpris dalla lavina, per ventira ual sper in crest, nua che la lavina

sesparta, aschia ch'el fuva sin tuts mauns serraus en da quella sco en in curtinet. In chischner ei vegnius stuschaus dalla lavina in toc tut sidretg. Ils avdonts dil pei dil **Badus** ein per quellaga mitschai culla tema.

*Gasetta Romontscha nr. 50; 13 da december 1872*

### 1872

Sco unfrenda dalla zoppina grassonta en **Tujetsch** ein schon ina troppa vadials giuvens ventschi a **Tujetsch** – in donn da bia mellis en consideraziun da lur caraschia dad uonn. Armauls che han giu la malsogna avon paucs onns, tuornan a pigliar ella danovamein.

*Gasetta Romontscha nr. 51; 20 da december 1872*

### 1873

---

#### Annunzia da mort

Ei ha plaschiu agl Altissim da clamar ord questa veta speronza tier ina megliera nies car sur frar ed augsegner

**igl aultreveriu sgr. Giachen Antoni Monn da Tujetsch, caplon a Laax**

El ei morts ils 27 da december en ina vegliadetgna da 45 onns suenter ina malsogna da mo treis dis, provedius cun tut ils sacraments dils moribunds. Nus recumandein l'olma dil defunct alla pia memoria da tuts parents ed enconuschents.

**Tujetsch**, ils 31 da december 1872

En num dils frars e nevs

Giachen Antoni Monn

*Gasetta Romontscha nr. 1; 4 da schaner 1873*

### 1973

Finalmein para era la **Surselva** da survegnir in dubel cuors postal temps da stad. Tier igl ordinari cuors sull'**Alpsu**, che va la damaun naven da **Cuera ad Ursera**, duei aunc vegnir ranschau en in secund che va naven da **Cuera** las  $10 \frac{1}{4}$ , cura ch'igl emprem tren dalla viafier ei leu arrivaus e vegn entuorn las 6 a **Mustèr** per l'autra damaun serender ad **Ursera**.

*Gasetta Romontscha nr. 3; 17 da schaner 1873*

### 1873

#### Publicaziun

Gerau Gion Andriu Berther, il giuven da **Tujetsch**, retscheiva tut ils quens dil defunct caplon Monn a **Laax**.

*Gasetta Romontscha nr. 3; 17 da schaner 1873*

### 1873

Sco ei vegn a nus comunicau ord buna fontauna duei il cuors postal en **Surselva** duront ils 9 meins, che la posta passa buca l'**Alpsu**, restar sco tochen dacheu

*Gasetta Romontscha nr. 5; 31 da schaner 1873*

### 1873

#### In bien e fidau spazzatgamin

vegn encuretgs per la vischnaunca da **Tujetsch**. Aspirants ston esser provedi cun buns attestats e tochen la fin dil present meins da mars tarmetter tier quels alla suttascretta ed era dar en lur cundiziuns en secret ni a bucca.

**Sedrun**, ils 10 da mars 1873

La suprastoza da vischnaunca

*Gasetta Romontscha nr. 11; 14 da mars 1873*

### 1873

Sco raritad vegn ei notificau a nus, ch'ei seigi vegniu vendiu a **Peiden** ina vadiala da 10 jamnas per 130 frs., mo a **Tujetsch** ei vegniu pagau 150 frs. per ina vadiala ed a **Mustér** vess ins aunc pagau dapli per ina, sch'ella fuss stada venala. Sin quels exorbitans prezis e grond esit dils tiers

fuss ei da giavischar in carschament da quels, sco ei vegn raquintau dad ina caura a **Zignau** ch'ha fatg onn 5 anseuls ed uonn 4 e dad ina nuorsa en **Tujetsch**, ch'ha 4 tschuts.  
*Gasetta Romontscha nr. 13; 28 da mars 1873*

**1873**

### Avis

Il suttascret fa cheutras da saver, ch'el vegni il marcau da **Glion** digl avrel, matg e zercladur a cumparer cun in cavagl mascal per encuter in dueivel prezi schar cuvierer cavallas. Era la fiera da **Trun** dil zercladur vegn el a cumparer.

Paul Schmet da **Tujetsch**

*Gasetta Romontscha nr. 14; 4 d'avrel 1873*

**1873**

### La fiera da **Tujetsch**

che curdass uonn sin dumengia, vegn tenida gliendisdis, ils 9 da zercladur.

**Sedrun**, ils 28 da matg 1873

La suprastanza

*Gasetta Romontscha nr. 22; 30 da matg 1873*

**1873**

Gl'emprem fenadur entscheiva la posta dall'**Alpsu** cun siu dubel cuors. Gl'emprem parta da **Cuera** la damaun las 5 e 30. ... ed arriva las 6 (18) e 30 ad **Ursera**. Il secund cuors banduna las 11 da miezdi **Cuera** ... e vegn ad **Ursera** allas 9 (21) e 55. ... **Uri** ha fatg uonn pli plaun ch'onn d'arver l'**Alpsu**, ils umens uranès han giu gronda lavour cun fierer ora la neiv dil **Gottard**, nua ch'ina troppa Tuatschins ein vegni en agid ed han fatg ina schurnada da 7 – 10 frs. sin quen dalla Confederaziun, che sto pagar quellas lavurs.

*Gasetta Romontscha nr. 26; 27 da zercladur 1873*

**1873**

### Nuorsas jastras

A **Tujetsch** sesanflan denter la muntanera nuorsas da leu las suandontas siat nuorsas jastras:

1. Ina nuorsa nera cun scalin, nudada ell'ureglia dretga dus snezs ed ina furcletta davos en, dapli aunc quater dalla medema noda.
2. In anugl alv cun ina tezla ch'ei si V. G. B. nudada ell'ureglia dretga in snez davon en ed en la seniastra in snez davos en ed ina ruosna. Las spatlas ein nudadas cun colur cotschna.
3. In tschut ner, ureglia dretga giudasum ed in snez davon en, la seniastra giudasum e fess ed ina furcletta davon en.

Da s'adressar tier la suprastanza a **Tujetsch**.

*Gasetta Romontscha nr. 29; 18 da zercladur 1873*

**1873**

Contribuziun per susteniment dils persecutai spirituals catolics dalla **Svizra**.

Contribuziun da **Tujetsch** en duas ratas tras signur farrer e caplon 100 frs. ...

Il comité dall'Uniun da Pius

*Gasetta Romontscha nr. 30; 25 da fenadur 1873*

**1873**

Duront il ferm temporal da venderdis sera ei il tun daus giu en in uaul a **Tujetsch** e mo cun gronda breigia han ins pudiu retener il serasar dil fiug.

*Gasetta Romontscha nr. 32; 8 d'uost 1873*

**1873**

8 ni 9 nuorsas ein fugidas ord il cantun **Uri** dil maun da **Tujetsch** ni **Mustér**. Sco noda da piazas (*da maz*) han ellas ina ruosna ell'ureglia dretga ed in streh tgietschen ed in blau sil calun. Tgi che sa dar novas da quellas a Tumaisch Huonder a **Tujetsch** survegn ina bunamana.

*Gasetta Romontscha nr. 34; 22 d'uost 1873*

**1873**

Ils marcadonts da biestga entscheivan a semetter sin via per la fiera da **Ligiaun**, tgi cun tema e tgi plein speronza e fidonza sils aults prezis e bien esit. Sch'ei paghi sco onn, seigi ei aunc adina da gudignar, schegie ch'ins hagi cheu pagau car. La pli gronda roscha ch'in da nos marcadonts ha enzacuras catschau sur cuolm, ei quella da Paul Schmet da **Tujetsch**. El ei semess sin via cun 270 tgaus e zuar la gronda part mutgs. Sin ses 300 armauls, ch'el ha giu la stad per las alps entuorn ha el piars 11 – in bi capital - , mo aunc adina moderada sperdita sin ina tala massa tiers. Bien viadi e buna fortuna!

*Gasetta Romontscha nr. 38; 19 da settember 1873*

**1873**

La fiera da **Rueras** dils 12 d'october che croda uonn sin ina dumengia, vegn tenida il di suenter, gliendisdis ils 13 d.q.

*Gasetta Romontscha nr. 41; 10 d'october 1873*

**1873**

Il renomau marcadont da **Ligiaun**, il qual ha cun ses 300 tgaus giu fatg in splendid gudogn sill'emprema fiera da **Ligiaun**, ei quella ga puspei semess sin via cun circa 280 armauls. Duess la gronda catschada da tiers buca lavegiar il giug, sche speresch'ins muort la gronda tscherca da tiers e la gronda abuldonza da Pavel, sin ina buna fiera. Denton bien viadi!

*Gasetta Romontscha nr. 42; 16 d'october 1873*

**1873**

### Tiers jasters

Nuorsas vanzadas en claus tier la zavrada a **Tujetsch**:

1. Ina nuorsa nera, tagliau giu omisduas ureglia ed ella seniastra tagliau ora dus dentsresgia.
2. In anugl ner, dretga giudasum fess, in snez davos en ed in fildirom mellen, seniastra ina furcletta rodunda osum, ina ruosna ed in snez davon en.
3. Ina nuorsa pigrera giuvna, dretga fess, dus snezs davos en ed in davon en, ha si ina rolla.
4. Ina nuorsa nera gronda cun corns, dretga giudasum ed in snez davos en, seniastra giudasum e fess.
5. In anugl alv cun corns, dretga ina furcletta davos en amiez l'ureglia.
6. Ina tgigisch nera, seniastra ina furcletta davos en, in snez davon en ed in tardent osum.
7. Ina nuorsa grischa, dretga giudasum ed ina furcletta quadra davos en, seniastra ina furcletta quadra davos en.
8. In tschanc ner cun corns, seniastra scurselau davon orasi, e dus snezs davon en.
9. Ina nuorsa alva, dretga giudasum, fess e duas ruosnas, seniastra in mugrin davon en, fess e duas ruosnas.

Quellas nuorsas jastras sesanflan tier la suprastanza a **Sedrun**, nua ch'ins sa retrer ellas enteifer 8 dis, bonifcond las spesas, pli tard vegnan ellas vendidas.

*Gasetta Romontscha nr. 43; 24 d'october 1873*

**1873**

Tier Giachen Antoni Schmed, **Cavorgia (Tujetsch)**: Ina starleglia nera cun scalin, dretga treis snezs davos en; seniastra in snez davos en ed in fildirom mellen davos en.

Tier Gion Fidel Riedi a **Zarcuns (Tujetsch)** in tschanc entir grisch cun corns, dretga in mugrin ed in snez davos en, en seniastra ina furcletta davon en.

*Gasetta Romontscha nr. 44; 31 d'october 1873*

**1873**

**Cadi.** Tuts quens dil defunct Placi *Sigisbert* Monn da (**Rueras**) **Tujetsch**, che seteneva si a Lyon (*morts el spital ils 9 da fevrer; 35 onns*), ein da consignar a siu curatur Tumaisch Huonder da **Rueras**.

*Gasetta Romontscha nr. 47; 21 da november 1873*

**1873**

... aschia ch'ina tschuncheisma lenna en **Tujetsch** ha bia meins valeta ch'ina ellas **Pardialas d'Uors**. Taxaziuns dils uauls communals: **Tujetsch** 37'000 frs., **Medel** 25'000 frs., **Mustér** 80'000 frs., **Sumvitg** 168'000 frs. **Trun** 50'000 frs, **Schlans** 20'000 frs., vischnaunca da **Breil** 101'000 frs., vischinadi da **Breil** 6600 frs. ...

*Gasetta Romontscha nr. 48; 27 da november 1873*

**1873**

Tier Gion Antoni Deragisch a **Sedrun** eis ei dus anseuls jasters, in ner ed in tgietschen, omisdus han l'ureglia dretga tagliau giudasum e fess, dapli in snez davos en.

*Gasetta Romontscha nr. 50; 12 da december 1873*

**1873**

Sin nossa davosa nova da **Tavanasa** vegn ei communicau a nus, ch'ei vivi sisum la val **Tujetsch a Tschamut** ina lètg che seigi onn (*ils 24 da zercladur 1872 in Gion Battesta ed in baret*) ed uonn (*ils 8 da december 1873 in Gion Battesta ed ina Maria Giuseppa*) vegnida benedida cun schumellins, ils emprems seigien morts, mo ils davos sauns e viscals. Lur bab (*Gion Martin Peder*) ei 53 onns vegls, maridaus per la tiarzaga, da ses 20 affons ein 13 aunc en veta. Sia davosa dunna (*Anna Maria Riedi*), ch'ha en aschi cuort temps survegniu 4 affons ei 43 onns veglia. «Non erit statim finis!»

*Gasetta Romontscha nr. 51; 17 da december 1873*

**1873**

Tuts quens dil concursant Lucas Beer da **Tujetsch (Gonda)** duein vegnir dai en a siu ugau da massa assistent Schmet a **Sedrun**

*Gasetta Romontscha, nr. 51; 17 da december 1873*

**1874**

Tras ina contabilitad beinrugalada sedistinguescha denter outras era la vischnaunca da **Tujetsch**.

*Gasetta Romontscha, nr. 2; 9 da schaner 1874*

**1874**

La votaziun suls 3 pugns da recapitulaziun (I lescha pils domiciliai, II lescha d'ingant, III lescha riguard pagar giu grevezias perpetnas) ha dau sequent resultat ella **Cadi**:

	I		II		III	
	pro	contra	pro	contra	pro	contra
<b>Tujetsch</b>	47	27		86		80
Medel	14	92		106	1	105
Mustér	122	19		138	9	113
Sumvitg	137			132	113	
Trun	91			91		91
Schlans	16	1		17		16
Breil	52			51	1	46
Total	479	139		621	124	451

*Gasetta Romontscha, nr. 5, 30 da schaner 1874*

**1874**

#### **Annunzia da mort**

Cheutras fagein nus da saver a nos parents ed enconuschents, ch'ei hagi plaschiu agl Altissim da clamar ord questa veta tier ina megliera nies car bab

**Martin Felici Schmet**

El ei spartius ils 2 da mars suenter ina cuorta malsogna provedius cun tut ils s. sacraments dils

moribunds. Nus recumandein sia olma alla pia memoria da tuts nos enconuschents.

**Tujetsch**, ils 8 da mars 1874

Ils contristai affons

Martin, Gion Battesta e Filomena Schmet

*Gasetta Romontscha, nr. 11, 13 da mars 1874*

#### 1874

Sco raritad relatein nus ch'in marcadont bavarès hagi a **Tujetsch** perfin cumprau si vadialas giuvnas per saver catschar quellas ton pli bein e cheutras survegnir ton meglieras vaccas da nossa razza. Per destinguidas vadialas ual zavradas seigi vegniu purschiu tochen 8 marenghins.

*Gasetta Romontscha, nr. 12, 21 da mars 1874*

#### 1874

**Cadi**

En consequenza d'in concediu benefici d'inventari ston tuts quens dil defunct Martin Felici Schmet da **Tujetsch** vegnir dai en al liquidatur assistent J. A. Schmet da leu.

*Gasetta Romontscha, nr. 13, 30 da mars 1874*

#### 1874

En consequenza ch'ina dunna ed in giuven da **Tujetsch** ein dacuort sebarschai zun fetg cun ir entuorn cun neolin (*ina sort d'iel*), ha quella vischnaunca anflau per bien da totalmein scumandar da barschar neolin. Quella saluteivla ordinaziun communalia mereta imitaziun.

*Gasetta Romontscha, nr. 17, 23 d'avrel 1874*

#### 1874

Quei onn haveva **Tujetsch**: rauba communalia 173'500 frs.; rauba privata 980'200 frs.; entrada d'industria 9200 frs.; taglia virila 216 frs.

*Gasetta Romontscha, nr. 20; 16 da matg 1874*

#### 1874

Il secund cuors postal sur l'**Alpsu**, menaus en onn, para muort schliata rendita d'anflar difficultads tier il departement postal a **Berna**, che less supplir quel tras in cuors postal denter **Mustér** e **Cuera**. Denton ei vegniu fatg reclamaziuns. Cuors postals pauc rendabels dat ei aunc biars.

*Gasetta Romontscha, nr. 21; 22 da matg 1874*

#### 1874

**Ei vegn tschercau**

da prender si per la proxima stad sut favoreivlas cundiziuns in s.h. cavagl mascal per l'alp da cavals dalla vischnaunca da **Tujetsch**. Da s'adressar tir la tit. suprastanza da leu.

*Gasetta Romontscha, nr. 22; 30 da matg 1874*

#### 1874

Publicaziun

La fiera da **Tujetsch** vegn tenida ils 8 e quella dad **Ursera** ils 9 e 10 da quest.

*Gasetta Romontscha, 1874, nr. 33, 6 da zercladur*

#### 1874

(Communicau) Ella vischnaunca da **Tujetsch** regia dad in grond temps enneu in abnorm stan da sanadad dalla glieud. Ils spirituels dil liug ed ils miedis da **Mustér** han cuntuadamein stuiu esser sin via, per porscher agid als malsauns. Ei ha dau el medem temps 16 – 18 malsauns, e da quels fuvan 11 mo en in vischinadi, el qual igl ei era el decuors da strusch in meins stau 4 baras en casas grad ina sper l'autra, aschia che la fama ni plitost tema u superstiziu dil pievel leva far esser quei ina malsogna contigusa. La malsogna principala, priu ora enquai cass, para dad esser stau il malcostas e la febra dils gnarvs. A proporziun dil diember dils malsauns ein

aunc ussa ils mortoris buca numerus, mo ils allegai miedis han tier quei favoreivel resultat contribuiu zun bia tras lur promtadad, premura e savida, e meretan perquei nossa engrazieivladad e recumandaziun. Igl ei zuar aunc adina da biars malsauns en nossa pleiv, aber speronza ch'il prighel grond seigi removius e dustaus. Curaschusadad enten il pigliar la malsogna e perseveronza e speronza el decuors da quella quentel jeu era sco facturs tiellas medischinas dils miedis, per forsa ad interim mitschar dalla faultsch dalla mort.

*Gasetta Romontscha, nr. 25, 19 da zercladur 1874*

#### 1874

##### **Disgrazia**

Dacuort ein dus pigns mattatschs da **Tujetsch** dai ell'aua en dus differents loghens e fussen stai ventschi senza spert agid. In da quels ei daus ell'aua si mises ed ei vegnius liberaus da siu resolut e curaschus camerat da 15 onns. Duri Huonder da **Sedrun**, che ha buca mo liberau la veta, mobein era tgirau il blessau cun tut pusseivel quitau entochen che siu bab ei arrivaus la sera.

*Gasetta Romontscha, nr. 29; 17 da fenadur 1874*

#### 1874

##### **Cadi.**

Sin agen garegiar ei vegniu dau a Rudolf Venzin a **Rueras** in ugau en persuna dad assistent Schmed a **Sedrun**, al qual tuts quens dad el ein da dar en immediat.

*Gasetta Romontscha, nr. 30; 25 da fenadur 1874*

#### 1874

##### **In tgaun**

da grondezia mesauna, spezia da pudel, cun pelegna liunga tschuora nera, giudem las toppas alv, ei fugius tschella jamna naven da siu proprietari. Tgi che sa dar novas da quel survegn in commensurau „trinkgeld“ da Calleger, nurser a **Tujetsch**.

*Gasetta Romontscha, nr. 30; 25 da fenadur 1874*

#### 1874

##### **Clasena**

En ina vischnaunca dalla **Cadi** ei vegniu claus 44 tschuncheismas lunghezia culla lenna fendida ord classena dus lenns; da far cun lattas vessien ins duvrau 100 da quellas. Speronza ch'ei vegni gleiti dapertut da quella da buca dar ora pli lattas per clauder, sco la vischnaunca da **Tujetsch** ei schon avon decennis ida ordavon cul bien exempl.

*Gasetta Romontscha, nr. 32; 7 d'uost 1874*

#### 1874

##### A **Tujetsch** tier la suprastonza sesanflan duas nuorsas jastras:

1. Ina tgigisch alva, dretga tagliau giudasum, seniastra fess ed ina furcletta davon en.
2. In barbeisch grisch cun corns, fess osum omisduas ureglas.

*Gasetta Romontscha, nr. 42; 16 d'october 1874*

#### 1874

Igl ei aunc massa tiers da vender; mo la vischnaunca da **Tujetsch**, che ha schon vendiu 100 vaccas, vess aunc da vender 100. Muort ils aults prezis d'onn ei igl unviern vargau vegniu tratg tut pli bia tiers ch'igl ordinari. Per ventira ha ei tochen ussa fatg stupenta aura sereina e caulda, aschia ch'il termometer mussava quels dis 18 grads Reaumur. Quei spargna bia fein, ch'ei schon ussa fetg cars.

*Gasetta Romontscha, nr. 43; 23 d'october 1874*

#### 1874

La jamna vargada ein a **Danis** treis persunas sebarschadas malamein cun dar ora neolin da cazzola. **Tujetsch** e **Mustér** han scumandau da barschar quei prigulus ieli, speronza ch'era

autras vischnauncas suondien quei bien exempl.

*Gasetta Romontscha, nr. 44; 30 d'october 1874*

#### 1874

La stupenta aura da quest atun para d'haver priu sia fin cun s. Martin, nua ch'igl ei tuttenina vegniu ina ferdaglia da 4 grads Reaumur. ... Il pli remarcabel eis ei che a **Tujetsch** catschavan ils truffels novs schon in bi cagl en tschaler!

*Gasetta Romontscha, nr. 46; 13 da november 1874*

#### 1874

A **Sedrun** tier Sep Antoni Huonder sesanfla in barbeisch jester ner, ureglia dretga ina ruosna ed ina furcletta rodunda davos en ualts osum, seniastra ina ruosna.

*Gasetta Romontscha, nr. 46; 13 da november 1874*

#### 1874

Entgins marcadonts da **Tujetsch** e **Medel** ein malgrad la gronda nevada semess ils 18 d.q. a **Mustér** sin viadi cun circa 100 stiarls per serender sur il **Lucmagn** sillia tiarza fiera da **Ligiaun**. (Quels paran d'haver pli gronda curascha ch'ils signurs conducturs dalla posta sursilvana.)

*Gasetta Romontscha, nr. 47; 21 da november 1874*

#### 1874

Finalmein ha ei calau da never ils 21 suentermiezd. ... **Tujetsch** e **Medel**, nua ch'ei era il pli grond prighel da lavina, han persuenter survegniu in vehement suffel e cufla, ch'ei temevan ch'ei mass cullas casas. Ils umens han giu da far bia strapazs quels dis per rumper via si els mises, nua che glieud e tiers eran nevi en. ...

*Gasetta Romontscha, nr. 48; 29 da november 1874*

#### 1874

Tier la suprastonza a **Sedrun**:

1. Ina ansola blaua, dretga davos en amiez l'ureglia ina furcletta rodunda.
2. In botsch entir gagl, seniastra giudasum, in snez davon en ed in davos en orasum in encunter l'auter.
3. Duas ansolas, ina nera ed ina gaglia culla medema noda, dretga ina furcletta osum ed ina davon en, ina ha era si in scalin.
4. Ina caura cotschna gaglia, dretga giudasum e fess duas gadas, seniastra giudasum e fess.
5. Ina ansiel dalla colur sco la caura, dretga giudasum in snez davon ed in davos en, seniastra giudasum ed in snez davon en.

*Gasetta Romontscha, nr. 48; 29 da november 1874*

#### 1874

Tier la suprastonza a **Sedrun**

1. Ina ansola cotschna, dretga dus snezs davon en.
2. Ina tgigisch nera cun corna, dretga ina ruosna, in snez davos en ed ina furcletta davon en en tiel tgau.

*Gasetta Romontscha, nr. 50; 11 da december 1874*

#### 1874

**Nevadas**

Odem il november ed all'entschatta da december ha ei dau duas grondas nevadas. A **Selva** e **Rueras** ella **Val Tujetsch**, eran plirs fugi ord casa per la lavina, mo per ventira ein els mitschai culla tema.

*Gasetta Romontscha, nr. 51; 18 da december 1874*

#### 1874

A **Tujetsch** tier la suprastonza, ina ansola gronda nera strala, ureglia dretga ina furcletta

orasum, seniastra treis snezs davos en.  
*Gasetta Romontscha, nr. 51; 18 da decembre 1874*

1875

### Tiers jasters

Tier la suprastanza a **Tujetsch** in tschanc alv entir, dretga giudasum, seniastra giudasum e fess.  
*Gasetta Romontscha nr. 1; 1. da schaner 1875*

1875

Tgei che selai reussir entras in bienmanipulau public ingant, quei ha semussau la jamna vergada a **Tujetsch**, nua ch'igl ei ella capitala vegniu vendiu ina pintga e schliata mesacasa, mo bein situada cun 1500 tschuncheismas prau grass ed in magher (il qual po dar 3 tschuncheismas fein) per la summa da buca meins che 10'000 frs. Cun quintar la casa carischia vegn quei prau grass aunc adina sin 4 frs. la tschuncheisma! Ei quei buca la tiara dalla cucagna, nua che latg e mèl flessegian en abuldonza.

*Gasetta Romontscha nr. 10; 5 da mars 1875*

— (Comunicau.) Tgei che selai reussir entras in bienmanipulau public ingant, quei ha semussau l' jamna vergada a Tujetsch, nua ch' ei gliei ella capitala vegniu vendiu ina pintga e schliata mesacasa, mo bein situada, cun 1500 tschuncheismas prau gras ed in mager (il qual po dar 3 tschuncheismas fein) per la summa de bucca meins che 10;000 fr. Cun quintar la casa caraschia vegn quei prau grass eunc adina sin 4 fr. la tschuncheisma! Ei quei buca la tiara della cucagna, nua che latg e mèl flessegian en abuldonza.

1875

### Publicaziun

En consequenza da declarada insolventad ei renconuschiu il concuors da Tumaisch Riedi da **Tujetsch / Rueras**. Designau sco retschevider da quen dalla massa ei assistent J. Antoni Schmed a **Sedrun**.

*Gasetta Romontscha nr. 10; 5 da mars 1875*

1875

### Publicaziun

La absenta mattatscha Maria Genoveva da Vigeli Monn da **Tujetsch**, domiciliaus en **Germania**, ei ugadada ella persuna dad assistent Schmet.

*Gasetta Romontscha nr. 12; 19 da mars 1875*

1875

Igl examen da maturitad ei dacuort vegnius mess giu da sequents students grischuns: ... Berther da **Tujetsch**. Ses studis ha el fatg a **Nossadunnaun** ed ei staus gl'unviern a **Cuera** per ton meglier saver sepreparar tier siu examen, ch'el ha fatg cun tutta honur. ....

*Gasetta Romontscha nr. 13; 24 da mars 1875*

1875

La votaziun fatga ella **Cadi** pervia dalla moda co las elecziuns circuitalas duein vegnir fatgas, ha

giu sequent resultat: per tener cumin sco tochen encheu han votau unanimamein **Medel** cun 109, **Tujetsch** cun 134, **Mustèr** cun 165, **Sumvitg** cun 120, **Trun** cun 120. A **Breil** eran 29 votants per tener cumin, 39 levan far las elecziuns sin vischnaunca, per il qual modus era **Schlans** ha sedeclarau unitamein cun 34 vuschs. Aschia ei pia cun 677 vuschs encunter 73 concludiu da far cumin sco vivon. **Trun** ha en sia risposta schau sentir il giavisch, ch'ei fussi forsa buca malfatg da midar giu u alternar il liug da tener cumin denter las treis vischnauncas **Mustér**, **Sumvitg** e **Trun**.

*Gasetta Romontscha nr. 16; 16 d'avrel 1875*

### 1875

A raschun ch'il secund cuors postal da stad sur l'**Alpsura** rendeva buca bia, e che negin sehanava fetg da surprender quel dil maun d'**Uri**, vegn quel buca menaus en uonn. La posta va la stad mo inaga per di ad **Ursera**, da **Cuera** a **Mustér** e viceversa aber duasga. Per la communicaziun locala dalla **Surselva** ei quella midada buca disavantagiusa.

*Gasetta Romontscha nr. 17; 23 d'avrel 1875*

### 1875

Sco deputai ein eligi: il mistral regent, mistral Arpagaus, cusseglier guvernativ Condrau, professer Johann Baptista Cariget ed assistent Schmid da **Tujetsch**. ... La dertgira circuitala ei vegnida cumponida ord ils derschaders: mistral Arpagaus, gerau Bundi, **Medel**, assistent Schmet da **Tujetsch**, derschader Al. Huonder **Mustér**, gerau Martin Demont e gerau Tumaisch Fidel Decurtins, omisdus dalla vischnaunca da **Trun**. Sco suppleant vegn gerau Lurenz Jagmet da **Tujetsch** eligius cun tschun auters.

*Gasetta Romontscha nr. 19; 6 da matg 1875*

### 1875

Il pass digl **Oberalp** ei ussa aviarts per carrs.

*Gasetta Romontscha nr. 2; 28 da matg 1875*

### 1875

Ils 13 d.q. ei monsignur uestg Willi arrivaus a **Mustér** sin siu viadi da Creisma en **Surselva** e leu vegnius retschards dad ina gronda processiun. Ils 15 eis el, suenter haver cresmau a **Medel** e **Tujetsch**, puspei semess sin viadi da retuorn. Speronza ch'el hagi obtenu ina buna impressiun da ses diocesans sursilvans.

*Gasetta Romontscha nr. 25; 18 da zercladur 1875*

### 1875

Il til dils jasters sur l'**Alpsu** ha uonn entschiet pli baul ch'antruras; a **Mustér** passan mintgadi crotschas ed ils admiraturs dalla biala natira pon buca ludar avunda il present magnific colorit dils bials funs.

*Gasetta Romontscha nr. 26; 22 da zercladur 1875*

### 1875

La sera dils 7 da fenadur ei vegniu sur **Mustèr** e **Tujetsch** dil maun digl **Oberalpstock** in temporal cun ina tempiasta aunc mai sudida en quellas cuntradas. Il termometer a **Mustér** era quei di sesalzaus sin 26 grads Celsius e tier la tempiasta, che ha cuzzau in quart d'ura, sbassaus giu sin 15. Sut in horrent tunar e camegiar deva ei garniala che las vias ed ils cuolms eran tut alvs, ins ha anflau garnials dad in zoll e duas lingias grondezia! Mo a **Sedrun** e **Camischolas** par'ei d'esser stau ina aura aunc bia pli stermentusa. La tempiasta veva denter en garnials sco bialas nuschs, che han totalmein manizau si ils bials segals e glins e sfraccau tetgs e finiastras. Il tettg da guotas dalla casa dil depot da posta a **Camischolas** ves'ora sco in dratg; ella casa da caplania a **Sedrun** ei buc'ina schiba da finiastra restada entira, ed ella sala dalla Cruna era ei dau en ina tempiasta che cuvreva il plantschiu en ina altezia da dua detta. Tier tut quei ei il tun aunc daus giu quaterga egl uaul e vess sut il stermentus suffel dau fiug quel, sche la dracca e tempiasta vess buca stizzentau la flomma. Duront quella stermentusa aura a **Sedrun** e

**Camischolas** ei la squadra da **Rueras** mitschada ualti bein ed a **Selva e Tschamut** ha ei gnanc pluiu.

*Gasetta Romontscha nr. 28; 9 da fenadur 1875*

**1875**

(Correspondenza dil **Badus**)

La sera dils 7 da fenadur ei stada terribla pella gronda part dalla magnifica val **Tujetsch**. In temporal cun grossa garniala dad 1 – 2 zolls diameter ei sesbucaus oragiu dils pézs **Crispalt** e **Giuv** e serasaus entroma sillas bein situadas squadras da praus ed èrs sur **Rueras**, **Zarcuns**, **Camischolas**, **Gonda**, **Salins** e **Sedrun**, sfraccond giu e manizzond si pli u meins tut ils fretgs dil bi funs. Mitschai cun tema orasut il ruh unviern cun sia gigantica nevada senza considerablas sventiras, steva dapresent nossa cultira, muort la favoreivla primavera, ch'ei ha fatg, en in stan zun bein avanzau, ch'empermetteva biala pareta e reha raccolta per tuts fretgs. Mo treis quarts ura da quei ominus di han sturniu e terrau las bialas e splendidas speronzas da nos premurai agricolants. Ils bials segals ellas squadras sura numnadas (grad las principales da graun), ein totalmein destrui e vegrnan dapresent segai giu. D'atun e gl'unviern vegrn ins a sentir la munconza da sternem bunamein ton sco quella dil graun. Pils dumiecs e truffels eis ei aunc grond dubi, sch'els pon dar ina tut mesauna raccolta; il renomau glin da **Tujetsch**, ch'era ussa ella fluriziun, sa dar aunc empau teglia, mo pauc sem. In donn quasi nunspitgau encorscha ins per ussa vid il fein, essend il zart e bien da feglia tut manizau giun plaun e formalmein catschau el tratsch, aschia ch'ina part mises vegrnan schon ussa fenai, avon che l'auter fein, ed in per alps han buca saviu vegrnir cargadas ad interim, essend il bi pastg entir da quellas spazzaus giu. – Il donn actual en general sin pastiras ed alps dalla communitad, sin praus ed èrs dils particulars astg'ins gagliardamein taxar sin 40 – 50'000 frs., senza quintar il donn che nescha pli tard ord las consequenzas da quella catastrofa. La devastaziun els uauls (nua ch'ei ha pigliau fiug en quater loghens) ei gronda.

Igl ei ver, che beinenqual beinstont dils donnegiai po vertir il manco per quest onn, ed era ils veramein paupers han lur medem regress visavi als fondos pauperils da vischnaunca; mo il pli fetg piteschan senza dubi quels dalla classa mesauna (e leutier auda la gronda part), ils quals ston cun breigia e lavur vegrnir atras cun lur famiglia ord la rendita dils tiers e dil funs, forsa hipotecaus. – Dil donn succedius vid tetgs e baghetgs, vid finiastras e habitaziuns vi jeu buca far detagliada menziun. Sut talas trestas e deplorablas circumstanrias tertgass il suittascret correspondent bunamein, che nossa ludeivla vischnaunca astgass motivadamein spluntar per in subsidi, u tiella cassa d'agid cantunala, ni tier la caritat beinvulenta da sias vischinonzas, tonpli ch'ils subsidis stuessen buca vegrnir dai ussa ed immediat, sonder plitost sin d'atun e sil proxim unviern.

Sco ins ha schon udiu, ha nies ludeivel magistrat dalla **Cadi** dessignau in pèr delegai per inspectar e calcular pressapauc il donn en nossa vischnaunca. Quei conclus ei ludeivels e corrects e nus essan schon oravon engrazieivels persuenter, perschuadi, che nuot ei meglier ch'ina nunpartischonta persunala inspecziun, ton per far constatar il donn sez, sco era per promover a siu temps il sura indicau subsidi.

*Maurus Desax, plevon a Sedrun*

*Gasetta Romontscha nr. 29; 16 da fenadur 1875*

**1875**

**Tiers jasters**

Tier la zavrada dallas nuorsas a **Tujetsch** ei restau anavos tier la suprastanza sequentas nuorsas jastras.

1. Ina nuorsa nera, tagliau giu miez l'ureglia seniastra, ella dretga ina ruosna, ina furcetta osum ed ina davos en e tagliau giu la cua.
2. Ina tgigisch nera, ureglia seniastra ina furcetta osum, in snez davon ed in davos en, dretga dus snezs davos en.
3. Ina nuorsa grischa, seniastra tagliau giu miez, dretga ina furcetta osum ed in snez davos en.
4. In anugl ner, seniastra fess, dretga tagliau giudasum ed in snez davos en.
5. In tschanc ner, dretga ina furcetta osum ed in snez davos en.

6. In anugl ner, seniastra dus dentsresgia davos en, ina ruosna, ina furcletta osum ed in davos en, dretga giudasum e titgira cotschna si dies.
7. Ina nuorsa alva, seniastra in snez davos en ed ina ruosna, dretga tagliau giudasum, dus snezs davos en ed ina ruosna.
8. Ina nuorsa alva, seniastra tagliau giu miez l'ureglia ed ina ruosna, dretga duas ruosnas ed in vinchelmess (*squadra*) tagliau ord miez l'ureglia, in snez davos en ed ina furcletta osum.
9. Ina nuorsa alva, seniastra ina furcletta davos en ed ina ruosna, dretga giu miez l'ureglia, titgira verda sillas spatlas.
10. Ina tschutta grischa, seniastra in snez davos en, ed in snez davon, dretga in snez davon en.
11. Ina nuorsa nera, seniastra fess, dretga priu ord miez l'ureglia in vinchelmess, giu la cua.
12. Ina nuorsa alva, seniastra ina furcletta rodunda osum ed ina furcletta davos ed ina davon en, dretga ina ruosna, giudasum ed in furcletta osum, titgira cotschna si dies.
13. In anugl alv cun corns, seniastra giu miez l'ureglia dretga in snez davon en, giu la cua e titgira cotschna si dies.
14. Ina nuorsa alva, seniastra dus snezs davon en.
15. Ina nuorsa alva, seniastra giu miez l'ureglia, dretga giudasum, ina furcletta ed in ruosna, titgira cotschna si dies.
16. In tschanc ner, seniastra fess, dretga ina furcletta osum ed ina ruosna.
17. In anugl alv cun corns, dretga ina ruosna, dus snezs davon en, ina furcletta osum, ina furcletta ed in snez davos en.
18. Ina nuorsa alva culla medema noda.
19. Ina tschutta grischa, seniastra ina ruosna ed ina furcletta davon en, dretga ina furcletta osum ed ina davon en.
20. Ina tschutta nera, seniastra dus snezs davon en, dretga fess.

Ils proprietaris da quels tiers san retrer quels enteifer il termin da 15 dis bonificond las spesas.  
*Gasetta Romontscha nr. 42; 15 d'october 1875*

## 1875

### Fiers

Marcadonts da **Tujetsch** e **Medel** han malgrad la schliata fiera da **Ligiaun**, tuttina ughegial d'instradar leu novas roschas. ... Silla fiera dad **Altorf** dalla jamna vargada era ei catschau sull'**Alpsu** da marcadonts dalla **Cadi** circa 100 vaccas, mo muort il grond biestgam ei quella fiera ida mal, damai ch'ils Tessinès han turnentau sul **Gottard** lur vaccas. Era las vaccas da maz erien beinmarcau ad **Altorf**.

*Gasetta Romontscha nr. 43; 20 d'october 1875*

## 1875

In signur bavarès d'**Ebersberg** ei staus tochen **Tujetsch** ed ha turnau a cumprar si ina roschada stiarlas per 80 – 120 frs. il tgau.

*Gasetta Romontscha nr. 44; 28 d'october 1875*

## 1875

### Tiers jasters

A **Cavorgia** tier Leci Balzart in anugl grisch, dretga giudasum, in snez davon en e duas furclettes davos en.

*Gasetta Romontscha nr. 45; 5 da november 1875*

## 1875

### Tiers jasters

Tier la suprastanza da **Tujetsch**:

1. Ina ansola nergaglia, dretga giudasum e dus snezs davos en, seniastra ina ruosna.
2. Ina ansola strala, dretga ina furcletta davon en ed in snez davos en ed ina davon en entraviers.
3. Ina ansola grischa, seniastra in mugrin davos en ed in snez davon en.

1876

### Correspondenza dil Badus

La vischnaunca da **Tujetsch** ha da registrar da temps en temps en sias annalas zun trestas catastrofas. Gliendisdis vargau, ils 10 d.q., han dus umens piars disgraziadamein lur veta ella **Val Curnera** dadens l'alp **Cavradi** da **Trun**. Els fuvan occupai da far via atras la neiv entochen tiellas meidias da fein a pastg, ch'els levan l'auter di menar a casa. Quater umens eran allas 10 avonmiezdi s'avanzai ordavon cun spelar ora la neiv entochen ualti datier dallas meidias, duont che plirs auters reparavan la via circa duas uras pli anora ella val. L'auter di duevan circa 50 umens dumandai gidar a vegnir ora cul fein. Ils 4 umens ordavon ein gleiti vegni ella lavina cun tagliar atras in cuflau da neiv e mo in ha cun gronda breigia pudiu sefar libers dalla neiv ed arrivar en brauncas entochen tiels auters umens, per dar avis dalla disgrazia (el sa aunc ussa buca traversar la stiva, igl ei in giuven da circa 17 onns).

Arrivond suenter circa 2 uras gl'agid dils auters, han quels aunc cavau ord la neiv in mat da 18 onns vivs, mo anflau ils dus auters schon morts. La disgrazia ei ton pli gronda e sensibla essend ch'in dils morts, statalter Stiafen Schmet – in brav e survetscheivel um, ei bab da casa da 9 affons en veta, denter ils quals siu fegl, che vess gleiti sez piars la veta, ei il pli vegl e dumbrava mo 17 onns. L'auter miert ei Gion Fidel Peder, fegl da Gion Martin Peder, ei in giuven da strusch 21 onn, fargliun d'ina vart cun 8 da sia madregna e 2 agens fargliuns, dils quals tuts el er'il pli vegl e fuss staus la petga dalla famiglia, ton pli che siu bab ei avon dus onns vegnius disgraziaus egl uaul, ha rut in bratsch ed ei aunc ussa buca bein habels tiella laver. Il pli trest ei stau il transport dils cadavers ord quella macorta val entochen **Tschamut**, che ha cuzzau tochen las duas suentermiezd; mo zun tresta ei era la sepultura dils 13 d.q. stada, nua ch'ins veseva tons orfans ed ina cumbrigiada vieua bargend spella freida fossa da lur pli cars da casa, ils quals eran 3 dis avon schon vegni cavai ord ina quasi medema freida fossa, nua che la mort veva provisoricamein satrau els igl emprem. – Dieus, il bab dils orfans, dallas vieuas da tuts sfortunai consoleschi quels ch'ein restai anavos e detti als morts il perpeten ruan.

Gasetta Romontscha nr. 2; 13 da schaner 1876

1876

La collecta fatga ella **Cadi** per ils Franzos disgraziai entras las innundaziuns e per ils basignus vischins dil cumin, che han pitiu grond donn dalla tempiasta, ha giu sequent resultat. La vischnaunca da **Mustér** ha contribuiu 280 frs., **Tujetsch** 184, **Medel** 142, **Sumvitg** 104 frs 12 ct., **Trun** 180, **Schlans** 15, fa ensemble 905 frs. 12 ct. **Breil** ha giu collectau pli baul 50 frs. per la **Frontscha** e tarmess quei direct a **Cuera**.

Gasetta Romontscha nr. 3; 20 da schaner 1876

1876

Assistent Schmed ei numnaus curatur dalla vieua Onna Maria Schmet ed ugau da ses 9 affons a **Tschamut**.

Gasetta Romontscha nr. 5; 4 da fevrer 1876

1876

### Publicaziuns

1. Tuts quens cul defunct Stiafen Schmet da **Tschamut** ein da dar en agl ugau da sia famiglia assistent Schmet a **Sedrun**.
2. Gion Giusep Giossi a **Bugnei** ei ugadaus ella persuna da Sep Antoni Deragisch, che retscheiva el medem temps ils quens da quei giuven.

Gasetta Romontscha nr. 7; 18 da fevrer 1876

1876

Suenter che **Tujetsch** ha refusau la nova constituziun cantunala cun 176 vuschs e **Medel** cun 126 ha l'entira **Cadi** 980 refusonts e mo 4 acceptonts.

Gasetta Romontscha nr. 15; 14 d'avrel 1876

**1876**

Finalmein eis ei tuttina vegniu decidiu a **Berna**, ch'il frequentau pass dall'**Alpsu** duei per la stad haver dus cuors postals a di. Plirs temevan, ch'enstagl dil secund cuors, dessi ei mo in cuors **Cuera – Glion**.

*Gasetta Romontscha nr. 16; 20 d'avrel 1876*

**1876**

Ils cuors postals sull'**Alpsu** ein definitivamein ranschai en sco suonda: il cuors annual va naven da **Cuera** las 5 e 30 dalla damaun ed arriva ad **Ursera** las 6 (18) e 35.

*Gasetta Romontscha nr. 19; 12 da matg 1876*

**1876**

Signur Oberbauinspector Salis ha quels dis inspectau la strada militara sur l'**Alpsu**, e sco insauda eis el staus bein cuntents cul manteniment da quella.

*Gasetta Romontscha nr. 33; 18 d'uost 1876*

**1876**

**Publicaziuns**

**Plazzas postalas**

Ei vegn cheutras scret ora en libra concurrenza:

Il depot da posta a **Rueras** cun 100 frs. salari annual.

Ils aspirants ston sin la fin da quest meins dar en al suttascret, metter vitier in attestat da conduita, notificar igl onn da naschientscha ed il num da lur liug nativ, descriver la situaziu da lur casa e dil local da biro.

Il dierctur circuital da posta:

Stäger

*Gasetta Romontscha nr. 34; 25 d'uost 1876*

**1876**

**La fiera da Rueras**

vegn cun approbaziun dil davos Cussegl Grond tenida ils 7 d'october d.q. e la sonda avon la fiera d'**Altorf** digl october.

**La suprastanza da Tujetsch**

*Gasetta Romontscha nr. 39; 29 da settember 1876*

**1876**

**Annunzia e recumandaziun**

Tier l'avertura dallas scolas fa il suttascret enconuschent, ch'el vendi material da scola, pupi, hefts, tenta e plemas per in fetg raschuneivel prezi.

E. Deragisch, ligiacudischs a **Mustér**

*Gasetta Romontscha nr. 41; 13 d'october 1876*

**1876**

**Tiers jasters**

A **Sedrun** tier Gion Michel Monn ina nuorsa nera, ureglia dretga tagliau giu miez ed ina furcletta rodunda davon en, seniastra ina furcletta osum, in snez davos en ed in davon en.

*Gasetta Romontscha nr. 43; 27 d'october 1876*

**1876**

Tiers jasters

**A Cavorgia**

1. Tier Giachen Anton Schmed ina ansola gaglia, dretga giudasum e fess, seniastra giudasum ed in snez davon en osum

2. Tier Gion Antoni Schmed ina ansola nera, fess l'ureglia seniastra.

*Gasetta Romontscha nr. 44; 3 da november 1876*

**1876**

**Tiers jasters**

A **Bugnei** tier Josef Antoni Giossi in ansiel, ureglia dretga fess ed in snez da mintga maun, seniastra giudasum.

*Gasetta Romontscha nr. 46; 18 da november 1876*

**1876**

**Annunzia da mort**

En profunda dolor fagein nus dalunsch da nossa veglia patria enconuschent a nos stimai parents, amitgs ed enconuschents ella **Cadi**, ch'ei hagi plaschiu agl Altissim da clamar naven da questa speranza tier ina megliera veta nossa preziada consorta e cara mumma

**Maria Ursula Gieret, nata Genelin da Sumvitg**

Ella ei spartida ils 31 d'october vargau provedida cun tuts perduns e sacraments dils moribunds ella vegliadetgna da 35 onns e 10 meins.

Nus recumandein nossa carissima defuncta alla pia memoria da tuts nos parents ed amitgs.

Il combrigiau mariu

**Stillwater, America, 4 da november 1876**

Gion Antoni Gieret e ses treis affons

*Gasetta Romontscha nr. 48; 1. da december 1876*

**1876**

**Tiers jasters**

A **Sedrun** tier Gion Battesta Monn ina ansola, ureglia dretga in dent resgia davon en, seniastra giudasum ed in snez davon en.

*Gasetta Romontscha nr. 48; 1. da december 1876*

**1877**

**Piars**

ina patenta (Hausierpatent) per rauba da bratsch, sut il num Carl Cavegn a **Sedrun**. Igl anflader ei supplicaus da remetter quella al proprietari encunter ina commensurada bonificaziu

*Gasetta Romontscha nr. 1; 5 da schaner 1877*

**1877**

**Tiers jasters**

A **Sedrun** tier Stiafen Beer sesanfla dapi treis jamnas in anugl alv muot, ureglia dretga ina furcletta davon en, ina ruosna ed in snez davon en.

*Gasetta Romontscha nr. 4; 26 da schaner 1877*

**1877**

Cun caschun ch'il Cussegl Federal ha strihau il secund cuors postal sull'**Alpsu** muort memia pintga frequenza da quel, ei il magistrat dalla **Cadi** s'adressaus tier la direczion postala a **Cuera** culla supplica da procurar ch'ei vegni persuenter egl interess dall'entira **Surselva** ranschau en sillia stad in cuors local da **Cuera a Mustér**, enstagl sco vivon mo da **Cuera a Glion**.

*Gasetta Romontscha nr. 5; 2 da fevrier 1877*

**1877**

En dus particulars cass, nua che cussegls da scola ein passai si sco petents e susteniu da buns attestats digl inspectorat da scola, ha el fatg in'excepziun e dau la patenta alla scolasta Onna Maria Caplazi da **Surrein**, che ha schon dau 17 onns scola ed ils davos onns quella da **Sedrun** cun 50 – 60 scolars en otg classas e zuar cun generala cuntentientscha.

*Gasetta Romontscha nr. 9; 2 da mars 1877*

**1877**

**Bostger**

Sin giavisch digl inspectorat cantunal han las vischnauncas da **Mustér**, **Tujetsch** e **Medel**

seschau en da formar ensemen in revier forestal ed emploiar in bostger cun 1100 francs paga.  
*Gasetta Romontscha nr. 14, 5 d'avrel 1877*

### 1877

Ils marcadonts da stiarls entscheivan a seregheglier ella **Cadi** e spendan ludeivels prezis. Era ils vadials tumprivs pagan bein. Fein maunca ei buc, malgrad la schliaf'aura dil mars ed avrel. Quella entarda las lavurs dalla cumpignia. En **Tujetsch** han ei stuiu better tiara per saver arar buca memia tard; entuorn quels englars terrenai era ei aunc massa neiv sils praus. Mo ils Tuatschins han per moda d'arar gl'emprem e per suenter better "ad jarva".

*Gasetta Romontscha nr. 17, 26 d'avrel 1877*

### 1877

Gl'avrel cun sia aura bletscha e freida ei vargaus; il proverbi "claras calondas e stgir meins" ei cheu severificaus. Calonda matg sei stada stgira e freida, lein ussa mirar, sch'il meins matg croda ora bials sco in desiderass zun fetg; mo oz, ils 2, ha ei plitost pareta da vegnir unviern che primavera. Il termometer muossa 2 grads freid. En **Tujetsch** ein ils funs aunc cuvretgs cun neiv ed ier cuflava leu sco da miez unviern.

*Gasetta Romontscha nr. 18, 3 da matg 1877*

### 1877

#### Publicaziun

Essend concediu il beneficium inventari als artavels dil defunct Giachen Antoni Decurtins, dueien ses quens vegnir dai a Gion Antoni Curschellas da leu, ch'ei era ugau dalla vieua Agata Decurtins, nata Giossi, e da ses 4 affons, tuts a **Bugnei**.

*Gasetta Romontscha nr. 18, 3 da matg 1877*

### 1877

#### Publicaziuns

Josef Anton e Martina Jacomet da **Sedrun van ell'America**. Lur quens ein da dar en enteifer 3 jamnas ad assistent Schmet.

*Gasetta Romontscha nr. 19, 10 da matg 1877*

### 1877

Tuts quens dil defunct Martin Antoni Valier da **Sedrun** ein da consignar a scolast Gion Antoni Soliva da leu.

*Gasetta Romontscha nr. 31, 3 d'uost 1877*

### 1877

Dumengia vargada ha monsignur uestg Willi benediu ora 11 spirituals en quei era in Tuatschin, signur Thomas Beer da **Sedrun**. La primizia ei dumengia, ils 19 d'uost.

*Gasetta Romontscha nr. 32, 10 d'uost 1877*

### 1877

L'indicada messa nuviala a **Sedrun**, ils 19 d.q., ei vegnida tenida a **Sedrun** cun biala solemnitad e sut gronda participaziun dil pievel. La respectabla cumpignia da students tuatschins ha legrau la sera ses convischins cun in fiug artificial – ina caussa aunc mai s'udida en quella val -, nua ch'ei flessegia latg e mèl en abuldonza.

*Gasetta Romontscha nr. 34, 24 d'uost 1877*

### 1877

En **Surselva** ein ils dus hotels digl uaul da **Flem** stai empleni ualti bein, duront che **Breil** e **Mustér** han uonn buca giu schi bia currants sco onn, persuenter ei stau ton pli bia passants per l'**Alpsu**.

*Gasetta Romontscha nr. 32, 10 d'uost 1877*

**1877**

Ils dis canins han purtau questa jamna gronda steppadad e fermes stempraus. Ils tribels uradis cun ferm suffel, tunar e camegiar dalla notg dils 21 sils 22 han mess en alarm entirs vischinadis sco **Sedrun** e **Zignau** che temevan ils druns.

*Gasetta Romontscha nr. 34, 24 d'uost 1877*

**1877**

Tier la messa nuviala a **Sedrun** dils 19 d'uost, havein nus giu caschun d'admirar il bi cant ecclesiastic da leu. Per nies grond plascher porta ussa la Allgemeine Schweizerzeitung da **Basel** ina correspondenza d'in viandont, ch'ha udiu quei cant ina dumengia, in grond laud als cantadurs da **Sedrun** ed a lur premurau instructer signur caplon *Giachen Antoni Augustin, Alvaschein*. Schegie che quella giuventetgna hagi negina cultivaziun musicala, hagi ella cantau meglier ch'igl aschinumna "domchor" da **Berlin** a **Basel**.

*Gasetta Romontscha nr. 38, 21 da settember 1877*

**1877**

**La fiera da Rueras**

Vegr tenida la sonda avon la fiera d'**Altorf**, ch'ei sonda proxima, ils 6 d'october.

**Camischolas**, igl 1. d'october 1877

**La suprastonza da Tujetsch**

*Gasetta Romontscha nr. 40, 5 d'october 1877*

**1877**

Tier la zavrada da nuorsas a **Tujetsch** ei restau anavos tier Christian Muggli a **Rueras** sequentas nuorsas jastras:

1. Ina nuorsa alva muota, dretga tagliau giudasum ed ina furcetta davon ora.
2. In'alva muota, ureglia dretga in fildirom, tagliau giu dasum e dus snezs davos en, seniastra ina furcetta davos en.
3. Ina nuorsa nera, dretga duas ruosnas, en ina da quellas en tier il tgau ina curegia, seniastra ina snez davon en entatier il tgau

*Gasetta Romontscha nr. 42, 17 d'october 1877*

**1877**

**Annunzia da mort**

En profunda dolur fagein nus da saver a nos stimai parents ed enconuschents, ch'ei hagi plaschiu agl Altissim da clamar ord questa speranza tier ina megliera veta nossa cara sora ed onda

**Rosa Martina Berther**

Ella ei spartida ils 23 d'october en ina vegliadetgna da 61 onns, provediada cun ils sogns sacraments e perduns.

Nus recumandein l'olma dalla cara defuncta alla pia memoria da tuts nos enconuschents.

Gion Andriu Berther, frar

er'en num dils auters parents

**Tujetsch**, ils 26 d'october 1877

*Gasetta Romontscha nr. 44, 1. da november 1877*

**1877**

**Tiers jasters**

A **Sedrun** tier ustier Lucas Cavegn sasanfla in barbeisch grisch, ureglia dretga in snez davon en, ella seniastra ina furcetta osum ed ina davos en, enta culiez ina tezla cun noda.

*Gasetta Romontscha nr. 44, 1. da november 1877*

**1877**

**Tiers jasters**

A **Sedrun** tier gerau Lucas Cavegn sesanfla in barbeisch grisch, ureglia dretga ina furcetta

osum, ella seniastra ina furcletta orasum ed ina furcletta davos en, ina tezla enta culiez.  
*Gasetta Romontscha nr. 45, 9 da november 1877*

**1877**

Cun plascher notifichein nus, che la respectada matta Rosa Martina Berther da **Sedrun**, ch'ei stada leu circa 40 onns cantadura ed ei morta buca daditg, hagi fatg si per caussas pias datier da 2000 frs. Denter auter ha ella en siu testament era seregurdau digl institut orfanil a **Schluein**.

Quel sco era il spital dalla S. Crusch a **Cuera**, ina dallas principalas ovras da nies nunemblideivel pader Teodosi, lesssen nus cheutras haver recumandau cauldamein alla beneficenzia d'in ludeivel publicum.

*Gasetta Romontscha nr. 46, 16 da november 1877*

**1877**

**Tiers jasters**

A **Tujetsch, Cavorgia** tier Luis Hendry dus anseuls ners cun sequenta noda:

1. Tagliau giudasum la seniastra e fess cun in gavigliel davos en ed in snez davon en.
2. Ella dretga ina ruosna, in snez davos en ed in davon en.

*Gasetta Romontscha nr. 46, 16 da november 1877*

**1877**

**Annunzia da mort**

Nus purtein cheutras a parents ed enconuschents tresta nova, ch'ei hagi plaschiu agl Altissim da clamar ord questa veta nossa cara mumma, sira e tatta

**dunna Bundsweibel**

**Teresa Berther**

Ell'ei morta ils 8 da november suenter ina liunga malsogna, provedida cun tuttas consolaziuns da nossa religiun en ina vegliadetgna da 65 onns.

Nus recumandein la preziada defuncta alla pia memoria da tuts parents ed enconuschents.

**Cuera**, ils 10 da november 1877

Anton Berther, fegl, salter cantunal

Carolina Berther, nata Vimermann

brit, beadis e beadias

*Gasetta Romontscha nr. 47, 23 da november 1877*

**1877**

**Tiers jasters**

A **Sedrun** tier Sep Antoni Gamboni in tschanc ner entir cun corns, ureglia dretga fess ed in snez davos en, seniastra fess ed in snez davon en orasum.

A **Sedrun** tier Gion Antoni Monn, giuven, sesanfla in barbeisch (*en Tujetsch in tschanc entir mo era chistrau, tenor DRG*) alv cun sequenta noda: ureglia dretga in snez davon en e fess, ureglia seniastra ina furcletta osum e tagliau giu la cuia.

A **Tujetsch** tier Gion Paul Berther ina ansola, dretga ina furcletta osum ed ina ruosna, seniastra giudasum ed in snez davos en.

*Gasetta Romontscha nr. 47, 23 da november 1877*

**1877**

**Tiers jasters**

A **Sedrun** tier vieua Cresenzia Huonder in botsch entir clar tgietschen, dretga giudasum ed in snez da mintga maun entraviers enagiu, seniastra ina furcletta osum ed ina davos en.

*Gasetta Romontscha nr. 48, 30 da november 1877*

**1877**

Dapi entgins dis ei vegniu naven duas cauras cun noda en fuorma da tardent en omisduas ureglas. Tgi che sa da novas da quels dus tiers, ei supplicaus da schar saver Duri Berther a **Tujetsch**.

*Gasetta Romontscha nr. 49, 7 da december 1877*

**1878**

### **Annunzia da mort**

Nus fagein cheutras da saver a nos parents ed enconuschents, ch'ei hagi plaschiu agl Altissim da clamar ord questa veta temporalia tier la perpetna beadedad nies car bab

### **Vigeli Josef Monn**

El ei spartius ils 17 da december suenter ina cuorta e leva malsogna ella biala vegliadetgna da 84 onns.

Nus recumandein sia olma alla pia memoria da tuts nos enconuschents.

Ils combrigiai affons:

Gion Antoni e Vigeli Josef Monn

Maria Librata e Barla Monn

**Tujetsch**, ils 26 da december 1877

*Gasetta Romontscha nr. 1; 3 da schaner 1878*

**1878**

### **Publicaziuns**

Tuts quens dil defunct gerau Josef Maria Monn da **Zarcuns** ein da consignar a statalter Gion Battesta Monn a **Sedrun**.

Giusep Antoni Peder a **Selva** ei retschevider da quens per la concursanta Culastia Andriuet da leu.

*Gasetta Romontscha nr. 2; 1 da schaner 1878*

**1878**

A **Rueras/Tujetsch**, grassescha la difteria quasi en tuttas casas. Igl ei miert leu dabia affons ed auters ein aunc buca ametsch.

*Gasetta Romontscha nr. 3; 18 da schaner 1878*

**1878**

Cul niev onn ei cumpariu in niev schematismus dil clerus dalla diocesa curienda ch'ins sa retrer. Il present nonsignur uestg Caspar Willi ei il 94 avel, siu capitel catedral consista ord 6 canonis residenzials e 18 extraresidenzials, siu seminari a s. Leci dumba dapresent 27 alums cun 5 professers. Egl uestgiu da **Cuera** sesanflan 321 spirituals seculars, il senior da quels ei signur Vigeli Wenzin a **Tujetsch** naschius 1792.

*Gasetta Romontscha nr. 5; 1. da fevrier 1878*

**1878**

Tenor il Tagblatt ha **Uri** selamentau tscheidiatsch, che dus viagjonts mistergners, che hagien buca giu survegniu quatier a **Tschamut**, hagien stuiu far il cuolm la notg e seigien arrivai ad **Ursera** cun peis schelentai. Quella gasetta remarca, ch'els hagien buca giu dumandau da star sur notg en quella casa, nua ch'ei vegni per ordinari dau quatier, sonder mo tier duas paupras famiglias. Ella cussegliu denton, ch'ins duessi procurar sin quei pass alpin per quatier a paupers viandonts sco ei seigi il cass sil **Lucmagn**. Cheuencunter remarchein nus, ch'ins hagi vuliu far in'empreva da quellas varts e dumandau persuenter in pign subsidi dil ludeivel Cussegl Pign ord igl annual subsidi cantunal pil pauperesser, ch'en tals cass vegni sigl avegnir negin pauper viandont enviaus pli ord casa a **Tschamut**.

*Gasetta Romontscha nr. 9; 1. da mars 1878*

**1878**

Resultat dalla collecta ella **Cadi** pils donnegiai entras il barschament a **Trun**: dalla vischnaunca da **Tujetsch** 50 frs. ... En num dils donnegiai vegn ei cheutras mess giu in public engraziamenti La suprastonza da **Trun**

*Gasetta Romontscha nr. 11; 15 da mars 1878*

**1878**

Cudisch da legendas dalla secunda part san ins haver mo per 3 frs. il toc, sco era cudischs da

quens, a vendiders vegn dau in rabat.  
Emanuel Deragisch, ligiacudischs  
*Gasetta Romontscha nr. 16; 19 d'avrel 1878*

### 1878

La vischnaunca da **Tujetsch** enquera per la proxima stad in bien nurser. Aspirants san s'adressar enteifer 10 dis tier la suprastonza.  
*Gasetta Romontscha nr. 24; 14 da zercladur 1878*

### 1878

Sill'**Alpsu** ei ils 8 d.q. succedi in trest cass. Dumengia sera era ei vegniu si leu circa 30 personas dad **Ursera** per entscheiver a cavar «torf» gliendisdis cull'alva dil di. Ellas ein manidas en ina casetta da duas alzadas, ils biars giu bass ed ils auters si sut il tetg, nua chiei era empau fein. Giusut vevan ei cazzola ed encunter catschar dis ha ina persuna vuliu derscher ell'ampla aunc empau neolin, mo l'entira butteglia ha pigliau fiug e tras in'explosiun ein las flommas serasadas sin tuts mauns. La glieud giusut ei fugida ed ha era susentau quels sisura; mo per cura che l'entira casetta era en fiug e flomma han ins observau chiei muncava aunc treis personas che vevan durmiu si suren: in spus ed ina spusa cun in auter um, ch'ein pli tard vegni tratgs ora sut las ruinas barschai e sfigurai schi fetg, ch'ins vess buca enconuschiu pli els, in pèr umens ein blessai malamein. In crotschier, ch'era dumengia sera passaus leu speras ora, ha raquintau a nus, ch'el hagi viu leu sin esch ina biala e frestga giuvna e l'autra damaun, cura ch'el seigi turnaus dad **Ursera** sil cuolm, eri sia bara nera e macorta exponida sur la via sper la bara da siu spus. La glieud leu d'entuorn bargevien sco affons. Oz en possa, damaun en fossa!  
*Gasetta Romontscha nr. 28; 11 da fenadur 1878*

### 1878

#### **Ingant per schar via per tscheins l'Alp da Nalps en Val Tujetsch.**

Ils 26 d'uost las 9 avonmiezdi vegn ei en claustra da **Mustér** sin via d'ingant schau via per tscheins sin 5 onns l'alp, che quella posseda ella **Val Nalps**. Ils onns vargai vegneva quella alp cargada cun 1000 – 1200 nuorsas bergamascas e 20 - 30 armauls. Ulteriur sclariment dat sin damondas fatgas l'administraziun claustral.

**Mustér**, ils 6 d'uost 1878

*Gasetta Romontscha nr. 32; 9 d'uost 1878*

### 1878

Sechelmeister *Gion Benedetg Deragisch (1811–1901)*, oriunds da **Tujetsch** e domiciliaus a **Stillwater** en **Minnesota**, fa cheutras da saver a ses parents ed enconuschents ell'**America**, ch'el seigi suenter in'absenza da 18 onns puspei arrivaus cun sia consorta (*vieua Barla Turte` Livers-Beer (1835–1914), secunda dunna*) saunamein e da buna veglia en sia veglia patria per star leu sin viseta in per meins e silsuenter turnar en sia nova patria americana.  
*Gasetta Romontscha nr. 36; 6 da settember 1878*

### 1878

#### **Annunzia da mort**

A parents ed enconuschents purtein nus cheutras la tresta nova che nossa cara mumma

**Margreta Nescha Cavegn, nata Monn (\*29-12-1796)**

seigi questa notg spartida da quest mund speronza tier ina megliera veta en ina vegliadetgna da 82 onns suenter ina cuorta malsogna ed haver retschiert ils sogns sacraments dils moribunds. Ella vegn satrada sonda, ils 28 d.q.

Nus recumandein sia olma allas oraziuns da parents ed amitgs.

En num dils affons en malencurada:

Vigeli Cavegn, fegl

**Sedrun**, ils 26 da settember 1878

*Gasetta Romontscha nr. 39; 27 da settember 1878*

**1878**

**Annunzia da mort**

En profunda dolur notifichein nus a parents ed amitgs, ch'ei hagi plaschiu agl Altissim da clamar tiella perpetnadad nies car fegl, frar e quinau

**Pieder Paul Wenzin (19-07-1839)**

El ei morts ils 24 d.q. provedius cun tut sogns sacraments dils moribunds en ina vegliadetgna da 39 onns suenter liunga e dolorusa malsogna.

Alla pia memoria recamondan sia olma

La combrigiada mumma:

*Maria Mengia Wenzin-Condrau.*

En num dils fargliuns:

Flurin Wenzin, frar

Vigeli Cavegn, quinau

**Selva**, ils 25 da settember 1878

*Gasetta Romontscha nr. 39; 27 da settember 1878*

**1878**

Allas duas battarias montanas **Grischun** e **Valleis** che han fatg in cuors a **Thun** sut major Zuan, vegn ei dau grond laud per lur bien secuntener ed oreifer sittar. La grischuna vegn sonda sull'**Alpsu** cun 130 umens e 60 cavals, che prendan lur quatier ella vischernaunca da **Mustér** che ha quest atun schon giu treisga schuldada a quatier. Stagn gronda mulesta en in meins.

*Gasetta Romontscha nr. 41; 10 d'october 1878*

**1878**

A **Cavorgia (Tujetsch)** tier Martin Peder sesanfla ina nuorsa nera cun sequenta noda: Ina furcletta osum l'ureglia dretga, ureglia senistra in snez davon en ed ina furcletta davos en.

*Gasetta Romontscha nr. 45; 7 da november 1878*

**1878**

Scolast Gion Antoni Soliva retscheiva ils quens dil concursant Giachen Antoni Curschellas, omisdus da **Tujetsch**.

*Gasetta Romontscha nr. 52; 25 da december 1878*

**1879**

Assistent Schmed ei retschevider da quens dil concursant Josef Antoni Balzart, omisdus da **Sedrun**.

*Gasetta Romontscha, nr. 5, ils 30 da schaner 1879*

**1879**

**Cadi**

Il beneficium inventari ei vegnius concedius per ils defuncts consorts Jacob Adalgott e Cristgina Maculin, retscheviders da quen ein assistent Schmet e Giachen Antoni Berther, tut da **Tujetsch**.

*Gasetta Romontscha, nr. 8, ils 20 da fevrer 1879*

**1879**

Sur dil mèl da **Tujetsch**.

(Correspondenza dil **Badus**) ... Quels signurs han intercuretg denter auter mèl svizzer, cristallisau, vegls da dus onns; quel da **Tujetsch** nr. IV era totalmein alvs, ferm cristallisau, ord la regiun dallas alps 4650 peis sur mar. Quel da **Tumein**, medemamein fetg cristallisau, pli mellens, 2000 peis sur mar.

Denter 100 parts mèl da quellas sorts cuntegnan:

	substanzia	aua
Il mèl da <b>Tujetsch</b> , nr. IV	82.48	17.52
<b>Tumein</b>	81.39	18.61

Plinavon han els intercuretg ils medems mèls rars ni flessegions, mo da ½ onn vegls, lur resultat ei sequentamein stabilius. Da 100 parts mèl cuntegnan:

	substanzia	aua
quel da <b>Tujetsch</b>	79.59	20.41
quel da <b>Tumein</b>	78.53	21.47

Ord quellas cefras vesa mintgin ch'il mél da **Tujetsch** (ni il mèl alpin) porta dapertut la plema e stat sco l'emprova per prender en gl'emprem rang. Jeu sun perschuadius, che nies mèl fagess aunc ina pli eclatanta cumparsa ella statistica, sch'ins intercuress el immediat el liug d'origin, enstagl per a **Vienna**. Fins gastronomi e lojals turists che gaudan nies mèl ella vallada sezza en siu cumplein aroma, san buca selamentar avunda sulla nunperdunabla sfalsificaziun dil mèl alpin, sco ella daventa dapertut dils maligns speculants. Leider ei la raccolta da mèl schon ver 2 – 3 onns stada fetg magra tier nus, en consequenza dallas tardivas e schliatas primaveras; aber ina pintga reserva da mèl exquisit per transport, ni enqual biala patgna mèl en natira grad ord magasins temps da stad, per schigiar ad enqual diletant, ei mintg'onn da survegnir. Talas queidas e marveglia ston ins per sesez pagar empau da car; aber la chemia, ni il process, ch'il magun fa tier mintgin, dat gl'equivalent, ch'il mèl da **Tujetsch** seigi tonaton enzatgei "non plus ultra".

*Maurus Desax, plevon a Sedrun*

*Gasetta Romontscha, nr. 9, ils 27 da fevrier 1879*

## 1879

Suenter ina liunga malsogna ei ils 2 d.q. miert a **Rumein** il beneficiat da leu signur pader Gallus Riedi oriunds da **Tujetsch** ella biala vegliadetgna dad 81 onn. RIP.

*Gasetta Romontscha, nr. 10, ils 5 da mars 1879*

## 1879

### Clom d'emigraziun

Per vegnir suenter l'ordinaziun dil Cussegl Grond, vegn ei cheutras fatg da saver che Gion Michel Derungs e sia sora Emilia Derungs da **Tujetsch** seigien intenziunai d'emigrar ell'**America**. Signur gerau Lucas Cavegn ei retschevider da quens dils numai emigrants.

**Trun**, ils 10 da mars 1879

Igl Uffeci circuital dalla **Cadi**.

Fegl Official dil Cantun Grischun, ils 14 da mars 1879

## 1879

Straduns alpins dallas vias da communicaziun ein: a) l'**Alpsu** da **Sedrun** tochen ils cunfins uranès (vivon schon naven dil vitg da **Mustér**). ...

*Gasetta Romontscha, nr.11, ils 13 da mars 1879*

## 1879

Sco nus havein profetisau ei il secund pugn da recapitulaziun sulla pasculaziun dils tiers manedels vegnius fiers cun splendida maioritad, il tierz sulla pescaria ei probabel era refusaus, sulla sort digl emprem pugn, sul niev uorden dil manteniment dallas stradas, san ins aunc nuota rapportar enzatgei definitiv. .... **Mustér**, **Medel** e **Tujetsch** han fiers tut quasi unitamein, ferton che **Sumvitg**, **Trun** e **Breil** han acceptau igl I. pugn.

*Gasetta Romontscha, nr.14, ils 3 d'avrel 1879*

## 1879

### **Cadi**

Ils pretendents dalla jerta dil defunct pader Gallus Riedi a **Mustér** duein dar en agl uffeci da cumin.

Sefundont sin §109 dil dretg privat ei Giachen Antoni Curschellas da **Tujetsch** puspei

rahabilitaus.

*Gasetta Romontscha, nr.15, ils 10 d'avrel 1879*

**1879**

Cumin 1879. .... sco derschaders ein numnai: ils presidents communals da **Tujetsch e Medel**, Luregn Jacomet e S. Beeli .... official civil a **Tujetsch**: Soliva ...

*Gasetta Romontscha, nr.19, ils 8 da matg 1879*

**1879**

Per s.h. taurs han obtenu premi: .... gerau Gion Andriu Berther da **Tujetsch** ...

*Gasetta Romontscha, nr.17, ils 24 d'avrel 1879*

**1879**

### Catschadur

Il catschadur Gion Clemens Riedi da **Mustér** ch'ei morts ils 8 da matg 1879 en casa pauperila a **Mustér**, ei tras siu cumbat cugl uors vegnius eternisaus el renomau cudisch: *Das Thierleben der Alpenwelt* da Fr. Tschudi, mo ual aschi remarcabla ei stada sia aventura ella lavina. Sco necrolog da quei valerus fegl dalla natira alpina, suonda cheu ina raquintaziun da quels dus aventurus schabetgs.

Naschius 1797 a **Selva** giudapeis dil majestus **Badus** eis el leu en ses giuvens onns vegnius ella lavina la stermentusa notg dils 12 sils 13 da december 1808, la medema notg, nua che pliras famiglias els cantuns **Berna**, **Uri**, **Sviz** e **Glaruna** ein vegnididas satradas cun casa e clavau confirmond il proverbi: "amiez la veta la mort seschluetta".

Sils cuolms era gronda nevada, la marschauna fuva rutta en ed in ferm suffel era levaus. Prevedend il grond prighel fa il caplon da **Selva** la sera suenter rusari aunc recitar ils vischins in paternies, che Dieus vegli pertgirar els dalla lavina. Avon baselgia secusseglan els lura sin tgei maun fugir, tgi temeva la lavina dil maun dretg e tgi quella dil maun seniester. Dividi en lur supposiziuns prendan els trestamein cumiau in da l'auter, sco la davosa gada ch'els sevesessen sin quest mund. Entgins enqueran lur refugi ellas casas dadens, ed ils auters ellas casas dado. Recumandond lur veta els mauns da Diu, semettan els a ruaus – biars en fossa per mai levar pli.

Entuorn mesanotg ramplunan las vals stermentusamein, ina sgarscheivla lavina vegn dalla **Val Ruinatsch** giu, neu sul **Rein** e sur in grond rieven si el vitg da **Selva**, sfraccond ensemes las casas dadens e tuts ils clavaus deno in sulet. 25 persunas han anflau cheu ina tresta mort e 17 ein vegnididas liberadas ord lur peinas ed anguoschas; era tschien tiers ein ventschi ella lavina. La glieud mitschada vegnan spert neutier cun pétgs e palas per cavar si ils sventirai, il venerabel caplon, cumpignaus dil caluster cun ina latiarna e provedius cul s. ieli, va pruamein entuorn per porscher agid e consolaziun als moribunds cavai si. Denter ils liberai sesanflava la famiglia Riedi, ch'era la sera restada graderi en sia casa. Ils geniturs durmevan en stebli, sper lur letg sesanflava lur pli pign affon en tgina, il grond, Gion Clemens, era semess sin pegna stiva, cun siu frar pli giuven. Entuorn mesanotg bragia igl affon pign, la mumma pren el en siu letg, e beingleiti suenter aud'ella ina sgarscheivla canera e grescha: "Jesus! La lavina vegn!" In stausch - la casa ei sfraccada! Il plantschiu en stebli vegn giu sil letg, mo al lennplantschiu han ils geniturs d'engraziar, ch'els ein buca vegni smaccai cun lur affon. Igl uvierchel dalla pegna en stiva vegn spert fiers sin dus mauns e Gion Clemens e siu far dattan giu sillenna stuppad'en pegna. Vargaus il fraccass enqueran ils geniturs da susentar ils dus buobs en stiva. "Nus essan en pegna, havein cauld e bien", rispundan quels dus frestgamein.

En bucca alla crudeivla mort, seconselond che tuts da casa seigien aunc vivs ed implond gl'agid da Diu cun caudas oraziuns, vegn la famiglia Riedi la sera sissu finalmein liberada ord sia horribla perschun. Ella auda lu a mond umens sulla neiv via, semptgai da turnar a casa schend: "Cheu savein nus far nuot, cheu sut ei tut ventschiu." "Udis buobs, tgei quels dian!", cloma la mumma, "ussa gri quei che vus pudeis!"

Clemens grescha e cloma cull'entira famiglia. La glieud suravi auda enzatgei ed entscheiva a cavar. Ventireivlamein vegn l'entira casada liberada ord fossa, ed en tgina anflan ei il giatcasa smaccaus dalla neiv, havend quel encuretg in bien igniv en tgina suenter che la mumma ha giu

priu gl'affon en letg, che fuss tschelluisa era daventaus in'unfrenda dalla mort. Ils morts cavai si duront treis dis ein vegni zugliai en blahs, transportai sin sliusas a Sedrun e leu sutterai en ina fossa communabla.

Clemens Riedi ei plaunsiu setratgs a **Mustér** e cheu ei lu succediu il november 1838 la renomada catscha sigl uors, il qual ha ina stad ora giu mazzau ina troppa stiarls. Adumbatten ha la vischnaunca da **Mustér** giu ordinau per s. Barclamiu ina generala catscha sin quella bestia, catschadurs eran postai pils cuolms entuorn, ferton che la glieud encurevan da leventar gl'uors cun grir, schumbrar e stgalinar, mo el ha buca schau seveser e silsuenter cuntuau sias spassegiadas da rapina.

L'entschatta november ein lura ils dus catschadurs e vischins a **Madernal**, Clemens Riedi ed Augustin Biscuolm vegni perina da far flucs cun quei malvugliu schani. Gl'emprem di da catscha era Biscuolm sentardaus e Riedi semetta en siu ardiment tut persuls sin viadi. Ellas grauflas dalla **Val Barcuns** anfl'el fastitgs digl uors, el vegn en rocla e senza schientscha seretegn el sin ina platè. Revegnius continuescha el sia campagna, arriva tier in grep, nua ch'igl uors veva sia tauna. El cuchegia da quella en ed encorscha ils egls dalla bestia, che tarlischavan el stgir sco duas cazzolas. Riedi ei spert seresolvius, el tacca sia buis, metta si in capsel, fa ina s. crusch e tila, mo la buis disdescha per l'emprema e secunda ga. Cun metter si il tierz capsel va il siet, las vals ramplunan dil ferm plum ed igl uors dat si in terribel sgregn. Il catschadur seglia spert d'ina vart, prepara in niev siet, tuorna anavos, cuchegia dalla tauna en, mo encorscha negin uors. Nunsefidond da tut persuls irritar danovamein la bestia, va el per quella sera a casa e raquenta sia catscha a siu camerat Biscuolm.

L'autra damaun semettan omisdus sin viadi per far giu gl'uors. Biscuolm mava ordavon e tier in malpass sto Riedi star anavos entochen ch'il camerat va giu ordavon. Tuttenina audan ei in terribel sgregn ed igl uors seglia si dies a Biscuolm, che sederscha e rocla culla bestia d'ina pala giu. Vegnend giu encounter in pigniel vegnan els da part in da l'auter ed en in fiep ual sut reussescha ei a Biscuolm da catschar il calcogn da sia buis en bucca agl uors e cheutras tener el empau d'ina vart. Riedi seprofitescha da quella favoreivla posiziun, sieta sigl uors, quel pren la fuigia, mo vegn terraus dad ina secunda balla tarmessa da Biscuolm. La ventira per quel ei staus che Riedi veva il di avon sittau ellas missialas agl uors, aschia saveva quel buca ruir e Biscuolm ei en quella famusa cambrolla mitschaus cun enzacons sgreffels en fatscha.

Quella catscha d'uors ha 1838 fatg la runda en tuttas gasettas ed ei silsuenter vegnida prida si sco remarcabladad egl allegau renomau cudisch da Tschudi, aschia ch'il mund posteriur vegn aunc a plidar dil catschadur Clemens Riedi. Possi el denton era haver anflau grazia sin l'auter mund!

*Gasetta Romontscha nr. 22, 29 da matg 1879 (Feuilleton)*

## 1879

La fiera da **Tujetsch**

vegn tenida a **Sedrun** gliendisdis ils 9 da zercladur.

La suprastonza

*Gasetta Romontscha, nr. 22, ils 29 da matg 1879*

## 1879

Piars

denter **Cavorgia** e **Mustér** in cudisch cun in summa ed ina brev da marcau. Da remetter alla stamparia encounter ina bonificaziun.

Gasetta Romontscha, nr. 23, ils 6 da zercladur 1879

## 1879

Il 17 d.q. ei uonn gl'emprem segneradi passaus sull'**Alpsu** – ina famiglia englesa, vegnida en crotscha tochen sur **Tschamut** si e da leu naven serendida a pei frestg - e legramein sulla neiv - suenter ils umens che purtavan la bagascha. Las damas han schau plascher quell'emperneivla aventurette, corunada cun in stupent appetit ed oreifer sien ad **Ursera**.

## 1879

Il negozi da nuorsas ha uonn buca giu la vivacitad d'onn. Ellas han l'entschatta pagau pli pauc e tier quei dueien quels che han cumprau si ellas, haver fatg pign gudogn, cun turnar a vender. Pli legreivel eis ei d'udir, ch'ina roscha purschals, catschai sulla **Alpsu** pella fiera d'**Ursera**, hagien leu pagau biebein, aschia che la **Cadi** ha aspects da saver vender ils tiers-casa pli bein egl **Uri** che giuviars. La fiera d'**Ursera** dalla jamna vargada ha danovamein mussau che nos tiers manedels ed armentivs pagassen in bien ton pli bia, sch'ei vegnessen teni empau meglier.  
*Gasetta Romontscha, nr. 25, ils 20 da zercladur 1879*

## 1879

Ils 29 da zercladur ei vegniu l'emprema posta sulla **Alpsu**, da nossa vart era la neiv fiers ora schon entgins dis avon, mo ils Uranès, ch'eran fatschentai pli fetg cun quellas lavurs sil **Gottard** e sillla **Furca**, han retardau l'avertura. Il **Lucmagn** ch'era uonn surcargaus cun neiv, ei ruts atras per ier ed oz passa l'emprema posta quei pass.

*Gasetta Romontscha, nr. 27, ils 4 da fenadur 1879*

## 1879

### Annunzia da mort

En profunda dolur fan ils suttascrets da saver a parents ed enconuschents, ch'ei hagi plaschiu agl Altissim da clamar ord questa tiella veta perpetna nossa cara consorta e mumma

**Barla Catrina Decurtins, nata Cavegn**

Ell'ei spartida ils 22 da zercladur suenter ina liunga malsogna e provedida cun ils s. sacraments e perduns pils moribunds ed ina vegliadetgna da 78 ½ onns.

Nus recumandein sia olma alla pia memoria dils stimai parents ed enconuschents.

**Rueras**, ils 26 da zercladur 1879

Il mariu en malencurada

Giachen Decurtins

En num dils combrigiai affons

Hans Giachen, fegl

*Gasetta Romontscha, nr. 27, ils 4 da fenadur 1879*

## 1879

### Fiug a Bugnei

Sonda vargada han in per affons a **Bugnei/Tujetsch**, dau fiug in clavau cun far termagls cun zulprins fosforics; cun spert dar neutier glieud han ins pudiu riscuder ils baghetgs d'entuorn. In niev avis da metter meglier giudamaun quels prigulus zulprins.

*Gasetta Romontscha nr. 31; 1. d'uost 1879*

## 1879

### Annunzia da mort

En profunda tristezia fetschel jeu cheutras da saver a nos parents, amitgs ed enconuschents, ch'ei hagi plaschiu agl Altissim da clamar ord questa tiella veta perpetna mia cara consorta

**Onna Maria Huonder n. Berther**

Ella ei spartida ils 24 d.q. suenter ina liunga malsogna da 5 meins, provedida cun tut ils s. sacraments e perduns pils moribunds en ina vegliadetgna da 48 onns e 2 meins.

Recamondel la cara defuncta alla pia memoria da parents ed enconuschents.

Il mariu en malencurada

Tumaisch Huonder

er'en num dils tierparents.

**Rueras**, ils 27 da fenadur 1879

*Gasetta Romontscha nr. 31; 1. d'uost 1879*

## 1879

### Annunzia da mort

En profunda tristezia fagein nus cheutras da saver nos a parents, amitgs ed enconuschents, ch'ei hagi plaschiu agl Altissim da clamar ord questa tiella veta perpetna nossa cara consorta, sora ed

onda

### **Sepa Monn, nata Wenzin**

Suenter ina liunga malsogna eis ella morta la sera dils 5 d'uost, provedida cun tut ils s. sacraments e perduns dils moribunds, en ina vegliadetgna da 48 onns.

Nus recumandein sia olma alla pia memoria da tuts nos parents ed enconuschents.

Pella cumbrigiada parentella:

Christian Monn, mariu

Onna Maria Condrau, nata Wenzin, sora

Fausta Mucli-Wenzin, sora

era en num dils auters parents

**Rueras**, ils 6 d'uost 1879

*Gasetta Romontscha nr. 32; 8 d'uost 1879*

**1879**

### **Cadi**

En consequenza d'in concediu beneficium inventari dueien tuts quens cul defunct pader Gallus Riedi da **Mustér** vegni dai en al president Franz Decurtins a **Trun**.

*Gasetta Romontscha nr. 33; 15 d'uost 1879*

**1879**

### **Avis**

Sin ina disgrazia, che vess maneivlamein saviu schabegiar cun ina crotscha ils 14 d.q. sill a strada dall'**Alpsu**, sesanfla il suittascret necessitaus da visar publicamein ils avdonts da quella da caveglier negins carrs ni autras caussas ellas chinettas, ni sill a strada per schar leu per pli ditg, cunzun temps da notg. Per tals surpassaments ha gl'uorden polizial da vias fixau in castitg da 2 – 10 frs.

Gion Poltera a **Tujetsch**, viè dall'**Alpsu**

*Gasetta Romontscha nr. 34; 2 d'uost 1879*

**1879**

Il davos d'uost ei ella **Val Nalps** (**Tujetsch**) vegniu viu in marighel da 40 camutschs, e l'emprema jamna dalla catscha han plirs catschadurs fatg buna raccolta, in da **Medel** ha sittau 14 muntanialas, dus quinaus da **Mustér** 7 camutschs, in da **Sumvitg** ha fatg giu egl uaul dadens la punt **Russein** in buc da camutschs che ha dau 70 glivras carn!

*Gasetta Romontscha nr. 37; 12 da settember 1879*

**1879**

Duas cauras da razza italiana ein idas a piarder da **Platta** tochen **Sedrun**. Tgi che sa novas da quellas ei supplicaus da schar saver gerau Lucas Caveng a **Sedrun**

*Gasetta Romontscha nr. 38; 19 da settember 1879*

**1879**

### **Cadi**

Ils quens dil concursant Barclamiu Geromini a **Selva** ein da surdar agl ugau da massa, statalter Fidel Wenzin da leu.

*Gasetta Romontscha nr. 39; 26 da settember 1879*

**1879**

### **Neiv**

La jamna vargada ha ei en **Surselva** neviu giu tochen **Trun**, e las davosas alps han stuiu vegnir descargadas. Sils cuolms era ei nevada, e perquei ha la posta sull'**Alpsu** calau si avon l'entschatta d'october, ed ins ha giu gronda breigia da rabbitschar neu ils 29 e 30 da settember ils 60 – 70 caval, ch'ils ustiers dad **Ursera** vevan priu si a tscheins per la stad en **Surselva**. A **Tujetsch** ein 76 nuorsas vegnididas en ina lavina e ventschidas. Ils èrs che eran aunc buca medi dapertut els aults, han leu danovamein pitiu dalla neiv e purgina.

*Gasetta Romontscha nr. 40; 3 d'october 1879*

**1879**

A **Tujetsch** restau anavos dalla zavrada tiella suprastonza.

1) In tschanc ner, ina furcletta osum ed ina ruosna per ureglia.

2) In tschanc ner, dretga dus snezs davon en.

3) In tschanc ner, dretga giudasum, ina furcletta ed in snez davon e davos en, seniastra giudasum e scursalau davos en.

4) In'alva cun corna, dretga giudasum e fess, seniastra dus snezs davon en.

5) In tschanc ner cun corns, dretga giudasum, ina ruosna e furcletta davos en, seniastra giudasum.

6) e 7) Duas nuorsas neras, dretga giudasum, ina furcletta davon en ed in snez davos en, seniastra la medema noda.

*Gasetta Romontscha nr. 40; 3 d'october 1879*

**1879**

**Cadi**

Essend concediu in beneficium inventari als artavels da Sepa Monn, nata Wenzin, dueien tuts quens da quella e da siu mariu Rest Monn veginr dai en ad assistent Schmed, tuts da **Tujetsch**.

*Gasetta Romontscha nr. 40; 3 d'october 1879*

**1879**

Sin quels miserabels prezis dils stiarls pudess ins tuttina dumandar si **Tujetsch** ni **Medel**, nua ch'ei vegn a proporziun tratg ils pli biars stiarls, schebein ei fussi buca pli profiteivel da trer empau pli paucs e buca surcargar las alps e pastiras, mo persuenter buca cumprar ina tala massa pieun e caschiel jester? Quei patratg ei vegnius tscheidiatsch, cu ins udeva las schliatas novas da **Ligiaun** e veseva el medem temps in marcadont jester da pieun e caschiel, che mava en crotscha a **Medel** ed in vitturin tuatschin, che semudergiava dad ir a casa cun ina carga pieun e caschiel jester. Denton maniava in marcadont da stiarls, ch'il pli radical remedii encunter il consumar ton pieun e caschiel fussi – piglei buca tema stimadas lecturas – da scumandar il caffè. Basta, sur quei tema naziunal-economic lein nus arver la discussiun pli tard.

*Gasetta Romontscha nr. 42; 17 d'october 1879*

**1879**

**Tiers jasters**

A **Tujetsch** tier la suprastonza ina nuorsa pigrera (*bergamasca*) alva, dretga in snez davos en entraviers.

*Gasetta Romontscha nr. 42; 17 d'october 1879*

**1879**

**Annunzia da mort**

En profunda tristezia notifichein nus a nos parents ed enconuschents, ch'ei hagi plaschiu agl Altissim da clamar ord questa veta, speronza tier ina megliera veta nies sur frar ed augsegner

**Igl aultreveriu**

**signur pader Sigisbert Beer OSR**

El ei morts ils 17 d'october a **Perouse (Frontscha)** en ina vegliadetgna da 58 onns.

Recumandond l'olma dil car defunct alla pia memoria da tuts nos enconuschents, signescha en num da tut ils contrastai parents

Hans Giachen Beer, frar

**Sedrun**, ils 23 d'october 1879

*Gasetta Romontscha nr. 43; 24 d'october 1879*

**1879**

Dus ni treis schinumnai „Schweizers“ che han da gidar a perver, vegn ei encuretg per ina possessiun en **Baviera**, umens da 18 – 35 onns. Els han cuost e quatier e lura aunc 6 marcs (7.50 frs.) pagaglia per jamna. Aspirants per quellas plazzas dueien ton pli spert s'adressar tier

Gion Antoni Monn, il giuven a **Sedrun**

*Gasetta Romontscha nr. 44; 31 d'october 1879*

**1879**

A **Tschamut** tier Gion Antoni Schmet sesanflan 13 nuorsas jastras cun sequentas nodas:

- 1) Dretga giudasum, seniastra in mugrin davos en.
- 2) Noda sco sura.
- 3) Noda sco sura, dapli ella seniastra fildirom mellen.
- 4) Dretga furcletta davon en e fess, seniastra snez davon en e duas furclettes davos en.
- 5) Dretga giudasum e snez davos en, seniastra mugrin.
- 6) Dretga furcletta osum, ina davon en, snez davos en, seniastra scursalau davon ora, furcletta quadra davon en, in snez davos en e titgira verda.
- 7) Dretg furcletta quadra davon en, seniastra furcletta quadra e dus snezs davon en.
- 8) Dretg scursalau davos ora si, snez davos en e furcletta quadra davon en, seniastra furcletta quadra davon en e titgira cotschna si dies.
- 9) Dretga dus snezs davos en, seniastra furcletta quadra davon en.
- 10) Dretga in snez davos en e furcletta davon en, seniastra ina furcletta davon en.
- 11) Dretga furcletta osum, ina davon en, e snez entraviers davos en. Seniastra furcletta quadra davon en.
- 12) Dretga giudasum ed ina furcletta fuorma da vinchel e snez davon en, seniastra mugrin davos en.
- 13) Dretga giudasum sco tut l'ureglia, seniastra giudasum fetg ed ina gronda furcletta davos en.  
Las biaras han aunc barschau sil nas.

*Gasetta Romontscha nr. 44; 31 d'october 1879*

**1879**

Enstagl da giuviars ei quels dis vegniu instradau ina truppa dalla **Cadi** sull'**Alpsu** per la fiera dad **Altorf** dils 5 e 6 d.q.

*Gasetta Romontscha nr. 45; 7 da november 1879*

**1879**

Il suittascret fa cheutras da saver ch'ils „Schweizers“ per la **Baviera** seigien schon pladi.

Gion Antoni Monn a **Sedrun**

*Gasetta Romontscha nr. 45; 7 da november 1879*

**1879**

Sis cauras ein fugidas neu dad **Ursera**, ellas eran cumpradas ed han differentas nodas, 5 han denter auter ell'ureglia seniastra in snez davon enagiu entraviers e la sisavla, nera, ha giu miez l'ureglia seniastra. Denter las empremas ei ina gaglia, ina nera muota, ina cotschna cun tgiern uiersch, ina che tila sil grisch ed ina nera cun alv da mintga maun. Tgi che sa novas ei supplicaus da schar saver Martin Peder a **Tschamut**.

*Gasetta Romontscha nr. 45; 7 da november 1879*

**1879**

**Tiers jasters**

A **Sedrun** tier Sep Antoni Gampon ina ansola cotschna, dretga giudasum e fess e dus snezs davos en.

*Gasetta Romontscha nr. 46; 14 da november 1879*

**1879**

A **Sedrun** tier Sep Antoni Gampon ina ansola nera, dretga giudasum, fess ed ina furcletta davos en.

*Gasetta Romontscha nr. 47; 21 da november 1879*

**1879**

**Tiers jasters**

A **Bugnei** tier Gion Antoni Curschellas ina ansola nera, ureglia dretga scurselau davon ora, seniastra furcletta e snez tut davon ora.

*Gasetta Romontscha nr. 48; 28 da november 1879*

**1879**

**Cadi**

A Maria Ursula Gieriet a **Rueras** ei dau Gion Antoni Beer a **Camischolas** sco ugau.  
*Gasetta Romontscha nr. 50; 12 da decembre 1879*

**1880**

**Clom d'emigraziun**

D'emigrar ell'**America** ein intenziunai Giachen Franzestg Berther, cun sia famiglia e Condrai Anton Derungs, cun dunna ed affons, omisdus da **Rueras**, sco retschevider da quens ei numnaus assistent J. Antoni Schmit da **Sedrun**; pli il giuven Gion Giusep Giossi da **Bugnei**, che ha Sep Antoni Deragisch sco retschevider da quens; pli la giuvna Barbla Cathrina Geriet da **Rueras**, che ha gerau Stoffel Riedi da **Rueras** sco retschevider da quens. Tgi che ha quens cun ils sura numani emigrants duei dar en quels als sura retscheviders da quens el termin da 3 jamnas.

**Mustér**, ils 12 da schaner 1880

Igl Uffeci circuital dalla **Cadi**

Fegl Ufficial nr. 3 dils 16 da schaner 1880

**1880**

Il suttascret fa cheutras da saver, ch'el seigi intenziunaus dad ir ell'**America** per la secunda ga e tgi che ha quen encunter el duei dar en el termin da 3 jamnas.

**Hans Tujetsch**

*Gasetta Romontscha nr. 5; 30 da schaner 1880*

**1880**

Ina possessiun per in pur ei venala a **Rueras**, **Tujetsch**, consistenta ord:

- 1) ina mesa casa, clavau, truaisch ed iert, dasperas
  - 2) 2750 tschuncheismas prau grass a **Dieni** cun dus maghers,
  - 3) 1200 tschuncheismas prau a **Flurin Dadens** cun in toc magher, che sepeglia vid il grass.
- Quellas duas aclas schaian mo 5 minutias sul vitg da **Rueras**.

3) in bien mises.

Ulteriur sclariment dat Toni Derungs a **Rueras**.

*Gasetta Romontscha nr. 6; 6 da fevrier 1880*

**1880**

**Cadi**

Pils suandonts emigrants da **Tujetsch** ei vegniu numnau sequents retscheviders da quen da leu:

- 1) assistent Schmet per las famiglias emigrantas da Giachen Franzestg Berther e da Condrai Anton Derungs.
- 2) Sep Antoni Deragisch per Gion Giusep Giossi
- 3) gerau Stoffel Riedi per Barla Catrina Geriet

Gion Paul Riedi da **Tschamut** e fargliuns Duri e Barla Cresenzia Schmid a **Sedrun** laian ir scussiun, sco retscheviders da quens ein pigl emprem assistent Schmet a **Sedrun** e pils secunds gerau Bruno Soliva a **Sedrun**.

*Gasetta Romontscha nr. 6; 6 da fevrier 1880*

**1880**

(Tarmess tier) Ils 6 d.q. ei igl aultreveriu signur Vigeli Wenzin da **Tujetsch**, il senior dil clerus dalla diocesa **Cuera**, vegnius surdaus al ruaus dalla fossa. Il defunct ei spartius ils 4 da quest (*fevrier*) ell'autla vegliadetgna dad 87 onns e 10 meins, suenter ina dolorusa malsogna da 15 dis, la quala el ha surpurtau cun tutta pazienza e resignaziun.

Naschius a **Tujetsch** ils 3 d'avrel 1792, ha il defunct fatg siu gimnasium e liceum ella venerabla claustra da **Mustér**, sedecidius da leger ora il stan spiritual, ha el entschiet il studium dalla teologia tier igl erudit sur decan Hitz, da gliez temps farrer a **Sedrun**, e lura finiu quel el seminari clerical a **Cuera**. Ils 17 d'octobre 1817 eis el vegnius benedius ora sco spiritual,

beingleiti suenter tarmess da ses superiurs a **Razen**, all'entschatta sco provisur, e suenter eis el dalla pleiv vegnius legius ora sco farrer. Sco fideivel e nunstunclenteivel pastur dallas olmas ha el pastorau cheu 36 onns, aschiditg sco sias forzas corporalas han ad el quei lubiu. Sco farrer a **Razen** era sur Wenzin respectaus e carezaus, e quei aschibein da sia entira pleiv sco era da ses signurs confrars, ils quals han legiu ora el sco secretari da lur capetel, enten il qual uffeci el ha funcziunau 32 onns. Essend la pastoraziun dalla gronda pleiv a **Razen** vegnida memia greva per sia avanzada vegliadetgna, ha el resignau quella ed ei seretratgs en sia vischnaunca nativa a **Tujetsch** e surviu a **Sedrun** ed a **Rueras** sco caplon entochen 1867. Havend el cheu piars totalmein sia vesida, eis el staus necessitaus da dar giu la caplania e seretrer anavos sin sia possessiun el pign vischinadi da **Bugnei**, nua ch'el ei aunc vivius 13 onns. Per sia gronda consolaziun ha el cheu aunc mintgadi saviu celebrar la s. messa, e quei entochen tier sia davosa malsogna. Era aunc en sia retratgadad a **Bugnei** ha sur Wenzin prestau bia buns survetschs a ses vischins. Entras sia gronda experienza era el el cass da gidar cun plaid e cussegli tut tgi che vegneva tier el, ed igl ei aschia buca da sesmarvegliar, che l'entira vischnaunca ha dau al venerabel defunct la davosa honur cun cumpignar el tiel ruaus dalla fossa. E nus tuts clamein suenter al defunct: «sin seveser ella perpetnadad». R.I.P.

*Gasetta Romontscha nr. 7; 13 da fevrier 1880*

## 1880

### **Annunzia da mort**

En profunda tristezia, notifichein nus a nos parents ed enconuschents, ch'ei hagi plaschiu agl Altissim da clamar tiella veta perpetna nies car augsegner

### **igl aultreveriu sur Vigieli Venzin**

Provedius cun tuts s. sacraments e perduns dils moribunds eis el spartius ils 4 da quest suenter ina dolorusa malsogna da 15 dis ell'aulta vegliadetgna dad 87 onns e 10 meins.

Nus recumandein sia olma alla pia memoria da tuts parents ed enconuschents.

M. Dumenia Venzin, niazza

Gion Rest Caduff, nevs

**Tujetsch**, ils 10 da schaner 1880

*Gasetta Romontscha nr. 7; 13 da fevrier 1880*

## 1880

Ils signurs Georg Antoni Casutt e Johann **Tujetsch da Falera**, ch'ein stai inaga ell'**America**, vegnan a partir ils 24 da fevrier naven da **Cuera**, ed ils 28 da fevrier naven da **Havre** per serender a **New York** cul magnific vapur postal franzos «Amerique».

*Gasetta Romontscha nr. 7; 13 da fevrier 1880*

## 1880

Sche nus havein cun caschun dalla schliata fiera da **Ligiaun** digl atun vargau giu selubiu da cussegliar als da **Tujetsch** da trer empau pli pauc vadials e persuenter cumprar negin pieun e caschiel jester, sche legr'ei ussa nus da saver notificar, ch'ei vegni ussa ella capitala da quella vallada, nua ch'ei flessegia rehamein latg e mèl, construiu in local per ina communabla cascharia. Amaturs dil delicius magnuc caura tuatschin fagein nus attents, ch'en quella cascharia vegni la stad fatg magnuc caura, che vegn ad haver bien esit.

*Gasetta Romontscha nr. 12; 19 da mars 1880*

## 1880

### **Annunzia da mort**

En profunda tristezia fagein nus cheutras da saver a nos stimai parents ed enconuschents, ch'ei hagi plaschiu agl Altissim da clamar naven da quest mund tiella veta perpetna nies car frar ed aug

**Rudolf Wenzin (\*7-12-1840)**

El ei spartius ils 3 d.q. suenter ina malsogna da mo 4 dis, provedius culs ss. sacraments dils moribunds en ina vegliadetgna da 38 onns.

Nus recumandein sia olma alla pia memoria da tuts nos parents ed enconuschents.

Ils combrigiai fargliuns:  
Onna Maria Condrau-Wenzin  
Fausta Muggli-Wenzin  
Ulrich Baptista Wenzin  
Era en num dils nevs e niazas.  
**Tujetsch-Mustér**, ils 6 d'avrel 1880  
*Gasetta Romontscha nr. 15; 9 d'avrel 1880*

## 1880

La piazza da dazier cantunal a **Tschamut** cun 100 frs. paga, la quala sa vegrir alzada, sch'il traffic sull'**Alpsu** crescha tras la viafier gottardista, ei scrett'ora en concurrenza. Aspirants ston dar en sillia fin da quest meins alla administraziun dallas finanzas cantunalas.

*Gasetta Romontscha nr. 17; 23 d'avrel 1880*

## 1880

### Cadi

Vieua Barla Sievi da **Bugnei (Tujetsch)** ei libra dad ugau.  
*Gasetta Romontscha nr. 17; 23 d'avrel 1880*

## 1880

Era gl'aut pass dalla **Bernina** ei cun pintga breigia vegnius fatgs carregiabels ils 6 da matg. Cun 50 frs. vegness era il pass dall'**Alpsu** aviarts da nies maun.

*Gasetta Romontscha nr. 20; 14 da matg 1880*

## 1880

Ils 18 d.q. ei il stradun sull'**Alpsu** vegnius aviarts per carrs e crotschas.

*Gasetta Romontscha nr. 21; 21 da matg 1880*

## 1880

### Annunzia da mort

En profunda tristezia notifichein nus cheutras a nos parents ed enconuschents, ch'ei hagi plaschiu agl Altissim da clamar tiella veta perpetna nies car mariu, bab e frar

**Gion Antoni Beer** (\*28-3-1826)

El ei spartius ils 8 d.q. suenter ina liunga malsogna en ses 54 onns ed in meins, provedius cun tutt s. sacraments dils moribunds.

Nus recumandein l'olma dil car defunct alla pia memoria da parents ed enconuschents.

Turtè Beer, nata Monn, consorta

Rest Valentin Beer e Gion Bistgaun Beer, fegls,

Barla Beer, sora.

**Tujetsch**, ils 24 da matg 1880

*Gasetta Romontscha nr. 22; 29 da matg 1880*

## 1880

In terschiel cun la noda T ed ina fuortga ei vegnius piars denter **Mustér** e **Tujetsch** la davosa fiera a **Mustér**. Igl anflader ei supplicaus da remetter el a **Camischolas** tier Paul Schmet, ni ella Cruna a **Mustér**.

*Gasetta Romontscha nr. 22; 29 da matg 1880*

## 1880

Per cuntentar las reclamaziuns ed ils differents interess dalla **Surselva** ha il departement postal concediu a quella tiella posta dall'**Alpsu** aunc dus cuors locals. La posta dall'**Alpsu** va naven da **Cuera** las 4 e 35 min dalla damaun, gentar a **Mustér** ed arriva las 6 dalla sera ad **Ursera**; en siu retuorn vegn ella las 10 e mesa avonmiezdi a **Mustér** ed arriva a **Cuera** las 6 e 20 min dalla sera. Il cuors local denter **Cuera** e **Mustér** va las 10 e mesa avonmiezdi naven da **Cuera**, vegn a **Mustér** las 7 e 15 min dalla sera, la damaun allas 5 parta quella posta da **Mustér** ed ei allas 12 e

20 min da miezdi a **Cuera**. ...

*Gasetta Romontscha nr. 23; 4 da zercladur 1880*

**1880**

**Cadi**

1) Josef Anton Schnoz da **Tschamut** retscheiva ils quens dil defunct Martin Riedi da leu ed ei el medem temps numnaus ugau dils quater affons minorens da quel.

2) Giachen Antoni Berther a **Camischolas** ei retschevider da quens pil defunct Crest Valentin Beer da **Tujetsch** ed ugau dils affons dalla dunna da quel Turtè Beer, nata Monn, e da ses affons minorens.

*Gasetta Romontscha nr. 23; 4 da zercladur 1880*

**1880**

**Manteniment dallas vias**

Discussiun generala el Cussegl grond sur il niev project per manteniment dallas vias. Il paragraf 3 sulla cunfinaziun dils pass alpins dallas vias da communicaziun: **Alpsu, Lucmagn, Albula, Bernina, Fuorn e Flüela** ha dau bia da far e cun 31 vusch encunter 30 ei sin proposiziun da Peterelli e Manatschal stabiliu, che per regla duei vegnir considerau, ch'il pass alpin sestendi mo dalla davosa vischnaunca da quest maun dil cuolm tochen tier l'emprema vischnaunca da tschei maun dil cuolm.

Condrau ha garegiau, ch'ei duei vegnir quintau, ch'ils pass **Alpsu** e **Lucmagn** entscheivien buca per a **Sedrun** e **Platta**, mobein el vitg da **Mustér** e quei tenor cunvenziun fatga cul cantun 1861. Il Cantun hagi quasi sfurzau si a **Mustér** e **Tujetsch** la strada dall'**Alpsu** e sulettamein garegiau, che quellas duas vischnauncas surprendien l'expropriaziun, il dar il material, menar la gera, mo ussa vegli ins far surprender ellas gl'entir manteniment. Ella cunvenziun dil cantun, serrada giu culla Confederaziun, hagi il Cussegl grond claramein declarau da surprender il manteniment naven dil vitg da **Mustér** tochen sils cunfins uranès. Per far la segira hagi la vischnaunca da **Tujetsch** aunc giu fatg dar il cumissari guvernativ in agen revers, ch'ella seigi mai e pli mai obligada da purtar pli grondas grevezias pil manteniment dalla strada dall'**Alpsu** ed ussa duei tut vegnir fieri dad ina vart. 1840 hagi **Tujetsch** dau en cullas outras vischnauncas sursilvanas sia scartira da mantener la via nova e garegiau che quella vegni baghegiada tochen **Rueras**, mo la cumissiun cantunala hagi 1841 declarau, che la strada sursilvana mondi mo tochen **Mustér**. Uss denton veglien ins far ir ella tochen **Sedrun** e quei en contradicziun cun cunvenziuns cul Cussegl Grond e culla Confederaziun. Quei seigi in agen dretg statistic, che la dertgira federala vegni ualvess ad approbar pil cass d'in recuors. Dad aunc far mantener **Mustér** la strada dall'**Alpsu** tochen sils cunfins da **Tujetsch** e quella dil **Lucmagn** entochen la punt sper l'uniun dil **Reinsu** e **Reimiez**, vegni ei cargau si a quella vischnaunca il manteniment d'ina tenda vias ella lunghezia dad endisch kilometers! Cheu encunter ei vegniu allegau, ch'ins hagi a siu temps concediu memia bia a quellas duas vischnauncas, ins stoppi tractar ellas sco las otras, da **Mustér** a **Sedrun** seigi negin cuolm, mobein ina biala vallada. Il davos ei vegniu, che la strada dil **Lucmagn** duei il cantun muort siu difficultus terren mantener naven dil vitg **Mustér**, l'**Alpsu** denton per naven da **Sedrun**.

*Gasetta Romontscha nr. 24; 11 da zercladur 1880*

**1880**

Il niev project stabilisescha che tiels pass alpins dallas stradas da communicaziun, hagien las vischnauncas territorialas da prestar l'expropriaziun, schar prender il material, menar la gera e dar ils necessaris umens per gidar a rumper via ni nua che la communicaziun vegni interrutta en cass extraordinaris. Gl'ulteriur manteniment ha il cantun.

*Gasetta Romontscha nr. 24; 11 da zercladur 1880*

**1880**

Sil marcau da **Glion** dils 7 d.q. (*zercladur*) ei cumpariu negins marcadonts tudestgs da sutsi e muort la pintga tscherca ein ils prezis dalla biestga sbassai considerablamein. Quei ha lu

animau ils marcadonts da **Tujetsch** e **Medel** da cumprar si roschada armauls. Era ils pors eran quella ga bienmarcau. Sin quei fuva ei da preveder, che la fiera da **Tujetsch (Sedrun)** dils 8 d.q. (*zercladur*) vegni ad haver pintga vivacitad. Auters onns vegneva cheu vendiu in grond diember cauras per bials prezis, mo uonn pagavan quellas mo 18 – 20 frs. – Il negozi da nuorsas ei uonn era buca staus schi viva sco auters onns, nuotatonmeins han ellas pagau andants prezis.

*Gasetta Romontscha nr. 24; 11 da zercladur 1880*

## 1880

Ina bancnota da 20 frs., probabel zugliada en ina brev, ei vegnida piarsa denter **Tujetsch** e **Cumpadials**. Il recla anflader ei supplicaus da metter amauns quella alla stamparia a **Mustér**.

*Gasetta Romontscha nr. 27; 1. da fenadur 1880*

## 1880

### America

In emigrau Tuatschin, che sesanfla gia varga diesch onns ell'**America**, ha dacuort notificau a nus, ch'ei seigi tras la Ligia Grischa da **Stillwater**, vegniu fundau ina nova colonia cul num **Badus** el territori da **Dakota**. Scadin commember dall'unioon grischuna ha stuiu pagar 15 dollars daner d'entrada e lu aunc in dollar per meins pil cuoz da 15 onns. Cun quels mettels han ins acquistau in adattau plaz per secollocar leu tuts ensemble. Quel ei vegnius anflaus ellas preras da **Dakota (dil Sid)**, 300 miglias el vest da **Stillwater**. Il mars 1879 ei lu setratg leu ina gronda partida, che ha entschiet a baghegiar casas amiez ils praus entuorn in lag. Igl ei cheu ranschau en in'ustria, ina stizun ed ina posta jamnila. **Badus** sesanfla denter duas novas viasfier en, ella distanza da treis tochen tschun uras. Las casas ein baghegiadas si cun aissas e biaras mo da tschespets, ch'ein leu fetg qualificai per material da baghegiar. En munconza da lenna vegn ei barschau fein e cotbla da crap. Igl ei vegniu construiu ina casa da scola, che survescha ad interim era per baselgia inagada il meins. Il liug **Badus** s'ingrondescha di per di e la Ligia Grischa ei renconuschida sco corporaziun, che ha ils dretgs da vender e cumprar tiara. Ils gronds e bials èrs han leu stupenta pareta. Possi il **Badus** american crescher e flurir pli e pli!

*Gasetta Romontscha nr. 31; 29 da fenadur 1880*

## 1880

Dumengia vargada ha monsignur uestg benediu ora dus novs spirituals grischuns: signur Fidel Deflorin da **Mustér** e signur Thomas Berther da **Tujetsch**.

*Gasetta Romontscha nr. 32; 6 d'uost 1880*

## 1880

In botsch entir giuven sesanfla tier il pender (*pindrer*) Giusep Antoni Gamboni a **Sedrun**. Quel ei da colur nera e da sequenta noda: Ureglia senistra duas ruosnas ed in snez davos en en tiel tgau. Il proprietari duei ton pli spert vegnir per el e bonificar las spesas.

*Gasetta Romontscha nr. 32; 6 d'uost 1880*

## 1880

Cun gronda solemnidad e bialas significantas decoraziuns ei ils 8 e 15 d.q. vegniu celebrau messa nuviala a **Mustér** e **Tujetsch** (*sur Tumaisch Giusep Berther 1853-1931*).

*Gasetta Romontscha nr. 34; 19 d'uost 1880*

## 1880

### Annunzia da mort

Cun profunda dolur fagein nus cheutras da saver a parents ed enconuschents, ch'ei hagi plaschiu agl Altissim da clamar ord questa veta speranza tier ina megliera nies car mariu e bab **Paul Schmid** (\*25-1-1812)

suenter ina liunga e dolorusa malsogna, provedius cun tuts ils ss. sacraments dils moribunds ils 13 d.q. en ina vegliadetgna da 69 onns e miez.

Nus recumandein il preziau defunct alla pia memoria da tuts nos parents ed enconuschents.  
La combrigiada famiglia:

M. Agata Schmid, nat. Deflorin, consorta  
Jacob Antoni, Paul, Vigeli e Barla, affons  
**Camischolas**, ils 19 d'uost 1880

*Gasetta Romontscha nr. 35; 26 d'uost 1880*

### 1880

Ina bajonetta ei veginida piarsa denter **Glion** e **Trun**; gl'anflader ei supplicaus da schar saver  
Vigeli Monn a **Sedrun**.

*Gasetta Romontscha nr. 35; 26 d'uost 1880*

### 1880

#### Dieschma

En ina questiun denter ils vischins e la vischnaunca da **Tujetsch** pervia dil modus co cumprar  
ora la dieschma, fatga pendenta tiel Cussegl Pign, ei president districtual Tuor a **Rabius** eligius  
sco cumissari guovernativ.

*Gasetta Romontscha nr. 36; 2 da settember 1880*

### 1880

L'annunzia da mort cuntenida en quest numer fa puspei endamen a nus il vegl proverbi: amiez  
la veta la mort seschluetta. Sauns e fretgs ha Gion Antoni Deragisch a **Sedrun** assistiu ils 9  
d'october allas funcziuns ed oraziuns fatgas leu quei di en sufragi da sia quinada morta a  
**Stillwater ell'America**; el tuorna lu a casa, mida vestgadira e va tiella lavour sils funs,  
cumpignaus dad in affon da 3 onns e miez. Havend el purtau il secund buordi risdiv, sesa el giu  
e sederscha tutteninaga. Gl'affon peglia tema, cuora tier las proximas casas, bragia e di: il bab ei  
sederschius e morts. E leider han ins anflau quel morts. R.I.P.

*Gasetta Romontscha nr. 43; 21 d'october 1880*

### 1880

#### Annunzia da mort

En profunda tristezia notifichein nus a nos parents, amitgs ed enconuschents, ch'ei hagi  
plaschiu al Tutpuscent da clamar tut anetgamein ella perpetnadad nies premurau e carezau  
mariu, bab e nevs

**Gion Antoni Deragisch a Sedrun** (\*8-10-1823)

El ei spartius dalla mort anetga ils 9 d'october en ina vegliadetgna da 57 onns.

Nus recumandein l'olma e la famiglia dil car defunct alla pia memoria e beinvulentscha da  
parents ed amitgs.

Onna Maria Deragisch, nata Beer, consorta  
er'en num da ses 7 affons, orfans.

Johann Sebastian Beer, aug

**Tujetsch e Zignau**, ils 14 d'october 1880

*Gasetta Romontscha nr. 43; 21 d'october 1880*

### 1880

#### Annunzia da mort

Cun profunda dolur notifichein nus cheutras a nos parents ed amitgs, ch'ei hagi plaschiu agl  
Altissim da clamar tier la veta celestiala nossa carissima consorta, mumma, quinada ed onda  
**Onna Maria Deragisch, nata Monn** (\*2-9-1814)

Ella ei spartida ils 3 da settember suenter ina malsogna da treis dis, provedida culs confierts da  
nossa religiun en ina vegliadetgna da 66 onns.

Recumandond nossa carezada defuncta alla pia memoria da nos enconuschents, signescha en  
num dalla parentella

il combrigiau mariu:

Gion Benedetg Deragisch

**Stillwater, Minnesota, Nordamerica**, ils 5 da settember 1880

*Gasetta Romontscha nr. 41; 7 d'october 1880*

**1880**

Signur Thomas Berther da **Tujetsch**, che ha fatg messa nuviala questa stad, ei numnaus prefect el seminari clerical da s. Leci.

*Gasetta Romontscha nr. 47; 18 da november 1880*

**1880**

La tiarza fiera da **Ligiaun** duei era esser ida mal per munconza da cumpraders. Sco raritad remarchein nus aunc, che malgrad ils bass prezis, hagi Tumaisch Monn da **Tujetsch** vendiu in stupent stierl da siu tratg per 190 frs., ferton ch'ei era il di avon vegniu vendiu in bov, in mutg da dus onns, per 60 frs. Tgei letga da tiers!

*Gasetta Romontscha nr. 49; 2 da december 1880*

**1880**

**Tiers jasters**

A **Sedrun** tier Giachen Giusep Jagmet ina tgigisch alva, ureglia dretga ina furcletta davos en, senistra in mugrin davon en.

*Gasetta Romontscha nr. 50; 9 da december 1880*

**1880**

**Cadi**

Assistent Jacob Schmed retscheiva ils quens dil concursant Josf Antoni Beer a **Gonda, Tujetsch**.

*Gasetta Romontscha nr. 50; 9 da december 1880*

**1880**

Enstagl d'ina ferdaglia da 20 grads sco onn, ha l'emprema terzina dil december cuntuau culla stad s. Martin dalla secunda mesadaad november. Ei era stupents dis suleglivs, la damaun sil pli in ni dus grads freid e da miezdi cauld e bien. Ils tiers manedels, che pasculavan gl'entir di ora, han spargnau bia fein, aschia che quel ei uonn bienmarcau. Per midar nuegl sin plauncas era ei denton pli malsegir, che da neiv, ed ella **Cadi** han cheutras plirs armauls piars la veta. Ad in beinstont pur da **Sumvitg** ein enten midar nuegl e passar sur in glatsch sgargliau sias duas principales vaccas idas surengiu, a **Mustér** ei era ruclau ina ed en **Tujetsch** duas.

*Gasetta Romontscha nr. 51; 16 da december 1880*

**1880**

**Tiers jasters**

A **Sedrun** tier Alois Jagmet ina tgigisch nera, ureglia dretga scurselau davon ora ed ina ruosna, senistra in snez davonenagiu.

*Gasetta Romontscha nr. 51; 16 da december 1880*

**1880**

Venal 7 entochen 8 tschuncheismas fein grass, il qual ins sa trer ni meglier magliar ora leu. Da s'adressar tier Thumaisch Schmet a **Tujetsch-Cavorgia**.

*Gasetta Romontscha nr. 53; 30 da december 1880*

**1881**

**Cadi**

Gion Paul Berther ei ugau da Margreta Vallier, omisdus **Tujetsch**.

*Gasetta Romontscha nr. 3; 20 da schaner 1881*

**1881**

**Tujetsch** para dad esser la val dalla cucagna. Ferton ch'ils funs ein ils davos onns en consequenza dils sbassai prezis dalla biestga e da bia scussiuns quasi dapertut curdai en prezi, ei leu quels dis aunc vegniu vendiu entiras tschaveras prau per 3 frs. 40 ct. la tschuncheisma vedra (circa 4 meters quadrats).

*Gasetta Romontscha nr. 8; 24 da fevrier 1881*

**1881**

**Annunzia da mort**

En profunda tristezia communichein nus cheutras a nos parents ed enconuschents, ch'ei hagi plaschiu agl Altissim da clamar ord questa veta speronza tier ina megliera veta nies car mariu e bab

**Giusep Lorenz Schmid (\*10-8-1815)**

El ei spartius ils 19 da quest suenter ina cuorta mo dolorusa malsogna, provedius cun tuts ils ss. sacraments e perduns dils moribunds ella vegliadetgna da 65 ½ onns.

Nus recumandein sia olma alla pia memoria da tuts nos parents ed enconuschents.

La combrigiada consorta:

Margerta Cristgina Schmid-Degonda

Ils affons en malencurada:

Margreta Cristgina, Barla Turtè, M. Laurenzia e Giachen Antoni Schmid

**Sedrun**, ils 22 da fevrer 1881

*Gasetta Romontscha nr. 8; 24 da fevrer 1881*

**1881**

**Annunzia da mort**

Cun in cor plein dolur e tristezia notifichein nus cheutras a nos stimai parents, amitgs ed enconuschents, ch'ei hagi plaschiu als inscrutabels decrets digl Altissim da clamar ord quest mund, speronza tier ina megliera veta, nies preziau fegl, frar e quinau

**igl aultreveriu signur plevon**

**Maurus Desax**

**Plevon a Sedrun**

Suenter liunga malsogna eis el spartius dumengia, ils 20 d.q. (*mars*) allas 3 suentermiezdì, provedius cun tuttas consolaziuns da nossa s. religiun en ina vegliadetgna da 43 onns ed in meins.

Nus recumandein l'olma da nies carissim defunct alla pia memoria da tuts ses parents ed enconuschents datier e dalunsch.

**Tujetsch-Mustér**, ils 21 da mars 1881.

Ils geniturs en malencurada:

Christian Anton Desax

M. Ursula Desax, nata Rothmund

En num dils combrigiai fargliuns e quinaus

Johann Baptista Desax

*Gasetta Romontscha nr. 12; 23 da mars 1881*

**1881**

**Annunzia da mort**

Cun profunda dolur notifichein nus a nos parents ed enconuschents en **Surselva** e **Surmir**, ch'ei hagi plaschiu agl Altissim da clamar ord questa veta tiella veta perpetna nossa cara consorta e mumma

**Onna Maria Poltera, nata Frank**

Ell'ei spartida la sera dils 20 d.q. suenter ina cuorta malsogna, provedida cun tuts ils ss. sacraments e perduns dils moribunds ed ina vegliadetgna da 50 onns.

Nus recumandein l'olma da nossa cara defuncta alla pia memoria da tuts nos parents ed enconuschents.

Il combrigiau mariu:

Andreas Poltera, vier

era en num dils affons.

**Tujetsch**, ils 21 da mars 1881

*Gasetta Romontscha nr. 8; 24 da fevrer 1881*

**1881**

**Annunzia da mort**

A nos stimai parents ed enconuschents, purtein nus la tresta nova, ch'ei hagi plaschiu agl Altissim da clamar ord questa veta, tiella perpetna, nossa cara sora ed onda

### **Barla Catrina Beer**

Provedida cun tutts ils ss. sacraments e perduns dils moribunds eis ella suenter ina liunga malsogna en ina vegliadetgna da 56 onns e 10 meins, morta ils 31 da mars a Nossadunnaun, nua ch'ella era domiciliada dapi 36 onns.

Nus recumandein cheutras l'olma dalla cara defuncta alla pia memoria da nos parents ed enconuschents.

La parentella en malencurada

**Tujetsch**, ils 5 d'avrel 1881

*Gasetta Romontscha nr. 14; 7 d'avrel 1881*

### **1881**

La pleiv da **Tujetsch** ha unanimamein elegiu sco plevon signur Giachen Antoni Beer, caplon a **Sedrun**, ed ha surdau la caplania a signur Tumaisch Berther da **Rueras**, che banduna da Pastgas il seminar clerical.

*Gasetta Romontscha nr. 15; 11 d'avrel 1881*

### **1881**

Sperond ch'ils prezis dalla biestga sesaulzien gl'atun proxim, entscheivan ils marcadonts dalla fiera da **Ligiaun** a cumprar si stiarls e vadials. Il grond e beinvesiu Furrer d'**Ursera** ha la jamna vargada cumprou si mo ella vischnaunca da **Tujetsch** 115 stiarls e pagau 15 – 17 marenghins il pèr. Bravo!

*Gasetta Romontscha nr. 17; 28 d'avrel 1881*

### **1881**

#### **Cumin 1881**

Dertgira circuitala: Luregn Jacomet, **Tujetsch**; suppleant da mediatur: assistent Schmed; supplenat per la dertgira circuitala: Christian Muggli da **Tujetsch**

*Gasetta Romontscha nr. 18; 4 da matg 1881*

### **1881**

(Tarmess en) Als aultreveri signurs spirituals ed als signurs ugaus baselgia, che vulan metter tier paramenta ni vischala da baselgia, savein nus culla megliera perschuasiun recumandar il negozi da signur J. J. Deplazes (*Deplaz*) a **Regensburg** en **Baviera**. Quel ha ina gronda elecziun da tutt artechels, furnescha quels en biala lavour artistica ed el stil ecclesiastic e quei tut per fetg raschuneivels prezis. Quei signur ei nies cumpatriot, burgheis dalla vischnaunca da **Tujetsch**, e tier empustaziuns ord siu cantun nativ, pren el ton sco pusseivel particular risguard.

*Gasetta Romontscha nr. 20; 19 da matg 1881*

### **1881**

#### **L'ustria Rheinquelle a Tschamut**

ei da miez matg puspei vegnid'aviarta. Engraziond pella confidanza demussada encunter quella ils onns vargai, serecamonda danovamein ad in ludeivel publicum il proprietari da quella

Lucas Cavegn

*Gasetta Romontscha nr. 21; 25 da matg 1881*

### **1881**

L'**Alpsu** ei vegnida aviarta schon ils 28 da matg e da lu enneu ein schon pliras crotschas idas da **Cuera ad Ursera** cun jasters.

*Gasetta Romontscha nr. 22; 3 da zercladur 1881*

### **1881**

#### **Ina buis ei vegnida brattada giu**

tiella davosa inspecziun dallas armas a **Mustér**, ell'ustria dalla Cruna. La buis, ch'ei vegnida prida leu nave e che vegn cheutras reclamada, ha il numer 2137 dallas buis dil landwehr. Quel che ha brattau giu ei supplicaus da schar saver Cristian Valentin Monn a **Sedrun**.  
*Gasetta Romontscha nr. 22; 3 da zercladur 1881*

### 1881

Suppleant dalla dertgira districtuala: capitani Muggli da **Tujetsch**.  
*Gasetta Romontscha nr. 23; 9 da zercladur 1881*

### 1881

#### Resultat

Tenor ufficiala publicaziun ei il niev project pervia dil manteniment dallas vias vegnius refusaus cun 5810 encunter 5782, aschia cun ina majoritad da mo 28 vuschs.  
*Gasetta Romontscha nr. 25; 23 da zercladur 1881*

### 1881

Suenter in bien examen han treis gimnasiasts dalla scola cantunala ed il seminarist, Martin Berther a s. Leci da **Tujetsch**, obtenui gl'attestat da maturitat. Ils 9 d.q. vegn la scola cantunala serrada.

*Gasetta Romontscha nr. 27; 7 da fenadur 1881*

### 1881

Suenter haver fatg ina campagna sul **Pass Cunchels** per prender en la **Partsura Sogngaglièsa**, nua che plievgia e suffel han leider impidiu ils solits manevres, ein ils recruits a **Cuera** vegni relaschai. Ils Sursilvans eran fetg cuntents d'haver survegniu uonn la taxa montana per daner da viadi, aschia ch'ils Tuatschins han per quel obtenui circa 27 frs. enstagl mo 5 frs. Speronza che bein enqual spargnus recrut hagi aschia saviu purtar daners a casa. Deplorabel eis ei mo, che aschi bia recruits vulan tier la partenza sefa gronds cun haver in stumbel cigara en bucca. Tresta parada!

*Gasetta Romontscha nr. 27; 7 da fenadur 1881*

### 1881

Tenor conclus guvernativ duei uonn puspei vegnir teniu in diember referats da viadi ed entgins cuors per mussar la cultivaziun da legums (verduras). Ils referats tracteschan dall'economia dallas alps e dil latg, dalla tratga da biestga, dall'agricultura, cultivaziun da pumera, da cultems etc. ed ins ha el senn da schar tener quels a **Trin, Sagogn, Breil, Trun, Mustér, Sedrun, Tavanasa, Pitasch, Versomi, Razen, Urmein e Ziraun** ...

*Gasetta Romontscha nr. 31; 4 d'uost 1881*

### 1881

#### Annunzia da mort

Cun in cor plein dolur e tristezia notifichein nus a nos parents, amitgs ed enconuschents, ch'ei hagi plaschiu agl Altissim da clamar tier el nossa cara consorta e sora dunna **Anna Maria Condrau**, nata Muggli (\*25-3-1853)

Ella ei spartida suenter ina liunga malsogna, ils 3 da settember allas 8 ½ dalla sera, provedida cun tuts ils ss. sacraments e perduns dils moribunds ed ina vegliadetgna da 28 onns e 5 meins. Nus recumandein l'olma dalla carissima defuncta alla pia memoria da nos parents ed enconuschents e nus sezs a lur ulteriura beinvulentscha.

**Mustér**, ils 6 da settember 1881.

Per la parentella en malencurada:

Dr. Augustin Condrau, mariu

Cristian Muggli, frar

Rosina Cagenard, nata Muggli, sora

*Gasetta Romontscha nr. 36; 7 da settember 1881*

**1881**

A **Sedrun** tier Josef Antoni Gampon sesanfla ina ansola jastra mesalva, ureglia dretga osum ina furcletta, seniastra in snez da mintga maun ualtı osum entraviers giu. Il proprietari duei ton pli spert vegnir per ella.

*Gasetta Romontscha nr. 36; 7 da settember 1881*

**1881**

Ina caura nera jastra, ch'era schon gl'atun 1879 vegnida scetta ora sco ansola, mo buca vegnida amauns, vegn danovamin scetta ora. Ella ha ell'ureglia dretga in snez davos en, ella seniastra furcletta e snez davon en. Ulteriur sclariment dat ligiacudischs Emanuel Deragisch a **Sedrun**.

*Gasetta Romontscha nr. 36; 7 da settember 1881*

**1881**

**Uors**

En **Tujetsch** vulan ins haver fastitgs dad in uors che duei haver scarpau nuorsas en in per loghens. Quella vischernaunca ha vendiu uonn fein a pastg per circa 2000 francs.

*Gasetta Romontscha nr. 37; 15 da settember 1881*

**1881**

**Tiers jasters**

- 1) Ina ansola miez alva, ureglia dretga ina furcletta orasum ed in furcletta amiez l'ureglia davon ora.
- 2) Ina ansola cotschna, ureglia dretga giudasum ed in snez davon en, seniastra ina furcletta davos en amiez l'ureglia.
- 3) Ina ansola nera, cun ina spatla alva, dretga giudasum, dus snezs davos en, seniastra ina ruosna.

Ils proprietaris dueien retrer quels treis tiers jasters ton pli gleiti tier il pender (*pindrer*) Sep Antoni Gamponi a **Sedrun**.

*Gasetta Romontscha nr. 38; 22 da settember 1881*

**1881**

En rectificazion dil davos numer da nossa gasetta relatein nus posteriuramein, ch'ils Glarunès seigien serendi sul cuolm **Pigniu e Lucmagn** cun pliras roschas biestga per la fiera da **Ligiaun**, resp. **Giubiasco**, essend ch'els passan buc il **Monte-Ceneri** cun lur vaccas. Persuenter eis ei uonn iu zun negina biestga glarunèsa sul **S. Bernardin**. Ils marcadonts da **Tujetsch e Medel** han giu uonn gronda furtina d'empruar lur fortuna ed ein gia semess sin via ils 19 d.q. A **Giubiasco**, nua ch'ei paga per ordinari il meglier, han ei uonn vendiu pauca biestga ed han lura instradau lur roschas per **Ligiaun**.

*Gasetta Romontscha nr. 39; 29 da settember 1881*

**1881**

La fiera da **Ligiaun** ei ida mal, schegie che negin seregora, ch'ei seigi iu sul **Monte-Ceneri** schi pauca biestga sco uonn. Il mender ei stau, ch'igl ei sin via rut ora la zoppina en ina roscha da **Tujetsch**, che negin sa co igl ei iu tier. Quella ei lu vegnida serrada giu damaneivel da **Ligiaun**. Per ventira ei la malsogna buca seresada pli lunsch, mo la tema che quei savessi daventar, ha fatg dar giu ils tiers pli bienmarcau. A **Sebiastg** era aunc vegniu vendiu stiarls per andants prezis; il meglier pagavan leu las grondas e bialas vaccas glarunèsas, fittaders han pagau per quellas tochen 50 marenghins il pèr ed aunc dapli, ferton che las mugias pagavien a proporziun mender. Ils purs talians vevien stuiu vender lur biestga gronda bienmarcau e levien a **Ligiaun** pagar pauc pils stiarls. Il davos seigi vegniu vendiu mo per 8 - 9 marenghins il pèr. Entgins marcadonts ein vargai giu per buca dar giu schi bienmarcau.

*Gasetta Romontscha nr. 40; 6 d'october 1881*

**1881**

La nova fiera d'**Ursera**, nua ch'ei fuva era vegniu catschau biestga da **Mustér, Tujetsch e**

**Medel**, ei stada fetg viva, mo ils prezis erien permiezvi. Cull'avertura dalla viafier gottardista han ins speronza da survegnir ad **Ursera** ina gronda fiera centrala pil commers da biestga denter l'**Italia** e la **Svizra**.

*Gasetta Romontscha nr. 41; 13 d'october 1881*

## 1881

### Tiers jasters

Nuorsas vanzadas dalla zavrada a **Tujetsch** che sesanflan tier statalter Gion Paul Berther:

- 1) In anugl alv, ureglia dretga fess ed in snez davos en, seniastra in snez davos en.
- 2) Ina nera, dretga in mugrin davon en ed in snez davos en, seniastra fess ed in snez davon en entraviers.
- 3) Ina nera, dretga giudasum e fess ed in snez davos en, seniastra in snez davos en.
- 4) Ina alva, dretga in «M» osum, seniastra il medem ed aunc tagliau giu in péz digl «M».
- 5) Dapli aunc ina alva cun corns cun la medema noda.
- 6) Ina alva, dretga scurselau davos orasi, ina furcletta ed in snez davon en, seniastra ina furcletta davon en ed in snez davos en.
- 7) Ina nera, dretga giudasum ed ina furcletta davon en, seniastra fess ed in snez davos en entraviers ed in davon en.
- 8) Ina nera cul tgau alv, dretga scurselau davon orasi ed in snez davon en, seniastra treis snezs davon en entraviers e colur cotschna.
- 9) Ina nera cun tschut, dretga ina furcletta davos en ed ina ruosna.
- 10) Ina alva, dretga in mugrin davon en e dus snezs davos en, seniastra in snez davon en entraviers.
- 11) In ner cun corns, dretga fess, seniastra dus snezs davos en entaveirs.
- 12) In ner cun corns, dretga giudasum ed in snez davos en ed ina furcletta davon en.
- 13) In alv, dretga in snez davon en ed in davos en, seniastra in snez davos en.
- 14) Quater nuorsas cun la medema noda, dretga scurselau davon e davos orasi, seniastra scurselau davos orasi e dapli aunc colur ed in cun corns ha aunc barschau si in D.

*Gasetta Romontscha nr. 41; 13 d'october 1881*

## 1881

Cun quei che la secunda fiera da **Ligiaun** ei il davos puspei ida mal, aschia ch'ins ha stuiu vargar giu cun bia bietga e ch'ils marcadonts, che han cumprau si vaccas per catschar quellas giuviars e sull'**Alpsu** pellas fieras luzernèsas, han tenor lur gudignau pauc ni nuot malgrad ils bass prezis, ch'els han pagau, va ei plauvinavon cun alzar empau ils prezis. - Denton ei schon vegniu vendiu ina tala massa biestga, ch'ins sto buca far naven pli biara per munconza da fein. Quel vegn ussa vendius ella **Cadi** per circa 40 frs. la veglia tschuncheisma gronda da circa 8 meters cubics. Il medem prezi ha era il fein a pastg en **Tujetsch**. Muort la scartezia da fein han biars teniu uonn ad honur la rabetscha da truffels cun sechentar ella, far flucs ord la feglia e dar ils stumbels allas cauras, che maglian quels pli bugen che fein.

*Gasetta Romontscha nr. 45; 10 da november 1881*

## 1881

Vinars d'ansauna bien e real, niev e veder, magari 100 liters, venda per in raschuneivel prezi Leci Balzart a **Tujetsch** (**Cavorgia**).

*Gasetta Romontscha nr. 46; 17 da november 1881*

## 1881

### Tiers jasters

A **Cavorgia** (**Tujetsch**) tier Luis Hendri ina nuorsa nera, ureglia dretga giu miez, seniastra duas ruosnas a pèr amiez la ureglia.

A **Cavorgia** (**Tujetsch**) tier Genoveva Hendri ina caura nergaglia, dretga ina ruosna scarpada ora, seniastra fess.

A **Surrein** (**Tujetsch**) tier Giachen Martin Riedi, ina caura strala cun in stertamugl (*rentamogn* = *Halsband*) ed in toc sughet enta culiez, dretga in mugrin osum davos en ed in snez entatier il

tgau davon en, seniastra in snez davos en e sil corns dus V in sur l'auter.  
*Gasetta Romontscha nr. 47; 24 da november 1881*

**1881**

**Tiers jasters**

A **Sedrun** tier Sep Antoni Gamboni sesanfla ina caura nergaglia, ureglia seniastra tagliau giudasum, ina ruosna ed ina furcletta davon ora.  
A **Surrein (Tujetsch)** tier Giachen Antoni Curschellas sesanfla ina tgigisch nera buca tundida, ureglia seniastra in mugrin davon ora.  
*Gasetta Romontscha nr. 50; 14 da december 1881*

**1881**

**Tiers jasters**

Tier Vigeli Biart a **Sedrun** sesanfla in tschanc ner buca tendius, dretga giudasum ed in snez davos en, seniastra duas furclettas davos en.  
Tier Sep Antoni Gamboni a **Sedrun** sesanfla ina nuorsa jastra, dretga in snez davos en, fess ed ina furcletta davon en, seniastra in snez davos en.  
*Gasetta Romontscha nr. 51; 22 da december 1881*

**1881**

A **Sedrun** tier Sep Anton Gambon ina ansola nera, dretga fess, in snez davos en ed ina furcletta davon en; seniastra in snez davos en.  
Tier viewa Margreta Cristgina Schmid a **Tujetsch (Gonda)** in anugl ner, dretga giudasum, fess ed in snez davos en.  
*Gasetta Romontscha nr. 52; 29 da december 1881*

**1882**

---

**Sepiars**

ina caura a **Sedrun**, ina giuvna nera cun tgau stral, enta culiez in rentamogl (*rentamogn*) da sughet alv, ureglies nudau nuot. Tgi che sa novas da quella ei supplicaus da dar en a Lucas Cavegn a **Sedrun**.

*Gasetta Romontscha nr. 2; 12 da schaner 1882*

**1882**

**Cadi**

Tuts quens dalla defuncta Barla Sievi da **Tujetsch** ein da consignar a Vigeli Deragisch da leu, ch'ei era ugau dils dus absents feglis da quella.

*Gasetta Romontscha nr. 4; 26 da schaner 1882*

**1882**

Muort il grond donn dallas uolps vid ils tschuts ha la val **Tujetsch** obtenu la lubientscha d'astgar far la catscha sin quellas tochen calonda mars. Cun quella caschun ha capitani Felix Vincens da **Mustér**, per gronda legria dils Tuatschins, sittau leu in stupent tschess rojal (Steinadler), che mesira cullas alas biabein 7 peis.

*Gasetta Romontscha nr. 8; 23 da fevrer 1882*

**1882**

En **Tujetsch** han dus tschess rojals quest unviern sfraccau si bia tschuts, tschancs e tgigischs; il grond da quels ei, sco schon relatau el davos numer, vegnius fatgs giu leu ils 18 da fevrer e l'auter ei ussa era vegnius sittaus ils 27 da fevrer dil catschadur Stiafen Fry da **Sumvitg**. En **Valrein** ei era dacuort vegniu sittau in grond e bi tschess rojal, che miseravi 16 peis (???) cullas alas stendidas ora.

*Gasetta Romontscha nr. 9; 2 da mars 1882*

## 1882

Buca ver! La Nova Gasetta da **Turitg** e suenter quella era il Rätier e Tagblatt raquentan, che mesjamna, ils 29 da mars, seigi passau tras **Turitg** circa 60 persunas dalla **Surselva Grischuna**, las biaras da **Tujetsch**, per serender ell'America. Ils 28 seigien leu ir ordavon 20 auters Sursilvans, per la gronda part da **Sursaissa**, e sco quels hagien sincerau, vegnien questa primavera aunc biars a vegnir suenter els e l'emigraziun ord il **Grischun** vegni a prender ina extraordinaria extensiun. Quasi schi nunverdads sco lingias! Da **Tujetsch** van mo 6 persunas ell'America, e quels ein semess sin viadi per ils 31 da mars. Da **Sursaissa** era ei stau iu in triep ordavon, mo sch'in pèr da quels, supponend forsa che ins laschi encrescher per els, han dau da crer, ch'aunc roschas Sursilvans vegnien a vegnir suenter els ell'America, sche pudessen ei secuglienar. Dad ina emigraziun en massa audan ins nuot ed ils vegls proverbis: «stai a casa e setila via undreivlamein» e «negliu sgolan utschals barsai en bucca», han aunc adina lur valur. Denton lein nus haver agurau bien viadi e tutta ventira a nos cumpatriots emigrai.

*Gasetta Romontscha nr. 14; 6 d'avrel 1882*

## 1882

Las pials ansiel pagan mal uonn, da biars onns enneu ein ils prezis da quellas buca stai pli aschi bass. Ei vegn plidau da 2 - 3 frs 50 ct. Cheu ei surviu sche ina caura fa dus anseuls ed aunc dapli, sco igl ei a nus vegniu raquintau dad in pur en **Tujetsch**, che ha da 5 cauras survegniu 11 anseuls e tuts sauns e frestgs. – Dil negozi da nuorsas audan ins aunc nuot, ferton che onn da quei temps era gia cumprau si biaras.

*Gasetta Romontscha nr. 15; 13 d'avrel 1882*

## 1882

10 viertels fein a pastg ein venals tier Vigeli Werth a **Selva**.

*Gasetta Romontscha nr. 15; 13 d'avrel 1882*

## 1882

Sin remonstraziuns da vart d'**Uri** ei il planisau secund cuors da posta sull'**Alpsu** vegnius strihaus.

*Gasetta Romontscha nr. 19; 11 da matg 1882*

## 1882

Cun quei ch'ils pass dall'**Alpsu** e dil **Lucmagn** ein stai aviarts schi baul, ei gia il matg schon passau dabia jasters tras la **Surselva**, che vegn speranza tras la viafier gottardista a survegnir pli numerusa frequenza da quels e pli gronda vivacitad.

*Gasetta Romontscha nr. 23; 7 da zercladur 1882*

## 1882

### La fiera da Sedrun

dils 8 da zercladur, che curdass uonn sillla fiasta da s. Sontgilcrest, vegn perquei tenida il di avon, mesjamna ils 7 da zercladur.

### La suprastanza da Tujetsch

*Gasetta Romontscha nr. 22; 1. da zercladur 1882*

## 1882

Las fieras dad **Ursera** e **Sedrun**, che han uonn fatg concurrenza ina a l'autra, ei vegniu marcadau pauc. ...

*Gasetta Romontscha nr. 24; 15 da zercladur 1882*

## 1882

### Cadi

Tuts quens cul defunct Tumaisch Riedi da **Tujetsch** ein da consignar a gerau Duri Wenzin da leu!

*Gasetta Romontscha nr. 27; 6 da fenadurs 1882*

**1882**

Dumengia vargada suentermiezdi ha ella **Cadi** draccau zun fetg, il **Rein** maya fetg ault ed ha priu naven las punts da **Sedrun** a **Surrein**. ...  
*Gasetta Romontscha nr. 28; 13 da fenadurs 1882*

**1882**

Capitani Mucli da **Tujetsch** ha quels dis fatg sillas alps ina rara anflada – ina cavazza camutsch cun corns bein conservai.

*Gasetta Romontscha nr. 33; 17 d'uost 1882*

**1882**

**Cadi**

Joseph Cortori (vulgo Bianchi) dall', staus sesents a **Tujetsch**, lai ir scussiun e ses quens ein da consignar ad assistent Schmet a **Sedrun**.

*Gasetta Romontscha nr. 35; 31 d'uost 1882*

**1882**

**Tiers jasters**

A **Tujetsch** tier statalter Gion Paul Berther a **Camischolas** sesanflan sequentas nuorsas jastras:

- 1) Dretga giudasum, fess ed in snez davos en, seniastra in snez davos en e fess.
- 2) Dretga giudasum, seniastra giudasum, in M priu ord miez l'ureglia cun ina zaunga e colur verda sillas spatlas.
- 3) Dretga furcletta osum ed in snez davos en, seniastra ina ruosna ed in snez davon en.
- 4) Dretga giudasum, fess, in snez davos en ed in fildirom amiez l'ureglia, seniastra fess e dus snezs davon en.
- 5) Dretga in snez davon en.
- 6) Dretga giudasum, ina furcletta davos en ed ina ruosna, seniastra giudasum e fess.
- 7) Ina nera, dretga in mugrin davos en, seniastra furcletta, scurselau e mugrin, tut davos en; quella ei tier Vigeli Josef Deflorin a **Camischolas**.

Ils proprietaris da tuttas quellas nuorsas dueien ton pli spert vegnir per quellas bonificond las spesas.

*Gasetta Romontscha nr. 38; 21 da settember 1882*

**1882**

**Tiers jasters**

A **Tujetsch** tier Gion Paul Berther a **Camischolas** sesanflan aunc treis nuorsas jastras cun sequentas nodas:

- 1) Ureglia dretga giudasum, fess ed in snez davos en, seniastra in snez davos en e fess.
- 2) Dretga scurselau davon ora ed ina ruosna, seniastra in snez davon en entraviers.
- 3) Dretga ina furcletta davon en, in snez davos en e fess, seniastra in snez davos en

A **Rueras** tier Gion Antoni Berther ina ansola grischa, ureglia dretga treis snezs davos en, seniastra giudasum ed in snez davos en.

*Gasetta Romontscha nr. 39; 2 da settember 1882*

**1882**

Ch'ei vegneva tratg ora glin en **Tujetsch** per igl october, ei ina remarcabladad che mereta da vegnir nudada si. ...

*Gasetta Romontscha nr. 40; 5 d'october 1882*

**1882**

L'emprema mesadad digl october ha cuntuau cul sbletschergnem ed ins ha giu tribla miseria da ventscher si ils fretgs. En **Tujetsch** han ins stuiu rischlar risdiv la sera cun latiarnas. Tuts fretgs empermettevan la stad ina reha raccolta, mo las plievgias e neivs digl atun han destruiu la biala speronza.

*Gasetta Romontscha nr. 42; 19 d'october 1882*

## 1882

Tier Gion Paul Berther a **Camischolas** ina nuorsa cun bransin, ell'ureglia dretga duas furclettes davos en ed in snez davon en.

*Gasetta Romontscha nr. 43; 26 d'october 1882*

## 1882

Tier Martin Peder a **Cavorgia** in tschut ner cul tgau alv, fess omisduas ureglies, seniastra aunc ina furcletta rodunda davos ora. In botsch giuven, dretga giudasum ed ina furcletta davon ora, seniastra furcletta davos ora.

*Gasetta Romontscha nr. 46; 16 da november 1882*

## 1882

### **Annunzia da mort**

Cun profunda dolur communichein nus cheutras a parents ed enconuschents, ch'ei hagi plaschiu agl Altissim da clamar ord questa speranza tier ina megliera veta nies car mariu, bab, sir ed aug

### **Duri Berther**

El ei spartius ils 26 d.q. suenter ina zun cuorta malsogna, provedius cun tutts ils s. sacraments e perduns dils moribunds ed ina vegliadetgna da 66 onns e miez.

Nus recumandein l'olma dil prezius defunct alla pia memoria da parents ed enconuschents.

M. Ursula Berther, nata Schmed,

Tumaisch Berther, caplon, fegl,

era en num dils auters fargliuns e parents.

**Tujetsch**, ils 28 da november

*Gasetta Romontscha nr. 48; 29 da november 1882*

## 1882

### **Annunzia da morts**

Cun profunda dolur communichein nus cheutras a parents, amitgs ed enconuschents, ch'ei hagi plaschiu agl Altissim da clamar ord questa speranza tier ina megliera veta nies car mariu, bab, sir e tat

### **Gerau Josef Anton Muggli**

### **negoziant da biestga**

El ei morts ils 15 d.q. suenter ina cuorta mo dolourusa malsogna provedius cun tutts ss. sacraments e perduns dils moribunds en ina vegliadetgna da 61 onn e 9 meins.

Nus recumandein l'olma dil prezaiu defunct alla pia memoria da tutts ses parents ed amitgs.

M. Catrina Muggli, n. Condrau, consorta

Rosa Muggli, feglia

Barla Decurtins, feglia

Gion Antoni Muggli, schiender

Hans Giachen Decurtins, schiender

**Sedrun e Regensburg**, ils 19 da december 1882

*Gasetta Romontscha nr. 51; 21 da december 1882*

## 1882

Sch'il Tagblatt fa attents sils avantatgs, che **Mustér** vegni a retrer la stad ord in dubel cuors da posta sull'**Alpsu**, sche savein nus notificar ad el ch'ils Uranès hagien schon ussa instanziau tier lur regenza per far luvrar ora, che quei secund cuors vegni da **Berna** ano puspei strihaus, ual sco igl ei stau onn il cass. Vediamo!

*Gasetta Romontscha nr. 52; 28 da december 1882*

## 1882

Ils 26 allas 4 dalla damaun ei a **Selva** vegni giu ina ferma lavina, che ha fatg tremblar las casas, mo ins ei mitschaus culla sgarschur e tema.

*Gasetta Romontscha nr. 52; 28 da december 1882*

**1883**

Per promover il traffic sull'**Alpsu** ed il **Lucmagn** vul il departement postal schar entscheiver ad ir la posta sur quels dus pass schon ils 15 da zercladur, enstagl per calonda fenadur ed ha perquei dumandau si nossa regenza, schebein ella vegli procurar, che quels dus cuolms seigien sin lura aviarts per carrs. Quella ha exprimiu promtadad cheutier, ed ei perquei semessa en correspondenza culla regenza d'**Uri**.

*Gasetta Romontscha nr. 2; 11 da schaner 1883*

**1883**

La vischnaunca da **Tujetsch** enquera suenter in taffer e bein versau nurser, sco pastur da sia entira muntanera nuorsas per il temps dalla proxima stad. – Aspirants han da s'adressar persunalmein tier la suprastonza da **Tujetsch**.

*Gasetta Romontscha nr. 7; 15 da fevrier 1883*

**1883**

Bavarès ein stai **tochen Tujetsch** e cumprau si leu vaccas, vadials giuvens e taurs per bials prezis, aschia ch'ils marcadonts da leu han saviu seperschuader, ch'ei seigi stau dad els ina schliata speculaziun da sez vuler serender cun vaccas sillla fiera bavarès a **Sonthofen** enstagl schar vegnir si tier nus ils Bavarès a cumprar si vaccas.

*Gasetta Romontscha nr. 12; 22 da mars 1883*

**1883**

### **Fotografia a Sedrun**

Cheutras notificheschel jeu, che jeu vegni ad esser sonda, ils 14 d'avrel a **Sedrun**, sch'igl ei favoreivla aura per far purtrets fotografics. Ei vegn exponiu sco musters pliras bialas fotografias. Per numerusas empustaziuns serecamonda cun tutta stema,

J. B. Poetter, fotograf a **Glion**

*Gasetta Romontscha nr. 14; 5 d'avrel 1883*

**1883**

### **Annunzia e recumandaziun**

Il suttascret fa cheutras da saver ad in ludeivel publicum dalla **Cadi** e da siu contuorn, ch'el cuntaschi culla industria da hafner, che siu defunct bab ha giu mess si a **Bugnei (Tujetsch)** e furneschi la medema vischala da tiaracotga per tuts basegns da casa, seigi per duvrar vid il fiug, en cuschina, vid latgiras, caffetieras, ruogs da flurs etc.

El engrazia per la gronda confidanza, ch'il publicum ha duront 50 onns mussau visavi a siu bab p.m., e supplicescha d'era schenghegiar quella ad el. El serecamonda perquei a negoziants ed a particulars e vegn a sespruar da survir cun buna rauba e bienmarcau.

Josef Anton Deragisch, fegl  
hafner a **Bugnei (Tujetsch)**

*Gasetta Romontscha nr. 14; 5 d'avrel 1883*

**1883**

Venal tier Hans Giachen Monn a **Rueras (Tujetsch)** ina biala vadiala giuvna.

*Gasetta Romontscha nr. 16; 19 d'avrel 1883*

**1883**

Cun caschun ch'il far nozzas solemnas ei culla fin dil temps pascal ecclesiasticamein puspei lubius, fagein nus attents sin in progress dalla vischnaunca da **Tujetsch**, culla speronza ch'era en auters loghens vegni quei bi exemplel da surengiu immitaus. Ins ha leu numnadamein anflau per bien da buca sittar pli tier nozzas. Contas sventiras ha ei schon dau cun quei terribel sittem. En bia vischnauncas ein ils giuvens aschi perderts da sittar, mo cura ch'il til da nozzas serenda en baselgia, mo en autres vegn ei per gronda mulesta da glieud malsavanaugh la sera avon e la damaun avon che catschar dis! Ei fuss beinduras pli tschec e perdert ch'ils mats fagessen in nizeivel schenghetg als spusai, enstagl far spesas cun sittar ora tonta puorla per far

ramplunar las vals. All'emprema vischnaunca che suonda gl'exempel da **Tujetsch** clamein nus tier in honorific vivat!

*Gasetta Romontscha nr. 17, 26 d'avrel 1883*

**1883**

### **In bien pegliatalpas**

vegn encuretgs dalla squadra **Rueras** e **Zarcuns** en **Tujetsch**. Quel sto esser provedius cun buns attestats e stuess permanentamein setener si en **Tujetsch**, quei temps che selai pigliar talpas. Cheuencunter vegn segirau fadigia per plirs onns, sch'el fa sia laver en uorden. El sto surprender quella ton pli gleiti. Aspirants dueien s'adressar tier gerau Cristian Muggli a **Rueras** ni tier Gion Paul Berther a **Camischolas**.

*Gasetta Romontscha nr. 18, 2 da matg 1883*

**1883**

### **Cumin 1883**

Ella dertgira circuitala: gerau Luregn Jagmet; suppleant: Fl. Berther da **Tujetsch**.

*Gasetta Romontscha nr. 19, 10 da matg 1883*

**1883**

Il secund cuors dalla posta sull'**Alpsu** parta da **Cuera** suenter ch'igl emprem tren dalla viafier ei leu arrivaus da **S. Gagl** a **Turitg**, va sur **Versomi** ed arriva la sera a **Mustér**. La damaun va el lura a **Göschenen** e stat en connexiun culs tils express dil di dalla viafier gottardista. Schi gleiti che quellas arrivan a **Göschenen** tuorna la posta a **Mustér**, nua ch'ella stat sur notg e parta la damaun per **Cuera**, aschia che ses passagiers san da miezdi ir a **Turitg** e **S. Gagl**.

*Gasetta Romontscha nr. 23, 7 da zercladur 1883*

**1883**

### **Piars**

denter **Mustér** e **Sedrun** in blah cun in pac nittas lien. Igl anflader ei supplicaus da schar saver Giachen Antoni Beer a **Sedrun**.

*Gasetta Romontscha nr. 28, 13 da fenadur 1883*

**1883**

Ad **Ursera** ei quels dis rut ora la zoppina denter las „vaccas da caffè“, u da casa. Malgrad las precauziuns pridas cun serrar giu quella biestga, po quella malsogna tgunschamein vegnir sur l'**Alpsu**. ...

*Gasetta Romontscha nr. 30, 26 da fenadur 1883*

**1883**

### **Pli recent**

Tras biestga d'in marcadont talian, che ha priu si l'alp **Curnera** en **Tujetsch**, ei en quella vischnaunca rut ora la zoppina. Quel veva schau urentar ses armauls ad **Ursera** avon in nuegl da vaccas malsaunas dalla zoppina e survegni sin quei in secret da sanedad. Sin viadi a **Curnera** ha el schau maner ses tiers en ina alp sur **Tschamut**, bandunada dallas vaccas il di avon. L'auter di vegn leu in pur da **Rueras** cun sia mugia per trer giu purment. Turnaus a casa ha el observau che siu armaul era ussa malsauns dalla zoppina, ch'ei ussa serasada el vischinadi da **Rueras**.

*Gasetta Romontscha nr. 31, 2 d'uost 1883*

**Cadi**

Sulla facultad dalla defuncta Culastia Schmed a **Sedrun** ei renconuschiu il concuors e Giachen Antoni Soliva da leu ei retschevider da quen.

*Gasetta Romontscha nr. 31, 2 d'uost 1883*

**1883**

Tuccond tier la zoppina rutta ora en **Tujetsch** supponan plirs, che quella seigi vegnida runada neu dad **Ursera** dil spazzatgamin Stoffel, che va savens da **Sedrun** ad **Ursera** cun cristallas, beiba brav ed ha muort eivradad stuiu durmir en nuegls da biestga infectada. Cun quella caschun lessen nus dumandar ils capogiuurists, schebein ei füssi falliu, sch'ins serassi en per 24 uras babs da famiglia, che van pellas ustrias entuorn, duront che dunna ed affons ston endirar fom, e cura che quels van silsuenter eivers pils vitgs entuorn dend scandel a pigns e gronds.

*Gasetta Romontscha nr. 32, 9 d'uost 1883*

**1883**

### **Scolas dalla Cadi**

**Tujetsch** alimentescha 5 scolas elementaras, quella da **Sedrun** ha survegniu la nota fetg bien, las scolas da **Camischolas** e **Rueras** han la nota bien, quellas da **Selva** e **Cavorgia** ualts bien. La scola tudentga a **Sedrun** ha la nota bien

*Gasetta Romontscha nr. 34, 23 d'uost 1883*

**1883**

La zoppina fa progress ella **Cadi**, da **Tujetsch** ano eis ella sepropagada ella vischinonta alp da **Nalps**, che auda a **Mustér**, era l'alp **Soliva** ella val **Medel** ei infectada. Denton vegn ei pretendiu ch'ella seigi uonn buca aschi nauscha sco auters onns. Ins tema pil negozi da biestga dil proxim atun. **Breil** e **Danis** hagien era la malsogna, medemamein a **Glion**

*Gasetta Romontscha nr. 34, 23 d'uost 1883*

**1883**

La zoppina ei ussa serasada pauc ni bia en tuttas vischnauncas dalla **Cadi**, bia alps sedattan tutta breigia da tener schuber las caschadas. Marcadonts da **Tujetsch** e **Medel** han schon spedi sur cuolm entiras marcanzias schubras per mitschar cun quellas avon ch'ils pass veggan serrai. Marcadonts tudentgs ein la jamna targada stai tochen en **Val s. Pieder** ed han catschau ord **Lumnezia** 60 bialas genetschas, per las qualas els han pagau pli bials prezis che onn.

*Gasetta Romontscha nr. 35, 30 d'uost 1883*

**1883**

**Tujetsch** sedosta da schar liber tut (muort la zoppina). Quella vischnaunca ei dadens e sur **Rueras**, aunc schubra ed ellal alps da quei intschess sesanflan 70 armauls, dils quals ins ha speranza da saver vender ina gronda part sillas proximas fieras el **Tessin**, **Uri** etc.

*Gasetta Romontscha nr. 36, 6 da settember 1883*

**1883**

... Nus deplorei vivamein, ch'ei sesanfla en quella roscha premis buca in Sursilvan. Il renomau mèl alpin da **Tujetsch** e **Medel** ei schon vegnius premiaus silla exposiziun internaziunala a **Paris** dil temps dils renomai apiculturs plevons Durgiai e Huonder da buna memoria. ...

*Gasetta Romontscha nr. 37, 13 da settember 1883*

**1883**

### **Annunzia da mort**

Ei ha plaschiu agl Altissim da retrer da parents, amitgs ed enconuschents ed alla fetg cumbrigiada famiglia tras ina zun tresta disfotunada mort, speranza tier ina pli beada veta nies car fegl e frar

**Vigeli Gisuep Soliva**

**da Tujetsch**

El ha stuiu unfrir sia veta en survetsch sco scauldalocomotivas silla viafier gottardista, en ina vegliadetgna da mo 24 onns.

Nus recumandein l'olma dil preziau defunct alla pia memoria da parents ed enconuschents. Ils contrastai:

M. Domenica Soliva, nata Valier, mumma

Cristgina Soliva, sora

Paul Soliva, frar

**Biasca**, 11 da settember 1883

*Gasetta Romontscha nr. 37, 13 da settember 1883*

### 1883

Il negozi da biestga selai en biebein. Ils marcadonts da **Tujetsch**, serendi digl **Uri** giu cun vaccas e genetschas en **Baviera** han fatg bunas fatschentas e dapresent traverseschan marcadonts tudestgs e romontschs las cuntradas sursilvanas, ch'ein buc infectadas dalla zoppina.

*Gasetta Romontscha nr. 38, 20 da settember 1883*

### 1883

Il glin da **Tujetsch** ei da vegl enneu renomaus e la raccolta da sem glin ei leu savens admirabla; uonn ha in vischin da **Rueras** en siu stupent glin anflau plontas glin, che vevan tochen 187 borlas, ditgel tschienotgontasiat borlas per ina.

*Gasetta Romontscha nr. 38, 20 da settember 1883*

### 1883

En **Tujetsch** vulan ei haver viu in tschierv (carteivel mo in buc-cavriel).

*Gasetta Romontscha nr. 41, 11 d'october 1883*

### 1883

#### Tiers jasters

Tier Gion Paul Berther a **Camischolas** duas nuorsas:

1) Ina grischa cun corns, dretga tagliau giu miez l'ureglia, seniastra furau e fess.

2) In ner muot, dretga giudasum, furau ed ina furcetta quadra davon en, seniastra giudasum ed ina furcetta quadra davos en.

*Gasetta Romontscha nr. 41, 11 d'october 1883*

### 1883

Silla bialaura ha in ferm suffel purtau ils 22 d.q. (*october*) ina bischa tochen **Rein** (*a Mustér*), aschia che certas vischnauncas che senuspevan da tener serrau en il tiers infectai dalla zoppina per ton pli gleiti vegin libers da quella, ston ussa far quei tras ordinaziun da surengiu. El **Tessin** ha la gronda dracca lavagau empau la fiera da **Giubiasca**. Il **Lucmagn** ha quasi negina neiv e l'**Alpsu** pauca.

*Gasetta Romontscha nr. 43, 25 d'october 1883*

### 1883

Venal in bien engarschaun tier Alois Jagmet a **Sedrun**.

*Gasetta Romontscha nr. 43, 25 d'october 1883*

### 1883

Marcadonts da **Tujetsch** e **Medel** han catschau roschada vaccas sillla fiera d'**Altorf** dils 7 ed 8 d.q. Per tener sidretg ella **Cadi** ils presents aults prezis, munglass quella gronda fiera ir bein.

*Gasetta Romontscha nr. 45, 5 da november 1883*

### 1883

#### Tiers jasters

A **Cavorgia** tier Luis Hendri ina ansiel ner, dretga ina ruosna, seniastra fess.

*Gasetta Romontscha nr. 46, 15 da november 1883*

### 1883

#### Zoppina

... La **Cadi** ei ussa totalmein libra da quella calamitad.

*Gasetta Romontscha nr. 47, 22 da november 1883*

**1883**

Igl ei uonn gl'emprem unviern che signurs e damas han da buna tempronza passau l'**Alpsu** en schletra. Tgi sa con ditg ch'ei va aunc avon ch'ei vegni ranschau en in direct cuors postal pli che per 3 meins denter la populada **Surselva** e la viafier gottardista.

*Gasetta Romontscha nr. 48, 29 da november 1883*

**1883**

### Tiers jaster

Tier Giachen Antoni Deflorin a **Tschamut** ina caura gaglia, ureglia dretga in mugrin davos en cun dus snezs lien, barschau sils corns A B.

Tier Giachen Antoni Schmet a **Cavorgia (Tujetsch)** in botsch blau, omisduas ureglas giudasum e duas furclettes osum, dapli in snez davos en en scadina.

*Gasetta Romontscha nr. 48, 29 da november 1883*

**1883**

### Tiers jasters

Tier Vigeli Biart a **Sedrun** in ansiel grisch, ureglia dretga giudasum, fess duasga ed ina furclette davon en

*Gasetta Romontscha nr. 49, 6 da december 1883*

**1883**

... Dumengia vargada ha era in beinaccreditau giuven grischun, che ha schon fatg ses studis theologics en **Germania**, seschau vestgir en sco noviz dalla claustra. Igl ei il signur premlitinent Giachen Martin Berther da **Tujetsch**, il pli proxim vischin dil vegl casti da **Putnengia**, che ha dau alla claustra da **Mustér** il renomau avat Pieder de *Putnengia*, fundatur dalla Ligia Grischa. Nus gratulein dacormein.

*Gasetta Romontscha nr. 51, 20 da december 1883*

**1884**

---

Il concours ei declaraus sur sequent: **Cadi**: Sul defunct Vigeli Josef Biart a **Sedrun**, retschevider da quen gerau militaric Gion Antoni Schmid da leu.

*Gasetta Romontscha nr. 1, 3 da schaner 1884*

**1884**

Il mars ha purtau la pli stupenta bialaura e terrenau tochen tiels aults selvadis da **Tujetsch** e **Medel**.

*Gasetta Romontscha nr. 12, 20 da mars 1884*

**1884**

Dils 23 taurs ch'ein vegni menai sillla piazza da **Trun** han ils suadonts tratg premi:

II. classa: 7) in stierl da Josef Berther da **Rueras**. ...

*Gasetta Romontscha nr. 14, 3 d'avrel 1884*

**1884**

In bien tgaun da nuorsas enquera il suttascret da prender si per la stad.

Alois Curschellas a **Rueras (Tujetsch)**

*Gasetta Romontscha nr. 16, 17 d'avrel 1884*

**1884**

Dr. Placi Berther a **Mustér** ei numnaus ugau da vieua Tresa Camihel, nata Huonder, sesenta a **Tujetsch**.

*Gasetta Romontscha nr. 16, 17 d'avrel 1884*

## 1884

### Annunzia da mort

Cun profunda dolur notificein nus cheutras a parents ed enconuschents, ch'ei hagi plaschiu agl Altissim da clamar ord questa tiella veta perpetna nies car sur frar ed aug  
**gl'autreveriu signur Jacob Lorenz Riedi**

### Beneficiat a Rueras

El ei spartius ils 22 d.q. allas 10 avonmiezdi suenter liunga e ruha malsogna, provedius cun tuts ils ss. sacraments e perduns dils moribunds, en ina vegliadetgna da 63 onns, 3 meins e 22 dis. Nus recumandein l'olma dil prezius defunct alla pia memoria da tuts parents ed enconuschents. En num dalla parentella en malencurada

Josef Anton Riedi, frar

**Tujetsch**, ils 23 d'avrel 1884

*Gasetta Romontscha nr. 17, 24 d'avrel 1884*

## 1884

Sin instanza dil Cussegl Pign tiel Cussegl Federal d'obligar **Uri** d'arver l'**Alpsu** sils 15 da zercladur, sco ei davanti da nossa vart, ha il Cussegl Federal rispundi, ch'**Uri** levi absolut buc arver quei cuolm avon gl'emprem fenadur, mo el hagi constrenschiu da far quella lavur sils 21 da zercladur.

*Gasetta Romontscha nr. 18, 1. da matg 1884*

## 1884

(Tarmess en) Ils 24 d'avrel ha la vischnaunca da **Tujetsch** cumpignau tiella fossa cun tutta honur igl autreveriu signur Giachen Lorenz Riedi, beneficiat a **Rueras**. Naschius leu 1820, ils 30 da december, era il defunct il giuven denter 8 fargliuns, e mussond el schon baul talent e buna veglia tiels studis, eis el da ses geniturs vegnius surdaus alla scola cantunala catolica ella venerabla claustra da **Mustér**. Il gimnasi ha el finiu a **Friburg** el flurend institut dils Gesuits ed ha lura obteniu in plaz liber el collegium da s. Carl Borromeus a **Milaun** per far ses studis filosofics e teologics. Ils 24 d'uost 1847 eis el vegnius benedius ora a **Cuera** sco sacerdot e suenter haver celebrau sia messa nuviala en sia baselgia parochiala da s. Vigeli a **Sedrun**, eis el vegnius eligius sco beneficiat da **Rueras**. Da leu eis el vegnius 1849 sco plevon a **Surcasti** e 1860 a **Vrin**, nua ch'el ha puspei operaui sco fideivel pastur dallas olmas tochen 1871. Lura ha el encuretg ina pli leva lavur ed anflau ina tala sill'a caplania a **Trun**. Mo la divina provedientscha ha giu ordinai, che nua ch'el hagi entschiet sia pastoraziun, dueigi el era finir quella. 1877 ha el puspei surprui la vacanta caplania da **Rueras**. Veggend malsauns la davosa cureisma ha el sentiu, che sia fin vegni gleiti neutier, el ha fatg siu testament, recumandau en quel siu tgierp ed olma a Diu e fatg si 2000 frs. per caussas pias. Malgrad siu viv desideri da puder murir e s'unir cun Cristus, ha el aunc stuiu endirar ditg tochen ch'il zenn grond ha ils 22 d'avrel allas 10 avonmiezdi annunziau als habitants da **Tujetsch** che lur preziau beneficiat da **Rueras** seigi spartius da quest mund. El rauassi en pasch. A nos stimai vischins da **Rueras** agurein nus in bien successur.

*Gasetta Romontscha nr. 18, 1. da matg 1884*

## 1884

### Annunzia da mort

A nos parents, amitgs ed enconuschents purtein nus la dolorusa nova, ch'ei hagi plaschiu agl Altissim da clamar tier el ella perpetnadad nies car e nunemblideivel mariu, bab, frar ed aug  
**gerau Lucas Cavegn**

El ei spartius oz allas 5 dalla sera suenter ina liunga malsogna, provedius cuns tuts s. sacraments e perduns dils moribunds en ina vegliadetgna da 67 onns e 9 meins.

Nus recumandein nies carissim defunct alla pia memoria e nus sezs ad ulteriura benevlentscha.

La famiglia en malencurada:

Onna Maria Cavegn, nata Wenzin, dunna

Affons: Carl, Sabina, Eleonora, Adolf, Florentin, Veronica ed Augustina,

era en num dils auters parents.

**Sedrun**, ils 13 da matg 1884

*Gasetta Romontscha nr. 20, 15 da matg 1884*

#### 1884

Ils 13 d.q. ei miert a **Tujetsch** gerau Lucas Caveng sco ustier dalla Cruna a **Sedrun** e dalla Fontauna dil Rein a **Tschamut**, bein enconuschents e bein accreditaus tel publicum viagiont. Mellis da puels seregordan dil bien tractament, dall'emperneivla conversaziun e digl oreifer humor e viz dil vegl ustier dalla Cruna a **Sedrun**, recumandaus honorificamein en tuts cudischs da viadi pella **Svizra**. El era ual aschi renomaus sco il famus mèl da **Tujetsch** che ha d'engraziar ad el siu renomè. Bia students vegnan engrazievlamein a seregurdar con bienmarcau, ch'els vegnevan ora en sia renomada ustria. Per sia vischnaunca eis el sco gerau e president communal sefatgs meriteivels cun promover ina bun'administraziun, saluteivel spargn da lenna, ina commensurada indemnisiaciun pella gudida dils rehs beins communals, per promozion da bunas scolas, da meglieras vias e sco amitg da scadin saluteivel progress. Tras el ed auters premurai umens survescha **Tujetsch** sco muster d'in spargnus tenercasa communal e dalla vertit patriotica da pagar promt ed exactamein il dabien dalla vischnaunca. Il statalter communal ei gl'emprem deivet, ch'ils Tuatschins pagan, ferton ch'en biars auters logs han ils cassiers communals gronda breigia da trer en lur dabien pella vischnaunca. Lucas Caveng ei staus in diember onns el magistrat dil cumin e plirasga deputau sil Cussegl Grond. Gl'uffeci da mistral, d'in temps schi tschercaus, ha el mai vuliu surprender.

Arrivaus sin ina vegliadetgna datier da 70 onns eis el staus perdetga dallas grondas midadas en **Surselva** dapli in miez tschentaner e ses raschienis sul temps vegl eran interessants da tedlar tier. Nus lein sulettamein allegar las midadas ella veta dils vitturins. Havend schon siu bab in negozi, menava Lucas da giuven sia necessaria rauba naven da **Glion ni Cuera**, dad in temps ch'ei era aunc negins straduns en **Surselva**. La veta ch'in vitturin stueva da quei temps far, pon ins comprender ord quei, ch'els stuevan elllas ruinas da **Danis**, nua che la via vedra vegneva savens sgurdinada, descargar, prender il carr in ord l'auter e sez purtar sulla via ruinada il carr e la rauba. Mo ils vitturins duvravan era buca ton sco ozildi, da magliar per um e cavagn prendevan ei cun els. Sco Lucas raquintava, deva siu bab 5 bazs (circa miez franc) per far il viadi da **Sedrun** a **Glion** e turnar anavos e sin quei daner da viadi spargnava el aunc adina enzacons bluzchers, ch'el vessi da cumprar ina ni l'autra ga enqual caussa. A **Glion** marendavan ils vitturins ord lur sitget e buevan communablamein cun lur cavals. Il loschi prendevan ei fetg savens elllas **Pardialas** sut tschiel aviert. Sulet cura ch'ei mavan a **Cuera** vevan ei ina stupenta tscheina e bien quatier tiella renomada Crusch Alva a **Domat** e quei tut mo per miez rensch ni 85 cts. e per ordinari arrivavan leu ils vitturins sursilvans cun particular appetit. Lucas fuva fetg discussius e perquei semegliava ei adina cuort en sia casa. El vegn aunc a restar ditg en buna memoria tier jasters e dumiastis. El rauassi en pasch!

*Gasetta Romontscha nr. 21, 21 da matg 1884*

#### 1884

**Tagliacappa**

anflan ton pli gleiti biala e buna lavur tier

Vigeli Berther, ugau baselgia a **Sedrun**.

*Gasetta Romontscha nr. 22, 29 da matg 1884*

#### 1884

Dertgira districtuala per 1885-1887: ... suppleants: ... assistent Schmed da **Tujetsch**.

*Gasetta Romontscha nr. 23, 5 da zercladur 1884*

#### 1884

**La fiera a Sedrun**

che curdass sin dumengia proxima vegn tenida gliendisdis ils 9 d.q. Tuts tiers che vegnan quei di catschai en **Tujetsch** sin quella fiera, ston esser provedi cullas prescrettas bullettas.

La suprastonza da **Tujetsch**

*Gasetta Romontscha nr. 23, 5 da zercladur 1884*

## 1884

Ils 15 d.q. entscheivan ils novs cuors postals sur nos pass alpins. Sull'**Alpsu** van puspei 2 cuors, in che va direct a **Cuera**, parta da **Mustér** las 3 suentermiezdi e l'auter las 7 e 35 minutias dalla damaun ...

... Il cuors principal sull'**Alpsu** entscheiva per ils 21 da zercladur e finescha ils 21 da settember.

...

*Gasetta Romontscha nr. 24, 11 da zercladur 1884*

## 1884

La fiera da **Sedrun** dils 9 han ils Uranès muncau e perquei ei quella buca stada viva ed ils prezis dallas cauras eran sbassai empau. Las nuorsas ch'eran stadas cumpradas si per 24 – 34 frs. il pèr, han ils marcadonts stuiu vender senza gudogn.

*Gasetta Romontscha nr. 24, 11 da zercladur 1884*

## 1884

Sil publicau niev plan dils cuors postals pella stad steva quei ner sin alv e perfin il postbureau a **Cuera** ha pils 15 da zercladur dau ora ad in jester passagier in bigliet da **Cuera** tochen **Ursera**, e quel ha cun raschun sesmervegliau d'udir tier sia arrivada a **Mustér**, ch'ei mondi aunc 8 dis negina posta sull'**Alpsu**! Ins giavischass sclariment sur quella malemporneivla muncada.

*Gasetta Romontscha nr. 25, 19 da zercladur 1884*

## 1884

### Annunzia da mort

En profunda dolur notifichein nus a tuts nos enconuschents, ch'ei hagi plaschiu agl Altissim da clamar tiella veta perpetna nies car fegl e frar

**Giachen Antoni Schmet a Sedrun.**

Provedius cun tuttas consolaziuns da nossa s. religiun eis el spartius ils 10 d.q. en ina vegliadetgna da mo 19 onns.

Nus recumandein nies car defunct alla pia memoria da tuts enconuschents.

La famiglia en malencurada:

Margreta Cristgina Schmed, nata Degonda, mumma

Margretta Cristgina, Barla Doratea e Maria Lorenza, soras

**Tujetsch**, ils 15 da zercladur 1884

*Gasetta Romontscha nr. 25, 19 da zercladur 1884*

## 1884

Per rectificaziun da nies artechel postal el davos numer, remarchein nus, ch'igl jester setrumpaus pervia dil cuors sull'**Alpsu**, vevi priu a **Flem** e buc a **Cuera** siu bigliet per quel.

*Gasetta Romontscha nr. 26, 26 da zercladur 1884*

## 1884

Signur Florin Berther da **Tujetsch**, che ha plirs onns studiau sillias universitads tudestgas, e meina ina zun versada plema, entra cugl emprem october ella redacziun dil Basler Volksblatt, che cumpara en grond format, treisga ad jamna ed ei per ses decisivs principis conservativs-catolics bein accreditaus ell'entira **Svizra** catolica. Nus gratulein tier quella acquisiziun.

*Gasetta Romontscha nr. 27, 3 da fenadur 1884*

## 1884

### Anflau

El vitg **Sedrun**, vischnaunca da **Tujetsch**, seigi vegniu anflau zatgei daners da pupi, il qual vegn conform § 192 dil dretg privat cheutras fatg enconuschent.

Il respectiv proprietari ha, cun en medem temps sco tal selegitimar, da s'adressar el termin da treis meins a dato tier il suittascret uffeci.

Per igl Uffeci circuital dalla **Cadi**

il president A. Tuor

**Rabius**, ils 14 da fenadur 1884

*Gasetta Romontscha nr. 29, 17 da fenadur 1884*

#### 1884

##### Cadi

Ils minorens affons da Gion Antoni Decrusch da **Tujetsch**, morts ad **Aifingen, Württemberg**, han per ugau president communal Johann Anton Soliva.

*Gasetta Romontscha nr. 31, 31 da fenadur 1884*

#### 1884

Marcadonts tuatschins ein serendi cun ina roscha genetschas silla fiera bavaresa a **Sonthofen** (200 km da **Tujetsch**), nua che quels mavan pli da vegl per cumprar si biestga per catschar alla fiera da **Ligiaun**. Ils temps semidan e nus semidein cun els.

*Gasetta Romontscha nr. 37, 11 da settember 1884*

#### 1884

Silla fiera da **Ligiaun** paress da buca vegni gronda catscha. Sul **Lucmagn** ei vegniu instradau 7 - 800 armauls ord la **Cadi**, 200 glarunes e sulla **Greina** po esser passau circa 300 tgaus. Ils davos dis ei da marcadonts talians en cumpignia cun Furrer vegniu cumprau giu entiras roschas cun schar in bi gudogn als vendiders. Ils Tuatschins, ch'eran stai serendi a **Sonthofen**, han leu buca saviu vender tut lur genetschas, mo han ussa aunc catschau giu leu in triep per dar meglier esit allas restadas anavos.

*Gasetta Romontscha nr. 39, 25 da settember 1884*

#### 1884

A **Tujetsch** tier statalter Gion Paul Berther sesanflan sequentas nuorsas jastras:

- 1) Ina nuorsa nera, ureglia dretga giu miez l'ureglia, seniastra ina furcletta osum ed in snez davos en.
- 2) Ina nuorsa alva cun corns, dretga giudasum.
- 3) Ina nuorsa nera, dretga in mugrin davon ed in davos en e dus snezs davos en, seniastra fess.
- 4) Ina nuorsa nera, dretga ina ruosna e fess, seniastra duas furclettes davos en fuorma d'in M.
- 5) Ina nuorsa grischa, omisduas ureglia giudasum.

*Gasetta Romontscha nr. 41, 9 d'october 1884*

#### 1884

##### Tiers jasters

A **Tujetsch** tier statalter Gion Battesta Berther ina nuorsa, dretga furcletta davon en ed in snez davos en, seniastra in mugrin davon en.

Tier Lorenz Jacomet a **Tujetsch** sesanflan 2 nuorsas, vanzadas dall'alp **Curnera** da sequenta noda:

- 1) Ina nuorsa alva bergamasca, ureglia dretga giudasum.
- 2) Ina alva cun scalin, dretga fess ed in snez davon en, seniastra in fildirom

*Gasetta Romontscha nr. 42, 16 d'october 1884*

#### 1884

La secunda fiera da **Ligiaun** ei buc ida schi bein sco l'emprema, e per excepziun han ils marcadonts quellaga fatg meglier giu **Ligiaun** che si **Giubiasco**. Il meglier esit vevan ils stiarls, las vaccas tergevan meins ed il mender pagavan a proporziun las mugias, ch'ins vess a **Ligiaun** saviu cumprar pli bienmarcau ch'el **Grischun**. Cun dabia biestga han ins stuiu vargar giu silla fiera da **Vareis**. Ils marcadonts, principalmein da **Tujetsch**, che han puspei vuliu empruar lur fortuna sillars renomadas fieras bavarèsas a **Sonthofen**, han malgrad las repetidas fieras buca saviu dar giu tut lur biestga. Aschia eis ei da capir ch'ils stravagants prezis tschessan. Per ventira ei lunsch ora la gronda part biestga venala vendida. ...

*Gasetta Romontscha nr. 44, 30 d'october 1884*

**1884**

Il far maluardau dils tubacheders vess sonda vargada saviu caschunar gronda sventira allas vischnauncas da **Tujetsch** e **Mustér**. In tubacheder tuatschin fuva quei di ad uaul cun entgins camerats sils cunfins da quellas duas vischnauncas. Envidond ina pipa, fiera el il zulprin ardent pli lunsch, ella gronda schitgira ha quel dau fiug il pastg e silsuenter in pluna roma. Serasond il fiug pli e pli han ins stuiu clamar agid, mo per l'auter di, la dumengia, han ins pudiu stizzar diltut. Ins ha giu grond cletg da buca stuer schar barschar bia plontas, mo quei cass ei in niev e serius avis pils tubacheders, ed igl § 35 dalla lescha da polizia plaida clar avunda sulla censura da talas «negligentschas».

*Gasetta Romontscha nr. 46, 13 da november 1884*

**1884**

Tut che selegra giud la biala stad s. Martin. ... Enzatgei resch niev fuv'ei era da ver il november a **Mustér** crotschas cun curants engles d'**Ursera**, che fagevan excursiuns sull'**Alpsu** il meins dad unviern.

*Gasetta Romontscha nr. 46, 13 da november 1884*

**1884**

**Tiers jasters**

Tier Gion Clau Berther a **Selva** ina caura nera, dretga in mugrin ed in snez davos en, en seniastra fess.

*Gasetta Romontscha nr. 46, 13 da november 1884*

**1884**

**Venal**

Dus envernauns mascals naschi gl'avrel, venda Giachen Giusep Jagmet a **Sedrun**.

*Gasetta Romontscha nr. 48, 27 da november 1884*

**1884**

**Iu a piarder**

Tgi che sa novas da duas cauras jastras, ina mesalva ed ina nera cun in F ed ina crusch sils corns (la noda dallas ureglies san ins buc) ei supplicaus da schar saver Gion Fidel Wenzin a **Selva** (**Tujetsch**).

*Gasetta Romontscha nr. 49, 5 da december 1884*

**1884**

A **Rueras** tier Giachen Fidel Cavegn ina caura nergrischa cun stgella, dretga ina furcletta osum davon en e sil tgiern dretg barschau si I. M.

*Gasetta Romontscha nr. 50, 11 da december 1884*

**1885**

---

La vischnaunca da **Tujetsch** ha piars quest unviern ina massa vadials giuvens, biars da quels ein ventschi 2 – 3 dis suenter esser naschi senza ch'ins fuss vegnius sissu danunder che quei derivi.

*Gasetta Romontscha nr. 4, 23 da schaner 1885*

**1885**

**Concurrenza per meisters da lenna**

La vischnaunca da **Tujetsch** baghegia uonn ina nova casa da scola a **Sedrun** ed ha schon tratg la lenna sil plaz. Essend che quella vegn pella gronda part construida da lenn, sche vegn ei cheutras aviert la concurrenza per quella lavur, che sto vegnir fatga en uorden. Meisters che aspireschan sin quella lavur ston tochen ils 25 da mars s'adressar tier la cumissiun da baghegiar.

*Gasetta Romontscha nr. 9, 26 da fevrier 1885*

**1885**

Cul process instradaus da quels dallas vias commercialas (ed era dalla vischnaunca da **Tujetsch**) encunter il cantun avon la dertgira federala pervia dil manteniment dallas vias, ei tochen ussa iu plau vinavon, finalmein aud'ins, ch'igl avrel vegni da quellas varts priu en perdetgas a **Cuera** e silsuenter vegni il tribunal immediat a prender amauns il process, sil qual ins ei fetg spanegiaus.

*Gasetta Romontscha nr. 12, 19 da mars 1885*

**1885**

Unanimamein ha la pleiv da **Tujetsch** eligiu plevon igl aultreveriu signur Adalbert Baselgia da **Sumvitg**, dapresent plevon a **Vrin**. Igl aultreveriu plevon Berther a **Pigniu** vegn ad **Andiast**.

*Gasetta Romontscha nr. 13, 26 da mars 1885*

**1885**

Ella **Cadi** ha il traffic da biestga tut anetgamein survegniu in legreivel impuls tras la cumparsa da marcadont Russy d'**Ursera**, che ha en **Tujetsch**, **Mustér** e **Medel**, cumprau si varga 140 vadials e stiarls per fetg bials prezis. Sin quei ein era nos marcadonts spert semess en moviment ed han stuiu alzar ils prezis. Tuttas bunas caussas ein treis, e perquei ei lu aunc cumpariu in marcadont bavarès per comprar vaccas da vadi e da bials ivers. Quei ei stau aura pils purs e nuslein sperar, ch'era ils marcadonts seigien buca vegni menai egl avrel.

*Gasetta Romontscha nr. 14, 2 d'avrel 1885*

**1885**

Premiaziun da taurs a **Trun**: II. Classa: ... 7) in mutg da Joseph Berther a **Rueras**, 70 frs.; ... 12) quel da Bruno Soliva a **Tujetsch** 40 frs.

*Gasetta Romontscha nr. 15, 9 d'avrel 1885*

**1885**

**Cadi**

Gion Antoni Schmed da **Tujetsch-Gonda** ei mess ugau sur il minorent Rest Antoni Schmed.

*Gasetta Romontscha nr. 16, 16 d'avrel 1885*

**1885**

**Cumin**

Ella dertgira circuitala ein eligi: ... president communal Soliva da **Tujetsch**. Il candidat ch'ils Tuatschins vevan semtgau pil Cussegl Grond, che vess segiramein giu bials aspects, Florin Berther, redactur dil Basler Volksblatt, han ins, essend buca habitants el cantun, constituzionalmein buca saviu leger ora.

*Gasetta Romontscha nr. 19, 7 da matg 1885*

**1885**

La jamna targada ei spel lag dall'**Alpsu** sin intschess uranès vegniu anflau in um miert, ch'ei tenor sias blessuras ed il cunti leu speras semazzaus ni vegnius mazzaus. Vid las scartiras anfladas tier el duei ei esser in cumiss sogngagliès.

*Gasetta Romontscha nr. 19, 7 da matg 1885*

**1885**

Il matg ei in bi meins pils poets, mo als purs fa el savens in streh tras lur quens. Uonn ha el puspei purtau crius suffels, neivs e purginas, il tratsch ei staus schelaus ed era il latg els tschalers sils cuolms, nua ch'igl ei en logs munconza da fein e pastg. ... Els marcaus da **Berna** e **Turitg** neveva ei zuar ils 15 d.q. (matg), ferton ch'ei cuflava ella **Val Tujetsch** sco il pli ruh unviern.

*Gasetta Romontscha nr. 21, 22 da matg 1885*

**1885**

Sigl empren da zercladur ei l'**Alpsu** aviarta per carrs.

*Gasetta Romontscha nr. 2, 28 da matg 1885*

**1885**

Il pass dall'**Alpsu** ei vegnius aviarts ils 29 ed il **Lucmagn** ils 31 da matg. **Uri** e **Tessin** han priu l'iniziativa, feton ch'il **Grischun** ha giu pintga laver e mess maun per avon che schar finir las lavurs da tschei maun dil cuolm. ... Tenor rapport ufficial ha il cantun dau ora 1884 pell'**Alpsu** mo 2894 frs. ... Conclusivamein dein nus bugen tier, ch'era la letargia sursilvana seigi empau la cu culpa, che ses dus pass alpins vegnan buca aviarts pli baul e che l'auta **Surselva** sa buca seprofitar pli bia dalla vischinonta viafier gottardista.

*Gasetta Romontscha nr. 23, 3 da zercladur 1885*

**1885**

A raschun ch'il signur plevon Baselgia ha buca vuliu bandunar **Vrin**, ha la pleiv da **Tujetsch** eligiu signur plevon *Francesg Eduard Muoth da Breil* a **Surrein** per siu niev plevon, e la pleiv da **Surrein** ei vegnida surdada a signur caplon Thomas Berther a **Sedrun**. ...

*Gasetta Romontscha nr. 24, 11 da zercladur 1885*

**1885**

Alla fiera da **Tujetsch** dils 8 d.q. (*zercladur*) ei vegniu marcadau pauc, cauras ein vegnidias vendidas per 18 – 22 frs., las nuorsas eran buca fetg tschercadas. La fiera d'**Ursera** ei aunc stada mendra, paucs tiers, pauca glieud e bass prezis.

*Gasetta Romontscha nr. 24, 11 da zercladur 1885*

**1885**

La zoppina smanatscha danovamein alla **Cadi**. Ina roscha nuorsas pigureras, ch'ei il matg vegnida catschada a **Chiasso** suls cunfins svizzers ed arrivada tochen **Aquacalda** sil **Lucmagn**, ha runau en quella malsogna ed infectau l'entira **Val Blegno**. ... La vischerna da **Medel** ha gia daditg postau ina guardia sil **Lucmagn**, mo ei vegn raquintau, ch'ei seigi era sefultschau el **Grischun** nuorsas pigureras dil maun dall'**Alpsu** ed ins spetga ina rigurusa inquisiziun. Nuorsas pigureras han era runau la zoppina a **Realp** en **Val Ursera**.

*Gasetta Romontscha nr. 25, 18 da zercladur 1885*

**1885**

Gl'unviern vargau ei vegniu teniu el **Grischun** 15 scolas da cuntuaziun (Fortbildungsschulen) u realas, denter auter er'en **Tujetsch**, ch'ha obtenu 200 frs. subsidi cantunal. ...

*Gasetta Romontscha nr. 26, 25 da zercladur 1885*

**1885**

(Tarmess en.) La zoppina. Sco enconuschent smanatscha quella malsogna contigiusa danovamein alla **Cadi** dad omisdus pass alpins (**Lucmagn** ed **Alpsu**). La **Val Blegno**, principalmein dad **Olivone** tochen sin nos cunfins, ei totalmein impestada. La malsogna ha leu quellaga in fetg nuscheivel caracter. Egl **Uri** ei la malsogna a **Realp**, ed era ussa ad **Ursera** e sin in'alp dall'**Alpsu**. Sin camond da **Berna** han quels pass stuiu vegnir aviarts e dau liber pass a tuts tiers cun bulletta, ch'ein ni paran sauns.

*Gasetta Romontscha nr. 27, 2 da fenadur 1885*

**1885**

(Communicau) Ils 19 d.q. vegn monsignur uestg F. C. Rampa a benedir ora 6 teologs en il seminari da s. Leci a **Cuera**. Denter quels sesanflan 3 Romontschs: ... da **Tujetsch** signur Gion Antoni Wenzin che celebrescha sia messa nuviala ils 15 d'uost a **Sedrun**.

*Gasetta Romontscha nr. 29, 16 da fenadur 1885*

**1885**

La zoppina fa progress el **Grischun** ed ei dapresent en 50 nuegls e sin 43 pasculaziuns. La **Cadi** ei malgrad la malsogna sill' **Alpsu** e **Lucmagn** aunc intacta.

*Gasetta Romontscha nr. 33, 13 d'uost 1885*

**1885**

Ella miseria da pavel vegn ei uonn fatg ton pli bia fein a pastg. Alla vischnaunca da **Tujetsch** ha quel purtau en uonn datier da 5000 frs., igl ei purs che han tiegl ingant pagau tochen 11 marenghins per saver segar tscheu e leu sin pastiras e cuolms. Biars han fatg leu blahs e blahs bi e verd muot (matun) e runeida. Era dalla feglia vegn ei seprofitau ton sco ins sa e po.

*Gasetta Romontscha nr. 36, 3 da settember 1885*

**1885**

Ils marcadonts da **Tujetsch** ch'ein stai ils 2 da settember silla fiera da **Lucerna**, telegrafeschan a nus, ch'ei hagien fatg atras 2 fieras e saviu vender mo 3 armauls.

*Gasetta Romontscha nr. 36, 3 da settember 1885*

**1885**

En rectificaziun d'ina notizia pertada en nies davos numer relatein nus, ch'ei seigi a nus ufficialmein vegniu scret, che **Tujetsch** hagi uonn buca tratg 5000 frs. ord il fein a pastg e las pastiras vendidas, sonder mo 2 – 3000 frs. Il reclamond scriva denter auter: «Ver eis ei denton, che **Tujetsch** fa uonn dabia fein dapli ord ils aults ch'igl ordinari, ver eis ei era, ch'in sulet pur ha cumprau per 220 frs., ver eis ei aber era, che l'activitat dils endiri Tuatschins, ils quals vulan pli bugen luvrar cun stenta e strapazs caras pastiras, che sedar vi ad in «dolce far niente», preferescha la lavur adina cun pign interess ad in cumadeivel ruaus senza negin interess.

Evident eis ei era che bia pastiras ein vegnidias pagadas caramein, denton san ils cumpraders seconsolar empau cul patratg ch'els hagien era aunc art e part dalla cassa communal, schiglioc pudess forsa bein enqualin clamar si cun Benjamin Franklin: «Ti pupratsch has quella gada pagau memia car tia fiffa.» Havessen ils Tuatschins saviu cumprar fein a pastg per 20 – 25 ct. il buordi, sco igl ei stau il cass en vischinontas vischnauncas, sche havessen els aunc cumprau bia tocs da segar dapli, enstagl stuer pagar entochen 2 frs. il buordi, etc.»

*Gasetta Romontscha nr. 37, 10 da settember 1885*

**1885**

**Cadi**

3) Carli Cavegn a **Sedrun** ha per ugau Gion Fidel Wenzin da **Selva**.

*Gasetta Romontscha nr. 37, 10 da settember 1885*

**1885**

Cullas midadas dils cuors postals dils 16 da settember han las postas sul **Lucmagn** ed **Alpsu** totalmein calau si, aschia che la **Cadi** ha per 9 meins zun negina communicaziun postala culla viafier gottardista. Ei fuss zun da giavischar, ch'in cuors da quella mass silmeins sur quei frequentau pass schiditg ch'il cuolm fuss aviarts e buca mo ils solits 3 meins, in tal accord savess la Confederaziun tgunsch serrar giu culs furniders dils cavals da posta. Quei fuss gl'emprem pass per vegnir tier in annual cuors postal sull'**Alpsu**. Duess **Uri** buca porscher maun leutier, sch'ei dapresent el **Tessin** fetg bials aspects per arranschar in tal sul **Lucmagn**.

*Gasetta Romontscha nr. 38, 17 da settember 1885*

**1885**

La biestga dalla **Cadi** pella fiera da **Ligiaun** ha entschiet a semetter sin viadi ils 16 d.q. (settember) ...

*Gasetta Romontscha nr. 38, 17 da settember 1885*

**1885**

Sco gronda raritad ha in um dalla barba grischa raquintau a nus, ch'el hagi anflau en **Tujetsch**

in glin che vevi si 190 borlas, ditgel tschien e navonta!

*Gasetta Romontscha nr. 38, 17 da settember 1885*

### 1885

(Tarmess en) ... Dapli seigien, sco ins ha intervegniu, en laver ni forsa schon spedidas ina bandiera per **Reams**, ina per **Camischolas (Tujetsch)**, gie schizun ina per **Paris**.

*Gasetta Romontscha nr. 38, 17 da settember 1885*

### 1885

Tier Hans Giachen Decurtins a **Sedrun**.

1) Ina nuorsa alva, ureglia dretga giudasum, seniastra furcletta orasum ed in snez davon en, colur cotschna sillas spatlas e davos.

2) Ina nuorsa alva, dretga giudasum, seniastra giudasum, fess ed in snez davos en, colur sco nr 1.

3) Ina nuorsa gaglia, dretga giudasum ed ina furcletta davos ora, seniastra ina ruosna, colur verda si dies sco ina crush

*Gasetta Romontscha nr. 40, 1. d'october 1885*

### 1885

**Tiers jasters**

A **Camischolas** tier Thomas Berther sesanflan sequentas nuorsas jastras:

1) In anugl alv, dretga furcletta gronda osum l'ureglia, ina furcletta davon en e dus snezs davos en.

2) Ina nuorsa nera, omisduas ureglia priu ora ina gronda furcletta davon en.

3) Ina nera, dretga in snez davon en, seniastra ina furcletta osum.

4) In tschanc alv, dretga giudasum e dus snezs davos en, seniastra ina furcletta davos en.

5) Ina avla, dretga ina furcletta davon en, ina ruosna, in fildirom blau ed in tagl davos en, seniastra ina furcletta davon en ed in snez davos en.

6) Ina tgigisch nera, dretga furcletta osum e dent-resgia davos en, seniastra giudasum e dent-resgia davos en.

7) Ina nuorsa nera, dretga giudasum ed ina ruosna cun curegia lien.

8) In tschanc alv cun la medema noda sco la sura.

9) In anugl alv, razza bergamasca, dretga duasga fess, seniastra scurselau davos orasi, giu la cua e si dies colur cotschna.

10) In anugl alv, razza bergamasca, seniastra giudasum ed in snez davon en, giu la cua e colur cotschna si dies.

11) Ina nuorsa alva, dretga duasga fess ed in M davos en.

12) In'alva cun corna, dretga giudasum, duas furclettes davon en ed in quadrel davos en, seniastra duas furclettes davon en ed in snez grond davos en.

13) In tschanc alv cun corns, dretga in grond mugrin davos en, seniastra in grond mugrin davon en e giu la cua.

15) Ina alva cun corns, dretga giudasum ed in grond dent-resgia davos en, seniastra fess en miez l'ureglia e priu giu la part davon.

15) In tschanc ner, dretga in snez davon en, seniastra ina furcletta osum l'ureglia ed in snez davos en.

16) Ina nera cun corns, dretga giudasum, fess, in fildirom mellen speras e dus snezs davos en, seniastra in grond snez davos en.

17) Ina grischa, dretga ina furcletta osum, seniastra giudasum e dus snezs davon en.

18) Ina nuorsa nera, dretga ina furcletta osum ed ina davon en e dus snezs davos en.

*Gasetta Romontscha nr. 41, 8 d'october 1885*

### 1885

Ins spetga, ch'il process fatgs pendents tier la dertgira cantunala dils avdonts dallas stradas commercialas e da **Tujetsch** encunter la nova lescha pervia dil manteniment dallas vias, vegni aunc uonn decidius. Quel dalla vischerna da **Tujetsch** ei fixaus sils 13 da november.

*Gasetta Romontscha nr. 43, 22 d'october 1885*

**1885**

Tier Thomas Berther a **Camischolas**:

1) Ina nuorsa alva, dretga fess, seniastra mugrin e snez davos en, sill a cuia scrotta launa cun marca N.

2) In anugl ner, dretga giudasum, fess ed in snez davos en, seniastra in snez davos en.

*Gasetta Romontscha nr. 43, 22 d'october 1885*

**1885**

Tier Giachen Fidel Beer a **Sedrun** ina ansola nera, dretga tagliau giudasum ed en in pleh.

*Gasetta Romontscha nr. 46, 12 da november 1885*

**1885**

La pli impurtonta nova pil **Grischun** ei, che la dertgira federala ha unitamein enviau anavos il recuors da **Tujetsch** e vegn consequentamein a far il medem culs recuors, ch'ils avdonts dallas stradas commercialas han da quellas varts dau en encunter il cantun. La vischnaunca da **Tujetsch** ha tras siu advocat, cusseglier dils stans P. C. Planta, garegiau tiella dertgira federala, che nossa nova lescha sul manteniment dallas stradas, duei, aschi lunsch ch'ella stetti en contradicziun cullas obligaziuns, ch'ella hagi supriu 1861 per manteniment dalla strada sull'**Alpsu**, buc esser ligionta per ella, eventual ch'il cantun seigi obligaus da bonificar ad ella pellas prestaziuns, ch'el garegi ussa dapli dad ella. Suenter ina liunga tractaziun, principalmein fetg impurtonta, ein omisdus plogns vegni enviai anavos, perquei ch'il stadi renconuschi per el neginas obligaziuns dil dretg privat e sappi cun **Tujetsch** far negina excepziun. Ch'il stadi sco tal seigi buca obligaus da tener sias empermischuns fatgas, quei sa il saun giudezi d'in sempel pur buca capir. Denton temevan schon 1861 bein enqual vischin da **Tujetsch**, ch'il cantun pudessi ina biala damaun rumper sia empermischun fatga pervia dil manteniment, e levan perquei far star neu persunalmein il cumissari guovernativ, che ha lura per quietar ils malcartents giu schau anavos en scret ina vaga declaranza.

*Gasetta Romontscha nr. 47, 19 da november 1885*

**1885**

Per completar l'allegada sentenzia dalla dertgira federala el process denter **Tujetsch** ed il cantun, relatein nus aunc, che quella vischnaunca stoppi supreder tuttas spesas giudizialas e pagar al cantun 1000 frs. per spesas extragiudizialas. Quei vegn a parer als Tuatschins stagn bia, denton pudess ei maneivel fruntar, ch'igl advocat dil cantun (Niggeler da **Berna**) fagess pagar siu client pli che melli francs per sias breigias ed expensas en quei process. Sco ei va las tunas, vegni il cantun en quels heiclis process pervia dil manteniment dallas vias, staus suprius inaga dad el, a secuntener cugl acquistau dretg e generusamein schenghegiar tuttas spesas extragiudizialas, che vegnan fatgas ora en sia favur.

*Gasetta Romontscha nr. 48, 26 da november 1885*

**1885**

**Cadi**

1) Ils quens dil concursant Giachen Antoni Schmet, marcadont da biestga a **Camischolas**, ein da consignar ad assistent J. A. Schmet a **Sedrun** ni al gerau Gion Paul Berther a **Camischolas**.

2) Assistent Schmet a **Sedrun** ei retschevider da quen per il defunct Gion Martin Peder da **Tschamut**.

3) Statalter Gion Mihel Monn ha l'ugadia da Scolastica Caviezel, omisdus da **Sedrun**.

*Gasetta Romontscha nr. 49, 2 da december 1885*

**1885**

Sco ei era da spitgar sill a sentenzia per **Tujetsch**, ha la dertgira federala enviau anavos il plogn dils avdonts dalla **Via-sura**, **Via-sut** e **Via-tudestga** e dau raschun al cantun cun 6 vuschs encunter ina. **Maiavila**, **Zezras**, **Cazas**, **Schons**, **Mesauc** etc. dueien survegnir anavos lur summas, stadas pagadas al cantun per vegnir libers da lavurs vid il manteniment da lur stradun. Ils avdonts da quellas stradas commercialas, che han ussa piars lur anteriura

impurtonza, garegiavan ch'il cantun duei tener las veglias cunvenziuns, ni silmeins pagar els per lur lavurs, ch'els stoppien ussa surprender dapli che quei, ch'era stau stabiliu tiella construcziun da quellas vias. La dertgira federala ha aber tschaffau si, che las cunvenziuns denter las vischnauncas suveranas ed il cantun suveran, hagien in caracter public e buca tenor dretg privat, e ch'il cantun sappi perquei mo dad el anora midar giu quellas cunvenziuns. Avon 20 – 30 onns fuss quella questiun fetg probabel vegnida decidida autruisa, denton san las vischnauncas pigl avegnir tgei peisa ins sappi metter sin semegliontas cunvenziuns.

*Gasetta Romontscha nr. 50, 10 da december 1885*

## 1885

Ils dis vargai ha la dertgira poliziala dalla **Cadi** nunspitgadamein giu da truar sur dad in mistergner tirolès, che veva engulau duas uras a **Dardin** ed era mitschaus tochen **Tschamut**. Udend da quei enguladetsch, ei polizist Berni daus suenter e vesend el quel ha el senistrau sia geppa, purtau in sac resti si dies e clamau al lader da spitgar empau. Quel ha mirau anavos e spitgau, nunsminond ord la cumparsa dil clamond, che la polizia seigi a dies ad el. Mo Berni ha fatg spert da cargar e menar il lader a **Mustér**.

*Gasetta Romontscha nr. 50, 10 da december 1885*

## 1886

### Ingant a Camischolas

Mardis proxim, ils 9 da fevrer, vegn leu vendiu ord la massa concursanta da Giachen Antoni Schmet en public ingant, mobiliar, iseglias, victualias, aissas, sco era fein grass, fein a pastg e sternem, ch'ins lai trer naven. L'entschatta vegn dau allas 9 en casa dil concursant.

Ulteriur sclariment dattan

Ils ugaus da massa

*Gasetta Romontscha nr. 10, 4 da fevrer 1886*

## 1886

### Teater a Sedrun

(ella aula dalla Cruna)

Dumengia, ils 7 da mars allas 2 suentermiezdi  
Gliendisdis, ils 8 da mars a l'ina suentermiezdi

I. La villa spel stradun, cumedia en dus acts  
II. La mustra dils recruits, cumedia en dus acts  
1. plazza 80 cts., 2. plazza 50 cts.

Per numerusa frequenza serecamondan gentilmein

ils mats da **Sedrun**

*Gasetta Romontscha nr. 11, 4 da mars 1886*

## 1886

Quell'autoritat (dertgira cantunala) ha entschiet sias deliberaziuns cun enviar anavos, muort las consequenzas la supplica dalla vischnaunca da **Tujetsch**, da schenghegiar ils 1000 francs, ch'ella sto tenor sentenzia dalla dertgira federala pagar al cantun sco spesas extragiudizialas per siu process piars pervia dil manteniment dalla strada **Alpsu**.

*Gasetta Romontscha nr. 13, 24 da mars 1886*

## 1886

L'exposiziun da s.h. taurs, tenida ils 24 da mars a **Trun**, ei stada ina dallas pli bialas da plirs onns enneu. Igl ei stau cumpariu 27 tgaus, tuts bein envernai, malgrad la generala munconza da Pavel. Sequents personals han obtenu premis per lur bos: ... Ella 3. classa: ... Florin Huonder da **Sedrun**, Jos. Berther da **Rueras**, ...

*Gasetta Romontscha nr. 14, 1 d'avrel 1886*

## 1886

Il pli car fein ei tscheidiatsch vegnius vendius a **Tschamut** egl ingant, quel ha pagau il maisudiu

prezi da 86 frs. la tschuncheisma ni 21.50 frs. il fiertel. A **Mustér** ei vegniu empraua da schar vegnir fein da **Cuera** che vegn franco **Mustér** 8 ½ la glivra, mo vegn ualvess ad esser schi buns sco il nies.

*Gasetta Romontscha nr. 15, 8 d'avrel 1886*

## 1886

(Correspondenza americana.) La Gasetta Romontscha ha a siu temps rapportau ch'ei seigi sil territori dil **Dacota dil Sid** ella republica dils **Stadis Uni** vegniu fundau da famiglias romontschas ina nova colonia, alla quala ei seigi en honor da nossa veglia patria vegniu dau il num **Badus**. Ussa savein nus relatar, ch'ei seigi uonn vegniu baghegiau cheu ina baselgia catolica tras las unfrendas dallas 70 famiglias romontschas, tudestgas ed englesas, che sesanflan en quei niev liug. Pliras han dau 100 dollars perina e pagan aunc annual 10 dollars ina, per salarisar lur plevon engles, che ha era empriu empau romontsch, per saver conversar ton meglier cun glieud veglia romontscha, alla quala ei va vess d'emprender igl engles. Ella libra **America** han tuttas confessiuns e tuttas uisas scolas cumpleina libertad, il stadi ha neginas marveglias da semischedar en fatgs da religiun, sco quei che biars prepotents signurs dalla Svizra han per moda da far.

*Gasetta Romontscha nr. 15, 8 d'avrel 1886*

## 1886

Ils quens dil concursant marcadont Thomas Huonder da **Tujetsch** retscheivan statalter Gion Paul Berther ed assistent A. Schmid da leu.

*Gasetta Romontscha nr. 17, 22 d'avrel 1886*

## 1886

... La repartiziun dils subsidis per las scolas da laver ei daventada sco onn. Las 16 scolas realas ni d'ulteriura cultivaziun a **Cuera**, **Glion**, **Trun**, **Tujetsch**, **Trin**, **Flem**, **Almens**, **Tusaun**, **Ziraun** etc. han obteniu 190 frs. ina, sis han aunc obteniu in supplement da 150 frs. ord il legat Valentinic.

*Gasetta Romontscha nr. 23, 2 da zercladur 1886*

## 1886

### Annunzia da mort

En profunda dolur notifichein nus a parents ed enconuschents, ch'ei hagi plaschiu agl Altissim da clamar ord questa veta, speranza tier la veta celestia nies car fegl e frar

### Duri Vigeli Deflorin

provedius cun tuttas consolaziuns da nossa s. religiun, spartius questa damaun, suenter ina liunga e dolorusa malsogna, ella vegliadetgna da 24 onns e 10 meins. Recumandein l'olma dil car defunct alla pia memoria da tuts parents ed enconuschents.

Duri Deflorin, bab

Giachen Giusep Deflorin, frar

Barbla Cathrina Deflorin, sora

**Tujetsch-Camischolas**, ils 16 da zercladur 1886

*Gasetta Romontscha nr. 25, 17 da zercladur 1886*

## 1886

### Annunzia da mort

A parents ed enconuschents purtein nus cheutras la tresta nova, ch'ei hagi plaschiu agl Altissim da clamar ella perpetnadad nies carissim quinau ed aug

### Statalter Giachen Antoni Beer

El ei morts igl 1. dad uost suenter ina liunga malsogna, provedius cun tuts ss. sacraments dils moribunds, en ina vegliadetgna da 65 onns e miez.

Nus recumandein l'olma dil preziau defunct alla pia memoria da tuts nos parents ed enconuschents.

Ils parents en malencurada:

Giachen Antoni Berther, quinau  
Vigeli Berther, nevs  
Maria Lisabet Berther, niazza  
er'en num dils auters parents  
**Tujetsch-Gonda**, ils 10 d'uost 1886  
*Gasetta Romontscha nr. 33, 12 d'uost 1886*

**1866**

### **Tiers jasters**

Tier la zavrada da nuorsas a **Tujetsch** ei vanzau sequentas nuorsas, che sesanflan tier Thomas Berther a **Camischolas**:

- 1) In tschanc ner, dretga furcletta osum e davon en ed ina ruosna.
- 2) In tschanc alv entir, dretga fess, seniastra dus dents resgai davon en.
- 3) In tschanc alv entir cun corns, dretga in snez davon e davos en, seniastra in davos en.
- 4) Ina tgigisch nera, dretga mugrin e furcletta davos en.
- 5) In anugl alv cu corns, seniastra mugrin davon ed in snez davos en.
- 6) In anugl ner cun corns, dretga dus snezs davos en, seniastra furcletta osum, ina ruosna ed in snez davos en.
- 7) In tschanc ner cun corns. Seniastra giudasum ed in snez davos en.
- 8) In tschanc alv, dretga in snez entraviers davos en, seniastra giudasum.
- 9) Ina nuorsa alva, seniastra ina furcletta davon en ed in snez davos en.

*Gasetta Romontscha nr. 42, 14 d'october 1886*

**1886**

### **Tiers jasters**

Tier Tumaisch Berther a **Camischolas** in tschanc ner, seniastra giudasum ed in snez davon en.  
*Gasetta Romontscha nr. 43, 21 d'october 1886*

**1886**

S. Martin ei a **Mustér** buca circulau tons daners sco auters onns, ins senteva l'absenza dil capomarcadont da buna memoria. Las miserablas vias han reteniu la solita processiun da **Tujetsch**, buc aber ils negoziants e capitalists siviars.

*Gasetta Romontscha nr. 47, 18 da november 1886*

**1886**

### **Tiers jasters**

A **Rueras** tier Gion Fidel Berther in anugl muot alv, dretga fess e dus snezs davos en, seniastra fess.

*Gasetta Romontscha nr. 48, 25 da november 1886*

**1886**

Sillas miserablas fieras da **Ligiaun** da quest atun era ei da temer, ch'ils artavels dil defunct marcadont uranès Furrer vegnessien muort sia surcargada cun tiers e sias anteriuras sperditas ad empruar da far far in rabatt ses crediturs. Quels dis ei lur agent cumparius en **Surselva** ed ha schau a quels, che vevan dau tiers al Furrer, las letgas da secuntentar cun 50 %, ni ch'ins laschi ir il concuors sulla relaschada facultad dil defunct, e lura sappien ei mirar tgei ch'ei survegnien. Denter dus mals han ils crediturs unitamen legiu ora il pign, enstagl spitgar aunc in onn e per lu riscar da survegnir pauc, han ei fatg la segira e priu ils 50 %, ch'ein vegni pagai ora grad leu. Particulars da **Mustér**, **Tujetsch** e **Medel** han cheutras stuiu spiarder varga 20'000 francs.

*Gasetta Romontscha nr. 51, 16 da december 1886*

**1887**

### **Annunzia**

Il suittascret selubescha da far enconuschent ad in ludeivel publicum, ch'el seigi uss secolocaus a **Rueras** ed hagi leu tschentau si in negozi da vinternalias, curom, ferradira etc.

Empermittend da survir cun tutta attenziun e per fetg moderai prezis, serecamonda gentilmein  
Anselm Capeder-Cavegn  
**Rueras**, ils 27 da decembre 1886  
*Gasetta Romontscha nr. 2, 13 da schaner 1887*

### 1887

Igl ei gia daditg vegniu seteniu si, che l'**Alpsu** che metta la **Surselva** en communicaziun cull'impurtontissima viafier gottardista, hagi mo treis meins in cuors postal e seigi gl'entir unviern serrada. Finalmein ha il magistrat dalla **Cadi** concludiu da far ils necessaris pass per far tener quei cuolm aviarts gl'entir onn. Gl'onn vargau ha nies cantun dau ora 10'417 frs. per tener aviert ils cuolms. Da quei ha la **Surselva**, culla quarta part della populaziun cantunala, obteniu pauc ni nuot, aschia ch'ins po spitgar da vart dil **Grischun** pintg'opposiziun, ed **Uri** vegn sin maniera ni l'autra speronza era porscher maun. Hariar ei quei che munta.

*Gasetta Romontscha nr. 4, 27 da schaner 1887*

### 1887

#### Teater a Sedrun

Ei vegn menau si a **Sedrun** ella Cruna  
Dumengia proxima, ils 13 d.q. allas 2  
Gievgia grassa, ils 17 d.q. allas 12  $\frac{1}{2}$   
Gliendisdis Tscheiver, ils 21 d.q. allas 12  $\frac{1}{2}$

**I. Gion Calder**, drama en 4 acts

**II. Ils Cavascazis**, cumedia en 2 acts

Prezis d'entrada:

Ina plazza reservada 2 frs.

1. plazza: 1 fr.

2. plazza: 70 rps.

Affons da scola: 30 rps.

Tier numerusa frequenza envida en gentilmein

Il comite dils mats da **Sedrun**

*Gasetta Romontscha nr. 6, 10 da fevrier 1887*

### 1887

L'alp **Cavradi** en **Tujetsch**, appartenenta alla pervenda da **Trun**, vegn sin primavera schada vi per in ni plirs onns.

Da s'adressar tier

**La suprastanza da Trun**

*Gasetta Romontscha nr. 8, 24 da fevrier 1887*

### 1887

#### Annunzia

Il suttascret selubescha da far enconuschen ad in ludeivel publicum, ch'el seigi provedius en sia stizun cun da tuttas sorts ferradiras, material da baghegiar, glas, uaffens etc.

Empermittend da survir cun tutta attenziun e per fetg moderai prezis serecamonda gentilmein  
Anselm Capeder-Cavegn

*Gasetta Romontscha nr. 10, 9 da mars 1887*

### 1887

Il suttascret venda per in raschuneivel prezi in bi sortiment d'uaffens per in uhrenmacher, appartenent ad in client vegnius ord **Germania**. El ha schau ver quels uaffens in bien uhrenmacher, che ha declarau quels per buns uaffens e sufficients. Aspirants san s'adressar tier Gion Antoni Soliva, scolast a **Tujetsch**

*Gasetta Romontscha nr. 11, 17 da mars 1887*

**1887**

### Dolurs dils dents

calan immediat si tras siu renomau remiedi, ch'ei aunc danovamein vegnius remedius. Ei vegn garantiu il success. Ins sa haver quel en guoterets da 80 ct. e dad 1 fr.

Ei vegn encuretg depots.

Distel, mieri da dents a **Schaffusa**.

Ins sa retrer quei remiedi da frars Cavegn ella Cruna a **Sedrun**

*Gasetta Romontscha nr. 12, 24 da mars 1887*

**1887**

A **Trun** ein stai 28 taurs. ... Igl ei vegniu anflau gronda amegliuraziun e progress tiers las vischnauncas da **Breil**, **Trun**, **Sumvitg** e **Mustér**, era tier **Tujetsch** e **Medel**, ed exprimiu la speronza, ch'ei vegni cuntuau sin quei pei.

Premis han obtenu:

I. classa

9) in mutg da gerau Gion Andriu Berther a **Tujetsch** 70 frs.

Premis d'honor ei vegniu dau ... ed a gerau Bruno Soliva a **Tujetsch**.

*Gasetta Romontscha nr. 13, 31 da mars 1887*

**1887**

Per amur dalla verdad stuein nus visavi allas malfundadas tschontschas, ch'il president communal da **Tujetsch** seigi igl inserant digl inserat sul tscheiver en nr. 7 dalla Gasetta Romontscha declarar, che quei seigi tuttavia buc il cass; quei signur ha mai tarmess ni plidau cun nus enzatgei sur da quei.

*Gasetta Romontscha nr. 16, 21 d'avrel 1887*

**1887**

Tuts cudischs ch'ins vul confidar a mi per schar ligiar en, san ins deponer e turnar a retscheiver anavos cun pagar la ligiadira tier ils dus sequents depots: a **Sumvitg** tier la Crusch Alva ed a **Trun** tier marcadont Anton Pajarola da Francestg. Segirond ina buna lavour e dueivel prezi serecamonda

Emanuel Deragisch, ligiacudischs a **Tujetsch**

*Gasetta Romontscha nr. 16, 21 d'avrel 1887*

**1887**

Il suittascret fa enconuschent al ludeivel publicum dil contuorn, ch'el seigi secolocaus a **Sedrun** ed hagi tschentau si cheu ina fravia. El ei prompts da retscheiver scadina empustaziun da siu mistregn, empermettend buna lavour per in raschuneivel prezi. Per numerusas empustaziuns serecamonda

Sebastian Beer, fravi a **Sedrun**

*Gasetta Romontscha nr. 19, 21 da matg 1887*

**1887**

Nominas dalla dertgira districtuala **Reinanteriur**: ... gerau Vigeli Berther, **Sedrun**.

*Gasetta Romontscha nr. 23, 8 da zercladur 1887*

**1887**

... Ins tertgass tuttina che la Confederaziun che ha dau ad **Uri** in bi subsidi pella construcziun dil stradun dall'**Alpsu**, savess zacuder si e constrenscher il guvern uranès da procurar, ch'el arvi quel sigl emprem zercladur. Tras premura privata han denton las empremas crotschas saviu passar quei pass ils 16 d.q. La posta ha refretg l'avertura da siu cuors sils 20 d.q.

*Gasetta Romontscha nr. 24, 16 da zercladur 1887*

**1887**

Sonda sera ei stau in terribel temporal sill'**Alpsu** che ha ruinau in toc la via e reteniu il carr da

posta per quella sera. Pli horribels ei staus igl urezi da dumengia notg sin gliendisdis. Il terribel tunar e camegiar da mesanotg ha fatg sterment a bia glieud, mo per ventira ha el cuzzau mo mes'ura e fatg negin donn.

*Gasetta Romontscha nr. 31, 4 d'uost 1887*

**1887**

### **Ord il Fegl official**

Cadi: Vieua Genoveva Hendry ha surpriu d'alimentar vieua Barla Catrina Peder, omisduas da **Tujetsch**. Ils quens dall'emprema sco era eventualas reclamaziuns encuter quei vitalezi ein da consignar a siu ugau, president communal Cristian Muggli da leu. – Il giuven Carl Cavegn da **Sedrun** ei libers dad ugau.

*Gasetta Romontscha nr. 31, 4 d'uost 1887*

**1887**

Sco igl ei a nus vegniu raquintau posteriuramein ha il tun tiels temporals da tscheidi mazzau sil cuolm **Tgom** en **Tujetsch** treis vadials ch'eran sut in pegr – negin vul seregurdar leu d'in semegliont cass.

*Gasetta Romontscha nr. 34, 25 d'uost 1887*

**1887**

### **Annunzia da mort**

En profunda dolur purtein nus cheutras a nos stimai parents ed enconuschents la tresta nova, ch'ei hagi plaschiu agl Altissim da clamar tiella veta perpetna nies car bab, sir e tat

#### **Statalter Gion Andriu Berther**

El ei morts ils 17 d.q. en ina vegliadetgna dad 81 onn ed 8 meins, provedius cun tuttas consolaziuns da nossa religiun.

Nus recumandein l'olma da nies car defunct alla pia memoria da tuts parents ed enconuschents.

**Camischolas**, ils 20 d'uost 1887.

La famiglia en malencurada

Gion Andriu Berther, fegl

M. Cristgina Berther n. Deflorin

M. Carmelia Berther, biadia

Gion Andriu Berther, biadi

Stiafen Berther, biadi

*Gasetta Romontscha nr. 34, 25 d'uost 1887*

**1887**

Gliendisdis vargau, ils 3 d'october, ha in barschament egl uclau **S. Leci (Cavorgia)** visvi **Sedrun** mess l'entira vallada da **Tujetsch** en alarm. Dus gronds clavaus, empleni cun nov ladretschs Pavel, ein en paucas uras stai preda da furiusas flommas. Il fretg da liunga stentusa lavur e da biars suadetschs da paupra glieud ei en cuort svanius en stgiras neblas. Il suffel freva per ventira las flommas naven dallas treis casas grad dasperas, ed igl ei perquei reussiu all'admirabla e ludeivla luvrusadad e curascha dalla glieud da constrenscher il fiug sin quels dus baghetgs. La caschun digl incendi duei esser stau l'imprecauziun d'affons ni tubacheders vid glin, cavegliaus sill'a punt nuegl. Sigl emprem clom d'agid ein ina massa habitants da **Mustér** serendi sill'a plaza da fiug. Cun quella caschun han ins experimentau con avantagius in telegraf ni telefon fuss per quell'isolada vischnaunca.

*Gasetta Romontscha nr. 40, 6 d'october 1887*

**1887**

### **Engraziamenti**

A Tut quels che han tiel barschament dils 3 d.q. a **Cavorgia** gidau ni vuliu gidar a supprimer il fiug, seigi cheutras mess giu in cordial engraziamenti. Vegli Dieus remunerar tuts e pertgirar in e scadin da semegliontas disgrazias.

La suprastonza da **Tujetsch**

**Rueras**, ils 4 d'october 1887

*Gasetta Romontscha nr. 40, 6 d'october 1887*

### 1887

Nuorsas vanzadas tier la zavrada a **Tujetsch** e da haver tier Tumaisch Berther a **Camischolas**:

- 1) In tschanc grisch, seniastra mugrin davon en, ina rusona ed in snez davos en.
- 2) In tschanc ner entir, en omisduas ureglia ina ruosna gronda en tiel tgau.
- 3) In tschut alv, dretga in snez davon enagiu, seniastra giudasum ed ina furcletta davon en.
- 4) In tschanc alv, dretga giudasum ed in senz davon en, seniastra ina furcletta davos en.
- 5) Nuorsa nera, fess pauc osum ed in snez davos en, tut en omisduas ureglia.
- 6) In tschanc ner, dretga fess e dus snezs davos en, seniastra in snez davos en.

*Gasetta Romontscha nr. 40, 6 d'october 1887*

### 1887

Suenter la fiera da **Tusaun** ein roschada marcadonts tudestgs vegni pella **Surselva** si tochen **Tujetsch** e **Medel** e cumprau si vaccas e genetschas mo per prezis fetg mediochers.

*Gasetta Romontscha nr. 41, 13 d'october 1887*

### 1887

A **Camischolas** tier Thomas Berther:

- 1) In tschanc grisch, dretga furcletta osum ed ina ruosna, seniastra in mugrin davos en.
- 2) In tschut ner, dretga in snez davos en, seniastra dus snezs davos en.

*Gasetta Romontscha nr. 41, 13 d'october 1887*

### 1887

#### **Annunzia da mort**

En profunda dolur e tristezia communichein nus a parents ed enconuschents, ch'ei hagi plaschiu agl Altissim da clamar ord questa veta tier la perpetnadad nossa cara sora, quinada ed onda

#### **M. Nescha Jacomet**

Ella ei spartida la notg dils 29 d'october, suenter ina liunga e dolorusa malsogna, provedida cun tuttas consolaziuns da nossa s. religiun en ina vegliadetgna da 58 onns e 9 meins.

Nus recumandein la cara defuncta alla pia memoria da tut nos parents ed enconuschents.

**Tujetsch**, ils 23 d'october 1887

Lorenz Jacomet, frar

Mihel Anton Meissen, quinau

Pils nevs e niazas:

Rest Valentin Beer

*Gasetta Romontscha nr. 43, 27 d'october 1887*

### 1887

Voluntarias scolas dalla sera ei stau mo treis: a **Mustér**, **Grono** e **Rueras**, che han obteniu in pign subsidi dalla societad da cuminetel.

*Gasetta Romontscha nr. 44, 2 da november 1887*

### 1887

#### **Tiers jasters**

A **Cavorgia** tier Giachen Antoni Schmet ina starleglia gaglia, dretga giudasum e ruosna, seniastra giudasum fess e ruosna.

*Gasetta Romontscha nr. 44, 2 da november 1887*

### 1887

#### **Cadi**

Sulla relaschada facultad dil defunct Lezi Loretz da **Camischolas** va il clom da quens. Assistent G. Antoni Schmed a **Sedrun** retscheiva tals.

*Gasetta Romontscha nr. 45, 10 da november 1887*

**1887**

**Tiers jasters**

Tier Luis Jagmet a **Bugnei** ina tgigisch nera, dretga furcletta osum e snez davon en, seniastra furcletta osum e dus snezs davon en.

*Gasetta Romontscha nr. 46, 17 da november 1887*

**1887**

**Annunzia da mort**

A parents ed enconuschents purtein nus la tresta nova ch'ei hagi plaschiu agl Altissim da clamar ord questa tier la veta perpetna nies car bab, sir e tat

**signur gerau Hans Giachen Beer**

Suenter ina liunga malsogna eis el spartius ils 5 d.q. en ina vegliadetgna da 82 onns e 7 meins, provedius cun tuttas consolaziuns da nossa s. religiun.

Nus recumandein l'olma da nies car defunct alla pia memoria da tut nos parents ed enconuschents.

**Tujetsch**, ils 14 da november 1887

Stiafen Beer, fegl

Mariarta Berther-Ber, feglia

Anna Maria Beer, feglia

Lezi Huonder, schiender

Gion Paul Berther, schiender

Giachen Antoni Huonder en num da tut ses biadis

*Gasetta Romontscha nr. 46, 17 da november 1887*

**1887**

En benefeci dils donnegiai tras il barschament da **Cavorgia** ei concludiu da schar prender si ina collecta el cumin.

Mira protocol da cumin nr. 18, pag. 138 sut datum dils 21 da november 1887.

*Notizia da pader Baseli Berther*

**1887**

Signur Biart da **Tujetsch** ha suenter haver giu finiu ses studis teologics surpriu la caplania da **Rabius**. Signur Alig ha puspei bandunau **Tujetsch** ed ei serertratgs sin sia anteriura caplania a **Sursaissa**.

*Gasetta Romontscha nr. 47, 24 da november 1887*

**1887**

**Tiers jasters**

A **Tujetsch (Gonda)** tier Josef Antoni Beer ina nuorsa nera, dretga tagliau giu miez e fildirom, seniastra giudasum e fess ed ina furcletta rodunda davos en.

*Gasetta Romontscha nr. 47, 24 da november 1887*

**1887**

**Venal**

In vadi da 3 jamnas tier Gion B. Beer a **Sedrun**.

*Gasetta Romontscha nr. 50, 15 da december 1887*

**1887**

**Annunzia da mort**

Cun profunda dolor fagein nus cheutras da saver a parents ed enconuschents ch'ei hagi plaschiu agl Altissim da clamar ella perpetnadad nossa cara consorta e mumma

**Ona Maria Biart**, nata Schmed

Ella ei morta ils 14 d.q. provedida cun tut ils ss. sacraments dils moribunds en ina vegliadetgna da 64 onns e 4 meins.

Nus recumandein la preziada defuncta alla pia memoria da tut nos enconuschents.

Vigeli Josef Biart, mariu  
Barla Turtè, feglia  
Vigeli Josef, Josef Antoni ed Alois, fegls  
**Tujetsch**, ils 19 da decembre 1887  
*Gasetta Romontscha nr. 51, 22 da decembre 1887*

**1887**

**Cadi**

Il concours ei declaraus sur vieua Margreta Peder e Lezi Antoni Peder da Martin Peder p.m., lur retschevider da quen ei gerau militaric Gion Antoni Schmed, tuts da **Tujetsch**.  
*Gasetta Romontscha nr. 51, 22 da decembre 1887*

**1888**

---

**Ingant a Tujetsch**  
(**Cavorgia**)

Sonda, ils 7 da quest allas 10 avomiezdi, vegn vendiu en public ingant, en casa dil concursant Peder ils tiers: 3 vaccas, 2 vadialas, 9 cauras, 10 nuorsas, era fein da schar trer naven.  
Tier numerusa frequenza envida

Il cummissiunau

*Gasetta Romontscha nr. 1, 5 da schaner 1888*

**1888**

A **Selva**, il pli prigulus liug ella val **Tujetsch** pellas lavinas, ein gia Mardis Tscheiver dus frars Peder, in da 18 ed in da 15 onns, che levan ir per lenna, stuli ella lavina. Sil clom d'agid ein umens da **Rueras** spert serendi sillla piazza dalla sventira, mo muort las stradas serradas giu, han ins a **Mustér** neginas novas, schebein ils disgraziai seigien vegni libera ni buc.

*Gasetta Romontscha nr. 7, 16 da fevrier 1888*

**1888**

Dils dus disgraziai da **Selva** han ins malgrad tutta tscherca negins fastitgs.

*Gasetta Romontscha nr. 8, 23 da fevrier 1888*

**1888**

Sulla davosa disgrazia vegn ei scret a nus: Igl allegau trest cass ha provocau en l'entira vischnaunca da **Tujetsch** gronda consternaziun e tema, denton ei cheu era semanifestau legreivla carezia proximala entras la promtadad, cun la quala tut ei dau neutier per prestar agid, sche quei fuss stau pusseivel. Honorifica menziun meretan nos aultreveri signurs spirituals plevon Eduard Muoth e caplon Antoni Wenzin, ils quals ein malgrad la schliata via ed igl aunc existent prighel da lavina sin via, cumpari spertamein sil plaz da sfortuna, e quel buca bandunau aschi ditg sco ins saveva aunc haver la minima speranza d'anflar ils disgraziai en veta.

*Gasetta Romontscha nr. 8, 23 da fevrier 1888*

**1888**

La vischnaunca da **Tujetsch** ha dumengia vargada concludiu d'instanziar, che la fiera dil zercladur dueigi vegnir tenida a **Sedrun** sco entochen da cheu.

*Gasetta Romontscha nr. 10, 8 da mars 1888*

**1888**

En **Surselva** tut che plira e selamenta giud il tardament dalla primavera e la gronda scartezia da fein, cunzun tiella classa pauperila, che tegn mo cauras e nuorsas, che han quasi gl'entir unviern giu arrest e semagliau si sesez. Ins segida cun dascha, barbaeagn, terc e frina. A motiv dalla trittadad vegnan bia tiers manedels a ventscher. Mo era ils perveseders dalla biestga ston serrar il bratsch stagn fetg, cheutras vegnan era las vaccas serradas e pon per uonn buca si cul latg. A

**Tujetsch** ei els plauns aunc 2 bratscha neiv, a **Mustér** 5 quartas e tier quei ha ei aunc neviu ils 10 tochen **Cuera**. Quei liung e ruh unviern cun sia scartezia da fein vegn a restar ditg en memoria, mo sepronza era dar gl'impuls, che bia casadas tegnan sigl avegnir pli paucs tiers sur unviern, mo san envernar quels ton meglier e far megliera economia. Detti Dieus, che quels schliats onns pils purs prendien ton pli gleiti ina fin!

Oz ils 12 neiva ei puspei pir che mai!

*Gasetta Romontscha nr. 15, 12 d'avrel 1888*

### 1888

Il matg ei arrivaus e cun el speronza la bialaura. Tochen sur **Mustér** si ei tut terrein ed ins entscheiva cullas lavurs dils funs. **Tujetsch** ha aunc  $\frac{1}{2}$  bratsch neiv.

*Gasetta Romontscha nr. 18, 2 da matg 1888*

### 1888

**Cadi.** Vigeli Schmed ei ugau da siu absent fegl Cristoffel Schmed, omisdus da **Tujetsch**.

*Gasetta Romontscha nr. 18, 2 da matg 1888*

### 1888

Il giuven dils dus disgraziae frars Peder (*Barclamiu (1872) e Vigeli Giusep Peder (1870)*) da **Selva**, ch'eran vegni Mardis Tscheiver (*ils 14 da fevrer 1888*) ella lavina, ei quels dis vegnius anflaus el risti fatgs el **Rein** per retener lur cadavers, sch'els duessen enten terrenar ir per l'aua ora. Ord siu tgau triblamein sbantunaus po ins era tier quei disgraziau concluder, ch'el hagi anflau ina sperta mort.

*Gasetta Romontscha nr. 22, 30 da matg 1888*

### 1888

Era il pass **Gelgia** ed **Albula** ein ussa aviarts per carrs. L'**Alpsu** ed il **Lucmagn** han dil maun grischun pauca neiv, aschia ch'els san sils 15 da zercladur vegrifatgs carregiabels cun pintga breigia. Tut autra lavur dat ei d'arver gl'emprem pass sil territori uranès. Ferton ch'il viè grischun ha fiers tiara tscheidiatsch e che quella ha magliau giuaden la neiv in bien meter pli a funs, che nua ch'igl ei buca fiers, ei quella avantagiusa lavur daventada pér dacuort dil maun d'**Uri**. L'uniun ch'ei seformada leu per promover la frequenza dils jasters, duess era schenghegiar empau attenziun alla **Alpsura**. – Ils viès han giu uonn breigia da survegnir tratsch muort la nevada e la tiara schelada, mo els duessen gia igl atun metter ensemes quel e nudar cun in signal.

*Gasetta Romontscha nr. 22, 30 da matg 1888*

### 1888

Per correcziun d'ina notizia en nies davos numer, che ha fatg la ronda en bia gassetas, remachein nus, ch'ils dus frars disgraziae ella lavina da **Selva** eran dalla schlatta Peder e buca Wenzin. Malgrad la progressonta terrenaziun fa la massa neiv da quella lavina aunc ussa stermont als consideraders da quella.

*Gasetta Romontscha nr. 23, 7 da zercladur 1888*

### 1888

Sil **Lucmagn** e sill'**Alpsu** vegn luvrau cun tutta forza per arver il pass. Essend ils umens dalla val d'**Ursera** fatschentai culla **Furca** e garegiond stagn grondas schurnadas, ha il viè Poltera procurau al delegau uranès S. Christen ina roscha umens da **Tujetsch**, per fierer ora la neiv dil maun d'**Uri**, aschia ch'ins ha sepronza ch'il stradun vegni aviarts gia avon miez zercladur.

*Gasetta Romontscha nr. 23, 7 da zercladur 1888*

### 1888

Il secund dils frars Peder (*Barclamiu 1872*), disgraziaus tras la lavina a **Selva**, ei quels dis vegnius anflaus ell'aua.

*Gasetta Romontscha nr. 24, 14 da zercladur 1888*

## 1888

L'**Alpsu** ei vegnida aviarta per crotschas ils 12 d.q. (e buc ils 10 sco las gassetas da **Cuera** rapportan) e gia ils emprems dis ei passau dabia crotschas e turists. Il **Lucmagn** vegn aviarts questa sera. Sul **Bernina** han ils carrs saviu passar ils 8.

*Gasetta Romontscha nr. 24, 14 da zercladur 1888*

## 1888

A **Tujetsch-Rueras** tier gerau Christian Muggli sesanflan 3 stiarlas alvas cun stgalin buca nudadas e duas tgigischs, in'alva, ureglia dretga ina furcletta ed in snez davon en, ella seniastra in snez davon en entraviers enagiu ed in fildirom; ina nera: ella dretga ina furcletta orasum ed in snez davon en.

Quels tiers ein vegni pindrai a **Cavorgia Sura** el prau ed il proprietari sa quels prender anavos tier il suittascret pagond occurridas spesas e donns.

Muggli Christian

**Tujetsch**, ils 13 da zercladur 1888

*Gasetta Romontscha nr. 24, 14 da zercladur 1888*

## 1888

Amiez la veta la mort seschlueta! Il cavrer *Giachen Antoni Curschellas* (1872) da **Camischolas**, in giuven da circa 17 onns, ei sin ina plauen semess giu per durmir, la capiala sut il tgau ed il fest enta maun, mo el ei buca levaus si pli. Veggend las cauras la sera persulas a casa, han ils vischins sminau ina sventira, ein spert i sillla tscherca da lur cavrer ed anflau quel morts ella descretta posizion. Cumpatg ch'ei era vegniu giu in crap ch'ha sturniu el.

*Gasetta Romontscha nr. 25, 21 da zercladur 1888*

## 1888

Oz, ils dus d'uost da miezdi, ei la posta dall'**Alpsu** arrivada a **Mustér** cun ina grossa cozza neiv sin tetg; egl ault neiv'ei, ella bassa tun'ei e dracca, denton ein las auas tschessadas empau.

*Gasetta Romontscha nr. 31, 2 d'uost 1888*

## 1888

Dumengia vargada, entuorn las 9 dalla sera ha anetgamein gl'alarm da fiug destadau ils vischins da **Sedrun** ord il sien. Ina casa lenn cun in clavau cunfinont enamiez numerus auters baghetgs, stevan en aultas flommas, ord las qualas ils dus habitants da quella casa, in um vegl ed ina fumitgasa, ch'eran medemamein schon a ruaus, han pudiu vegnir clamai tras il grir e clamar dad ina vischina. Al spert succuors dils vischins e lur energica lavur eis ei reussiu da tener concentraru il fiug mo sin quels dus baghetgs, schegie ch'il fiug seresava cuntuadamein ora sin plirs baghetgs vischinonts, casas e clavaus plein fein. Ord la casa intschendrada han ins pudiu liberar sulettamein empau caschiel ord tschaler, ferton ch'ins ei ella furia vegnius memia tard sil patratg da liberar las 12 cauras ord nuegl, las qualas ins ha lu anflau stenschidas, senz'esser segirau. Sur igl origin dil fiug han ins negins segirs indecis; ins suppona che quel seigi ruts ora el tgamin.

Tier quella caschun ei a **Sedrun** par'ei era vegniu experimentau la calamitad, la quala ins vegness probabel aunc ad experimentar en bein enqual auter liug dalla **Surselva** en in cass da barschament, numnadamein, che las sprezzas e rors erien buc en bien uorden e che la glieud ei buca instruida egl arranschament da quellas pil mument decisiv, aschia che las sprezzas ein p.e. el vertent cass stadas pér en duas uras en acziun, muort munconza d'exercezi ed enconuschiantscha. In saluteivel avis dad empruar beinduras las sprezzas e s'exercitar el tractament da quellas.

*Gasetta Romontscha nr. 36, 6 da settember 1888*

## 1888

Ils 2 d.q. ha il s'approximond unviern puspei tarmess dapertut ina malvegnida avon-guardia, cun cuvierer ils aults cun ina cozza da neiv entochen profund giu els uauls. Ella **Surselva** fuva

quella setschentada tochen **Tschamut**. Quella neiv, unida cun fetg humida freida temperatura ha fugentau ils biars curants els hotels ed era necessitau da descargar entginas alps, perfin a **Cuera**. La bialaura ch'ei lu immediat sissu cumparida, ha puspei fatg supportabla la situaziun ellas alps, sche mo quella ha liung cuoz, schiglioc eis ei da haver gronda tema, ch'ils èrs vegnien uonn buca madirai, cunzun els aults, era quels a **Mustér** e plinengiu ein aunc zun verds.

*Gasetta Romontscha nr. 36, 6 da settember 1888*

### 1888

Cun plascher prendein nus si la rectificaziun dalla correspondenza el davos numer sugl incendi a **Sedrun**, la quala derivava zuar era dad in aspectatur da quel, che la sprezza seigi schon en ina buna mes'ura e buca pér en duas uras stada en acziun e ch'ils umens giuvens, ch'ein schiglioc plitost versai el survetsch dalla sprezza, erien naturalmein absents a militar. – Nus selubin cun quella caschun aunc ina remarca per mauns dalla ludeivla vischnaunca da **Tujetsch**, ton pli che nus essan tier quei cass da vischins da **Tujetsch** sez, vegni insinuai, da prender l'iniziativa tier la recumandaziun a quella vischnaunca, d'ereger in telegraf ni telefon cun **Mustér**, che vegness en scadin cass buca mo a purtar in desiderau levgiament dil commerci cun quella vischnaunca, mobein che fuss ual en cass da barschaments gie da grondissim néz per recurir da vischnauncas vischinontas savens fetg necessari immediat agid.

*Gasetta Romontscha nr. 37, 13 da settember 1888*

### 1888

Plirs negoziants bavarès ein vegni dalla **Surselva** si tochen **Tujetsch** per cumprar vaccas e genetschas, mo levan buca si culs prezis ed han cumprau zun pauc.

*Gasetta Romontscha nr. 38, 20 da settember 1888*

### 1888

Malgrad la miserabl'aura ein marcadonts tudentgs vegni dalla **Surselva** si tochen **Tujetsch**, mo negoziu pauc.

*Gasetta Romontscha nr. 41, 11 d'october 1888*

### 1888

A **Camischolas** tier Tumaisch Berther:

- 1) ina tgigisch grischa, seniastra giudasum, ina furcletta da mintga maun ed in fildirom blau;
- 2) in tschanc ner, dretga giudasum e priu ora ina furcletta quadra per miez ora ed in snez davos enagiu;
- 3) ina tgigisch nera, dretga in snez davos en, seniastra ina furcletta osum;
- 4) in anugl ner, dretga in mugrin osum davos en ed in snez davos en;
- 5) in tschanc ner, dretga giu miez l'ureglia ed in snez davos en, seniastra in snez davon en e priu ora mesa glina cun zaunga pez anavos;
- 6) ina nuorsa nera cun corns, dretga giu miez l'ureglia e dus snezs davos en, seniastra ina ruosna gronda e fess ora.

*Gasetta Romontscha nr. 41, 11 d'october 1888*

### 1888

A **Camischolas** tier Tumaisch Berther:

- 1) in anugl ner, dretga giudasum, seniastra fess;
- 2) ina nuorsa grischa, dretga giudasum, fess ed in snez davos en, seniastra fess;
- 3) ina nuorsa grischa, dretga giudasum, seniastra ina furcletta da mintga maun;
- 4) ina nuorsa nera, seniastra giudasum e dus snezs davon en.

*Gasetta Romontscha nr. 42, 18 d'october 1888*

### 1888

Dacuort ha la ludeivla vischnaunca da **Tujetsch** solemnamein celebrau la fiasta dalla renovaziun da sia baselgia parochiala a **Sedrun**. Numnada vischnaunca ha spendiu buca meins

che 8000 frs. per schar renovar igl interiur da sia baselgia cun frestgas picturas, la quala porscha ussa in surprendent, magnific aspect. Quella gronda, delicata lavour ei vegnida menad'ora el decuors da quater meins tras ils enconuschents picturs Frars Goss da **Regensburg**, che han menau ora lur lavour meisterilmein, cun bien gust e conform allas reglas artistas. Quella renovaziun ei tonpli stada adattada, che la baselgia da **Sedrun** cuntegn, extra dalla renomada tuor da mir ciclopic, ornaus cun gigantic maletgs al fresco da s. Gieri, dil renomau pictur tuatschin Diogg, aunc specialmein in object fetg artistic e da gronda valeta, numnadamein in altar lateral da Nossadunna el stil vegl gothic (15avel tschentaner) cun fina sculptura sin fundament sulerau. Artists dueigien schon haver purschiu 12'000 frs. per quella pèrla, (altars dil medem stil vesan ins en nies contuorn p.e. era a **Mustér** ella baselgia da s. Gada, s. Valentin etc.) Igl arviul dalla baselgia ei decoraus cun treis maletgs al fresco, representond enamiez Tschuncheismas e dus laterals s. Vigeli e levada. Era la scantschala en baselgia ei da considereivla valeta artistica. Quei pietus e bi senn fa tutta honor alla vischnaunca da **Tujetsch** ed ins sa gratular ad ella tier sia stupenta baselgia, e duei quei exemplar era stimular bein enqual vischnaunca da tener schuber e renovar lur casas da Diu.

*Gasetta Romontscha nr. 46, 14 da november 1888*

## 1888

A **Cavoria Tujetsch** tier Rest Giusep Jagmet ina tgigisch alva, seniastra in snez e mugrin davos en.

*Gasetta Romontscha nr. 46, 14 da november 1888*

## 1888

Ils 30 d.q. ei miert a **Sedrun** igl aultreveriu signur caplon dr. Maculin. In necrolog suonda el proxim numer.

*Gasetta Romontscha nr. 49, 6 da december 1888*

## 1888

### Annunzia da mort

Cun profunda dolur notificein nus ad in venerabel clerus, a parents ed enconuschents, ch'ei hagi plaschiu al Tutpusent da clamar ord questa, speronza tier ina megliera veta nies car sur frar e augsegner

### igl aultreveriu signur dr. Jacob Andreas Macolin

spartius oz da miezdi, suenter ina liunga malsogna, provedius cun tuttas consolaziuns da nossa s. religiun ella vegliadetgna da 72 onns e 4 meins.

Nus recumandein il preziau defunct alla pia memoria da tuts parents ed enconuschents.

Rosa Lanzani-Macolin, sora

Scoalstica Curti-Macolin, sora

G. Crisost Berther, nevs

era en num dils auters parents.

**Tujetsch e Como**, ils 30 da november 1888

*Gasetta Romontscha nr. 49, 6 da december 1888*

## 1888

A **Camischolas** tier Gion Paul Berther in anugl ner, dretga fess, seniastra in snez davos en.

*Gasetta Romontscha nr. 49, 6 da december 1888*

## 1888

Il defunct dr. Andreas Maculin, ch'ei ils 2 d.q. vegnius satraus a **Sedrun**, era naschius a **Rueras** ils 18 d'uost 1816, ha fatg ses studis filosofics e teologics el collegiun german a **Ruma** ed ei ils 18 da settember 1840 vegnius benedius ora. Turnaus ord la capitala catolica ei vegniu surdau ad el ina professura el seminari a s. Lezi. Suenter nov onns ha el resignau quella ed ha surpriu la pleiv da **Mols** el cantun **S. Gagl**. Gl'onn 1859 eis el vegnius clamaus silla pleiv da **Surcasti**, 1863 a **Pasqual** e 1866 sco caplon a **Selva** en sia vischnaunca nativa. Quei eremitasch, che ha mess neu ina rendeivla pervenda per siu spiritual, ha plaschiu al defunct schi bein, ed el sesanflava

cheu aschi cuntents ch'el ei staus leu 22 onns entochen ch'el ha sentiu, ch'ei cuozi buca ditg pli cun el. La stad vargada ha la pleiv da **Tujetsch** surdau ad el la caplania a **Sedrun**. Cun sia maslogna lev'ei buca vegnir meglier e la fiasta da siu sogn patrun s. Andriu, eis el spartius da quest mund. El sedestingueva sco predicatur ed ha schau anavos en manuscret ina gronda collecta da priedis. Versaus ella teologia ha el era en siu testament seregurdau dil vegl canon, che recumnadava al spiritual, che quei ch'el savonzi el survetsch dalla baselgia, duei el applicar per la baselgia e pils paupers, e fatg si 1000 frs. alla baselgia parochiala, 1000 frs. al pauperesser e 500 frs. alla meriteivla uniun da s. Lezi per cultivaziun da buns spirituals. **Tujetsch** vegn aschia a conservar quei generus vischin en buna memoria e dacormein agurar ch'el ruaussi en pasch.

*Gasetta Romontscha nr. 50, 13 da december 1888*

### 1888

In s.h. tiercasa da peil mellen clar, ureglia dretga giudasum e furcletta davos en – schar saver assistent Schmed a **Sedrun**

*Gasetta Romontscha nr. 50, 13 da december 1888*

### 1888

Nus schein suandar cheu il resultat dalla davosa dumbraziun dil pievel ord entgins cerchels. Igl emprem numer ei la factica populaziun da 1888 ed il secund ei quella da 1880, per indicar schebein la populaziun seigi ils davos onns carschida ni sminuida.

	1888	1880
Mustér	1329	1304
<b>Tujetsch</b>	<b>768</b>	<b>785</b>
Medel	527	561
Sumvitg	1169	1235
Trun	983	956
Breil	851	880
Schlans	184	179
<b>Total</b>	<b>5811</b>	<b>5899</b>

*Gasetta Romontscha nr. 51, 20 da december 1888*

### 1889

---

#### Annunzia

Il niev cudisch d'oraziuns ei cumparius titulaus l'Olma pietusa. Igl ei in zun edificont cudisch, screts d'in spiritual dalla Societad da Jesus, il qual cuntegn ultra dallas bialas oraziuns pil survetsch divin cun viaspas e himnis aunc 31 meditaziuns, las qualas duessen muncar en negina famiglia catolica. Quei cudisch vegn ligiaus en ferm e solid e vegn daus per in raschuneivel prezi. Ins sa retrer quel tier mes depots a **Mustér** tier Basel Columberg, a **Trun** tier Anton Pajarola ni direct tier il suittascret proprietari. A revendiders vegn dau rabat. Per numerosas empustaziuns serecamonda

Emanuel Deragisch, ligiacudischs a **Tujetsch**

*Gasetta Romontscha nr. 1, 3 da schaner 1889*

### 1889

(Correspondenza americana.) Ei fagess a nus in grond plascher, sche la Gasetta Romontscha admoness ils Romontschs el **Grischun** da bein ponderar avon che sedecider da serender

**ell'America.** Ei para, che bia emigrants hagien negina idea, co ei passa e repassa da tschei maun dalla mar. Biars arrivan tscheu cun vanas ideas, cunzun el schliet temps dad ussa. Glieud giuvna, ferma e frestga, anflan onz fadigia, schebein che nus havein tscheu da quels en abundonza.

Il pli deplorabel eis ei, ch'ei vegn neuaden ella **America** da quels schanis, ch'ein leuora nuot valeta e san sin neginas modas gudignar lur paun. Cun tals subjects va ei tscheu fetg mal. Avon 15 dis havein nus Romontschs stiuu sepassar si resolutamein e spedir in tal anavos ell'**Europa** sin quen da sia vischnaunca nativa, che veva tarmess el ell'**America** per fierer a dies ad autra glieud. Ins duei mo buca tertgar, ch'ins sappi duvrar ell'**America** da tutta sort glieud, na quei ei buc il cass. Duess ei era esser in che ha fatg atras bunas scolas e tratga da duvrar tscheu negin agid, sche secugliuna el malamein, cunzun sch'el ha buc empau da luvrar. El sto tscheu semetter en e far lavurs groppas e ruhas. Il di dad oz ei tscheu nuot meglier ch'ella veglia **Grischa**; vul in ir suenter sia clamada e professiun, sche stat el leuora meglier che tscheu. Nus Grischuns romontschs, che sesanflein tscheu, vessen grond plascher, sch'els mettessen quei ella gasetta, sinaquei ch'ins suandass il vegl ed experimentau proverbi che di: Stai a casa e setila via undreivlamein. Cun quei serius avislein nus haver salidau cordialmein nos vegls cumpatriots ella cara **Grischa** ed augurau ad els in bien niev onn.

Aschia scriva in emigrant sursilvan ord il stadi **Wisconsin**.

*Gasetta Romontscha nr. 2, 10 da schaner 1889*

## 1889

### Recumandaziun

Havend gleiti luvrau dus onns dil mistregn da fravi per cumpleina cumentientscha da mias postas, prendel jeu la libertad d'era serecumandar pli lunsch dentuorn per lavur. Jeu suprendel tuttas lavurs da fravi cun empermetter solida e prompta lavur e per in raschuneivel prezi. El medem temps engraziel jeu a mias actualas postas per la confidanza schenghegiada a mi e supplicond da conservar a mi quella vinavon.

Sebastian Beer, fravi a **Sedrun**

*Gasetta Romontscha nr. 3, 17 da schaner 1889*

## 1889

(Tarmess en.) Sco nus havein legiu en gassetas dalla **Germania** ei nies cumpatriot, signur Gion Giusep Deplz da **Tujetsch**, domiciliaus a **Regensburg, Baviera**, vegnius honoraus cun diplom e medaglia tier l'exposizion vaticana, che ha giu liug a **Ruma** igl onn vargau, cun caschun dil giubileum da sia sontgadad papa Leo XIII, muort sias bialas lavurs en resti da baselgia. – Sch'ins considerescha, che tut il mund era cheu representaus e quei era cun extra bialas caussas, sch'ei quei ina grondissima honur e dat pedetga dalla gronda habilitad, enconuschientscha ed exactedad, cun las qualas signur Gion Giusep Deplaz lavura ora talas caussas da baselgia. Ina megliera recumandaziun per ses artechels da baselgia, dat ei bein buc, che grad quella honorifica renconuschientscha da Leo XIII. – Perquei eis ei fetg da recumandar, che nos aultreveri signurs spirituals, che muossan dapresent in'aschi ludeivla premura en metter neu dischents ornaments da baselgias, s'adressassen per quels tier quei signur, essend ch'ins ei cheu segirs d'adina survegnir lavurs scosauda ed exactamein fatgas tenor las prescripziuns dalla s. baselgia, il qual ei tuttavia buca il cass tier tuts marcadonts da quellas raubas.

*Gasetta Romontscha nr. 5, 31 da schaner 1889*

## 1889

### Ingant a Sedrun

Sonda proxima ils 9 d.q. allas 10 avonmiezdi vegn mess en public ingant a **Sedrun**: 3 vaccas, 1 stiarla, 2 stiarls, in vadi ed entginas cauras e nuorsas. Ulterior sclariment dat Duri Battesta Huonder

*Gasetta Romontscha nr. 6, 7 da fevrier 1889*

## 1889

### Teater a Sedrun

ella sala dalla Cruna

Gievgia, ils 28 da fevrer e sonda ils 2 da mars, a l'ina suentermiezdì.

### I. La via grada la megliera

Cumedia en 1 act da A. Kotzebue

### II. La respectabla societad

Cumedia en 2 acts da A. Kotzebue.

Denter ils acts cant.

Plazzas reservadas: 1 fr.

I. Plaza: 80 cts.

II. Plaza: 50 cts

Affons la mesadad.

Tier numerusa frequenza envida en gentilmein

La societad teatrala

*Gasetta Romontscha nr. 8, 21 da fevrer 1889*

## 1889

Era ils giuvens da **Tujetsch** meretan per lur humoristica producziun dallas duas allegadas cumedias da *August Kotzebue* (1761-1819), tras las qualas els han teniu si legher in grond auditori, ludeivla menziun. Ins vesa, ch'era ora silla tiara sa cun premura e curascha vegnir eduau pulitas forzas pella tribuna. La versiun romontscha dallas duas cumedias, sco era l'instrucziun da qeullas ha signur scolast *Josef Schuoler*, **Danis**, procurau cun fetg bien success.

*Gasetta Romontscha nr. 10, 7 da mars 1889*

## 1889

In signur bavarès ei staus quels dis tochen **Tujetsch** e **Medel** per cumprar si bunas vaccas da latg, mo muort ils aults prezis, che vegnevan dumandai, ha el aunc ussa buca cumprau si biaras. Dalla davosa fiera da **Tusaun** vegn ei relatau, ch'ei seigi stau pauca biestga, mo da biars marcadonts, che hagien pagau ualти bein.

*Gasetta Romontscha nr. 11, 14 da mars 1889*

## 1889

L'exposiziun da taurs da tratga ha giu liug per nies district **Reinanteriur** ils 26 d.q. a **Trun** sut direcziun dils signurs experts Pitschi, Fopp e Braun. Aunc mai ei quell'exposiziun stada frequentada d'in aschi grond diember tiers ed en general tiers eligi, il qual era signur president dalla cumissiun d'experts ha en sia allocaziun finala constatau cun cumentantscha, da l'autra vart era deplorau, che la lescha da taurs seigi uonn encunter gl'interess dils purs danovamein vegnida fiersa. .... Dils 51 taurs exponi ein 16 vegni premiai en 3 classasm e 10 vegni risguardai cun menziun d'honur.

.... II. classa: ... 8) Soliva Bruno, **Sedrun**, 40 frs. ....

*Gasetta Romontscha nr. 13, 28 da mars 1889*

## 1889

### Annunzia

Il suittascret selubeschda da far enconuschen, ch'el hagi a **Tujetsch** in depot e menader per las teilas en la persuna dil signur Battesta Walier da **Camischolas**. Cun engraziar allas stimadas postas ch'han schon offeriu lavur, serecamonda milsanavon cun empermetter solida e prompta lavur

Gion Giachen Friberg, ferber a **Danis**

*Gasetta Romontscha nr. 13, 28 da mars 1889*

## 1889

**Tujetsch** ha buca mo concludiu da far in uorden culs taurs, mo schon tschentau si quel. Ei vegn teniu 6 taurs en 4 rots, ils dus rots pigns ed isolai survegnan dalla vischnaunca 30 frs. per in subsidi. Il decembre vegnan ils taurs da tratga visitai da treis experts, els ston esser da colur clar-blau tochen stgir-blau, sinaquei ch'ins survegni buca vadials ners, che paghien pauc.

Denton manegian plirs, ch'ils "smaladius nairs" pagassien schon dapli, sch'ei vegnessien era teni sco s'auda. Per promover la tratga da bials taurs pon ils vadials entirs pascular sillas bialas pastiras, mo els ston la stad esser stai sillar jarva. Duess ei nunspitgadamein curdar tier enzatgei ad in taur, sche sto en quei cass in rot gidar ora l'auter. Quei uorden ei ad interim fatgs per 10 onns.

Gasetta Romontscha nr. 16, 18 d'avrel 1889

**1889**

**Ingant a Sedrun**

Sonda proxima ils 27 d.q. allas 12 vegn mess en public ingant: 2 vaccas tumprivas, ina mugia, 2 vadials ed entginas cauras dils dus frars Bearth emigrai ell'**America**.

Gasetta Romontscha nr. 17, 25 d'avrel 1889

**1889**

Ils 25 d'avrel ha ei dau a **Tujetsch** e **Medel** in bratsch neiv, mo quell'ei id'ora da bunaura ed ha fatg bein als funs. Speranza ch'il matg semetti en bein.

Gasetta Romontscha nr. 18, 2 da matg 1889

**1889**

**Cadi**

Genoveva Monn da **Tujetsch** ei libra dad ugau.

Gasetta Romontscha nr. 18, 2 da matg 1889

**1889**

**Cadi.** Muort la bialaura da dumengia vargada ei il cumin staus frequentaus fetg numerusamein era dall'allontanada vischnaunca da **Breil**. Il til che ha accumpignau il mistral regent da **Trun** a **Mustér** era veramein imposants cun sia parada militara, cul mistral e saltè a cavagl cun lur mantials ufficials e la massa crotschas, carrs e pedunzs. ....ella dertgira president communal Christian Muggli da **Tujetsch**; suppleants da dertgira: ... marcadont Carl Cavegn da **Tujetsch**.

Gasetta Romontscha nr. 19, 9 da matg 1889

**1889**

La vischnaunca da **Tujetsch** pren si per la stad sin ina buna alp ina partida cavals sillar jarva.

Ulteriur sclariment dat

La suprastonza

Gasetta Romontscha nr. 22, 29 da matg 1889

**1889**

La Confederaziun lai ereger sil contuorn dil lag dall'**Alpsu** 12 – 14 casas da schurmetg da duas alzadas. Las respectivas lavurs ein screttas ora en concurrenza cun in termin da s'annunziar entochen ils 12 da zercladur. L'annunziaziun ha da vegnir fatga tiel: Geniebureau federal.

Gasetta Romontscha nr. 23, 6 da zercladur 1889

**1889**

Ils 5 d.q. ei il stradun sill'**Alpsu** vegnius aviarts cun pigns cuosts.

Gasetta Romontscha nr. 23, 6 da zercladur 1889

**1889**

(Correspondenza.) Ils 26 da matg ein ils apiculturs da **Tujetsch** (Secziun Badus) seradunai ella sala dalla nova casa da scola a **Sedrun** per udir in instructiv referat sur l'apicultura, tenius da signur plevon Muoth. Suenter haver motivau la necessitat dall'enconuschienscha teoretica per in ver apicultur, ha il referent dilucidau la gronda muntada dalla tratga d'aviuls els divers riguards: influenza da quella sillar spirtala e moralta cultivaziun dil carstgaun, valeta dil mèl d'aviuls pil diever da casa ed en riguard sanitaric, la grondiusa impurtzonza dils aviuls per

l'agricultura, la rendita materiala, che fa ord l'apicultura tier nus ina fetg adattada industria ed ina resursa, ch'igl agricultur duess en sia presenta critica situaziun buca sprezzar. Passond tier la historia naturala digl aviul, ei vegnida explicada la vitala constituziun dalla famiglia dils aviuls, lur multiplicaziun sco individuum (cuadetsch) e sco pievel (schamnar). Tractond las casas d'aviuls ha il referent fatg resultar ils avantatgs dil sistem mobil visavi il stabil e mussau avon in magazin mobil da nova construcziun, mobils era dado, el funs ed uvierchel e la spunda davos, maneivels da tractar e buca custeivels. – Il referent ha ludau il sistem mobil sco il "perfetg", mo cussegliau ad emprendists da porgressar tier quel mo empau alla gada; el ha priu en defensiun nos schi sbitai truchets vegls, mussond che e co era quels sappien vegnir tractai raziunalmein, cun metter enstagl suten "suren" cun ranschar sistem mobil (mischuns) el "spazi da mèl" e cun far schaumnas artificialas entras "schumbrar giu".

Nus renconuschin il nez da talas instrucziuns, vein fatg buns propiests, ei tucca da quels mantener. Denton in cordial salid a tuts promoturs ed amitgs dalla biala apicultura.

N.

*Gasetta Romontscha nr. 24, 13 da zercladur 1889*

### 1889

Sonda vargada ei la cuntrada da **Tschamut** e **Selva** vegnida devastada dad ina tempiasta, che ha totalmein ruinau ils ers.

*Gasetta Romontscha nr. 29, 18 da fenadur 1889*

### 1889

Sill'**Alpsu** ein presentamein circa 100 luvrers talians occupai culla construcziun dallas 17 casas pella schuldada, situadas spel stradun sisum il lag, las biaras sin intsches uranès. Davontier vegnan quellas menadas si cun crappa tagliada. Era la via sigl ault **Calmut** vegn ussa stagiada giu, ferton che vid la fortificaziun sin quel ei aunc buca mess maun.

*Gasetta Romontscha nr. 30, 25 da fenadur 1889*

### 1889

Sco gronda remarcabladad vegn ei notificau a nus, ch'ins hagi a **Rueras** anflau ina plonta da glin, che hagi si 516 borlas. **Tujetsch** ei renomaus per siu bi glin, mo d'enatzgei semegliont sa negin seregurdar.

*Gasetta Romontscha nr. 36, 5 da settember 1889*

### 1889

La vischnaunca da **Tujetsch** enquera da prender si per plirs onns **in bien e fidau spazzatgamin.**

Apirants sin quella fadiga san dar en lur offertas e cundiziuns entochen ils 20 da settember alla suprastanza da **Tujetsch**.

*Gasetta Romontscha nr. 36, 5 da settember 1889*

### 1889

Quels dis ei vegniu catschau roschadas genetschas ord la **Cadi** e biaras gia cumpradas si vegnan aunc a suandar. Negin seregoria dad in aschi viv e bien negozi gia per l'entschatta settember.

En general vesevan quels armauls ora fetg bein.

*Gasetta Romontscha nr. 37, 12 da settember 1889*

### 1889

Sill'**Alpsu**, nua ch'ils Uranès cavan turba, ei vegniu anflau sut ina sdrema turba d'in metter altezia in larisch da 50 centimeters el diameter, che veva 350 tscherchels annuals. Best e frastgas erien bein conservai.

*Gasetta Romontscha nr. 38, 19 da settember 1889*

### 1889

**Cadi**

Ils quens dils concursant Giochen Deflorin a **Rueras** ein da consignar a statalter Gion Paul Berther a **Camischolas**.

*Gasetta Romontscha nr. 48, 28 da november 1889*

**1889**

**Tiers jasters**

Tier Alfons Jacomet a **Sedrun** in ansiel ner, dretga giudasum, seniatra in snez davos en osum.

*Gasetta Romontscha nr. 49, 5 da december 1889*

**1889**

A **Tujetsch (Cavorgia)** tier Tumaisch Josef Peder in botsch ner, seniastra giudasum ed ina furcletta davos en.

*Gasetta Romontscha nr. 50, 12 da december 1889*

**1889**

Tier Giachen Antoni Soliva a **Sedrun** ina tgigisch nera, dretga giudasum, ina furcletta davos en, dus snezs in davon ed in davos en la furcletta, dretga nuot.

*Gasetta Romontscha nr. 51, 19 da december 1889*

**1890**

Il tribel suffel da gievgia vargada ha en plirs loghens caschunau gronds donns. En **Tujetsch** ha el devastau ils uauls, il medem ei daventau en outras cuntradas, mo la pli sgarscheivla catastrofa vess ei saviu dar sillla viafier **Weesen-Cuera**.

*Gasetta Romontscha nr. 5, 30 da schaner 1890*

**1890**

Stan civil dalla **Cadi** per 1889, nua ch'igl emprem numer da scadina colonna va tier allas naschientschas, mortoris ed allas maridaglias dils vischins en vischnaunca ed il secund a quels ord vischnaunca

	Habitants	Naschientschas		Mortoris		Maridaglias	
<b>Tujetsch</b>	768	28	15	16	4	5	2
Medel	528	19	6	7	8	3	4
Mustér	1329	34	22	23	7	9	13
Sumvitg	1169	31	10	25	4	4	5
Trun	983	25	6	14	8	8	6
Schlans	184	2	0	2	0	1	0
Breil	849	27	5	20	6	5	5
<b>Total</b>	<b>5810</b>	<b>166</b>	<b>64</b>	<b>107</b>	<b>37</b>	<b>35</b>	<b>35</b>

*Gasetta Romontscha nr. 6, 6 da fever 1890*

**1890**

**Ingant a Rueras**

Il suittascret notifichescha cheutras ch'ei vegni Gliendisdis e Mardis Tscheiver ils 17 e 18 d.q. en casa da signur marcadont Anselm Capeder a **Rueras** vendiu en public ingant ord la massa concursanta da Giochen Deflorin da leu: sia casa, ses funs, feins e sternem da trer, aissas, lenna da slondas e da barschar, mobiliar e truffels etc. Ei vegn quels dis dau l'entschatta allas 10 avonmiezdi.

Tier numerusa frequenza evid'en

Igl ugau da massa

*Gasetta Romontscha nr. 7, 13 da fever 1890*

## 1890

Malgrad la serrada dalla **Frontscha** va il negozi d'armauls vinavon. Marcadonts tudestgs e romontschs ein cuntuadamein sin viadi. In econom bavarès ei quels dis staus tochen en **Tujetsch** ed ha pagau per bialas vaccas tochen 26 marenghins.

*Gasetta Romontscha nr. 8, 20 da fever 1890*

## 1890

Sut viva participaziun d'in numerus publicum ei ils 26 d.q. vegniu teniu a **Trun** l'inspecziun dils taurs. ... Ella secunda classa ei vegniu premiau 10 stiarls a 40 frs. ed in mutg cun 70 frs. ... 3) statalter Fidel Wenzin da **Tujetsch**, 5) Hans Giachen Decurtins da **Tujetsch**, ... Menziun d'honur per lur stiarls han obteniu: ... Giachen Antoni Wenzin da **Tujetsch**

*Gasetta Romontscha nr. 13, 27 da mars 1890*

## 1890

Tgi che vul metter tiers tier il pigurè ell'alp da **Nalps** duei s'adressar tier Frars Cavegn ella Cruna a **Sedrun**

*Gasetta Romontscha nr. 15, 10 d'avrel 1890*

## 1890

### Annunzia da mort

En profunda dolur fagein nus cheutras da saver a nos parents, amitgs ed enconuschents, ch'ei hagi plaschiu agl Altissim da clamar ord questa veta speranza tier la beadada perpetna nies car mariu, bab, tat e sir

### Signur scarvon Martin Felici Beer

El ei spartius ils 21 da quest. Provedius cun tuttas consolaziuns da nossa s. religiun e moralmein resignaus ella veglia dil Segner, en ina vegliadetgna da 73 onns.

Nus recumandein l'olma dil preziau alla pia memoria da nos parents ed enconuschents.

**Rueras-Tujetsch**, ils 22 d'avrel 1890

Per la famiglia en malencurada:

Barla Cresenzia Beer-Berther, consorta

Giachen Martin Beer, fegl

*Gasetta Romontscha nr. 17, 24 d'avrel 1890*

## 1890

Mr. uestg ei puspei restabilius e vegn sonda sera ils 10 d.q. ad arrivar a **Mustér** per cresmar cheu la dumengia. Ils 13 vegn ei cresmau a **Tujetsch**.

*Gasetta Romontscha nr. 19, 8 da matg 1890*

## 1890

L'**Alpsu** ei gia stada aviarta ils 10 d.q. Ferton che la lavur dalla vart grischuna ha custau mo 25 schurnadas, ha il premurau hotelier signur Christen-Bellevue spendiu 5-600 frs. per arver dil maun uranès. Il 12 d.q. han 5 carruns da 5 cavals in passau quei pass alpin, era il banchier Rothschild da **Londra** era ad **Ursera** semptgaus da traversar la **Surselva**, sche l'aura dubiusa vess buca muentau el da prender la via **Caschinutta-Turitg-Cuera**.

*Gasetta Romontscha nr. 20, 14 da matg 1890*

## 1890

Elezziuns dalla dertgira districtuala **Reinanteriur**: ... president communal Soliva a **Sedrun**, ...

*Gasetta Romontscha nr. 23, 4 da zercladur 1890*

## 1890

La curontina dils nueglis a **Segnas**, stai infectai dalla zoppina va sonda alla fin. La **Val Ursera** ha perquei puspei aviert alla biestga il pass dall'**Alpsu**.

*Gasetta Romontscha nr. 24, 12 da zercladur 1890*

## 1890

La vischnaunca da **Tujetsch**, che veva giu tut quitau per tener naven la zoppina, ei nunspitgadamein vegnida infectada da quella sils cuolms da **Scharinas** cunfinonts cugl **Uri**. Sill'inspecziun fatga dil veterinari ein endisch muvels vegni serrai giu sin ina pasculaziun. Ins suppona, che marcadonts da pors da **Wassen**, nua che quella malsogna grassescha dapresent, ch'ein mani en quels mises, hagien tras lur resti runau neutier quella.

*Gasetta Romontscha nr. 28, 10 da fenadur 1890*

## 1890

Gl'entir cantun ei ussa libers dalla zoppina cun excepziun da tschun alps ella vischnaunca da **Tujetsch**.

*Gasetta Romontscha nr. 32, 7 d'uost 1890*

## 1890

### Pli recent.

Ier sera vegneva in pur d'**Ursera** giu dall'**Alpsu** cun in carr fein e quater persunas sissu. Entras ir memia dabot ei il carr sederschius sin in caraun, la feglia da 22 onns ei dada giu encunter in paricarr e sesturnida, ferton ch'il bab ed in pader ein mitschai cun blessuras. Avon enzacons onns ha quei medem pur giu piars ina secunda feglia sill'**Alpsu** tras barschament d'ina hetta.

*Gasetta Romontscha nr. 32, 7 d'uost 1890*

## 1890

### Engraziamenti

Cheutras vegn ei, en num dallas otg, tras incendi dils 17 da schaner 1890, grevamein donnegiadas famiglias a **Cavardiras**, mess giun in public engraziamenti als generus benefacturs, che han sucussiu ad ellas en lur tresta situaziun. Vegli il Tutpuissent remunerar els persuenter.

... 10) Ludeivla vischnaunca da **Tujetsch** 50 frs. ...

**Mustér** igl 1. d'uost 1890

Il comite d'agid

*Gasetta Romontscha nr. 32, 7 d'uost 1890*

## 1890

... Per motivs strategics vegn ei era a vegnir postulau ina viafier sull'**Alpsu** e **Furca**. Vedremmo!

*Gasetta Romontscha nr. 34, 21 d'uost 1890*

## 1890

Tenor il bulletin dils 15 d.q. sur las malsognas contagiusas dalla biestga era ei l'emprema mesadad uost vegniu avon ella **Svizra** pliras da quellas, 38 cass da malner, a **Flerden** (**Muntogna**) ein 8 armauls ventschi da quel. La zoppina regeva en 11 nueglis e 20 pasculaziuns cun 2239 armauls. El **Grischun** ei sulet **Tujetsch** infectaus cun 708 armauls, 551 caura, 146 pors ed 1 nuorsa. **S. Gagl** ed **Apenzell** vegnan mai a vegnir libers da quella malsogna entochen ch'ei vegn buca fatg definitiv uorden sils cunfins austriacs.

*Gasetta Romontscha nr. 35, 28 d'uost 1890*

## 1890

### Annunzia da mort

Cheutras fagein enconuschent a nos parents, amitgs ed enconuschents da nossa veglia patria, ch'ei hagi plaschiu agl Altissim da prender tier el nossa cara consorta e mumma

## **Onna Maria Degonda-Frissoni**, nata Muggli

Ell'ei spartida ils 2 d'uost suenter ina liunga e dolorusa malsogna, provedida cun tuts sontgissims sacraments e consolaziuns dils moribunds en ina vegliadetgna da 62 onns e 7 meins.

Nus recumandein la sia olma alla pia memoria da tuts parents, amitgs ed enconuschents.

Joseph Frissoni, mariu

Jacob Antoni Degonda, fegl

Johann Cristian Degonda, fegl

Rosa M. Simonet-Degonda, feglia

M. Dora Friberg-Degonda, feglia

M. Luisa Jörk-Degonda, feglia

**St. Henry, America.** 8 d'uost 1890

*Gasetta Romontscha nr. 36, 4 da settember 1890*

## **1890**

El numer antecendent ed el hodiern havein nus purtau l'annunzia da mort da dus emigrants dalla vischnaunca da **Tujetsch**, che meretan ina particulara menziun. Dil defunct statalter Giachen Martin Schmet vegn ei secret ord l'**America**: «Quel ei gl'onn 1872 semess sin viadi per l'**America** ella vegliadetgna da 70 onns, plirs fagevan beffas cun el, manegiavan, ch'el vegnessi buca giud la vasta mar e dessi ina buna tschavera pils peschs. Mo ual quels beffegiaders ein schon avon biars onns ella fossa leu ora en nossa veglia patria, ferton ch'igl emigräu ei adina staus sauns ell'**America** tochen ils 7 digl uost vargau, nua ch'el ha buca pudiu levar pli ed ei morts en tschun dis dalla vegliadetga e fleivlezia. – Paucs onns suenter ei la vieua tuatschina Onna Maria Degonda, nata Muggli, semessa sin viadi cun 7, ditschel siat, pigns affons per far sia fortuna da tschei maun dalla mar. Era sur da quella fagevan biars curvien; passond quella caravana tras **Mustér**, seregurdein nus aunc fetg bein, ch'ina passanta dama americana ei veramein stada surstada giud la curascha ed energia dallas vieuas grischunas. Denton di il proverbi: Niessegner gida ils cuarschus.»

*Gasetta Romontscha nr. 37, 11 da settember 1890*

## **1890**

### **Annunzia da mort**

En profunda dolur fagein nus cheutras da saver a nos parents ed enconuschents en nossa veglia patria, ch'ei hagi plaschiu agl Altissim da clamar ord questa speranza tier ina megliera veta nies preziau bab, sir e tat

### **Statalter Giachen Martin Schmet da Tujetsch**

El ei spartius a **St. Henry**, el stadi **Nordamerica, Minnesota**, ils 12 dad uost, suenter ina cuorta malsogna, provedius cun tutas consolaziuns da nossa sontga religiun ell'autla vegliadetgna dad 88 onns e 10 meins.

Nus recumandein l'olma da nies car defunct alla pia memoria da tuts nos parents ed enconuschents.

**St. Henry**, ils 20 d'uost 1890

La parentella en malencurada:

Maria Barla Beer, nata Schmet, feglia

Jacob Alois Schmet, fegl

Josefina Tuor, nata Schmet, feglia

Catrina Trexler, nata Schmet, feglia

Maria Trexler, nata Schmet, feglia

Fridolin e Vigeli Schmet, fegls

Vigieli Josef Beer, schiender

Anna, nata Regenscheid, brit

Josef Tuor, schiender

Simeon Trexler, schiender

Alois Trexler, schiender

Henrica e Leonora Beer, biadias  
*Gasetta Romontscha nr. 37, 11 da settember 1890*

### 1890

Ils 16 e 17 d.q. ein marcadonts romontschs ed uranès serendi cun lur roschas stiarls sul **Lucmagn** per la fiera da **Ligiaun**. Per quels ei vegniu pagau 130 – 150 frs. in. Silla varghentada curontina ha ussa era **Tujetsch** – dado liber pass.

*Gasetta Romontscha nr. 38, 18 da settember 1890*

### 1890

La fiera da **Mustér**, dils 27 da settember, fuva ord motiv, ch'igl ei ord **Sursassiala**, specialmein ord la vischnaunca da **Tujetsch** schon cuntuadamein vegniu vendiu biars tiers, frequentada mo da 3 taurs, 74 vaccas, 76 genetschas, 20 mugias e stiarls e 16 pors, dils quals igl ei pressapauc vegniu marcadau la quarta part. Marcadonts bavarès fuvan negins sil plaz, bein ord motiv da collisiun da quella fiera cun outras. Ils numerus marcadonts svizzers aber, che cumpravan si tiers per cuntinuar cun quels la marcanzia, han ord quei motiv cumprau si tut material da mediocre qualitad, essend che per tiers exquisits vegneva dumandau prezis, che havessen bein impidiu ulteriura speculaziun; aschia fuss la "flur" aunc resalvada per ils possessurs dalla **Baviera**. Per vaccas e genetschas ei vegniu pagau denter 16 – 21 marenghins. Stiarls fuvan fetg tschercai, mo paucs sin plazza. Bialas genetschas ein encunter offertas da 25 marenghins buca veginidas dadas. Per vaccas da maz vegneva dumandau 13 – 18 circa marenghins. Uonn drova la carn buca veginir salada pli tiella mezca! Denton eis ei da cuir e sperar che quels prezis semantegnan per indemnizar il pur per il liung schliet temps passau.

*Gasetta Romontscha nr. 40, 2 d'ctober 1890*

### 1890

#### Cadi

Beneficium inventari sulla relaschada facultad da Martin Schmed, **Tujetsch**, retschevider da quens ei statalter Gion Paul Berther a **Camischolas**.

*Gasetta Romontscha nr. 41, 9 d'october 1890*

### 1890

#### Tiers jasters

Tier Gion Paul Berther a **Camischolas** ina nuorsa alva, dretga: osum l'ureglia priu ora in M cun zaunga, in snez e furcletta davos en, dapli in fildirom, senistra: priu ora in M cun zaunga osum l'ureglia.

*Gasetta Romontscha nr. 42, 16 d'october 1890*

### 1890

#### Annunzia da mort

A parents, amitgs ed enconuschents purtein nus cheutras la dolorusa nova, ch'ei hagi plaschiu agl Altissim da clamar ord questa speranza tier ina megliera veta nossa cara mumma, sora, sira, quinada, tatta ed onda

**Onna Maria Caveng**, nata Wenzin ella Cruna

Ella ei spartida dumengia sera allas 5 suenter ina liunga malsogna, provedida cun tuttas consolaziuns da nossa s. religiun en ina vegliadetgna da 58 onns e 9 meins.

Nus recumandein l'olma da nossa preziada defuncta alla pia memoria da tuts nos parents ed enconuschents.

Ils cumbrigai affons:

Carl Caveng-Maisen

Sabina Capeder-Caveng

Eleonora Berther-Caveng

Adolf e Florentin Caveng

Veronica ed Augustina Caveng

Era en num dils auters parents

**Sedrun**, ils 27 d'october 1890

*Gasetta Romontscha nr. 44, 30 d'october 1890*

## 1890

In giuven da 17 – 18 onns savess emprender il mistregn da calger tier frars Curschellas a **Tujetsch** sut favoreivlas cudiziuns.

*Gasetta Romontscha nr. 46, 13 da november 1890*

## 1890

### Tiers jasters

A **Cavorgia** tier Tumaisch Monn, in ansiel muot, dretga in snez davon en, seniastra fess.

*Gasetta Romontscha nr. 46, 13 da november 1890*

## 1890

Ord l'**America** vegn ei da **Badus** scret a nus: "Nus Romontschs essan loschs d'haver rabbitschau nies stimau cumpatriot Josef Muggli da **Tujetsch** (**Cavorgia**) tier ina biala piazza. Cun grond pli eis el vegnius numnaus cassier da nies taun (district), che retila ina paga da 7400 frs. e vegn cul procent dils pagaments annual sin 10'000 frs. Sco cassier ha el in annual traffic da 50'000 talers. Quei ei igl emprem Romontsch, ch'ei da nies saver vegnius honoraus cun ina buna piazza, mo el ha era sedau gronda breigia per vegnir vinavon el lungatg englès. – In cordial salid a nos cumpatriots ella **Grischa**. Cun grond plascher legin nus regularmein ella Gasetta Romontscha las novitads da quella.

*Gasetta Romontscha nr. 50, 11 da december 1890*

## 1890

### Cadi

Sur relaschada facultad dil defunct Martin Felici Schmed, calger a **Sedrun**, ei renconuschiu il concuors e statalter Paul Berther a **Camischolas** ei liquidatur.

*Gasetta Romontscha nr. 50, 11 da december 1890*

## 1890

### Cadi

Giachen Martin Berther ei assistent d'Alois Giossi, omisdus da **Tujetsch**. – Giachen Antoni Deflorin ei ugau da vieua Margreta Peder, omisdus da **Tschamut**.

*Gasetta Romontscha nr. 52, 24 da december 1890*

## 1891

---

Materias, fazalets e savun venda

Sebastian Beer, fravi a **Sedrun**

*Gasetta Romontscha nr. 3, 15 da schaner 1891*

## 1891

### Annunzia da mort

En profunda malencurada communichein nus a parents, amitgs ed enconuschents, ch'ei hagi plaschiu agl Altissim da clamar ord questa veta, speranza tier ina beada perpetna nies car mariu, bab, schiender e tat

### Vigieli Schmet

El ei morts ils 13 d.q. en ina vegliadetgna da 75 onns e miez, suenter ina liunga malsogna, provedius cun tut s. sacraments e consolaziuns dils moribunds.

Nus recumandein l'olma dil preziau defunct alla pia memoria da tutt enconuschents.

La famiglia en malencurada:

O. M. Cristgina Schmet, nata Berther, consorta

Margreta Cristgina Cavegn-Schmet, feglia

Giachen Amtoni Schmet, fegl  
 Duri Vigieli Schmet, fegl  
 Cristoffel Schmet, fegl  
 Alois Cavegn, schiender  
 Josefa Filomena Schmet-Berther, brit  
 Duri Vigieli Cavegn, biadi  
**Rueras (Tujetsch)**, ils 19 da schaner 1891  
*Gasetta Romontscha nr. 4, 22 da schaner 1891*

## 1892

### Ingant a Sedrun

Sonda proxima ils 24 d.q. allas 12 da miezdi vegn vendiu en ingant 2 vaccas giuvnas, che han aunc da far vadi, 2 bialas mugias, 2 stiarlas, 2 stiarls ed 1 vadiala d'artavels Lucas Caveng ella Cruna.

*Gasetta Romontscha nr. 4, 22 da schaner 1891*

## 1891

### Ingant a Sedrun

Gliendisdis e mardis tscheiver naven dallas 9 dalla damaun vegn vendiu ord la massa da Martin Schmet p.m.: vestgadira d'umens, 2 maschinas da cuser, uaffens da calger, 2 letgs cun plemas d'itschal, tapets, plumatschs, bia midadas da letg, vischala da fiug ed autra, aviuls e mèl, truffels, curom, lenna da barschar e da diever etc. etc.

Tier numerusa frequenza envidan en

ils cummissiunai

*Gasetta Romontscha nr. 6, 5 da fevrier 1891*

## 1891

Tenor ils registers dil stan civil dalla **Cadi** ha ei dau en quels igl onn 1890 sequentas inscripziuns da naschientschas, mortoris e maridaglias.

	naschientschas		mortoris		maridaglias	
	en vischn.	ord visch.	en vischn.	ord visch.	en vischn.	ord visch.
Mustér	28	11	33	6	12	8
Tujetsch	20	14	24	9	4	5
Medel	11	3	15	2	6	5
Sumvitg	33	17	28	11	6	14
Trun	29	6	15	4	7	7
Schlans	0	0	4	2	1	0
Breil	18	4	21	2	4	6
<b>Total</b>	<b>139</b>	<b>55</b>	<b>140</b>	<b>36</b>	<b>40</b>	<b>45</b>

*Gasetta Romontscha nr. 8, 19 da fevrier 1891*

## 1891

Co ils funs ein sbassai en prezi en consequenza dils schliats onns, pon ins comprender ord quei, ch'il tscheins dils praus dalla pervenda da **Tujetsch**, ch'ein uonn puspei vegni schai via danovamein, ei vegnius reducius per varga 400 frs. ad onn! Ferton ch'ei vegneva vivon dau tochen 44 frs. la tschavera, han ins ussa stuiu schar via ella per 27 e 28. D'atun, nua ch'ei vegn suenter 5 onns puspei priu si in niev register da taglia, vegn la facultad ella **Cadi**, nua ch'ils

prezis dils funs eran dai en tut pli ault, ch'en autras cuntradas, vegnir taxada per in considerabel import pli bass, che tochen ussa. frs.

*Gasetta Romontscha nr. 8, 19 da fevrer 1891*

## 1891

### Annunzia da mort

En profunda dolur notifichein nus a parents ed enconuschents, ch'ei hagi plaschiu agl Altissim da nunspitgadamein clamar ella perpetnadad nossa casa consorta, mumma e tatta

**Barla Catrina Schmid**, nata Wenzin

Ell'ei morta ils 22 d.q. en ina vegliadetgna da 76 onns ed 11 meins, provedida cun ils s. sacraments paucs dis avon sia mort.

Nus recumandein l'olma dalla preziada defuncta alla pia memoria da tuts enconuschents.

**Sedrun**, ils 23 da fevrer 1891

La famiglia en malencurada:

Giachen Antoni Schmid, mariu

Gion Antoni Schmid, fegl

Giachen Martin Schmid, fegl

Margreta Cristgina Schmid, feglia

Maria Apolonia Luz, brit

Favorita Huonder, brit

Bruno Soliva, schiender

En num dils biadis:

Heinrich Schmid e Barla Catrina Soliva

*Gasetta Romontscha nr. 9, 26 da fevrer 1891*

## 1891

Sill'emperneivla serenezia dil schaner e fevrer ha il mars purtau vehements suffels ed ils 11 d.q. ina brava nevada, a **Mustér** varga miez meter ed a **Medel** e **Tujetsch** in meter.

*Gasetta Romontscha nr. 11, 12 da mars 1891*

## 1891

Il negozi da biestga en **Surselva** muossa aunc gronda vivacitad. Marcadonts bavarès e tudestgs ein stai tochen **Tujetsch** e cumprau si biestga per bials prezis. Per stiarlas ei vegniu purschiu tochen 14 ½ marenghin. La fiera da **Trun** dils 16 d.q. ei era stada frequentada da pli bia biestga e marcadonts, ch'auters onns. Igl ei leu vegniu marcadau dabia e per aults prezis. Per ina gronda e biala vacca, che veva gia fatg vadi, ei vegniu pagau 29 marenghins.

*Gasetta Romontscha nr. 12, 18 da mars 1891*

## 1891

L'exposiziun da taurs ha giu liug per nies district **Reinanterieur** ils 3 d.q. a **Trun**. La gronda participaziun vid tala exposiziun cun 55 tgaus – 46 stiarls e 9 mutgs – ha mussau ch'ei regi denter il stan agricolan ina avantagiusa concurrenza per furniziun da qualificai tiers da raz. II. classa: 9) Gieriet Cristian, **Tujetsch-Gonda**, in stierl 40 frs.

III. classa: 16) Decurtins Hans Giachen, Tujetsch, in stierl 40 frs. 17) Frars Caveng **Tujetsch-Rueras** in stierl 40 frs. 18) Decurtins Hans Giachen, **Tujetsch**.

*Gasetta Romontscha nr. 15, 9 d'avrel 1891*

## 1891

Ord il Fegl Ufficial dil register mercantil

La firma famiglia Caveng, artavels Lucas Caveng a **Sedrun** e **Tschamut** ei sesligiada si. Il hotel Rheinquelle a **Tschamut** ha Carl Caveng supriu, ferton che la Cruna cul negozi a **Sedrun** ein i via sils frars Adolf e Florentin Caveng.

*Gasetta Romontscha nr. 16, 16 d'avrel 1891*

## 1891

## **Annunzia**

La vischnunca da **Tujetsch** enquera da prender si per la proxima stad enzacontas s.v. genetschas en sias alps.

Plinavon pren ella era si entgins s.v. cavals silla jarva en sia alp da cavals.

Relativas damondas ein ton pli gleiti da adressar alla

## **Suprastanza da Tujetsch**

*Gasetta Romontscha nr. 18, 30 d'avrel 1891*

## **1891**

### **Cumin 1891**

Suppleant dils deputai: ... president communal Soliva da **Tujetsch**. Derschaders: ... president communal Soliva da **Tujetsch**; suppleants da dertgira: ... gerau Christian Muggli da **Tujetsch** ...

*Gasetta Romontscha nr. 19, 6 da matg 1891*

## **1891**

Nos pass alpins han giu la stad vargada sequenta frequenza: ... **Alpsu** 11'731 viandonts che han pagau 55'175 frs.; **Lucmagn** 1260 – 3131 frs. ....

*Gasetta Romontscha nr. 22, 27 da matg 1891*

## **1891**

La fiera da **Sedrun** dils 8 d.q. ha buca giu la frequenza e muntada da pli daditg. Igl ei vegniu negoziau mo denter la glieud dil contuorn. Las cauras han pagau 20 – 25 frs. il tgau; pli caras a proporziun ein las nuorsas stadas uonn, ins ha saviu vender per circa 30 frs. il pèr.

*Gasetta Romontscha nr. 24, 11 da zercladur 1891*

## **1891**

### **Venal**

in grond e bia asen da 4 onns, buns per trer e purtar. Da s'adressar tiella Cruna a **Sedrun**.

*Gasetta Romontscha nr. 26, 26 da zercladur 1891*

## **1891**

Signur president guvernativ Peterelli ei staus ils 13 d.q. sill'**Alpsu** cun delegai dalla **Cadi** per regular cun ina deputaziun uranèsa ils cunfins internaziunals ell'alp **Tiarms**. Tut ei passau en buna pasch e harmonia.

*Gasetta Romontscha nr. 29, 16 da fenadur 1891*

## **1891**

### **Annunzia da mort**

A parents ed enconuschents purtein nus cheutras la tresta nova, ch'ei hagi plaschiu agl Altissim da clamar ella perpetnadad nossa cara onda

La venerabla muniesa egl **Au, Sviz**

### **Maria Benedicta Beer da Tujetsch**

Ell'ei spartida ils 26 da fenadur en ina vegliadetgna da 74 onns, provedida cun tuttas consolaziuns da nossa s. religiun.

Nus recumandein l'olma dalla preziada defuncta alla pia memoria da nos parents ed enconuschents.

Per la parentella en malencurada:

**Sumvitg e Tujetsch**, ils 28 da fenadur 1891

Thomas Beer, plevon a **Sumvitg**

*Gasetta Romontscha nr. 31, 30 da fenadur 1891*

## **1891**

### **Cadi**

Gion Battesta Beer e sia dunna Lisabet da **Sedrun** vegnan ugadai tras assistent Gion Antoni Schmed da leu.

*Gasetta Romontscha nr. 31, 30 da fenadur 1891*

## 1891

L'alp **Cavradi a Tujetsch** vegn schada via da segar. Da s'adressar tier Carl Caveng a **Tschamut**.

*Gasetta Romontscha nr. 32, 6 d'uost 1891*

## 1891

In signur bavarès ei quels dis staus tochen **Tujetsch** e cumprau si ina roscha vaccas per bials prezis. Muort la zoppina ella **Baviera** vegn ei leu quest atun teniu neginas fieras, era buca la renomada da **Sonthofen**, silla quala plirs da nos marcadonts speculavan.

*Gasetta Romontscha nr. 36, 3 da settember 1891*

## 1891

Quels dis ei puspei vegniu marcadau ina massa vaccas e genetschas en **Surselva** e pagau 20 – 28 marenghins ina. In marcadont tudestg ha catschau 13 da quellas sull'**Alpsu**, che stevan ad el intrasglaute 24 marenghins ina.

*Gasetta Romontscha nr. 37, 10 da settember 1891*

## 1891

Il suttascret venda per in fetg raschuneivel prezi:

- mél d'aviuls da **Tujetsch**, in onn vegls
- in bien ualer
- ina maschina da cuser per calgers
- uaffens da calger
- ina buna madrazza da plemas

Ed enzatgei auter mobiliar ord ina massa.

Gion Paul Berther a **Camischolas**

*Gasetta Romontscha nr. 37, 10 da settember 1891*

## 1891

Quels dis ei vegniu instradau sul **Lucmagn** pliras roschas vadials e mutgs da marcadonts da **Tujetsch**, **Medel**, **Uri** etc. per la fiera da **Ligiaun**. Il davos temps ei puspei vegniu marcadau dabia biestgam, mo buca per aschi aults prezis sco la primavera. Pavel ed auters fretgs duein uonn buca muncar ell'**Italia**, nua ch'igl ei en pliras cuntradas vegniu fatg quels dis il quart fein.

*Gasetta Romontscha nr. 38, 17 da settember 1891*

## 1891

Tier statalter Giachen Fidel Cavegn a **Rueras (Tujetsch)**.

- 1) In anugl ner, dretga ina furcletta davon en, seniastra dus snezs davos en.
- 2) Ina nera, dretga treis snezs davos en, seniastra giudasum e fess.
- 3) Ina nuorsa alva, dretga giudasum e fess. Seniastra treis snezs davos en.
- 4) Ina tgigisch grischa, dretga ina furcletta ed in snez davos en, seniastra ina ruosna ed in snez davon en entatier il tgau.
- 5) In anugl alv, dretga fess ed in snez davon en, seniastra dus snezs davon en e davos en priu ora cun zaunga entraviers encunter il tgau.
- 6) Ina nera, dretga ina furcletta quadra e dus snezs davon en, seniastra dus snezs davon en ed in trianghel fess ora.

*Gasetta Romontscha nr. 42, 15 d'october 1891*

## 1891

Tenor ordinaziun dil cussegl d'educaziun vegn la scola da **Camischolas (Tujetsch)** muort sia pintga frequenza unida cun quella da **Sedrun** che survegn cheutras dus scolasts, in per la scola inferiura ed in per la scola superiura.

*Gasetta Romontscha nr. 43, 22 d'october 1891*

## 1891

Silla ferma opposiziun dalla beinstonta fracziun **Camischolas** ha la vischnaunca da **Tujetsch** concludiu dumengia vargada da schar exister vinavon la pintga scola da leu, mo da tuttina promover la scola generala a **Sedrun** cun dar a quella dus scolasts. Tenor rectificaziun dalla respectiva notizia en nies davos numer.

*Gasetta Romontscha nr. 44, 29 d'october 1891*

## 1891

Tier Giachen Antoni Deflorin a **Tschamut** ina ansola grischa, seniastra fess ed in snez davon enagiu encunter il tgau.

Tier Vigieli Beart a **Sedrun** in botsch grisch schubergiau, dretga fess e furcletta davos en, seniastra ruosna, scarpad'ora e sils corns noda barschada C.F.

*Gasetta Romontscha nr. 47, 19 da november 1891*

## 1891

Ina s.h. hutscha, che fa igl emprem fevrer purschals ed in bi envernaun tier Anselm Capeder a **Rueras**.

*Gasetta Romontscha nr. 48, 26 da november 1891*

## 1891

### Tiers jasters

A **Tschamut** tier Giachen Antoni Deflorin ina starleglia gaglia, ureglia seniastra dus snezs davos en.

*Gasetta Romontscha nr. 48, 26 da november 1891*

## 1891

A **Sedrun** tier Vigieli Biart dus anseuls

- 1) in cun scalin, seniastra giudasum e furcletta davos en,
- 2) dretga in snez davos en ed ina furcletta davos en.

*Gasetta Romontscha nr. 51, 17 da december 1891*

## 1891

Tier Giachen Antoni Soliva a **Sedrun** dus anseuls:

- 1) in tgietschen cun scalin, dretga giudasum, seniastra ina furcletta ed in snez davos en,
- 2) in gagl, dretga giudasum e fess ed in snez davos en.

*Gasetta Romontscha nr. 52, 25 da december 1891*

## 1892

### Cadi

Vieua Onna Maria Schmed, retschevider da quens Gion Paul Berther, Camischolas.

*Gasetta Romontscha nr. 2, 7 da schaner 1892*

## 1892

### In trest cass da lavina

ei puspei succedius ils 4 da quest en **Tujetsch**. Ils dus giuvens Paul Giusep da 30 onns, che haveva la primavera vargada giu rut in bratsch e schui e siu frar Vigieli Giusep da 20 onns, fegls dil beinenconuscent marcadont Battesta Valier da **Camischolas**, havevan detg la damaun a lur bab, ch'els mondien a **Pardatsch** e ventschien da trer ora duas pintgas vaultas draussa e vegnien lu suenter a **Nacla** per trer leu empau cultem ad in vischin da **Surrein**. Els eran serendi el liug cun in cavagl e bov. Il di era empau burasclus.

Encunter vegnir sera ha in um da **Surrein**, Giachen Antoni Monn, insinuau ad in perveseder, che mava a **Nacla** a perver, ch'el duessi ir en in toc a mirar, sche quels dus giuvens vegnien buca neunavon. Quei ei daventau. El ei staus ualtsil plaz a **Ruinas**, in tschancun dador il crest

digl **Uaul Siaras**, ch'el ha viu la tresta situazion dil liug, ina stermentusa lavina, dasperas observau negins fastitgs, ni dils giuvens ni dils bos. Quei um, plein anguoscha e grevadetgna ei curius anavos per clamar en agid. Vagnend a **Burganez** ha el entupau il bab dils dus giuvens, ins sa comprender cun tgei sentiment el ha communicau il schabegiau. Suenter haver spons cheu las pli grossas larmas, plirau e rugau, ein els sesparti, il bab per serender sin la freida fossa da ses fegls, l'auter per clamar glieud en agid. Vagnend igl um a **S. Antoni (Surrein)** eis ei vegniu tuccau da stuornas e lu aunc tarmess affons encunter **Sedrun** per relatar il fatg e ch'ins sappi tgei uaffens prender. Udend ils da **Sedrun** a tuccond, han biars tertgau, ch'ei seigi rut ora fiug ed ei era gronda confusiu. Biars eran curi dil **Drun** giu senza saver il pertgei. Ei pudeva esser circa mesa las tschun. Nuotatonmeins ein bingleiti circa 50 umens ensemblamein cul segnerfarrer stai rimnai el liug dalla disgrazia e cun palas e lontschas eis ei vegniu luvrau cun tutta energia aschi ditg sco il clar ha lubiu, mo tut adumbatten. La lavina po esser circa 60 peis aulta e 250 peis lada. Stau notg, ein ils umens semess enschanuglias, han recitau ils tschun pugns, fatg in niev plan per il di suandont e sereratgs cun grev cor encunter casa.

L'auter di, il venderdis, ei l'entira vischnaunca semessa en moviment, tgi cun menadiras a maun per trer naven la neiv, tgi cun cavar, tgi cun lontschas, en certas distanzas e tenor comando e la lavur mava vinavon cun grondissim success. Ei era circa 150 – 180 umens. Denter las 11 – 12 vegn la mugia anflada giu el vadretg, aunc buca ton afuns e zuar tras in tgaunet, il qual haveva entschiet a scavignar leu. Quella era aunc cuvretga giu cun in blah ed il giuv era aunc fermaus vid ella. Ord quei suppon'ins, ch'ils giuvens eran grad vid il cargar, durond che la lavina ei vegnida e han forsa strusch advertiu, entochen ch'ella ei buca stada neutier. Secartend ch'ils giuvens pudessien era sesanflar en quei medem liug, ein ils umens serimnai leu pli ensemble e luvrau leu, mo senza success e forsa per donn dil bien plan, ch'els havevan priu all'entschatta. La malaura entschaveva a smanatschar ed ils umens han cun quei entschiet a far gronds irals cun schar ina panuglia denter en, sinaquei ch'ei sappien aunc intercurir ella cullas lontschas. Allas 12 vegnan circa 15 femnas cun numerusas hontas caffè per porscher enzatgei da cauld als stuncleintai umens. Suenter va la lavur vinavon, mo tut adumbatten. Pér encunter sera vegn ei aunc anflau treis sulets drauss dalla pluna, denton ina gronda distanza in ord l'auter. Ei semetta en da never pli e pli fetg e cun quei ein ils umens stai necessitai da dar si lur lavur empau avon, ch'il di fuss staus ora. La notg sissu e la sonda ha ei neviu canticadamein, aschia ch'ins ha buca astgau ughegiar da serender sil plaz, muort niev prighel da lavina. Silla tresta nova telegrafica als dus frars dils disgraziai en **Germania**, han quels fatg spert da turnar a casa paterna tier in trest seveser.

La biala veglia isonza da rugar pils morts ei era vegnida observada cheu. Quater dis e quater notgs eis ei vegniu recitau nunitrerrutamein il s. rusari en la casa dils cars defuncts, nua ch'in grond diember personas ord ils differents vischinadis sebrattavan giu. Gliendisdis allas 9 eis ei vegniu fatg las funcziuns da bara, nua che l'entira vischnaunca ha priu viva part e cheutras era consolau il pauper e cumbrigiau bab cun sia entira famiglia.

---

Cun quella caschun lein nus era far menziun dallas diversas sventiras succedidas entras lavinas ella **Val Tujetsch**. Ei havess grad aunc muncau in di, ch'ei fuss stau 143 onns, che l'emprema disgrazia cun lavina ei schabegiada, dalla qualia ins ha aunc memoria.

- 1749, ils 6 da fevrer, per sontga Turte, entuorn las 10 dalla sera ei ina stermentusa lavina rutta giudora dalla **Pulanera** ed ord la **Val Mila** e mess sutsura miez il vitg da **Rueras**. Da varga 100 personas ein strusch 60 vegnididas cavadas ora vivas. – Udend a tuccond da stuornas a **Rueras** era il plevon, sur Giachen Biart a **Sedrun**, serendius cun sis auters umens encunter **Rueras** per porscher agid als disgraziai. Stai a **Zarcuns** ei rut ora ina terribla lavina giud **Londadusa**, numnada la lavina dil barlot, ed il segnerfarrer cun quater da quels umens ein daventai in'unfrenda.

- 1782 ein quater paupers babs da casa, che mavan per fein a pastg ella **Val Gierm** vegni leu ella lavina e cun els era in uors, che duei esser staus la raschun, che quella lavina seigi rutt'ora.

- 1808, ils 12 da decembre a **Selva**, la lavina giud la **Val Ruinatsch**, nua che 25 personas e 100 tiers han anflau la fossa.

- 1817, ils 6 da mars, la lavina a **Rueras**, che ha devastau la tiarza part dil vitg, 9 casas, 11 clavaus, 5 mulins e falluns ed 1 resgia. 27 persunas han anflau leu la mort. La massa neiv sto esser stada terribla; ella vargava si la casa pervenda ed ils mirs dalla baselgia. Aunc ils 15 d'uost vesevan ins restonzas da neiv vin **Suloms**. 7 persunas han ins saviu satrar per ils 15 da matg. Schebein la gigantica ustonza sur il vitg da **Rueras** ei vegnida fatga avon ni per suenter quella catastrofa, savein nus buca dir per franc, probablamein suenter (*quei ch'ei ver*).
- 1836 la sera dalla fiasta da Nadal, la lavina da **Giuv**, nua che dus giuvens perveseders cun entgins muvels han piars lur veta. Dus ein vegni cavai ora vivs
- 1865, ils 4 da fevrer, ei il frestg giuven Flurin Venzin da **Selva**, mond vi da tschei maun alla catscha, daventaus in'unfrenda dalla lavina.
- 1876, ils 10 da schaner, ein Stiafen Schmed e Gion Fdel Peder da **Tschamut** vegni en la lavina ellas vals da **Selva**, fagend leu via per vegnir ora cun fein a pastg.
- 1888, ils 14 da fevrer, ein ils dus giuvens frars Peder da **Selva**, mond per lenna, vegni fieri dalla lavina giu el **Rein** en plau **Viradas**, ils quals ins ha anflau per la primavera el **Rein**, in el risti e l'auter a **Carmihut**.
- Quei onn ha era la lavina dalla **Pulanera** puspei smanatschau al vischinadi da **Rueras**. Pliras notgs ein per tema ils habitonts entadem il vitg serendi en pli segiras casa. La lavina ei lu era vegnida e zuar tochen giudem **Curtin Cadentschuns**, denton fatg mo entgin donn vid dus baghetgs a **Cadentschuns**.
- Igl onn 1755, ils 26 da fevrer, han ils vischins da **Rueras** concludiu da prender si ils 6 da fevrer, sontga Turtè, sco firau per 10 onns, per cheutras rugar per ils disgraziai ed urbir ora entras l'intercessiun da suntga Turtè, che Niessegner vegli pertgirar da talas disgrazias. Quella empermsichun ei vegnida renovada gl'onn 1816. Ei vegneva sin quei di legiu giu il rodel dils disgraziai ella lavina a **Rueras**, celebrau la suntga messa, fatg ina unfreenda, schau arder candeila e tut che mava en ner. Quella isonza ei vegnida observada tochen el niev temps, priu ora il far firau.

Ferton che nus havein secret questas lingias ei vegniu a nus pliras gadas il patratg: Tgi sa, sch'ei fuss buca commensurau, sche l'entira vischnaunca renovass puspei quell'empermischun da far firau ils 6 da fevrer, ni prendess si da far enzatgei bien, per exemplu da far mintga onn da temps da buna peda communablamein in pelegrinadi tier la Mumma dalla Misericordia a **Mustér**, sche Niessegner pertgiri da talas disgrazias! – Vegli il bein Diu consolar la cumbrigiada famiglia Valier e pertgirar nossa vischnaunca da novas disgrazias, grad puspei en quels dis da schi stermentusa nevada. Dieus hagi puspei fatg grazia cullas olmas da tuts disgrazai.

X.

*Gasetta Romontscha nr. 7, 11 da fever 1892*

## 1892

### Annunzia da mort

En profunda tristezia fagein nus cheutras da saver a parents, amitgs ed enconuschents, che nos dus cars fegls, frars e nevs

#### **Paul Giusep e Vigieli Giusep Wallier**

seigien ils 4 d.q. vegni ella lavina ed aunc ussa buc anflai, gl'emprem ei en ina vegliadetgna da 29 onns e 9 meins ed il secund era 19 onns e 4 meins vegls.

Nus recumandein ils disgraziai alla pia memoria da tuts nos parents ed enconuschents.

**Camischolas**, ils 7 da fevrer 1892.

En num dalla famiglia en malencurada

il combrigiau bab:

Gion Battesta Wallier, marcadont

*Gasetta Romontscha nr. 7, 11 da fever 1892*

## 1892

Il 17 d.q. ein 16 persunas da **Mustér** ed in pèr da **Tujetsch** semessas sin viadi per tscherclar lur fortuna ell'**America**. Duas paupras famiglias han giu la ventira da survegnir da lur parents ell'**America** buca mo il daner da viadi, mo era in subsidi per gidar a pagar lur deivets, ch'els

vevan cheu. Ina tala beneficienzia en nies temps materialistic, nua ch'il spért da famiglia svanescha pli e pli, mereta ina publica menzium. – Quels emigrants serendan el stadi **Dacota dil Sid**, el nordost dils vastus **Stadis Uni**. Fatg la mar ston els naven da **New York** aunc viagiar 3 dis e 3 notgs culla sperta viafier per arrivar en lur nova patria. Bien viadi e buna ventira!

*Gasetta Romontscha nr. 8, 18 da fever 1892*

## 1892

Tenor l'ufficiala inspecziun dils registers digl Uffeci civil ha ei giu 1892 a

	naschientschas		mortoris		maridaglias	
	en vischn.	ord visch.	en vischn.	ord visch.	en vischn.	ord visch.
Mustér	37	20	25	7	7	14
<b>Tujetsch</b>	18	8	16	8	1	9
Medel	23	8	10	3	3	5
Sumvitg	29	11	22	9	9	7
Trun	21	11	16	8	4	8
Schlans	1	0	5	2	1	0
Breil	33	11	23	2	1	3
<b>Total</b>	<b>162</b>	<b>369</b>	<b>117</b>	<b>39</b>	<b>26</b>	<b>46</b>

*Gasetta Romontscha nr. 9, 25 da fever 1892*

## 1892

Sin giavisch dalla vischnaunca da **Tujetsch** ha il guvern concediu a quella in cuors per l'apicatura, che vegn a veginir daus da signur plevon Thomas Berther a **Surrein**.

*Gasetta Romontscha nr. 10, 4 da mars 1892*

## 1892

Suenter ch'igl ei schon avon plirs onns adumbatten vegniu fatg pass per obtener in telegraf sull'**Alpsu**, audan ins ussa cun ton pli grond plascher, che l'administraziun telegrafica vegn la proxima stad a construir in telegraf da **Mustér** ad **Ursera** ed in auter sul **Lucmagn** da **Mustér** a **Luorscha**. Muort la fuola da telegrams ha ei la stad schabegiau savens, ch'ei duvrara pliras uras per spedir in telegram dad **Ursera** a **Mustér**. Cun quella caschun lessen nus era far attents silla necessitat d'ina megliera communicaziun telegrafica denter la **Cadi** e **Lumnezia**, buca che quels telegrams stoppien gl'emprem vegnir spedi a **Cuera** per schar turnar da leu an **Lumnezia**.

*Gasetta Romontscha nr. 11, 10 da mars 1892*

## 1892

Alla heroica carezia proximala da tutt umens da **Tujetsch** eis ei reussiu gliendisdis vargau da suenter giganticas ed admirablas lavurs da sis dis vid la lavina a **Pardatsch**, anflar il cadaver dil vegl dils disgraziai frars Vallier, il Paul Giusep. Il mardis ein era las duas sliusas vegnidias neunavon el medem circuit en ina profunditat da 30 peis ed ins ha speronza e sedat tutta breigia d'en cuort era anflar il giuven frar. In artechel sur quellas lavurs suonda muort munconza da plaz el proxim numer.

*Gasetta Romontscha nr. 11, 10 da mars 1892*

## 1892

**Sper la lavina**

Silla freida fossa a **Pardatsch-Tujetsch**, la quala tegn aunc adina zuppau en siu immens ravugl il cadaver dil giuven disgraziau fegl Vallier, ha el decuors dallas duas jamnas vargadas, sco schon cuortamein stau indicau el numer antecedent, semanifestau in grondius exempl da curaschusadad e nunstunclenteivla energia da vart dils vischins dalla ludeivla vischnaunca da **Tujetsch**. Leuen ella stgira pitoresca val, en salvadia isoladada, lunsch naven dil marveglius mund, nua che neiv e glatsch meinan in rigurus domini il liung temps d'unviern e nua che gigantica pezza, armada cun numerosas smanatschontas lavinas, han negin schanetg cul pauper viandont, che surpassa ses prigulus cunfins, leu ha ina pussonza humana priu si in dir cumbat cun quella pussonza fenomenala e surventschiu ella. Avon nus schai en gronda profunditad e dimensiun la lavina, che ha avon in meins sepatrunau da duas giuvnas unfrendas. Mo tgi che ha schon giu caschun da sesanflar en fatscha ad in tal eveniment dalla natira sa sefigurar l'imposanta impressiun da quel e seperschuader dall'impotenza dil carstgaun viers quella forza naturala. In pictur da sentiment havess strusch saviu anflar in pli sublim e communetond aspect per in'artistica representaziun che leu en fatscha alla lavina da **Pardatsch**, encunter la quala ils 200 curaschus umens da **Tujetsch** han schon duront duas jamnas menau in fadigius cumbat, per pretender anavos dad ella las caras unfrendas.

\*\*\*\*

Armai cun agens ferms uaffens (hauas e cuntials da fein) per quella extraordinaria lavur, han tuttis umens da **Tujetsch** entschiet mesjamna dalla tschendra ad attaccar la lavina a **Pardatsch**, sebrattond giu di per di ella greva lavur suenter vischinadis. In tgaunet pign, suord, surveva sco fastisader, cun liungas lontschas da fier, giudem spizzadas e crenadas, vegneva la lavina sondada, per intercurir fastitgs dallas unfrendas. Sin tuttas varts ei il coloss vegnius attaccaus e traversaus cun profunds foss e sutminaus cun corridors e tunnels entochen giu tier l'aua, la quala era gl'emprem vegnida retenida dalla lavina e haveva perquei tratg atras la neiv e midau quella bunamein en viv glatsch, mo haveva ussa puspei rut atras siu ordinari letg en ina profunditad da 40 peis!

Las spartidas denter divers foss e tunnels vegnevan mintgaga intercuretgas cullas lontschas fier. Treis parallels foss giuaden el tgierp dalla lavina han ina mesira da silmeins 50 meters lunghezia e 7 meters altezia, buca quintau ils numerus foss laterals aunc existents e quels, ch'ein puspei vegni cuvretgs en cun material. Veramein giganticas lavurs! Finalmein han ins culla lontscha survegniu fastitgs dad in cadaver, tergend siado cun quella fils da resti. Suenter ruha lavur ein ins arrivaus sin quel en profunditad da 30 peis, serraus en en posiziun prosternida ella atgna neiv. Il cadaver aunc bein seconservaus ei sut grond conduct vegnius surdaus l'auter di alla fossa benedida. En pintga distanza dil disgraziau han ins en cuort era anflau las duas sliusas vitas direct ina suenter l'autra en medema posiziun, sco quellas eran en scadin cass era postadas si en via. Il material dalla carga schischeva spatitschaus d'entuorn.

Ins haveva ussa fundada speranza d'anflar el medem circuit tut – ualti giudem enamiez la lavina – era il tgierp da l'auter frar ed il cavagl ed ils valerus umens han dubliau lur activitat. Mo entochen dacheu eis ei deplorablamein buca reussiu da far novas acquistas auter ch'il terscham e la sigir, mo aunc cuntuadamein serendan ils premurai umens di per di en sil trest camp, entscheivan e fineschan lur valerusa lavur sut invocaziun digl agid da Diu e nundisturbend nova disfavoreivla aura la lavur ein tutts decidi da proseguir quella entochen tiel cumplein success. Possi quei en cuort reussir per cumpleina satisfacziun da quella brava vischnaunca e per silmeins in ton cunfiert al cumbrigiau bab e famiglia.

Surveschi quella cuorta descripziun sco publica menziun da honour dalla carezia proximala e valerusadad dil pievel tuatschin e per mussament, che sut la dira crusta d'in ruh pievel muntagnard flureschien aunc adina las pli bialas e zartas vertits!

*Gasetta Romontscha nr. 12, 17 da mars 1892*

## 1892

Exposiziun da taurs da raz dils 29 d.q. a **Trun** ha, malgrad la disfavoreivla aura, giu ina gronda participaziun, schebein dil publicum sco da marcadonts jasters. Da 9 mutgs e 35 stiarls exponi, generalmein tut bials exemplars, ein 18 premiai en 3 classas cun daners e 2 cun menziun da honour, quels appartegnan tier als suandonts proprietaris:

... II classa: Decurtins Hans Giachen, **Tujetsch**, 40 frs. per in stierl. ...  
*Gasetta Romontscha nr. 13, 24 da mars 1892*

## 1892

Igl ei remarcabel, che la vischnaunca da **Tujetsch** ha mo muort la malsogna, che regia leu localisada en dus allontanai nuegls dubels, buca astgau separticipar vid l'exposiziun, ferton che ad in'autra vischnaunca da medemas relaziuns ei quei vegniu scumandau. Tras la buontad digl expert signur president Rusette ha la regenza zuar en davos'ura aunc lubiu da schar inspectar ils 6 bials tiers da quella vischnaunca el liug sez, mo nuotatonmeins ei quei divers tractament staus da grond pregiudezi per possessurs da leu, che havessen intenziunau da vender lur tiers sill'exposiziun. Sch'ei cunterfa buc all'ordinaziun cantunala sanitarica, sche san ins buca capir, pertgei ina vischnaunca duei tier la presenta calamitad da malsogna aunc vegnir dasperas pergiudicada pli fetg. Forsa che quei sclarescha si!

*Gasetta Romontscha nr. 14, 31 da mars 1892*

## 1892

El Grischun ein aunc 23 nuegls cun 230 armauls infectai dalla zoppina, che serepartan sillas vischnauncas **Tujetsch**, **Sumvitg**, **Tinizong**, **Reams** e **Termin**.

*Gasetta Romontscha nr. 16, 14 d'avrel 1892*

## 1892

La vischnaunca da **Tujetsch** enquera da prender si per la proxima stad, naven dils 20 da zercladur tochen ils 15 da settember en sias relativas alps sequentas spezias da s.v. tiers:

- 1) genetschas per la taxa dad 8 frs., cumpigliau en tuttas spesas dall'alp;
- 2) stiarlas per la taxa da 5 frs., era cumpigliau en il pustretsch dall'alp;

3) cavals sut in onn vegls 15 frs., sur in onn 20 frs. e cavallas cun pulein vitier 25 frs., quella taxa ei aber mo per la jarva, il pustretsch vegn pagaus extra.

Aspirants han da s'adressar tochen la fin da matg tier  
la suprastonza

*Gasetta Romontscha nr. 17, 21 d'avrel 1892*

## 1892

Las vischnuncas da **Tujetsch** e **Sumvitg** ein puspei libras dalla zoppina.

*Gasetta Romontscha nr. 18, 28 d'avrel 1892*

## 1892

In marcadont da **Lumnezia** che ha cumprau si ina roscha bials stiarls a **Tujetsch**, ha era stimulau negoziants da **Tujetsch** e **Medel** da suandar siu exempl, ferton ch'els vessen preferiu da far plaunsiu cun quella cumpra. Igl ei vegniu pagau 9 tochen 10 marenghins per bials stiarls.

*Gasetta Romontscha nr. 18, 28 d'avrel 1892*

## 1892

Ils 30 da matg ei cun ina zun pintga lavur la **Alpsu** vegnid'aviarta sil maun grischun, ferton ch'igl **Uri** veva concludiu d'arver per sils 5 da zercladur, schegie ch'ei drova era da sia vart pigns cuosts. Cun caschun dalla fiera da **Trun**, che vegn frequentada da bia Uranès, ein gia in pèr carrs uranès passai l'**Alpsu** ils 31 da matg ed ils dad **Ursera** han dau tut laud al **Grischun** da haver aviert il cuolm senza spitgar giu tochen ch'ei plagi als signurs dad **Altorf** d'era arver quel da lur maun. Tochen ussa spitgava in cantun sin l'auter cull'avertura, mo a raschun ch'il **Grischun** ha adina bia pli leva lavur, duei el ir ordavon cul bien exempl e buca senuspir da spender in pign daner per promover ina ton pli sperta averture dil cuolm e la communicaziun culla viafier gottardistica. Franc e segir vegn lura **Uri** era a stuier arver da sia vart. La **Surselva** ha aschia il dretg da garegiar, ch'ei vegni aviert da siu maun cura ch'ei retracta da pigns cuosts, senza spitgar giu l'iniziativa uranès. Sch'ins ponderescha ils gronds cuosts, ch'il **Grischun** ha cun arver ses auters pass, sche astgan ins cun buna raschun garegiar, che l'**Alpsu** vegni risguardada empau meglier che tochen ussa. Cun ina bagatella havess il **Lucmagn** era saviu

vegnir aviarts sigl emprem zercladur, sill'impurtonta fiera da **Trun**. In carr tessinès ei cun pintga breigia arrivaus ils 31 da matg a **Mustér**. Sch'ins dat ora grondas summas per construir straduns suls cuolms, dueien ins procurar, ch'ins sappi seprofitar da quels pli liung temps, che quei ch'igl ei stau il cass tochen ussa cull'**Alpsu** ed il **Lucmagn**  
*Gasetta Romontscha nr. 23, 2 da zercladur 1892*

## 1892

Hariar ei quei che munta. Dumengia, ils 22 suenter il survetsch divin, han ils umens da **Tujetsch** fatg ina nova laver cumina per anflar ella lavina il secund disgraziau frar Valier. Mo igl ei vegniu cavau ora sulet il cavagl, il mardis sissu han lura affons viu il disgraziau el risti tratgs el dargun per retener il cadaver. Sin lur clom ein umens dai neutier, han cavegliau la bara el vischi, daditg semtgau silla piazza dalla sventira e purtau quella a **Sedrun**, nua ch'ella ei vegnida satrada il medem di cun caschun dalla processiun dalla rogaziun sut in numerus conduct. El ruaussi en pasch ed alla premurada vischnaunca ina menziun d'honur per sia perseveronza e sacrificiudad.

*Gasetta Romontscha nr. 23, 2 da zercladur 1892*

## 1892

La fiera da **Sedrun** vegn tenida mesjamna, ils 8 da zercladur, cun observar las solitas prescripcziuns.

La suprastonza da **Tujetsch**

*Gasetta Romontscha nr. 23, 2 da zercladur 1892*

## 1892

La fiera da **Tujetsch** dils 8 d.q. ha buca giu l'impurtonza sco daditg, nua ch'ils Uranès vegnevan neu e cumpravan si roschada cauras ed auters tiers. Uonn ei cheu vegniu marcadau zun puc.

*Gasetta Romontscha nr. 24, 9 da zercladur 1892*

## 1892

(Tarmess en.) La jamna vargada ei a **Sedrun** vegniu teniu in cuors d'apicultura entras il premurau apiculturist signur plevon Tomas Berther da **Surrein**. Igl ei quei stau igl emprem cuors da tala spezia, ch'ei vegnius tenius en **Tujetsch**. Il diember dils participonts fuva circa 20, en quei era entgins dalla vischnaunca da **Mustér**. Cun legherment savein nus notificar, che quella extensiva teoretica e pratica instrucziun d'ina entira jamna hagi anflau general applaus da vart dils coninteressai. – **Tujetsch** posseda presentamein circa 90 schaumnas, 10 en magazins mobils, las otras en truchets. Quest cuors dad apicultura ha purtau primarmein il general grond avantatg, ch'el ha sclariu si nos apiculturists clar e bein sur tuttas principales damondas ord la veta da quei niebel insect. En spezial ei lu era scadin da nus arrivaus tier la perschuausiun, ch'il sistem mobil, las scaffas, seigi lunsch ora pli avantagius, ch'il stabil, ils truchets. Scadin da nus ei per quei seresolvius, da silmenis far in'entschatta ed in'emprova cun il niev sistem. Cheutras vegn in niev progress ad entrar en nossa cara vallada dil Babdus e far flessegier rehamein il zun preziau e renomau mèl da **Tujetsch**.

*Gasetta Romontscha nr. 25, 15 da zercladur 1892*

## 1892

Al valerus spazzatgamin Stoffel a **Tujetsch** ei reussiu da prender ord in igniv si ella pezza ina stupenta evla giuvna, ch'ei ussa exponida el pavigliun dil hotel Rheinquelle a Tschamut.

*Gasetta Romontscha nr. 27, 30 da zercladur 1892*

## 1892

**Cadi**

Anselm Capeder ha l'ugadia dall'absenta Colastia Jagmet, omisdus da **Tujetsch**.

*Gasetta Romontscha nr. 28, 7 da fenadur 1892*

**1892**

### **Annunzia da mort**

Cun profunda dolur notifichein nus cheutras a tuts nos stimau parents, enconuschents ch'ei hagi plaschiu agl Altissim da clamar ord questa veta, speronza tier ina megliera nossa preziada consorta, mumma, feglia, sora, brit e quinada

### **Barla Catrina Berther**

Ell'ei spartida ils 12 da fenadur suenter ina liunga e greva malsogna en ina vegliadetgna da 32 onns e 9 meins, provedida cun tuttas consolaziuns da nossa s. religiun.

Nus recumandein la cara defuncta allas oraziuns e pia memoria da parents ed enconuschents.

Per la cumbrigiada famiglia:

### **Rueras, ils 13 da fenadur 1892**

Vigeli Giusep Berther, mariu

*Gasetta Romontscha nr. 29, 14 da fenadur 1892*

**1892**

... Igl ei ussa ual 20 onns, ch'il negoziant da cristallas Giachen Fidel Caveng da **Tujetsch** ha era piars la veta culla lucrativa mo zun prigulusa lavur da cavar cristallas.

*Gasetta Romontscha nr. 30, 21 da fenadur 1892*

**1892**

In mulin cun dus gangs e Salins, **Tujetsch**, vegn vendius ni schaus via per tscheins per 1 – 10 onns per in fetg raschuneivel prezi da

Josef Battaglia a **Sedrun**

*Gasetta Romontscha nr. 30, 21 da fenadur 1892*

**1892**

Il negozi da genetschas ella **Cadi** ha priu ina legreivla entschatta. Il marcadont bavarès Wegmann ha la jamna vargada traversau las alps dalla **Val Medel** e cumprau si leu 46 genetschas per 14 – 25 marenghins. In auter Bavarès ha marcadau en **Tujetsch** in bi triep genetschas per bials prezis. Il medem ei tenor las gasettas daventau ella **Partsura Bernèsa**, nua ch'igl ei denton vegniu salvau anavos la principala biestga per paradar cun quella sillla proxima exposiziun agricolana svizra. Leu ei era vegniu cumprau si ina roscha taurs da 12 – 20 meins dad jasters e da cumissiuns communalas dalla **Svizra Orientala** per 500 – 1200 frs. in.

*Gasetta Romontscha nr. 32, 4 d'uost 1892*

**1892**

Cul meins d'uost ha il traffic dils jasters, che vess il zercladur e fenadur aunc schau giavischar bia ell'entira Svizra, priu tier considerablamein. Era en **Surselva** ein ussa las postas pli pleinas, ei dat extrapostas e carrs supplementarics tiella roschada crotschas, che passan e repassan

**l'Alpsu.**

*Gasetta Romontscha nr. 32, 4 d'uost 1892*

**1892**

Nus schein cheu suandar l'altezia sur mar dils capologhens dallas vischnauncas sursilvanas culla populaziun da quellas.

**Tujetsch** dumbra 768 habitants: **Tschamut** ei 1640 meters sulla mar, **Rueras** 1401 meter, **Sedrun** 1398. ...

*Gasetta Romontscha nr. 34, 18 d'uost 1892*

**1892**

Gl'onn vargau ha igl Uffeci circuital dalla **Cadi** sin giavisch da pliras varts giu petiziunau ch'il departement postal duessi prolunghir il cuors postal sull'**Alpsu** denter **Mustér** e **Caschinutta** per aschiditg, che quei pass alpin resti aviarts, silmeins tochen igl emprem october e quei tonpli che la medema favur ei vegnida concedida alla posta dalla **Furca**. Mo adumbatten. En 15 dis

cala tutta communicaziun postala sul' **Alpsu** si, malgrad tutta proximitad dalla impurtontissima viafier gottardista. Duei ina pass cunfinonts ad ina viafier europeica survegnir pli e pli grond traffic ed impurtonza, sche sto la posta sco piuniera ir ordavon cul bien exempl. Ils meinaposta ein promts tier quella prolungaziun ed ei drova mo l'ordra da Berna.

*Gasetta Romontscha nr. 36, 1. da settember 1892*

## 1892

**Tujetsch** ha uonn pitiu pli ch'igl ordinari dil malnér (*Rauschbrand*), ei ha dau in temps, nua ch'ei ventscheva tochen 5 mutgs ad jamna.

*Gasetta Romontscha nr. 36, 1. da settember 1892*

## 1892

Oz ein circa 200 genetschas, cumpradas si per bials prezis a **Medel**, **Tujetsch** e **Mustér** da marcadonts tudestgs e romontschs, vegnididas instradadas pella renomada fiera bavarèsa a **Sonthofen** (*robind 200 km da Sedrun*), ils 14 d.q. Bien e rendeivel viadi?

*Gasetta Romontscha nr. 37, 7 da settember 1892*

## 1892

### **Clom da quens privat**

Essend ch'il suittascret ei intenziunaus d'emigrar, sche supplicescha el cheutras ses crediturs e debiturs dad enteifer otg jamnas dar en tuts quens cun el a signur gerau Anselm Capeder a **Rueras**

**Sedrun**, ils 5 da settember 1892

Josef Anton Balzart

*Gasetta Romontscha nr. 37, 7 da settember 1892*

## 1892

Ina ansola jastrà, ureglia seniastra ina furcletta davos en ed in snez davon e davos en, sesanfla tiel pender (pindrer) Gion Bistgaun Beer, fravi a **Sedrun**

*Gasetta Romontscha nr. 38, 15 da settember 1892*

## 1892

Tier ils suittascrets anfla ina fidada fumitgasa, che sa cuschinari empau, ina piazza pil temps d'unviern. Da s'adressar ton pli spert tier

Frars Cavegn ella Cruna a **Sedrun**

*Gasetta Romontscha nr. 40, 29 da settember 1892*

## 1892

El decuors digl atun vegn signur ferster A. Schwarz da **Zignau** a tener en pliras vischnauncas dalla **Cadi**, sco a **Trun**, **Sumvitg**, **Tujetsch** e **Breil** referats sur dall'ameglieraziun dallas alps. Different plans da stallas per alps stattan mintgamai en disposizion. Ils referats vegnan teni en lungatg romontsch el senn sco l'uniun agricolana svizra recamonda l'ameglieraziun da nossas alps.

*Gasetta Romontscha nr. 41, 6 d'october 1892*

## 1892

A **Sedrun** ei quels dis negau in affon da 2 onns entochen che sia mumma fuva en fallun.

*Gasetta Romontscha nr. 43, 20 d'october 1892*

## 1892

### **Tiers jasters**

A **Rueras** tier statalter Giachen Fidel Cavegn 3 nuorsas:

1) in'alva, dretga ina ruosna, seniastra giudasum;

2) in anugl grisch, dretga furcetta osum, seniastra giudasum e dus snezs davon en;  
3) in anugl ner, dretga giudasum, furcetta e snez davos en, seniastra giudasum.  
*Gasetta Romontscha nr. 43, 20 d'october 1892*

## 1892

### Publicaziun

La dertgira circuitala dalla **Cadi** ha concludiu da suttametter ils protocols da hipoteca digl entir cumin dalla **Cadi** ad ina revisiun totala, conform l'ordinaziun guvernativa dils 17 da zercladur 1887. Ord tal motiv vegnan tuts possessurs da respectivas valeivlas brevs da hipotecas visai da dar en quellas: ...

per **Tujetsch** a signur protocolist assistent *Jacob Anton Schmed*

... franco entochen ils 31 da december 1892 sut smanatscha dallas consequenzas tschententalas. ...

*Gasetta Romontscha nr. 44, 27 d'october 1892*

## 1892

### Cadi

Tuts quens cullas emigrantas Cristgina Schmet e feglias Maria Cristgina e Lurenzia a **Sedrun** ein sils 8 da december da dar en a statalter Gion Paul Berther a **Camischolas**.

*Gasetta Romontscha nr. 49, 1. da december 1892*

## 1892

### Tiers jasters

A **Sedrun** tier Vigieli Monn, vegl, in anugl ner cun corns, dretga giudasum, fess ed in snez davosenagiu, seniastra in snez davosenagiu.

*Gasetta Romontscha nr. 51, 15 da december 1892*

## 1893

### Cadi

Giachen Antoni Soliva da **Sedrun** ei en concuors, tuts quens cun el ston vegnir dai en sils 30 da schaner agl ufficial da concuors.

*Gasetta Romontscha nr. 1, 5 da schaner 1893*

## 1893

La **Val Tujetsch**, nua che lavinas ein antruras da casa, ei mitschada culla tema. **Selva** ha pitiu nuot, a **Tschamut** ein in per clavaus sfraccai ed a **Bugnei**, ch'ei tschelluisa schurmegiaus digl uaul, ei ina lavina d'in fistatg vegnida en ina casa da zuler en ed ha barricadau igl esch-casa d'ina autra.

*Gasetta Romontscha nr. 5, 1. da fevrier 1893*

## 1893

Ils 7 d. q. ein 25 persunas da **Mustér** e 10 da **Tujetsch** semessas sin viadi per l'**America**. Bien viadi e buna fortuna da tschei maun dalla mar!

*Gasetta Romontscha nr. 6, 9 da fevrier 1893*

## 1893

Tenor ils registers civils dalla **Cadi** han las singulas vischnauncas da quei cerchel giu 1892

	naschientschas		mortoris		maridaglias	
	en vischn.	ord visch.	en vischn.	ord visch.	en vischn.	ord visch.
Mustér	30	25	10	22	14	11

Tujetsch	22	19	8	14	7	7
Medel	14	12	5	9	4	2
Sumvitg	33	36	5	19	16	1
Trun	16	13	4	12	3	7
Schlans	3	4	0	1	1	1
Breil	19	25	7	7	5	10
<b>Total</b>	<b>137</b>	<b>134</b>	<b>39</b>	<b>84</b>	<b>50</b>	<b>39</b>

Gasetta Romontscha nr. 6, 9 da fevrier 1893

### 1893

#### Era progress

(Communicau.) Suenter ina pausa da circa 60 onns audan ils vischins da **Rueras**, **Tujetsch**, puspei a dend las uras giud il clutger baselgia. Quell'ura duei esser stada cumprada il tschentaner vargau el Valleis ed in sulet vischin orasisum il vitg sa seregurdar, che quell'ura funcziunavi aunc exactamein. Dad onns enneu sesanflava quell'ura si sut il tetg baselgia en, tochen ch'il giuven fravi dil vitg *Giachen Lurenn Caduff* cun in brav meister da leu, regulond inaga ils zenns, han giu commiseraziun cun quella tresta situaziun, priu en lur mauns e suenter liung studi ed exacts experiments en quella tuttavia nova clamada per els, effectuau che l'ura va e dat dapresent excellent. Igl ugau baselgia cun entgins vischins dueien era haver remunerau l'activitat, talent e savida da quels dus inschignus convischins sin biala moda. -

El medem temps savein nus relatar, ch'il vischinadi da **Rueras** possedi dapresent entras la nustunclenteivla permura da signur caplon Wenzin Gion Antoni, *caplon da 1886 – 1935*, ina bufatga biblioteca en caussas romontschas e tudestgas, dalla quala ils vischins fan duront il temps d'unviern diligent diever, principalmein la giuentetgna e sediverteschan ed instrueschan cheutras mintgin a casa sia sin ina biala ed edificonta moda. Special laud meretan ils giuvens dil vitg, ils quls han sin lur agen cuost procurau per ina adattada scaffa per conservar ils cudas.

Gasetta Romontscha nr. 6, 9 da fevrier 1893

### 1893

Missiun interna. Tenor rapport dil Vaterland han las pleivs catolicas dil **Grischun** contribuiu 1892 per quella sco suonda: ... **Tujetsch** 40 frs. ...

Gasetta Romontscha nr. 6, 9 da fevrier 1893

### 1893

L'exposiziun da taurs a **Trun** dils 22 d.q. ha, favorisada da stupenta aura e sut grond succuors da glieud, marcadonts e tiers, en general giu in favoreivel success. ...

II. classa: ... Frars Berther e Monn Gion Battesta, **Tujetsch**, scadin 50 frs. per stiarls.

III. classa: Beer Sebastian, **Tujetsch**, mutg 50 frs.,

Menziun d'honur: .... Hetz Fidel, **Tujetsch**.

### 1893

Per la fiasta da cant a Mustér han s'annunziau 3 scolas da **Tujetsch**, 4 da **Mustér**, 4 da **Sumvitg**, 3 da **Trun** e quellas da **Dardin** e **Danis**.

### 1893

Tgi ch'ei sepatrunaus d'ina roda ord miu carr, staus collocaus ella stalla da nuorsas a **Mustér**, ei

supplicaus da puspei remetter quella.  
Lucas Caveng a **Rueras**

### 1893

100 curtaunas truffels da sem venda Gion Paul Berther a **Camischolas**.

### 1893

Ins ha speronza, ch'il cuors postal dalla stad **Mustér-Caschinutta** vegni prolunghius per in meins, sch'il pass **Oberalp** ei aviarts gl'emprem zercladur e resta carregiabels tochen igl 1. d'october, sco igl ei savens il cass. Sin quella moda vess la **Surselva** ina directa communicaziun postala culla viafier gottardista silmeins 4 meins per onn, il qual ei segiramein negin luxus.

### 1893

La vischnaunca **Tujetsch** tscherca da prender si pella stad proxima ina partida s.v. genetschas en sias relativas alps, sco era in diember s.v. mutgs en l'alp **Maighels**.

Las genetschas pagan 15 frs. l'ina taxa per la jarva, ils mutgs 9 frs. Il pustretsch, sco outras casualas spesas, ton dallas genetschas sco dils mutgs, ein buca cumpigliai ellas sura indicadas taxas, sunder ein extra da pagar.

Relativas annunzias ein da tarmetter tier  
alla suprastonza da **Tujetsch**

### 1893

#### **Annunzia da mort**

Cheutras notifichein nus a nos parents ed enconuschents, ch'ei hagi plaschiu agl Altissim da clamar ella perpetnadad nies car bab, tat e basat

#### **Lezi Antoni Muggli**

El ei spartius ils 25 d.q. suentermiezdi, provedius cun tut s. sacraments ell'autla vegliadetgna dad 87 onns e 9 meins.

Nus recumandein sia olma alla pia memoria da tut parents ed enconuschents.

En num dalla combrigiada famiglia:

Duri Battesta Muggli, fegl

**Rueras**, ils 26 d'avrel 1893

### 1893

Duas bunas vaccas da latg veggan tschercadas da prender si per la stad; da s'adressar tier Carl Cavegn a **Tschamut**.

### 1893

Calonda matg ein tut ils pass alpins grischuns stai aviarts pil carr, priu ora l'**Alpsu** ed il **Lucmagn**. Per arver ils auters cuolms spenda il cantun in grond daner, pils dus davos buca gronds, savessen era l'**Alpsu** ed il **Lucmagn** schon ussa vegnir aviarts, mo quei selai spitgar ch'il cantun vegni ad arver els sillla fin da matg. Lura veggan **Uri** e **Tessin** a far spert d'arver da lur maun. Mo l'experienza muossa, che tochen ch'il **Grischun** arva buc, patartgan era nos vischins uranès e tessinès buc vid l'avertura. Nus sperein ch'il signur inschignier districtual vegni a procurar, ch l'**Alpsura** vegni ton pli gleiti aviarta, sinaquei ch'il concediu cuors denter **Mustér** e **Caschinutta** sappi prender sia entschatta cugl emprem zercladur.

### 1893

#### **Annunzia da mort**

Ei ha plaschiu agl Altissim Diu da clamar ord questa sperozna tier ina megliera veta nies carissim bab, frar e tat

#### **Duri Deflorin**

El ei morts questa damaun en ina vegliadetgna da 64 onns suenter ina cuorta mo dolorusa malsogna. Nus recumandein l'olma dil car defunct a tut ses parents ed enconuschents. La parentella en malencurada:

Giachen Giusep Deflorin, fegl  
Vigieli Josef Berther, schiender  
**Camischolas**, ils 2 da matg 1891

**1893**  
**Cadi**

Meister Vigeli Giusep Beer a **Sedrun** lai ir scussiun. Ses quens ston sils 14 da matg esser dai en agl uffeci da concuors.

**1893**  
Il **Lucmagn** ei dapi entgins dis aviarts; era l'**Alpsu** vegn damaun carregiabla e ha il departement postal, sin repetida damonda digl Uffeci e proposizion da nossa direcziun postala a Cuera, concediu da schar ira in sempel cuors postal schon digl 1. – 15 da zercladur e dils 15 tochen ils 30 da settember sur quei cuolm. Sch'ins considerscha tgei enormas summas igl ei vegniu applicau vid auters pass, sch'eis ei nuota memia d'era risguardar silmeins mo empau quei cuolm sper la pli impurtonta viafier.

**1893**  
Ils pass alpins **Alpsu**, **Furca** e **Gottard** ein ussa carregiabels, ed ils 14 d.q. ein gia Engles passai en crotscha sull'**Alpsu**. Igl emprem zercladur entscheiva il cuors postal **Mustér-Caschinutta**, che va la damaun da **Mustér** e tuorna leu anavos la sera.

**1893**  
**Cadi**  
Sulla relaschada facultad da Josef Antoni Huonder a **Sedrun** va il beneficium inventari. Ils quens retscheiva Johann Mihel Monn da leu.

**1893**  
**Cadi**  
Cusseglier guvernativ dr. Städlia a **Zug** ei ugau da Franz Sidler da **Zug**, caplon a **Selva denter 1891 - 1893**.

**1893**  
Denter ils 40 scolasts, ch'ein da cuort vegni patentai sesanflan: ... Schmid Johann da **Tujetsch**, ...

**1893**  
Il temporal dalla notg dils 4 d.q. ha cun siu horribel tunar e camiar fatg sterment a bia glieud, a **Mustér** e **Tujetsch** ei il tun daus giu en plirs uauls e ruinau bein enqual pegg.

**1893**  
Il traffic dils jasters ei pil meins zercladur darar staus ell'autta **Surselva** aschi vivs sco uonn; il **Lucmagn**, la **Piora**, l'**Alpsu** ed era il difficultus pass dalla **Sandalp** denter **Mustér** e **Linthal**, han quei temps giu considerabla frequenza. Signur cusseglier Zemp, schef dil departement postal, e signur oberpostdirector Steger han sin lur viadi d'inspecziun passau l'**Alpsu** ed il **Lucmagn** e vegnan era a far ils auters pass alpins grischuns. Els han saviu seperschuader, ch'il niev cuors postal denter **Mustér** e **Caschinutta**, anticipaus per 15 dis, seigi stau fetg commensurau. Speranza ch'era la posta serila da **Cuera** vegni regalada cun ina nova e pli adequata crotscha.

**1893**  
Circa 30 funs bien mèl d'aviuls da **Tujetsch** venda bienmarcau statalter Gion Paul Berther a **Camischolas**.

**1893**

### **Clom da quens**

Per controllar e verificar ils extensivs quens da miu defunct fegl gerau Gion Antoni Schmid da **Gonda-Tujetsch**, sco era per regular giu quels immediat en favur da stimai eventuais crediturs e debiturs, vegnan tut quels supplicai da vuler dar en lur respectiv quens cul defunct en scret al sutsignau enteifer il termin da jamnas a dato.

Per evitare tuttas consequenzas en cass d'omissiun, repetin nus da vuler dar suatientscha al vertend clom.

**Gonda-Tujetsch**, ils 25 da fenadur 1893

Assistent Jacob Antoni Schmid, bab

**1893**

**Tujetsch** ha tras ses signuns e fumegls alla **Baviera** particular cletg. In signur bavarès ha quels dis cumprau si leu ina roscha vaccas e pagau meglier che quei ch'ins vess spitgau, 13 - 15 marenghins.

**1893**

Suandont il bi exemplel da sia ludeivla farria ha era il vischinadi da Ruberas en **Tujetsch** el termin da  $3\frac{1}{2}$  meins la stad vargada schau renovar fetg gustusamein sia baselgia interiur- ed exteriuramein tras il moler Benedic Kopp da Oberhelfensschwyl, S. Gagl. Igl interiur dalla baselgia cun sias novas, semplas mo fetg finas e stillisticas decorazins, ses significonts simbols ed ils artistics maletgs d'iel i vid igl arviul dil chor e dalla nav baselgia (ss. Trinitad), sco era ils novs bauns, il schuber e niev plantschiu da cement ed il commensurau cundrez da luftiar la baselgia, cun finiastras e burals, porscha in magnific aspect tiell'entrada en quei restaurau sanctuari. D'ina vart dalla nav croda en egl il migeivel maletg da s. Turtè, la quala vegn a **Rueras** specialmein venerada dapi igl onn 1749, cura ch'ina furiosa lavina ord la **Val Mila** e **Pulanera (Pala Nera)** ha per il di da sia commemoraziun, ils 6 da fevrer, ruinau miez il vitg da **Rueras**. Speciala attenziun mereta era la biala scantschala. Concludend ord la biala lavour, ha quella giu in fetg capavel auctur e mereta en emprema lingia aber la sacrificontadad ed il senn religius da spirituals e parochians, che porschan maun tier talas renovaziuns, in spezial laud.

**1893**

Cun quei ch'ils marcadonts da biestga han saviu metter bein giudamaun quella ch'ei han giu cumprau si las fieras da settember, ein els turnai anavos cun pli gronda curascha e cheutras han las fieras digl october obteniu pli gronda vivacitad. Aschia ei sonda vargada sill'a fiera da **Tusaun** vegniu cumprau si massa armauls, e per pli aults prezis, che la fiera dils 21 da settember. Vaccas e genetschas mesaunas han pagau 10 – 15 marenghins, las bunas 16 – 20 ed aunc dapli. Sonda e dumengia ein ils marcadonts dai dalla **Surselva** si tochen **Tujetsch** e **Medel** ed han en differentas vischnaucas cumprau ina gronda quantitat genetschas. La fiera da **Trun** dils 10 ha giu bia tiers e bia marcadonts da vaccas e stiarls. Genetschas mesaunas pagavan 8 – 12 marenghins, las distinguidas tochen 17 marenghins, in pign pur da **Rabius**, mo in fetg premurau e renomau perveseder, ha la dumengia vendiu duas per 38 marenghins. Bass eran ils prezis dils stiarls e mutgs, 70 – 90 frs. e 100 – 120 frs. Tiell'exposiziun da biestga a **Cuera** ein cumpari gronds economis dalla **Germania** ed **Austria** per cumprar siarmauls da razza.

**1893**

In enqua da brattar ina vacca da maz per ina tumpriv. Da s'adressar tier Thomas Huonder a **Rueras**.

**1893**

### **Tiers jasters**

A **Camischolas (Tujetsch)** tier J. Andriu Berther:

- 1) in tschanc alv, dretga in mugrin davos en, seniastra in mugrin davon en,
- 2) treis nuorsas, 2 nerás, 1 alva, dretga mugrin davon e davos en, seniastra giu mesa l'ureglia.
- 3) ina nuors'alva, dretga in snez davon e davos en orasum,

- 4) in anugl alv, priu ora in quader orda miez da mintga ureglia e giudasum dalla cua,
- 5) ina nuorsa alva, dretga fess e scurselau davos en,
- 6) in anugl ner entir, dretga mugrin davon en, dus snezs davos en, seniastra fess,
- 7) in tschanc alv entir, dretga ina ruosna, seniastra in snez davon en,
- 8) nuorsa grischa, dretga fess, seniastra dus snezs davos en,
- 9) nuorsa nera cun corns, dretga dus snezs davon en.
- 10) nuorsa nera, dretga giudasum ed in M davon en, seniastra giudasum e fess,
- 11) in tschanc alv, dretga ina furcletta orasum ed ina davon en, in quader ord miez l'ureglia, seniastra giudasum ed in quader ord miez l'ureglia.

### 1893

#### Tiers jasters

A **Camischolas** (**Tujetsch**) tier Gion Andriu Berther sesanflam pliras nuorsas buca tundidas vegnidas neutier suenter la zavrada:

- 1) in tschanc ner entir cun corns, dretga giudasum, ina ruosna e furcletta davos en, seniastra fess,
- 2) in tschanc ner entir cun corns, dretga ina ruosna e fess, seniastra giudasum, fess ed in snez davos en,
- 3) ina nuorsa nera, titgira cotschna sin in calun, dretga fess in snez entraviers davos en, in mugrin davon en, seniastra ina furcletta orasum, in snez entatraviers davos en,
- 4) ina nuors' alva, dretga ina furcletta orasum, ina davon en, in snez davos en,
- 5) ina nuorsa grischa cun corns, dretga furcletta orasum dus snezs davos en entroma anavon, seniastra ina furcletta orasum, ina davon en e titgira cotschna sin il culiez.

### 1893

Signur candidat dalla medischina Stiafen Berther da **Camischolas** ha dacuort fatg cun bien success siu emprem examen propedeutic sill'universiatd da **Turitg**. Gratulein!

### 1893

Ord l'allontanada alp **Cavradi** sper **Tschamut**, appartenenta alla pervenda da **Trun**, la quala plirs speculants da leu vevan uonn gartegiau da prender si per far fein a pastg, ei vegniu menau el decuors dil davos temps entuorn 600 tscheners (*centner*) oreifer fein alpin da stupent' aroma, staus fenaus la biala stad vargada e cavegliaus cun tut quitau sin meidias al pei dall'alp. Per facilitar il custeivel e grev transport entuorn duas aultas vals, ei tras mechanist Huonder da **Mustér** vegniu mess neu in inschignus cundrez cun sugaras da fildirom en ina lunghezia da 2000 meters, sillas qualas l'entira provisio da fein ei vegnida menada al stradun en ponns, pendi vid numerusas rodas da ghisa cun crutsch. Cun la medema caschun han ils impressaris era giu la buontad da schar empruar pil disturbi vischins da **Selva** co lur buordis lenna schulien en ina minuta neu dallas vals e precipizis, il qual duei haver plaschiu ad els lunsch meglier, che da stuer semudergiar temps d'unviern tras lavinas e vals cun lur cargas. En outras cuntradas muntagnusas dueien tals cundrezs pari ils davos onns ad esser vegni instradai cun bien success, spezial pil transport da lenna ord uauls enza ni cun mo greva communicaziun. Aschia sa ina massa lennam, che smarschescha schiglioc si ellas regiuns aultas, vegnir explotada ed ils uauls dalla bassa vegnan cheutras schurmegiai, il qual ei generalmein ualti necessari. S'entelli che tals cundrezs cunvegnan mo tier explotaziun all'ingrossa.

*Gasetta Romontscha nr. 45, 9 da november 1893*

### 1893

A **Sedrun** tier Josef Flurin Huonder:

- 1) ina nuorsa alva, dretga ina pala, seniastra giudasum e furcletta davos en,
- 2) in anugl alv, dretga giudasum e snez davos en, seniastra fess e furcletta davon en.

A **Sedrun** tier Giachen Antoni Beer

- 1) in anugl alv, dretga osum furcletta e ruosna, seniastra giudasum e snez davos en,
- 2) tier Rest Monn in ansiel ner, ureglia seniastra in M davos en.

A **Sedrun** tier Bruno Soliva in'ansola, dretga ina furcletta davon, seniastra in snez davos en.

A **Selva (Tujetsch)** tier Gion Antoni Peder in anugl ner, dretga giudasum, furcletta e snez da mintga maun dalla furcletta davos en, seniastra giudasum ed ina tezla cun spezia da crusch.

A **Sedrun** tier Sep Antoni Gamboni

- 1) in ansiel nergagl, dretga giudasum, in snez davon en en tiel tgau;
- 2) tier Anselm Muggli in ansiel ner penderliu, uerglia seniastra fess osum.

*Gasetta Romontscha nr. 48, 30 da november 1893*

### 1893

A **Cavorgia (Tujetsch)** tier Lezi Antoni Peder in ansiel ner, dretga giudasum ed ina furcletta davos en, seniastra ina furcletta davos ed in snez davon en.

*Gasetta Romontscha nr. 49, 7 da december 1893*

### 1893

In ufficial american romontsch, domiciliaus a **Badus, Dacota dil Sid**, scriva a nus denter auter: Co ei va tscheu vegnan quels, ch'ein dacuort turnai ord l'**America** schon ad haver discurriu, en scadin cass ei dapresent buc in bien temps da vegnir ell'**America**. Jeu sun ussa tscheu varga 20 onns, e hai aunc mai viu schi schliats temps, sco quei che nus havein uonn, pauca ni negina fadiglia e buca daners en circulaziun.

*Gasetta Romontscha nr. 50, 14 da december 1893*

### 1893

#### Tiers jasters

A **Sedrun** tier Placi Jacomet:

- 1) in anugl alv, dretga giudasum ed ina furcletta davon en, seniastra giudasum ed ina furcletta davos en,
- 2) in anugl grisch cun corns, dretga giudasum, dus snezs davos en e fildirom mellen,
- 3) ina tigisch nera, dretga giudasum, fess ed ina furcletta davos en, seniastra in snez davos en entraviers.

*Gasetta Romontscha nr. 50, 14 da december 1893*

### 1893

#### Scamond

Tut pinar badugnas, collers, tortas etc. a **Nislas e Baglieuls (Bagliel, Bigliel)** ei scumandau sut castitg.

Ils possessurs dil prau

*Gasetta Romontscha nr. 52, 28 da december 1893*

### 1894

Tenor ina publicaziun dil comite d'gid ei tochen ussa vegniu en pils donnegiai dil fiug a **Glion** en tut 8105 frs. .... **Tujetsch** ha dau 41 frs. ...

*Gasetta Romontscha nr. 2, 11 da schaner 1894*

### 1894

Per in mussament dalla bunaura, che regia dapresent ellas aultas muntognas, han umens da **Tujetsch** che mavan per fein a pastg ed han sin lur viadi giu anflau genzianas flurentas, tarmess ina da quellas alla redacziun della Gasetta Romontscha.

*Gasetta Romontscha nr. 6, 8 da fevrier 1894*

### 1894

Spella fontauna dil **Rein** - ella **Cadi** - ha l'iniziativa dil dazi entschiet a prender si ualti ferm tgierp e schein nus oz ruclar quel dalla val giuado, buca dil **Rein** giu sco las biaras leschas da **Berna**, bein aber via **Cuera – Herzogenbuchsee** – palaz a **Berna**. ... Perquei suttascrivi vus tut, conservativs e liberals, che saveis tgei ei vul dir luvrar e barhar per viver. ... **Tujetsch** ha furniu

161 su ttascripzion, ... Total ella **Cadi** 1250.

*Gasetta Romontscha nr. 9, 1. da mars 1894*

#### 1894

Tujetsch ha aunc furniu posteriuramein 18 su ttascrizioni pell'iniziativa dil dazi, **Mustér** 7. Total ella **Cadi** 1275.

*Gasetta Romontscha nr. 10, 8 da mars 1894*

#### 1894

(Tarmess en.) Ils 29 da mars ei sut gronda participaziun da vart dil publicum vegniu teniu a **Trun** l'exposiziun da s.h. taurs. En tut ei vegniu menau si 60 tgaus, 14 mutgs e 46 stiarls. ...

II. classa: ... 7) Adolf Cavegn, **Tujetsch**, in stierl 65 frs., ...

III. classa: han obtenu premis a 50 frs.: ... 15) Paly Gion Anton, **Tujetsch**, .. 19) Beer Stiafen, **Tujetsch**, ...

*Gasetta Romontscha nr. 14, 5 d'avrel 1894*

#### 1894

Sin territori **Grischun** ei il stradun dall'**Alpsu** cun pintga breigia vegnius aviarts quels dis e han ins speronza, che quei stimuleschi era nos stimai vischins uranès d'arver lur vart, che dessi relativamein era pigns cuosts. Igl ei mintg'onn ina vera calamitad, che quei pass, che custass ordinariamein il pli pauc da tuts d'arver schon a bun'ura, vegn cuntrari aviarts in dils pli davos e quei ord motiv, ch'el ei sin intsches da dus cantuns, respectiv era d'in cantun che vul far nuot e fa nuot per quei pass. ...

*Gasetta Romontscha nr. 20, 17 da matg 1894*

#### 1894

Essend che l'**Alpsu** ei aunc ussa da vart uranès buca aviarts, malgrad las pintgas breigias necessarias, ei nossa regenza vegnida supplicada da vuler effectuar tiella regenza uranès da schenghegiar a quei pass empau pli bia attenziun da sia vart. Sch'ins pareglia la survesta cumparida dacuort sur il diember dils viandonts, che han 1893 passau nos pass alpins culla posta, sche figurescha l'**Alpsu (Cuera – Caschinutta)** tonaton cul considerabel diember da 13'635 e sesanfla aschia denter ils frequentai pass.

*Gasetta Romontscha nr. 21, 23 da matg 1894*

#### 1894

Ella scola cantunala ei la jamna passada vegniu fatg ils examens per 7 abituriens, che han finiu ils studis gimnasials e ch'ein vegni declarai per madirs tiella universitat, 5 culla nota II e culla III, milsanavon han 33 alumis dil seminari scolastic fatg igl examen per la patenta. *Denter quels sesanfla Palli Jacob da Tujetsch.*

*Gasetta Romontscha nr. 28, 12 da fenadur 1894*

#### 1894

Sche la Bündnerpost scriva che **Tujetsch** hagi uonn ina biala raccolta da mèl e quel seigi muort sia bellezia e delicatezza fetg tschercaus, sch'ei quei ver, mo alterau eis ei da pretendere, ch'ins vendi quel per 3 – 4 frs. il fun, per dus francs la glivra (*il fun*) sa ella retrer dils apiculturs tuatschins mèl per far regals sin tuts mauns.

*Gasetta Romontscha nr. 31, 2 d'uost 1894*

#### 1894

Ils marcadonts Kellenberger han cumprau si ellas alps da **Tujetsch** e **Val s. Pieder** circa 100 genetschas e vaccas e dueien ver pagau per las principales tochen 500 frs. ina.

*Gasetta Romontscha nr. 33, 16 d'uost 1894*

**1894**

In s.v. engarschaun 1½ onn (bristga) sco era in bi envernaun mascal schubergiau venda Carl Caveng a **Tschamut**.

*Gasetta Romontscha nr. 38, 20 da settember 1894*

**1894**

Suenter ina reussida emprova digl atun vargau ha signur hotellier Carl Caveng a **Tschamut** tenor entelgiantscha culla ludeivla vischnaunca da **Tujetsch** mess in considerabel diember grondas litgivas el lag da **Tuma** – la fontauna dil **Rein** – per empruar da popular quel cun peschs. Il romantic contuorn dil **Badus** ni **Six Madun** cun siu idillic lag vegn tras quella nova populaziun cul temps a vegnir dublamein emperneivels sco liug d'excursiun.

*Gasetta Romontscha nr. 41, 11 d'october 1894*

**1894**

**Tiers jasters**

A **Tujetsch** tier Gion Andriu Berther:

- 1) in tschanc ner, dretga giudasum, furcletta ed in snez davos entatier il tgau, seniastra giudasum, fess ed in snez davos en e giudasum la cua.
- 2) ina nuorsa nera, dretga in mugrin orasum davon en e priu ora ina farcla e scursala entatier il tgau ed in snez davos en orasum.

*Gasetta Romontscha nr. 42, 18 d'october 1894*

**1894**

**Cadi**

Las soras Veronica ed Agustina Caveng han per ugau gerau Anselm Capeder, tuts da **Tujetsch**.

*Gasetta Romontscha nr. 44, 31 d'october 1894*

**1894**

La redacziun dalla Gasetta Romontscha ei quels dis nunspitgadamein vegnida regalada cun ina scatla péra “ord igl iert pervenda a **Sedrun**, 1398 meters sur mar.” Péra da **Tujetsch!** Pilver enzatgei reschniev ed aunc mai sudiu. Tut che sescarpava da mirar e schigiar quei bi e delicius fretg. La pomologia ha ils davos onns tras tschaffen e perseveronza fatg gronds progress en **Sursassiala**. Nies cordial engraziament per quei original schenghetg!

*Gasetta Romontscha nr. 45, 8 da november 1894*

**1894**

In bien cavagl da maz tier Florentin Caveng a **Sedrun**.

*Gasetta Romontscha nr. 45, 8 da november 1894*

**1894**

**Tiers jasters**

A **Sedrun** tier president communal Soliva ina nuorsa nera, dretga ina ruosna ed in mugrin orasum davos en, seniastra ina ruosna.

*Gasetta Romontscha nr. 50, 13 da december 1894*

**1894**

**Tiers jasters**

A **Sedrun** tier Giachen Antoni Soliva duas ansolas cun la medema noda: ureglia seniastra tagliau giudasum e fess, dretga fess.

*Gasetta Romontscha nr. 51, 20 da december 1894*

**1895**

**Annunzia**

Il suatascret fa cheutras da saver ad in ludeivel publicum da **Tujetsch** ch'el mondi duront quest

unviern a cuser il stèr per 1 fr. per di, buca sco ei vegn plidau tscheu e leu dad 1 fr. 50 ct.

Empermettend a sias stimadas postas buna e solida lavur, serecamonda gentilmein

**Tujetsch-Gonda**, il schaner 1895

Schmed Duri, calger

*Gasetta Romontscha nr. 2, 10 da schaner 1895*

**1895**

**In bien calger**

anfla lavur tier calger Jacob Martin Curschellas a **Surrein-Tujetsch**.

*Gasetta Romontscha nr. 3, 17 da schaner 1895*

**1895**

Il december vargau ha in emigrau cumpatriot secret a nus da **Badus**, stadi **Dacota dil Sid**, denter auter il sequent: Ei vegn ad esser enconuschent ad els, che nus havein in schliet onn, in onn da negin fretg. Salin ha ei dau il sem, truffels e terc nuot e negin fein. Ils tiers han ei stuiu ir tschien miglias lunsch ed aunc dapli tiels Indians, per schar envernar e prender anavos primavera, quels ch'ein aunc vivs. L'entira stad ha ei tier nus pluiu ina suletta gada e quei mo 10 minutias. Il mender vegn ei ad esser primavera, biars han buca sem da metter ora e buca daners da cumprar e nuot da perver ils tiers da lavur etc.

*Gasetta Romontscha nr. 4, 24 da schaner 1895*

**1895**

Entras la tscherca ella Gasetta Romontscha ei il suatascret vegnius en possess d'in bi s.v. piertg maschal entir, il qual el tegn en disposiziun. Dapli ha el venal in s.v. piertg maschal schubergiau dad in onn e meiz.

Sebastian Beer, fravia **Sedrun**

*Gasetta Romontscha nr. 6, 7 da fevrier 1895*

**1895**

L'inspecziun dalla schuldada dil landsturm cun buis ed ils respectivs exercezis han liug per ils singuls battagliuns ils suandonts dis: battagliun da fisiliers 90, stab e III. cumpignia, ils 15 da matg a **Glion**. I. cumpignia (secziun **Tujetsch**, **Medel** e **Mustér**) ils 20 da matg a **Mustér**, ...

*Gasetta Romontscha nr. 10, 7 da mars 1895*

**1895**

(Communicau.) L'inspecziun dils uffecis civils ella **Cadi** pro 1894 ha resultau la suandonta statistica da naschientschas, mortoris e lètgts (cumpriu ils burgheis dalla **Cadi** domiciliai ordeifer lur vischnauncas).

	naschientschas	mortoris	lètgts
Muster	53	39	15
<b>Tujetsch</b>	<b>33</b>	<b>10</b>	<b>14</b>
Medel	23	13	7
Sumvitg	51	42	17
Trun	32	24	7
Schlans	6	1	3
Breil	36	23	9
<b>Total</b>	<b>234</b>	<b>152</b>	<b>72</b>

En quels totals ein 60 naschientschas, 47 mortoris e 35 copulaziuns da lètgts, da burgheis dalla **Cadi** domiciliai ordeifer lur vischnaunca.

*Gasetta Romontscha nr. 10, 7 da mars 1895*

**1895**

**Alp per genetschas e mutgs**

1. La vischnaunca da **Tujetsch** enquera da prender si en sia alp da genetschas per la proxima stad enzacontas genetschas jastras.

2. Dapli pren quella era si in diemberet mutgs en si' alp **Maighels**.

Las genetschas pagan per la jarva 10 frs. per tgau ed ils mutgs 7 frs. per tgau. Il pustretsch ed autras eventualas spesas han ils relativs possessurs da tala biestga da pagar extra dalla sura indicada taxa. Da s'adressar tier la suprastanza locala tochen ils 15 da matg o.c.

La suprastanza da **Tujetsch**

*Gasetta Romontscha nr. 10, 7 da mars 1895*

**1895**

La fiera da **Trun** dils 18 d.q. ei stada frequentada d'in diember marcadonts bavarès, tudestgs-svizzers ed interns, sco era d'ina massa glieud. ... Per ina biala vadala da **Schlans** da 10 jamnas han Tuatschins pagau 6 marenghins. ...

*Gasetta Romontscha nr. 12, 21 da mars 1895*

**1895**

Las vischnauncas d'**Ursera** e **Mustér** han tras mediaziun da lur tit. regenzas dau en al departement postal federal la motivada instanza da vuler ereger sur la **Alpsu** in telegraf. ...

*Gasetta Romontscha nr. 13, 28 da mars 1895*

**1895**

**Ustria dalla Cruna a Sedrun**

Ils suittascrets notifichechan cheutras ad in ludeivel publicum, ch'ei hagien vendiu lur ustria a lur quinau signur Placi Matias Berther-Caveng, il qual ha schon ina retscha d'onns funcziunau sco Oberkellner en plirs hotels. Els engrazian per la confidonzia demussada tochen encheu a lur ustria e suppliceschan d'era vuler conservar quella per lur successur.

**Sedrun**, ils 23 da mars 1895

Frars Caveng

.....

Sereferend sillla sura annunzia, recamonda il suittascret sia ustria "Cruna a **Sedrun**" ad in ludeivel publicum. El vegn a sedar tutta breigia per menar vinavon quei daditg enneu bein accreditau hotel e tras bien tractament e moderai prezis acquistar la cumentientscha da ses gasts. Per numerusa frequenza serecamonda gentilmein.

**Sedrun**, ils 23 da mars 1895

Placi Matias Berther-Caveng

*Gasetta Romontscha nr. 13, 28 da mars 1895*

**1895**

**Annunzia da mort**

Cheutras notifichein nus a nos parents ed enconuschents, ch'ei hagi plaschiu agl Altissim da clamar ella perpetnadad nossa cara consorta e mumma

**Onna Maria Wenzin**, nata Deflorin

Ella ei spartida la damaun dils 21 d.q. provedida cun ils ss. sacraments e perduns dils moribunds, en ina vegliadetgna da 63 onns ed in meins. Nus recumandein sia olma alla pia memoria da tuts parents ed enconuschents.

Gion Fidel Wenzin, mariu

Giusep Florin Wenzin,

Barla Catrina Monn-Wenzin,

e Hans Giachen Wenzin, affons,

Gion Andriu Monn, schiender

M. Gada Pally, brit

**Tujetsch-Selva**, ils 24 da mars 1895

*Gasetta Romontscha nr. 13, 28 da mars 1895*

**1895**

**Venal**

Ina hutscha da 14 meins tier Martin Riedi a **Tschamut**.

*Gasetta Romontscha nr. 14, 4 d'avrel 1895*

**1895**

**Cadi**

Alla firma Frars Cavegn a **Sedrun** ei per in accumodament vegniu schau in termin da dus meins e destinau president J. J. Condrau a **Mustér** per lur factor, al qual tuts quens cun quella firma dueien vegnir dai en sils 14 da matg. Per quei accumodament ei fixau ina radunanza dils crediturs sils 17 da zercladur el hotel dalla Cruna a **Sedrun**.

*Gasetta Romontscha nr. 18, 2 da matg 1895*

**1895**

**Cumin 1895**

... Ella dertgira: scolast Anselm Capeder da **Tujetsch**, ... suppleant per la dertgira: scolast Soliva da **Tujetsch**.

*Gasetta Romontscha nr. 19, 9 da matg 1895*

**1895**

Las postas alpinas grischunas han 1894 menau en tut 119'714 passagiers e priu en per quels 661'816 frs. ... **Alpsu (Cuera – Caschinutta)** 14'086 passagiers 60'968 frs.; **Lucmagn (Mustér – Biasca)** 1126 passagiers e 2633 frs. ...

*Gasetta Romontscha nr. 20, 16 da matg 1895*

**1895**

... Il **Lucmagn** ei carregiabels cun empau breigia dil premurau spitalier da **S.Maria** e per schar passar la posta l'entschatta zercladur sull'**Alpsu** vegn ei a custar pauc.

*Gasetta Romontscha nr. 20, 16 da matg 1895*

**1895**

**Annunzia da mort**

En profunda dolur e tristezia fagein nus da saver a nos parents ed enconuschents, ch'ei hagi plaschiu agl Altissim da clamar ord questa veta nies car mariu, bab, frar e quinau **gerau Vigeli Giusep Berther**

El ei morts la damaun dils 13 d.q. suenter ina liunga e dolorusa malsogna, provedius cun tuts s. sacraments e perduns dils moribunds en ina vegliadetgna da 45 onns.

Nus recumandein l'olma dil car defunct a tuts parents ed enconuschents.

**Sedrun**, ils 13 da matg 1895

Maria Berther, nata Desax, consorta

Barla Cathrina Berther, fegl

Maurus Berther, fegl

era en num dils fargliuns e quinaus dil defunct

*Gasetta Romontscha nr. 20, 16 da matg 1895*

**1895**

La vischnaunca **Tujetsch** enquera per la proxima stad in bien e fidau nurser. La pagaglia porta en 400 – 500 frs. Il temps da survetsch cuoza circa 3 meins. Aspirants san s'adressar tier la suprastanza locala entochen ils 10 da zercladur.

**La suprastanza**

*Gasetta Romontscha nr. 20, 16 da matg 1895*

**1895**

Ina buna vacca vegn prida si naven dad ussa pella stad da Placi Berther ella Cruna a **Sedrun**.

*Gasetta Romontscha nr. 21, 22 da matg 1895*

**1895**

**Fiera a Sedrun**

Sonda proxima ils 8 da zercladur.

*Gasetta Romontscha nr. 23, 6 da zercladur 1895*

**1895**

*Exercezis militars dalla recruta. Da 400 ein circa 300 umens vegni a Mustér cun 25 officiers, il rest ei sefermaus a Sedrun per passar il Kritzlipass (Pass la Crusch). ...*

*Gasetta Romontscha nr. 24, 12 da zercladur 1895*

**1895**

**Annunzia da mort**

En profunda dolur notifichein nus cheutras a parents ed enconuschents ch'ei hagi plaschiu agl Altissim da clamar ella perpetnadad nies car mariu, bab e sir

**Gion Andriu Berther**

El ei spartius questa damaun suenter ina liunga malsogna, provedius cun tuttas consolaziuns da nossa s. religiun en ina vegliadetgna da 60 onns.

Nus recumandein l'olma dil preziau defunct alla pia memoria da tuts parents ed enconuschents.

La famiglia en malencurada:

**Camischolas-Tujetsch**, ils 3 da fenadur 1895

Christgina Berther, nata Deflorin, consorta

Gion Andriu Berther, fegl

Stiafen Berther, fegl

Carmelia Berther, feglia

*Gasetta Romontscha nr. 27, 4 da fenadur 1895*

**1895**

Dumengia vargada ha monsignur Battaglia benediu ora 12 alums dil seminari clerical a S.Lezi. Denter quels sesanflan mo 4 Grischuns, numnadamein era igl aultreveriu signur Alois Brugger da Tujetsch, ...

*Gasetta Romontscha nr. 29, 18 da fenadur 1895*

**1895**

Dils alums dil seminari clerical benedi ora da cuort da monsignur uestg a Cuera ... legia signur Josef Aluis Brugger da Tujetsch ils 15 d'uost a Sedrun. Augurein biala primizia!

*Gasetta Romontscha nr. 30, 25 da fenadur 1895*

**1895**

... Mustér ha considerabla fuola dad jasters, ins auda plidond sin gassa tudestg, franzos, talian ed engles. Da biars han stuiu prender quatier en casas privatas. Ils biars curants vegnan leu e tuornan anavos sull'Alpsu, per ton pli spert arrivar tiella viafier. ...

*Gasetta Romontscha nr. 31, 1. d'uost 1895*

**1895**

**Annunzia da mort**

En profunda dolur e tristezia notifichein nus a parents ed enconuschents, che Niessegner hagi clamau tier el nies carissim mariu, bab, frar, sir, aug e quinau

El ei spartius ils 12 d.q. suenter ina liunga e dolorusa malsogna, provedius cun ils s. sacraments e perduns ella vegliadetgna da 66 onns e 2 meins.

Nus recumandein sia olma allas ferventas oraziuns da tuts parents ed enconuschents.

M. Cristgina Wenzin, consorta

Giachen Giusep, en num dils affons,

Giusep A. e M. Nescha, fargliuns  
J. Anton Wenzin, caplon, quinau  
er'en num dils auters parents.

**Sedrun**, ils 16 da settember 1895

*Gasetta Romontscha nr. 38, 19 da settember 1895*

## 1895

Ina s.h. hutscha cun sis purschals da 5 jamnas tier Florentin Caveng a **Sedrun**.

*Gasetta Romontscha nr. 40, 3 d'october 1895*

## 1895

### Annunzia

Il suittascret fa cheutras enconuschenet ad in ludeivel publicum, ch'el hagi tschentau si a **Sedrun** ina maschina da scarsinar launa. Essend el s'occupaus varga 20 onns cun quei mistregn sa mintgin spitgar buna lavur e per in fetg raschuneivel prezi.

Anton Gisler

*Gasetta Romontscha nr. 41, 10 d'october 1895*

## 1895

### Tiers jasters

A **Rueras** tier Gion Antoni Hitz:

- 1) ina nuorsa nera, seniastra ina furcletta davos en;
- 2) in tschanc ner, dretga in mugrin orasum e dus snezs davos en, seniastra fess;
- 3) in tschanc ner, dretga ina furcletta, seniastra ina ruosna.

*Gasetta Romontscha nr. 41, 10 d'october 1895*

## 1895

Igl aultreveriu signur *Giusep Aluis Brugger* da **Tujetsch**, che ha questa stad legiu messa nuviala en sia vischnaunca nativa sut gronda ed edifonta participaziun da quella, ei dumengia vargada, ils 13 d.q. vegnius eligius sco plevon da **Trun**, nua ch'el haveva il davos temps funcziunau sco provisur. Ad multos annos!

*Gasetta Romontscha nr. 42, 17 d'october 1895*

## 1895

### Annunzia da mort

Ei ha plaschiu agl Altissim da clamar tier El nies car mariu, bab, sir, frar e quinau **gerau Duri Wenzin**

El ei spartius ils 12 d.q. la damaun suenter liunga dolorusa malsogna, provedius cun tuttas consolaziuns da nossa s. religiun ella vegliadetgna da 62  $\frac{1}{2}$  onn.

Nus recumandein l'olma dil car defunct alla pia memoria da tuts parents ed enconuschents.

La famiglia en malencurada:

M. Constanzia Wenzin, nata Beer, consorta

Vigieli Giusep Wenzin, fegl

era en num dils auters affons.

Thomas Beer, farrer, quinau,  
era en num dils auters parents.

**Rueras**, ils 15 d'october 1895

*Gasetta Romontscha nr. 42, 17 d'october 1895*

## 1895

### Tiers jasters

A **Rueras** tier Fridolin Berther ina caura cotschna, dretga giudasum, seniastra dus snezs davon ed in davos en.

*Gasetta Romontscha nr. 42, 17 d'october 1895*

**1895**

**Annunzia da mort**

En profunda dolur notifichein nus a parents ed enconuschents, ch'ei hagi plaschiu a Diu da clamar tier la perpetnadad nies car frar ed aug

**Duri Battesta Wenzin**

El ei morts la damaun dils 16 d.q. suenter ina dolorusa malsogna, beinresignaus ella veglia da Diu, provedius cun tuts s. sacraments e consolaziuns da nossa s. religiun en ina vegliadetgna da 57 onns e 4 meins.

Nus recumandein l'olma dil preziau defunct alla pia memoria da tuts parents, amitgs ed enconuschents.

**Rueras-Tujetsch**, ils 22 da november 1895.

Per la parentella en malencurada:

Fausta Muggli-Wenzin, sora

Christian Muggli, nevs

Rosina Cagienard-Muggli, niazza

Cristgina Muggli-Bear, niazza

Maria Cagienard, sutniazza

*Gasetta Romontscha nr. 48, 28 da november 1895*

**1895**

**Tiers jasters**

A **Rueras** tier Vigiel J. Monn ina caura mesalva, ureglia dretga giudasum ed ina furcletta rodunda davon en, seniastra in snez davon en.

*Gasetta Romontscha nr. 48, 28 da november 1895*

**1895**

**Bials schenghetgs**

per affons sin Daniev sco era nuschs, mèl, vinars trester e liquers san ins haver tier

Florentin Caveng a **Sedrun**

Ustria Kreuzlipass

*Gasetta Romontscha nr. 49, 5 a december 1895*

**1895**

**Tiers jasters**

A **Cavorgia-Tujetsch** tier Luis Hendry ina caura cotschna da scalin, dretga in snez davon en en tiel tgau, seniastra ina pintga furcletta davon en, semeglia murdiu ora, sils corns noda-casa.

*Gasetta Romontscha nr. 50, 12 da december 1895*

**1895**

**Tiers jasters**

A **Bugnei-Tujetsch** tier Emanuel Deragisch, ligiacudischs, ina ansola nera, dretga giudasum, seniastra ina furcletta osum.

A **Cavorgia-Tujetsch** tier Gion Antoni Schmid duas cauras neras jastras

1) dretga osum davos en in mugrin, seniastra furcletta davos en e scurselau orasisum davos orasi,

2) dretga in tarden orasisum, seniastra duas furclettes davos en ed orasisum ina fuortga.

*Gasetta Romontscha nr. 51, 19 da december 1895*

**1895**

Venal ina biala vacca giuvna, che fa da miez schaner per la tiarza ga vadi, ed ina gronda e biala mugia. Da s'adressar tier gerau Cristian Muggli a **Rueras**.

*Gasetta Romontscha nr. 52, 24 da december 1895*

**1895**

Von **Disentis** beginnt das weidenreiche, von mächtigen Gebirgen eingeschlossene Hochtal

**Tavetsch**, eine Perle unter den Alpentälern, mit den Ortschaften **Sedrun** (1398 m), **Rueras** (1409 m) und **Tschmaut** (1640 m), und in vielen Windungen der kunstvollen Oberalpstrasse, deren Erstellung gegen eine halbe Million Franken gekostet hat, gelangt der Reisende über die Passhöhe (2046 m) hinab zum dunkelgrünen und forellenberühmten **Oberalpsee** und weiter nach **Andermatt**. Die meisten Orte dieser Route sind nicht nur beliebte Sommerfrischen, sondern auch bergsteigerquartiere ersten Ranges. Von **Tschamut** aus wird der **Tomasee** besucht, ein kleines, dunkelgunes, fischloses, von Felsen und Geröllhalden umschlossenes Gewässer, der Quellsee des **Rheins**, zu dem die Gletscherbäche des **Badus** und **Krispalt** niederrinnen.

*Album der Schweiz 1895*

## 1896

### Ingant a Sedrun

ils 23 da schaner 1896 allas 10 avonmiezdi, vegn a **Sedrun** ella Cruna ingantau sequents beins da Giachen Antoni Zanetti a **Sedrun**:

- a) sia hetta da barschar vinars cun bien uorden.
- b) In plizug

Uffeci da stumadira dalla **Cadi**.

**Trun**, ils 9 da schaner 1896

Cathomen Mathias

*Gasetta Romontscha nr. 3, 16 da schaner 1896*

## 1896

(Correspondenza.) Quels dis ein in agen «Spazzatgamin» cumparius dalla versada plema da nies revendissim pader Baseli Berther a **Mustér**, sco squetsch separau ord las annalas dalla societad retoromontscha. Igl ei ina cumedia en dus acts. Ord pliras raschuns vessen nus viu «Il spazzatgamin» pli bugen en in act; mo era en sia divisun plai el a nus aunc adina bein avunda. Ils Romontschs, che han aunc ina sbrenzla d'interess per lur lungatg, vegnan a leger quella cumedia, scretta en schi bialas e bunas expressiuns popularas, en in schi ferm e bi lungatg. A societads da teater savein nus garantir, ch'il «Spazzatgamin» ei la cumedia la pli humoristica existenta en nies romontsch. – Sempla scenaria, rollas mo per umens, veta dramatica, stupenta comica, bi lungatg – tgei vul ins aunc dapli? Las societads teatralas, che vulan porscher al pievel in saun e legreivel divertiment, prendan amauns il «Spazzatgmin». E quel recumandein nus cauldamein buca mo pil teater, era per la lectura, a tuts cumpatriots sursilvans, principalmein als scolasts, che dueigien oravon tuts sustener cul fatg quels, ils quals impundan temps e talents e daners per la sviluppazion e pil mateniment da nies lungatg murent.

*Gasetta Romontscha nr. 7, 13 da fevrier 1896*

## 1896

**Tujetsch** enquera in bien pastur en ina segira alp da genetschas, numnada **Nual**. Ulteriur sclarament dattan ils cautegias Lezi Huonder e Gion Antoni Monn a **Sedrun**.

*Gasetta Romontscha nr. 7, 13 da fevrier 1896*

## 1896

(Communicau.) Ils 14 d.q. han dus vischins a **Sedrun (Gonda)** piars 3 cauras, las qualas ein vegnidias tut anetgamein malsaunas e ventschidas gia suenter tschun uras. Las enzennas duront la malsogna, sco era quellas vid il cadaver, laian concluder, ch'ei setracti cheu dalla medema malsogna sco quella vid il muvel da Giachen Lutz a **Medel**, numnadamein d'in aunc buc enconuschent tissi el fein. Perquei duess ei tier in eventual niev cass, il fein, il qual era el pursepen il mument ch'il tier vegn malsauns, vegnir tenius si, aschia era gl'entir cadaver, essend che l'expertisa ha da basegns da tut quei material.

*Gasetta Romontscha nr. 8, 20 da fevrier 1896*

**1896**

**Venal**

ina s.h. hutscha da 2 onns cun 5 purschals da 3 jamnas tier Giachen Antoni Soliva a **Sedrun**.  
*Gasetta Romontscha nr. 12, 18 da mars 1896*

**1896**

**Annunzia da mort**

En profunda dolur purtein nus cheutras a nos parents, amitgs ed enconuschents la tresta nova,  
ch'ei hagi plaschiu agl Altissim da clamar ella gloria celestiala nies carezau affon

**Gion Giusep Giger**

El ei spartius ils 31 d.q. sin ina cuorta mo greva malsogna en ina vegliadetgna da 2 onns.

En profunda dolur signeschan

Josef Maria Giger, bab

Maria Tresa Giger, nata Giossi, mumma

Gerau Gion G. Giossi, tat

**Rueras**, ils 31 da mars 1896

*Gasetta Romontscha nr. 14, 2 d'avrel 1896*

**1896**

L'exposiziun da taurs a **Trun** ha giu liug ils 8 d.q. sut gronda frequenza da glieud e tiers.

Premis: ... 21) Augustin Soliva, **Tujetsch**, per in stierl 50 frs. ...

In stierl da Hans Giachen Caduff da **Tujetsch**, staus classificaus sut nr. 6 ha buca obtenu premi,  
essend buca staus presents sill'inspecziun digl atun.

*Gasetta Romontscha nr. 15, 9 d'avrel 1896*

**1896**

Il suttascret tscherca da prender si sin igl emprem da matg in pulit cavagl a tscheins per la  
proxima stad.

Carl Caveng, Rheinquelle, **Tschamut**

*Gasetta Romontscha nr. 15, 9 d'avrel 1896*

**1896**

**Creisma**

Ils 6 serenda monsignur a **Tujetsch**, creisma leu ils 7 e vegn la sera anavos a **Mustér**.

*Gasetta Romontscha nr. 16, 16 d'avrel 1896*

**1896**

Oz finescha monsignur usetg siu viadi da creisma ella **Surselva** cun cresmar ils affons dalla  
pleiv da **Tujetsch**. Malgrad sia ordra dada d'abstrahar da tuttas festivitads, eis el tuttina en  
tuttas pleivs vegnius beneventaus cun artgs da triumf – ed outras decoraziuns. El para malgrad  
ses 68 onns sauns e viscals e speronza che quei vegni aunc ad esser il cass ad multos annos!

*Gasetta Romontscha nr. 19, 7 da matg 1896*

**1896**

Sco ins auda ei sin dumengia proxima, ils 17 d.q. suentermiezdi, clamau el el hotel **Oberalp** a  
**Glion** ina radunoza da tut ils hoteliers dalla **Surselva**, naven da **Rehanau** entochen Val, **Alpsu**  
e **Lucmagn**, per sedeliberar inaga sur communabel operar per promozion dil traffic da jasters,  
cun ina communabla, intensiva reclama per la biala **Surselva** ed eventualmein dar ora in  
cudischet cun descripziuns ed illustraziuns dalla vallada, in schinumnau «Wanderbild». ...  
*Gasetta Romontscha nr. 20, 13 da matg 1896*

**1896**

Tenor novas recentas vegn l'**Alpsu** dil **Grischun** aviarta oz, mo sil territori uranès vegn aunc  
ussa luvrau nuot. In empustau coratschier sogngagliènè da **Buchs** ei igl emprem d.q. vegnius a  
**Caschinutta** per retscheiver ina famiglia jastra, che vegneva ord l'**Italia** e leva passar ils 2

**l'Alpsu**, mo ha stuiu dar si quei plan.  
*Gasetta Romontscha nr. 23, 3 da zercladur 1896*

**1896**

**In scolast**

per la scola a **Cavorgia** enquera il cussegl da scola da **Tujetsch**.  
*Gasetta Romontscha nr. 23, 3 da zercladur 1896*

**1896**

La fiera da **Sedrun** ha uonn giu paucs tiers e pintga muntada. Marcadonts jasters era ei negins ed igl ei vegniu marcadau mo denter ils purs; igl ei vegniu vendiu vaccas per 20 marenghins e las pli biaras cauras per 25 frs.

*Gasetta Romontscha nr. 24, 11 da zercladur 1896*

**1896**

Cun gronda breigia ein ils pass **Alpsu** e **Furcla** stai aviarts sils 15 d.q., nua che las postas han uonn per l'emprema ga passau quels cuolms. Igl ei stau in onn excepziunal da grondas nevadas sillas muntognas e cun quei ei iu schi plaun cun quella avertura, mo sch'il defunct activ e premurau Sebastian Christen ad **Ursera** fuss aunc staus en veta, fuss ei probabel iu empau pli spert cun quella lavur. Signur Teodor Fietz da **Hamburg** ha gia ils 5 da zercladur ughegiau da passar igl **Alpsu** cun sia crotscha, ch'ei vegnida cavegliada sin duas sliusas ed ha cun agid da cavals da supplement e da biars umens sut direcziun dil giuven hotelier Arthur Christen ventireivlamein passau l'**Alpsu**. Igl ei stau ina aventura e cara expediziun, che ha fatg al curaschus Signur Fietz ed a sia signura e feglia bein enqual plascher e vegn aunc ditg a restar ad el en frestga e legreivla memoria.

*Gasetta Romontscha nr. 25, 18 da zercladur 1896*

**1896**

Il suittascret enquera in buob dad 11 – 12 onns per pertgirar 20 – 25 pors, ussa tochen da scargar las alps.

**Martin Riedi a Tschamut.**

*Gasetta Romontscha nr. 25, 18 da zercladur 1896*

**1896**

Las alps ein ussa cargadas, priu ora a **Tujetsch** e **Medel**, nua ch'ils purs vulan entochen ch'ei ston buca fenar, sez regular lur tiers e fan era en roda sez signun ellas alps per buca stuer pagar memia bia pustretsch, vulend era «pli bugen pladir in um da fenar, che da sgarmar». L'autla temperatura dils davos dis – tochen 28 grads Celsius – ha luentau la neiv els aults e catschau vinavon la retardada vegetaziun. Concernent las alps ei ils davos onns daventau ni silmeins projectau bein enqual remadura, mo ei seschass aunc far bia per far render ellas empau meglier, che quei ch'igl ei il cass en bia cuntradas. Pli bia sur da quei in'autra ga.

*Gasetta Romontscha nr. 28, 9 da fenadur 1896*

**1896**

L'ugadia da vieua Barla Catrina Schmed ed affons da **Tujetsch** ei sligiada si.

Gerau Duri Berther ei ugau da vieua M. Turtè Beer e da siu absent fegl Cristian Valentin Beer, tuts da **Tujetsch**.

*Gasetta Romontscha nr. 28, 9 da fenadur 1896*

**1896**

**Annunzia da mort**

Cun dolur notifiechin nus a parents ed enconuschents la tresta sort da nies carissim affon **Gion Antoni**

Ils 14 d.q. eis el en siu siatavel onn vegnius disgraziaus en nies mises ella **Val Mila**, curdond

tras ina vadretg ell'aua furiosa e vegnend anflaus pér l'autra damaun.  
Recumandond per pia memoria  
ils contrastai geniturs:  
Christ Antoni Gieriet  
Barbara Catrina, nata Monn  
**Gonda-Tujetsch**, ils 16 da fenadur 1896  
*Gasetta Romontscha nr. 30, 23 da fenadur 1896*

#### 1896

Encuretg in mattatsch da 12 – 15 onns per pertgirar circa 100 cauras encunter buna pagaglia. Da s'annunziar persunalmein immediat tier Martin Berther a **Camischolas, Tujetsch**.  
*Gasetta Romontscha nr. 30, 23 da fenadur 1896*

#### 1896

Ils dis vargai han marcadonts svizzers cumprau si circa 80 genetschas ellas vischnauncas **Mustér, Tujetsch e Medel**, intragliauter seigi vegniu pagau entuorn 16 marenghins ina, il pli ault ei stau 22 marenghins.  
*Gasetta Romontscha nr. 37, 10 da settember 1896*

#### 1896

Sco auters onns ha era uonn igl enconuschen marcadont Stabel da **Regensburg** cumprau si ina partida genetschas ella val **Tujetsch** e pagau tochen 23 marenghins.  
*Gasetta Romontscha nr. 39, 24 da settember 1896*

#### 1896

In bien calger anfla lavur per in liung temps tier Emanuel Deragisch, calger a **Bugnei, Tujetsch**.  
*Gasetta Romontscha nr. 40, 1. d'october 1896*

#### 1896

Venal ina hutscha da 2 onns cun 6 purschals da 3 jamnas tier Florentin Caveng a **Sedrun**.  
*Gasetta Romontscha nr. 41, 8 d'october 1896*

#### 1896

Dus bials engarschauns mascals schubergiai tier Carl Caveng a **Tschamut**.  
*Gasetta Romontscha nr. 42, 15 d'october 1896*

#### 1896

... Sur da quei selai dar sequenta fundada risposta: Aschiditg sco ils gronds signurs bavarès vegnan onn per onn si tier nus e specialmein ella vallada da **Tujetsch** e cumpran igl emprem nossas vaccas e genetschas blauas, aschiditg sco nos stiarls clars ein fetg tschercai dils marcadonts talians e pagan 1 - 2 marenghins il tgau pli che quels da peil marun, e schiditg sco noossas exposiziuns naziunalas, sco per exempla la grondiusa da **Berna** digl onn vargau e da Genevra d'uonn, premieschan nossas vaccas e genetschas blauas cun grond laud, aschiditg vulein nus mantener nies vegl peil blau per nies general interess e vulein pli bugen abstrahar da visitar las exposiziuns districtualas e spargnar cuorsas e spesas.

II.

*Gasetta Romontscha nr. 43, 22 d'october 1896*

#### 1896

**Venal**

Dus bials engarschauns venda Placi Mathias Berther-Caveng hotelier a **Sedrun**  
*Gasetta Romontscha nr. 43, 22 d'october 1896*

#### 1896

**Tiers jasters**

A Rueras tier Gion Hitz:

1) ina nuorsa grischa, dretga in mugrin davos en ed in snez davon en, seniastra in mugrin davos en;

2) in tschanc ner, comba davon ligiada si, ureglia dretga in tarden, seniastra fess;

3) in tschanc ner, dretga ina furcletta orasum ed in snez davon en, seniastra ina furcletta orasum, dus snezs davon en ed ina ruosna

*Gasetta Romontscha nr. 43, 22 d'october 1896*

## 1896

Venal a **Bugnei, Tujetsch**, circa 10 tschaveras prau grass e magher, denter quei grass e magher a **Bigliel** e l'**Acla**. Plinavon dus mises, in a **Siat Fontaunas** e l'auter alla **Val**. Ulteriur sclariment dat Leci Huonder a **Sedrun**.

*Gasetta Romontscha nr. 44, 29 d'october 1896*

## 1896

Il remarcabel meins october 1896 ei stulius e negin che lai encrescher per quel. Il meins november pareva ils emprems dis da semetter en pauc meglier. Ils 4 ei stau schelira da 5 grads, aschia ch'ils truffels bletschs schelavan la damaun ellas canastras, ferton ch'ins cavava els. En **Tujetsch** ston quels veginir cavai orasut ina neiv da miez bratsch. La bialaura dils 4 e 5 schass sperar ina stad s. Martin, sch'ins secugliuna buca danovamein.

*Gasetta Romontscha nr. 45, 5 da november 1896*

## 1896

### Tiers jasters

A **Cavorgia, Tujetsch**, tier Giachen Antoni Schmet dus anseuls:

1) in grischalv, dretga giudasum, seniastra in snez davos ed in davon en amiez l'ureglia,

2) in gagl, dretga giudasum, seniastra giudasum e ruosna.

*Gasetta Romontscha nr. 45, 5 da november 1896*

## Venal

Ina vacca da maz engarschada tier Giachen Antoni Schmed a **Cavorgia**.

*Gasetta Romontscha nr. 48, 26 da november 1896*

## 1897

In solid giuven da circa 18 onns che capescha tudestg e sa ir entuorn cun cavals, anfla per la stad in bien survetsch. Da s'informar tier la Cruna a **Sedrun**.

*Gasetta Romontscha, 21-01-1897 nr. 4*

## 1897

### Annunzia da mort

Cheutras notifichein nus a parents ed enconuschents, ch'ei hagi plaschiu agl Altissim da clamar ella perpetnadad nossa cara consorta, mumma, feglia e sora

### Barla Catrina Honder n. Jacomet

En ina vegliadetgna da 41 onn eis ella spartida ils 30 da schaner, suenter ina dolorusa malsogna, provediada cun tut ils s. sacraments dils moribunds.

La preziada defuncta vegin recumandada alla pia memoria da tuts nos enconuschents.

**Sedrun**, ils 3 da fevrer 1897.

Per la parentella en malencurada:

Josef Florin Huonder, mariu

Vigeli Jacomet, bab

Er'en num dils affons.

*Gasetta Romontscha, 04-02-1897 nr. 6*

## 1897

Dacuort ha signur professer Muoth purtau avon alla societad historic-antiquara a **Cuera** in zun

interessant referat sullas relaziuns dils anteriurs uclauns e vitgs da **Tujetsch** in cun l'auter e cun l'abbazia da **Mustér** – in product da ses studis fatgs la vacanza vargada egl archiv ed urbari da quella vischnaunca.

*Gasetta Romontscha, 15-04-1897 nr. 16*

### 1897

Venal in vadi mascal da 15 dis tier Gion Bistgaun Beer, fravi, a **Sedrun**.

*Gasetta Romontscha, 22-04-1897 nr. 17*

### 1897

Encuretg pil vischinadi da **Rueras-Tujetsch** in mattatsch per far cavrer naven da far mundi tochen s. Martin. Da s'adressar ton pli sper tier Giachen Fidel Cavegn, **Rueras**.

*Gasetta Romontscha, 29-04-1897 nr. 18*

### 1897

Sin intschess da **Selva e Tschamut** ei dacuort aunc vegniu cavau ora entirs tocs truffels stai satrai en gl'atun dalla neiv. Muort il lev unviern erien quels ellas plauncas aunc buns e bials e seigien immediat puspei sil toc vegni tagliai e duvrai sco sèm, ferton che quels en plauns fuvien per part smarschi dil bletsch. Quei mass matei ualvess mintg'unviern aschia, schiglioc fuss ei magari bein enqualga cumadeivel e pratic per spargnar il sem.

*Gasetta Romontscha, 06-05-1897 nr. 19*

### 1897

#### **Tschamut Rheinquelle**

Ils 20 da matg arva il suittascret siu hotel Rheinquelle e recamonda quel a tuts passants sull'**Alpsu**, segirond bien tractament e raschuneivel prezi.

Carl Caveng

*Gasetta Romontscha, 13-05-1897 nr. 20*

### 1897

#### **Annunzia**

Il suittascret fa enconuschenet al ludeivel publicum, ch'el seigi ussa pli habels tier il mistregn d'urer, e suprendi da reparar da tuttas sorts uras da sac e da preit, sco era da tuttas sorts vechers. Era san ins retrer dad el da tuttas sorts uras da sac, da preit e vechers novs. Garantend buna lavur e bunas solidas uras novas bienmarcau serecamonda

Luzius Antoni Soliva (1865-1902)

#### **Ligiacudischs ed urer a Sedrun**

*Gasetta Romontscha, 26-05-1897 nr. 22*

### 1897

Ils straduns dalla **Bernina**, **Flüela** ed **Albula** ein ussa aviarts per carrs. L'**Alpsu** vegn questa jamna era aviarts.

*Gasetta Romontscha, 03-06-1897 nr. 23*

### 1897

Statalter Paul Berther ei ugau dallas soras Barla Cristgina ed Anna Maria Muggli, tuts da **Tujetsch**.

*Gasetta Romontscha, 03-06-1897 nr. 23*

### 1897

La fiera da **Tujetsch** vegn tenida uonn el solit liug a **Sedrun**, ils 10 da zercladur.

La suprastonza.

*Gasetta Romontscha, 03-06-1897 nr. 23*

**1897**

Encuretg in scolast patentau per la scola da **Cavorgia-Tujetsch**. Aspirants ein supplicai da s'adressar tier il cussegl da scola.

*Gasetta Romontscha, 11-06-1897 nr. 24*

**1897**

Ina buna vacca da latg, ch'ha fatg vadi dacuort, enquera da prender si per la stad.

Carl Caveng, hotelier a **Tschamut**.

*Gasetta Romontscha, 11-06-1897 nr. 24*

**1897**

L'**Alpsu** ei finalmein era da vart uranèsa vegnida aviarta per carrs mesjamna vargada, suenter che da vart grischuna ei schon stau aviert ils 2 da quest, aschia ch'igl ei ussa schon stradun schetg tochen sum. La posta **Mustér-Caschinutta** va ussa regularmein. Nos stimai convischins d'**Uri** astgassen en general schon risguardar empau meglier lur convischins grischuns concernent metter ad uras maun vid dar pass e repass la primavera sur quei frequentau cuolm. Ludeivla premura muossa da quellas varts nossa regenza e speranza vegn quella pigl avegnir era ad effectuar, che sia collega uranèsa patratgi mintgamai empau pli baul vid quella laver. - Oz ei era il **Lucmagn** vegnius aviast per crotschas.

*Gasetta Romontscha, 11-06-1897 nr. 24*

**1897**

La fiera da **Tujetsch-Sedrun**, dils 10 da quest, ha giu circa 50 arnauuls dils quals igl ei denter ils purs vegniu cumprau si da biars per bials prezis (15 – 15 marenghins). Amaturs han anflau specialmein in triep bialas vaccas, catschadas si dil davos marcau **Glion**.

*Gasetta Romontscha, 16-06-1897 nr. 25*

**1897**

Culs 14 da zercladur ei era la lingia telegrafica sugl **Oberalp**, **Mustér-Ursera** vegnid'aviarta cun ina staziun da telegrafica a **Tschamut** ed ina sil pass. L'erecziun da tala lingia ha ord quei motiv cuzzau pli ditg che quella sul **Lucmagn**, la quala ei vegnida aviarta schon onn, essend che sull'**Alpsu** ha il telegraf muort il prighel da lavinas stuiu vegnir mess sper il lac en sut tiara (sco cabel) ed ein talas liungas lavurs vegnididas interruttas baul gl'atun tras la schliat'aura.

*Gasetta Romontscha, 01-07-1897 nr. 28*

**1897**

El bi lag da **Tuma** – la fontauna dil **Rein** sper il pei dil **Badus** – haveva avon tschun onns signur hotelier Carl Caveng a **Tschamut** tenor cunvenziun cun la ludeivla vischnaunca da **Tujetsch** giu mess en 4 – 500 litgivas per far l'emprova, sche peschs sevientien e semantegnien en quei lag en tal'altezia (2344 meters sur mar). In'inspecziun ha quels dis giu il legreivel resultat, ch'il lag seigi ussa schon populaus rehamein cun peschs, denter auter cun tals d'ina peisa da  $\frac{1}{2}$  - 1 fun l'in e d'oreifra qualitat. Damai ch'il cantun ha en plirs loghens schau ranschar en e subsidiau pes-cheras artificialas, ni cundrezs per cuis e tratga da litgivas (sco a **Tusaun** etc.) e ch'el dat gie sin damonda giu gratuitamein gronds diembers da quels cuis allas vischnauncas per puspei popular las auas cun peschs, fuss ei segiramein indicau, da seprofitar da quell'oreifra caschun, cunzun si ellas auas dallas muntognas aultas, nua ch'ei exista aunc negins peschs, ni nua che quels ein en consequenza da malauras considerablamein decimai. Ei gie la pesca ina buna resursa da daners ed en rehas auas da peschs ina segira fadiglia. In ni l'auter savievel e premurau pescadur dalla **Sursevla** duess era aspirar per ina tala pes-hera en nossa vallada, che vegness segiramein concediu dalla regenza. Il cantun ha avon paucs onns era creau las novas plazzas d'inspecturs dalla pesca, sul néz dallas qualas ins sa esser da divers meini; dil medem meini san ins aber bein esser, ch'ei duei oravon vegnir mirau, ch'ei detti aunc peschs ellas auas avon che metter si inspecturs da peschs, schiglioc drov'ei buca tals.

*Gasetta Romontscha, 05-08-1897 nr. 33*

**1897**

Dus asens (summaris) venda il pigurer da **Nalps** en **Tujetsch**.

*Gasetta Romontscha, 12-08-1897 nr. 34*

**1897**

Barla Catrina Giacumet ei sut ugadia da Sep Florin Huonder, omisdus da **Tujetsch**.

*Gasetta Romontscha, 16-09-1897 nr. 39*

**1897**

La gronda calamitad dalla cuntuad'aura bletscha ha giu sia culminaziun la sera dalla Rogaziun federala, nua ch'ei ha bischau tochen **Cuera** e fatg descargar tuttas alps. A **Mustér** er'ei ils 20 mesa quarta neiv ed ils 21 mussava il termometer mo dus grads sur nul. Per ventira para l'aura da sevolver, ils 22 ei terrenau tochen **Mustér**, mo ils bials risdivs, truffels e la pumera han pitiu grond donn. Sill'**Alpsu** er'ei in meter neiv e perquei ha sia posta calau si siu cuors culs 21 da quest.

*Gasetta Romontscha, 23-09-1897 nr. 40*

**1897**

L'**Alpsu** ei gliendisdis puspei vegnid'aviarta per carr, mo sentelli buca da nos stinai fratelli uranès, mobein da commerciants da vart grischuna. Denton drovan ussa ual ils Uranès il pli urgent passasch per turnar anavos culs cavals da tscheins, retrer lennas etc.

*Gasetta Romontscha, 23-09-1897 nr. 40*

**1897**

Cun plascher notifichein nus, che signur Stiafen Berther da **Camischolas**, **Tujetsch**, hagi daciort fatg cun bien success siu examen final sco miedi sill'universitat a **Turitg**. Gratulamur!

*Gasetta Romontscha, 09-12-1897 nr. 51*

**1897**

A **Cavorgia (Tujetsch)** tier Luis Hendri in ansiel grisch cun scalin, dretga fess en fuorma da furcletta e dus snezs davos en.

*Gasetta Romontscha, 09-12-1897 nr. 51*

**1897**

A **Sedrun** tier Giachen Antoni Soliva in botsch tgietschenalv, dretga giudasum ed in snez davon en, seniastra fess ni forsa furcletta, sin ils corns barschau en S M.

A **Bugnei-Tujetsch** tier Tumaisch Curschellas in tschanc ner cun corns buca tundiu, dretga in snez davos en, seniastra in snez davon en.

*Gasetta Romontscha, 09-12-1897 nr. 51*

**1898**

---

Sep Florin Huonder ei ugau da Rosa Macolin, omisdus **Tujetsch**.

*Gasetta Romontscha, 13-01-1898 nr. 2*

**1898**

Il suttascret venda ina partida badugna frestga da diever el vitg **Sedrun** per in raschuneivel prezi. Cumpraders dueien s'annunziar ton pli spert tier

Alfons Jagmet a **Sedrun**

NB. Fetschel aunc da saver, che jeu vendi la badugna per in raschuneivel pagament era a quels dus umens, ch'han selubiu da sepatriunar d'in ton badugna sin mes funs, ils 19 da november 1897, la quala els ston forsa pagar pli tard.

*Gasetta Romontscha, 20-01-1898 nr. 3*

## 1898

Milsanavon porta quella gasetta meinsila (*Bündner Monatsblatt*) igl interessant artechel historic sulla **Val Tujetsch**, purtaus avon da signur professer Muoth 1896 alla Societad historic-antiquara a **Cuera**. Cun quella caschun fa igl autur attents, che quella vischnaunca, che dumbravi 1850 aunc 979 habitants, vevi en consequenza dall'emigraziun tiella davosa dumbrada da 1888 mo 768.

*Gasetta Romontscha, 20-01-1898 nr. 3*

## 1898

Venal: in vadi mascal giuven tier Giochen Deflorin a **Rueras**.

*Gasetta Romontscha, 20-01-1898 nr. 3*

## 1898

Producziun teatrala a **Sedrun**

Gievgia grassa, ils 17 e dumengia ils 20 da fevrer vegn menau si:

**Il fegl scumbigliau ni calger stai tier tiu laisch**

Cumedia en treis acts. Denter ils acts musica. Avertura a l'ina e mesa suentermiezdi.

Entrada:

I. plazza 80 cts.

II. plazza 50 cts.

Affons la mesadad

Tier numerusa frequenza envida gentilmein

La societad da musica **Sedrun**

*Gasetta Romontscha, 10-02-1898 nr. 6*

## 1898

Ils dus minorents frars Stiafen e Gion Fidel Schmed han per ugau Hans Giachen Caduff, tuts da **Tschamut**.

*Gasetta Romontscha, 17-02-1898 nr. 7*

## 1898

**Annunzia da mort**

A parents ed enconuschents purtein nus cheutras la tresta nova, ch'ei hagi plaschiu agl Altissim da clamar ord questa speranza tier ina megliera veta nossa preziada sora, quinada, onda e cusrina

**Maria Augustina Caveng**

Suenter ina liunga e per part dolorusa malsogna eis ella resignadamein morta ils 2 da quest en ina vegliadetgna da 27 onns e 10 meins, provedida cun tuts s. sacraments dils moribunds.

Nus recumandein l'olma dalla cara defuncta alla pia memoria da tuts parents ed enconuschents.

En num dalla parentella en malencurada:

**Sedrun**, ils 2 da mars 1898

Carli Caveng, frar

*Gasetta Romontscha, 03-03-1989 nr. 9*

## 1898

**Annunzia da mort**

En profunda dolur notificein nus a parents ed enconuschents, ch'ei hagi plaschiu agl Altissim da clamar ella perpetnadad nossa cara mumma, tatta, sora e sira

**M. Catrina Muggli, nata Condrai**

Suenter ina liunga malsogna e provedida cun tuttas consolaziuns da nossa sontga religiun eis ella spartida ils 25 da fevrer ell'aulta vegliadetgna da 85 onns.

Nus recumandein cheutras l'olma dalla preziada defuncta alla pia memoria da nos parents ed enconuschents.

La parentella en malencurada:  
Rosa Muggli-Muggli, feglia  
Barla Decurtins-Muggli, feglia  
Mengia Wenzin-Condrau, sora  
Hans Giachen Decurtins, schiender  
er'en num dils auters parents.  
**Sedrun e Regensburg**, 28 da fevrer 1898  
*Gasetta Romontscha, 03-03-1989 nr. 9*

### 1898

#### Annunzia

Per l'alp **Curnera** a **Tujetsch** vegn ei priu si per la stad genetschas per in arvè da 15 frs. ina e mutgs per 10 frs. in. Da s'adressar tier Emanuel Deragisch. Ligiacudischs a **Tujetsch**.  
*Gasetta Romontscha, 10-03-1898 nr. 10*

### 1898

Sill'exposiziun da taurs a **Trun** ei stau catschau 40 tocs, dils quals sis ein veni premiai en I., 9 en II. ed 8 en III. classa ed appartenevan als suandonts proprietaris: ... II. classa: Gieriet Cristian, **Tujetsch**, in stierl 60 frs, .... Caduff Hans Giachen, **Tujetsch** .... III. classa: ... Berther Gion Andriu, **Camischolas** per mutgs 50 fr.  
*Gasetta Romontscha, 14-04-1898 nr. 15*

### 1898

Venal ina biala vacca giuvna, che fa il matg vadi, tier Giachen Antoni Wenzin a **Rueras**.  
*Gasetta Romontscha, 14-04-1898 nr. 15*

### 1898

La vischnaunca da **Tujetsch** enquera da prender si en sias alps da schetgs per la stad proxima enzacontas genetschas per il prezi da 15 frs. il tgau e pustretsch inclusiv. Ils tiers vegnan pri a mauns entuorn s. Gion, ils 24 da zercladur.

**Tujetsch**, ils 15 d'avrel 1898

La suprastonza

*Gasetta Romontscha, 21-04-1898 nr. 16*

### 1898

#### Annunzia da mort

Cun profunda dolur notifichein nus a nos parents, amitgs ed enconuschents, ch'ei hagi plaschiu agl Altissim da clamar ord questa speranza tier ina megliera veta nossa cara mumma **Onna Maria Ursula Berther**, nata Schmed

Ella ei spartida resigandamein ils 28 da quest en ina vegliadetgna da 77 onns, provedida cun tuttas consolaziuns da nossa sontga religiun.

Nus recumandein l'olma dalla cara defuncta alla pia memoria.

**Sedrun**, ils 28 d'avrel 1898

Ils combrigiai affons:

Thomas Josef Berther, plevon

Pader Baseli Berther, OSB

Maria Ursula Monn-Berther

Vigeli Giusep Berther-Deflorin

Maria Turtè Berther-Berther

La sepultura vegn fatga sonda allas 9.

*Gasetta Romontscha, 21-04-1898 nr 16*

### 1898

In bien fidau cavagl, empau passaus vi, vegn tschercaus da prender si naven digl emprem zercladur entochen miez october. Da s'adressar tier la Cruna a **Sedrun (Tujetsch)**.

## 1898

### Annunzia

Dr. med. Stiafen Berther da **Tujetsch** ei sedomiciliaus a **Mustér** e habitescha en casa da signur professer Carigiet.

Uras per audienzia:

Mintgadi dallas 7 – 8 avonmiezdi, dallas 12 – 1 suentermiezdì.

Las dumengias 12 ½ - 2 ½ suentermiezdì.

**Mustér**, ils 4 da matg 1898.

Gasetta Romontscha, 05-05-1898 nr. 18

## 1898

### Annunzia da mort

Cheutras notofichein nus a parents ed enconuschents, ch'ei hagi plaschiu agl Altissim da clamar ella perpetnadad nossa cara onda

### Dunna Fausta Muggli

En ina vegliadetgna da 70 onns eis ella suenter liunga maldiispostadad, duront la quala ella ha repetidamein retschiert ils s. sacraments, nunspitgadamein spartida oz a **Rabius**.

Nus recumandein cheutras la preziada defuncta alla pia memoria da nos parents ed enconuschents.

Per la parentella en malencurada:

**Rabius** e **Rueras**, 11 da matg 1898

Cristian Muggli, nevs

Rosina Cagienard-Muggli, niazza

Cristgina Muggli-Bear, niazza

Maria Cagienard, sutniazza

La sepultura ha liug venderdis, ils 13 da quest circa allas 9 a **Sedrun**.

Gasetta Romontscha, 12-05-1898 nr. 19

## 1898

Las vischnauncas da **Tujetsch** e **Falera** han menau en l'assicuranza da biestga. Bene!

Gasetta Romontscha, 02-06-1898 nr. 22

## 1898

### La fiera da **Tujetsch**

vegn tenida sonda proxima ils 4 da zercladur a **Sedrun**. Per tutt tiers menai tier, sto vegnir presentau bulletta.

La suprastonza

Gasetta Romontscha, 02-06-1898 nr. 22

## 1898

La fiera da **Tujetsch** dils 4 da zercladur, ha giu entuorn 80 armauls, mo buca marcadont, tonpli che l'**Alpsu** ei aunc buca aviarta e ch'ils Uranès han muncau, ils quals devan pli baul gronda vivacitad a quella fiera. Tonaton ei ei aunc vegniu marcadau empau denter ils purs per bials prezis.

Gasetta Romontscha, 08-06-1898 nr. 23

## 1898

Finalmein ei l'**Alpsu** era vegnida aviarta per carr da vart uranès e ha il cuors postal entschiet a cursar culs 11 da quest. Era il **Lucmagn** ei aviarts.

Gasetta Romontscha, 16-06-1898 nr. 24

## 1898

### Avis

L'alp **Curnera** vegn cargada ils 28 da zercladur.

**Tujetsch**, ils 16 da zercladur 1898.

Emanuel Deragisch, ligiacudischs

*Gasetta Romontscha, 16-06-1898 nr. 24*

### 1898

Tractandas guvernativas. Las statutas d'assicuranza da **Breil, Peist, Tujetsch, Castiel, Trun, Valzeina, Feldis e Schluein** vegnan approbadas.

*Gasetta Romontscha, 23-06-1898 nr. 25*

### 1898

Encuretg in buob da 12 – 14 onns per pertgirar in cavagl cun pulein sin pastira da casa tochen d'atun. D'entrar en survetsch ton pli gleiti. Ulteriur sclariment dat Gion Andriu Berther a **Camischolas**.

*Gasetta Romontscha, 23-06-1898 nr. 25*

### 1898

In buob da 12 – 15 onns vegn ei encuretg per in'alp da nuorsas. Da s'adressar tier Josef Maria Albin a **Tschamut**.

*Gasetta Romontscha, 21-07-1898 nr. 29*

### 1898

Ella **Surselva** ei la zoppina plinavon rutta ora a **Tujetsch, Schlans, Castrisch** ed a **Surcasti** etc. Sco bien mied encunter la zoppina recamonda in inserat dil Tagblatt d'unscher las plagas cun „verdünnte Carbolsäure“ ni „carbolsaurer Kalk“ sco era da stiarner ellas stallas frina gep. Il principal mied ei, sco gia savens recumandau, da tener schuber.

*Gasetta Romontscha, 18-08-1898 nr. 33*

### 1898

La sonda sera ha il cavrer da **Sedrun** notificau alla suprastanza da **Tujetsch**, ch'ei sesanfli entadem la **Val Strem**, in toc sut igl ault dil **Kreuzlipass** (*Pass la Crusch*) giu, sper il trutg, il cadaver d'in um, il qual ei sin immediata expertise seconstatau. Il medem temps ein era gia dus amitgs ed il quinau da quei disgraziau vegni sur tal pass per encuir fastitgs da quel, essend ch'el havess schon dapi 4- 5 dis puspei duiu esser turnaus anavos a casa, haveva giu dau negin rapport e ch'ins saveva da sia projectada rutta. Era fuvan tuttas retschercas telegraficas stadas senza success. Il disgraziau fuva in cert Albert Müller da 36 onns, oriunds dil **Turgau** ed emploiau a **Turitg** sil biro da controlla dalla Nordostbahn. Sin sia bara, che sesanflava en posiziun durmenta, sper la senda, han ins anflau ses daners, proviant e siu diari tut en uorden. Tenor il davos fuv'el serendius gia la dumengia avon allas 4 dalla damaun naven d'**Amsteg** e fuv'arrivaus pér las 5 dalla sera tiella crusch dil **Kreuzlipass**, pia pér en 13 uras, ferton che quei viadi selai far en 5 – 6 uras. Entochen leu havevan cavrers uranès mussau ad el la via. Da quell'ura naven cala siu diari si, schegie ch'ins ha anflau sia bara in toc sut igl ault dil pass giu. Ad **Amsteg** havevan ins advertiu igl um giuven da buc ir sul **Kreuzlipass** ni silmeins buca senza guid, buca perquei che quei pass fuss grevs ni malsegirs, schegie da vart uranès ensi empau strapazius, mo plitost perquei, ch'il disgraziau Müller fuva da fetg fleivla constituziun ed havev'aunc combas mendusas. Ei fuva perquei fetg temerari d'in tal um da serender sur in cuolm e lu aunc persuls. Sco ils cavrers uranès raquentan, stuevi Müller tier scadina pendenza empau pli ferma seruschnar sin tuts quater, che vegn era confirmau tras il visum repertum medicinal. Tenor quel ha ei plinavon seschau constatar negins particulars indecis dalla caschun dalla mort da Müller, aschia ch'igl ei ord tut dubi, che quel seigi da fleivlezia buca serabitschaus vinavon e hagi stuiu suittacumber al strapaz a mesa via. Era eis ei da supponer, che quei pupratsch hagi aunc stuiu survivor si en quels aults la stravaganta notg da neiv e dracca dils 8 sils 9, che havess purtau la mort al pli ferm um en tala situaziun. La bara ei vegnida transportada ils 16 da quest a **Turitg**. La comunicaziun dalla Neue Zürcher Zeitung, ch'il

cadaver da Müller fuvi tut smuttaus ei faulsa, essend ch'el purtava neginas blessuras e fuva buca ruclaus.

*Gasetta Romontscha, 18-08-1898 nr. 33*

### 1898

Il davos Fegl Ufficial nr. 33 cuntegn in diember brevs da hipoteca ord ils protocols da **Mustér**, **Schlans**, **Sumvitg** e **Tujetsch**, ch'ein tier la respectiva revisiun dils protocols da hipoteca dil cumin dalla **Cadi** buca stadas dadas en, ni dallas qualas ins ha schiglioc buca saviu eruir il proprietari. S'annunzian ils crediturs hipotecarics da talas brevs buca tier ils protocollists enteifer dus meins, sche vegnan quellas brevs annuladas. Cheutras ei lu la revisiun da quels schi impurtonts documents publics finida e vegn dacheudenvi speronza mantenu bien uorden, cun far cassar dafertontier brevs pagadas giu ...

*Gasetta Romontscha, 25-08-1898 nr. 34*

### 1898

La superexpertisa per la taxaziun dils uauls ei finida e seresultescha ei tenor detagliau rapport dil respectiv expert, ferster Meier, ina sbassada totala per 2'623'106 frs. digl anterius schazetg da 1896. Per **Tujetsch**: schazetg 1896: 171'400 frs.; revisiun 1898: 125'000 frs.

*Gasetta Romontscha, 29-09-1898 nr. 39*

### 1898

Damai che la zoppina ei ussa silmeins ellas cuntradas nua ch'ella ei rutta ora gl'emprem, sco per exemplu ella **Cadi**, varghentada e ch'era il contumaz e las desinfecziuns dils nuegls ein cheu ualti alla fin, speran ins senz'auter, che nossas autoritads vegan immediat a far tut lur pusseivel per far arver ils pass al commers da biestga ...

*Gasetta Romontscha, 06-10-1898 nr 40*

### 1898

Il cuors local sull'**Alpsu**, ch'ei dapi entgins onns tras intermediaziun da nossa direcziun postala vegnius concedius duront l'emprema mesadad dil zercladur e la secunda mesadad da settember cun taxas d'unviern, ha era uonn giu fetg gronda frequenza, in mussament, ch'ei fuvi in basegns, ferton che l'allegada posta nocturna purtava mo mintgazacu in dormulent passagier. Ins spera perquei ina midada da quei cuors!

*Gasetta Romontscha, 06-10-1898 nr. 40*

### 1898

Las suprastonzas dallas sis vischnauncas dalla **Cadi**, ch'ein libras dalla zoppina, han sin iniziativa d'ina libra radunanza a **Mustér**, petiziunau telegraficamein tier la regenza, ch'ei vegni immediat aviert silmeins il commers da biestga sur il **Lucmagn** e l'**Alpsu**, ch'ei vegni schau tener las fieras regulars e las exposiziuns e ch'ei vegni publicau quei commensuradamein. Per part ha la regenza, sco ins vesa ord al hodierna respectiva publicaziun, corrispundi a quei giavisch.

*Cuntegn dil telegraf*

*Der unterzeichnete Vorstand ersucht namens seiner Gemeinde Ihre hohe Behörde dringend bei Tessin und Uri sofort telegraphisch die Aufhebung der Grenzsperrre für die seuchenfreien Gemeinden der Cadi zu erwirken, unsere regulären Märkte und Ausstellungen wieder zu gestatten und für die geeignete Publikation dieser Verfügung zu sorgen.*

*Gasetta Romontscha, 13-10-1898 nr. 41*

### 1898

Signur Stiafen Berther da **Camischolas**, che ha dacuort fatg igl examen da miedi sill'universitat da **Turitg**, ha quels dis era obtenu leu il doctorat dalla medischina. Gratulein!

*Gasetta Romontscha, 13-10-1898 nr. 41*

**1898**

Ils frars Kellenberger han quels dis viagiau la **Cadi** e cumprau a **Medel** 46 genetschas ni vaccas per 13 – 21 marenghin l'ina. Per mediocras genetschas han els pagau intagliauter 16 e 17 marenghins. Cun **Tujetsch**, che ha megliers tiers ed ha teniu la dira, han els saviu maradar nuot, era pauc a **Mustér**. Denton ein ils sura prezis tenor rauba aunc adina andants. La mesjamna ha era il marcadont Fellmann digl **Aarau** catschau giuviars 25 vaccas ord **Tujetsch**, tut rauba da bienmarcau. Ils stiarls paghien uonn 1 – 2 marenghins pli pauc ch'onn.

*Gasetta Romontscha, 20-10-1898 nr. 42*

**1898**

### **Annunzia e recumondaziun**

Il suittascret fa cheutras da saver ad in ludeivel publicum, ch'el hagi en bien stan sias maschinas da scarsinar launa e scarsini per 15 cts. il fun. El ha in depot a **Mustér-Raveras** tier soras Fontana e vegn inaga per jamna leu per la launa. Empermittend buna e sperta lavur serecamonda

Anton Gisler a **Sedrun**

*Gasetta Romontscha, 20-10-1898 nr. 42*

**1898**

### **Tiers jasters**

Tier statalter Thomas Schmed da **Cavorgia** sesanflan sequentas nuorsas vanzadas tiella zavrada da **Tujetsch**:

1. In tgigisch ner, dretga giudasum, in dentresgia ed in snez davos en entraviers, seniastra giudasum.
2. In tschanc alv, dretga scurselau davon ora, ina ruosna e dus snezs davon en.
3. In tschanc ner cun corns, dretga in snez davos en, seniastra giudasum.
4. In tschanc alv cun corns, dretga ina furcletta orasum l'ureglia, in gavigiel davon ed in snez entraviers davos en.
5. In anugl ner cun corns, dretga ina furcletta orasum l'ureglia, seniastra dus snezs davos en.

*Gasetta Romontscha, 20-10-1898 nr. 42*

**1898**

A **Rueras** tier Lezi Antoni Brugger in grond e bi engarschaun, ina liufa schubergiada da dus onns.

*Gasetta Romontscha, 20-10-1898 nr. 42*

**1898**

### **Tiers jasters**

A **Cavorgia-Tujetsch** tier statalter Thomas Schmed sesanfla in anugl grisch cun corns, ureglia dretga ina furcletta orasum ed in snez davon en, seniastra ina furcletta orasum e dus snezs davos en.

*Gasetta Romontscha, 27-10-1898 nr. 43*

**1898**

Dr. med. Stephan Berther a **Mustér** ei per quest unviern absents. Tuts davers vegn ei supplicau da pagar a signur gerau Gion Andriu Berther a **Camischolas, Tujetsch**.

*Gasetta Romontscha, 17-11-1898 nr. 46*

**1898**

In vadi ed ina vadiala tier Gion Fidel Berther a **Rueras**.

*Gasetta Romontscha, 24-11-1898 nr. 47*

**1898**

### **Tiers jasters**

A **Sedrun** tier Rest Flurin Monn duas ansolas culla medema noda: dretga tagliau giudasum e

fess, seniastra pala. A **Sedrun** tier Giachen Antoni Soliva in'ansola buca nudada.  
*Gasetta Romontscha, 07-12-1898 nr. 49*

### 1898

Dus marcadonts bavarès han cumprau si in triep bunas vaccas e genetschas en **Tujetsch** e pagau 19 – 26 marenghins l'ina.

*Gasetta Romontscha, 15-12-1898 nr. 50*

### 1898

Die Oberalpstrasse zieht westwärts .... durch Wald und Wiesen ins **Tavetscherthal**, der obersten Stufe, wo noch bis 1600 m viel Roggen und Gerste gezogen wird, und auch die Kirsche noch reift, der Wald steigt bis zu 2000 m; der Landesvorzug besteht in den trefflichen Weiden und in der Produktion vorzüglichen Käses und Honigs (Schafe und Rindvieh bilden die Staffage der Vorhöhen). Die Einwohner, romanisch und katholisch, sind starke, energische Leute. – Die Strasse führt zum Hauptort des Thales:

**Sedrun** (1398 m ü. M.) mit einem Luft- und Molkenkurhaus. Schöne Spaziergänge und naher Wald, eine angenehme Station für Gebirgswandern, am Ausgang des **Strimthales**, durch welches der **Kreuzlipass** ins **Maderanerthal** führt; gegenüber das lange **Perdatschthal** mit gewaltigen Gebirgshöhen und Gletschern.

Bei (7 km) **Rueras** in herrlicher Berglandschaft erreicht die Strasse die höhere Stufe und zieht über das den Lawinen ausgestzte **Selva** nach dem einsamen Bergdorflein **Chiamutt**, 1640 m, auch als Luftkurort (guter Gasthof) benutzt; in einer vom hohen Gebirgen (**Badus**, **Piz Maler**, **Piz Giuv**) umschlossenen Mulde. Hier am **Badus**, dem Grenzberg des **Oberlandes**, hoch oben am Gneisfelsen, entspringt aus dem stets von Schneemassen umgürten **Tomasee** der Hinterrhein (!). Die Landschaft ist ernst und grossartig.

Die Oberalpstrasse erklimmt dann in weiten Windungen die **Val Surpalix** hinan die Grenze des Kantons **Uri**, führt zum **Oberalpsee** hinab und zuletzt nach (von Chur 94.2 km) **Andermatt**, 1448 m ü. M. im **Urserental** an der Gotthardstrasse.

*Die Bäder und Klimatischen Kurorte der Schweiz von Dr. med Th. Gsell Fels, 1898*

### 1899

(Tarmess en.) Ils 3 d.q. la sera ha ei en **Tujetsch** suflau vaccas ord via duront il buentar, ch'ins ha stuiu seplar ora ellas cun palas. Quella medema sera ha ei suflau naven e neviu en ina nuorsa, tut encuirir ei stau adumbatten. Otg dis suenter (ils 10 d.q.) ei quella nuorsa miez ventschida vegnid'avon nuegl e magliava si la stubla; aber beiber ha ella buca vuliu quella sera. Ella ei stada 8 dis sut la neiv en, pertgei cun encuirir suenter, han ins anflau il létg, nua che quella paupra unfrenda dalla cufla haveva giu siu loschi.

*Gasetta Romontscha nr. 3, 19 da schaner 1899*

### 1899

#### Producziun teatrala

dalla societad da musica a **Tujetsch**.

#### I. Il zenn miraculus

Drama en 5 acts da Guglielm Kamerer.

#### II. Il spazzatgamin

Cumedia en in act da pader Baseli Berther.

Dumengia proxima, ils 5, gievgia grassa, ils 9 e dumengia ils 12 da fevrer.

Avertura a l'ina suentermiezdì.

Prezi d'entrada: I. plazza 1 fr., II. plazza 70 ct. Affons la mesadad.

La societad da musica.

*Gasetta Romontscha nr. 5, 1. da fevrer 1899*

### 1899

Ils 9 da schaner ei miert el stadi american **Minnesota**, damaneivel da **S. Paul** en ina vegliadetga da 79 onns igl emigräu exbenedictin signur Sigisbert Monn da **Mustér**. Dad in temps che la

claustra sesanflava en in deplorabel stan ha el cun lubientscha da ses superiurs cun in per auters confrars bandunau la venerabla abbazia da **Mustér**, ha provediu in suenter l'auter las caplanias da **Sedrun** e **Selva** e silsuenter las pleivs da **Samnaun** e **Vrin**. Ils anno 1870 eis el setratgs ell'America (*emigraus 1874, el Stadi da Minnesota ha el pastorau a Stillwater 1874–79, West-Newton 1879–1885, Shakopee 1885–1888, S.Walburg a Hennepin e Loreno 1888–1895 e lu staus resignat a New-Ulm*). Udend che la claustra da **Mustér** seigi restaurada e flureschi sin legreivla moda, ha el instanziau da puspei vegnir prius si leu, il qual ei lura era vegniu concediu. Mo ina liunga malsogna ha per memia impidiu da vegnir suenter a siu pli intim giavisch – da puder beneventar ils novs conventuals dalla claustra da **Mustér** e murir en lur miez. Regulond ses fatgs mundans ha el generusamein seregurdau da quella, respectiv dalla nova baselgia da Nossadunna. El rauassi en pasch!

*Gasetta Romontscha nr. 6, 9 da fevrier 1899*

## 1899

La societad teatrala da **Tujetsch** ha dau el decuors dil tscheiver cun tutta bravura il drama «Il zenn miraculus» (translataus da signur Anton Felici Monn) e la cumedia dil «Spazzatgamin».

*Gasetta Romontscha nr. 7, 16 da fevrier 1899*

## 1899

### Cadi

Vigieli Beart da **Tujetsch** ei ugau da sias feglias minorenas.

*Gasetta Romontscha nr. 7, 16 da fevrier 1899*

## 1899

### Annunzia da mort

En profunda dolur notifichein cheutras a parents ed enconuschents, ch'ei hagi plaschiu agl Altissim da clamar ella perpetnadad nies zun prezau sur frar ed augsegner

**Igl aultreveriu signur pader Gesuit Alois Caduff**

Provedius cun tuttas consolaziuns da nossa s. religiun eis el ils 14 d.q. morts ad **Exaeten** en **Hollandia** suenter ina malsogna da mo 3 dis (malscostas) en ina vegliadetgna da 55 onns e 10 meins.

Nus lessien cheutras haver recumandau nies carissim defunct alla pia memoria da tut ses parents ed enconuschents.

**Rueras-Tujetsch**, ils 20 da mars 1899

Ils fargliuns en malencurada:

Gion Rest Caduff e Genoveva Deflorin, nata Caduff  
er'en num dils nevs e niazas.

*Gasetta Romontscha nr. 12, 23 da mars 1899*

## 1899

### Annunzia

Ell'alp **Curnera** a **Tujetsch** sa vegnir cargau stiarls la proxima stad. Tgi che vul far quei duei s'adressar tochen ils 20 d'avrel tier

Emanuel Deragisch, ligiacudischs a **Tujetsch**

*Gasetta Romontscha nr. 13, 30 da mars 1899*

## 1899

Exposiziun da taurs ils 4 d.q. a **Trun** ei vegniu menau en tut 53 tgaus. 23 da quels ein vegni classificai:

I. classa: ... 6) in stierl da Giachen Antoni Deragisch da **Tujetsch**, premi dad 80 frs.

II. classa: ... 11) in mutg da Giachen Giusep Cavegn da **Tujetsch**, ... 13) in mutg da Giachen Caduff da **Tujetsch**, ...

III. classa : ... 23) in stierl da Johann Jacob Caduff da **Tujetsch**, 50 frs.

*Gasetta Romontscha nr. 14, 6 d'avrel 1899*

**1899**

### **Annunzia e recumandaziun**

Il suttascret fa cheutras enconuschen ad in ludeivel publicum, ch'el hagi mess si in bein assortiu negozi da calzers, capials e capialas. Empermettend da survir cun buna e solida rauba encunter raschuneivels prezis, serecamonda

Placi Mathias Berther-Cavegn, ella Cruna a **Sedrun**.

*Gasetta Romontscha nr. 14, 6 d'avrel 1899*

**1899**

Ils pass alpins han custau la primavera 1898 mo per arver per carr: ... igl **Alpsu** 155 frs., ... Buca ch'ei dess era neiv sin quels dus pass (**Alpsu** e **Lucmagn**) encunter ils quals la populada

**Surselva** cunfina e che survessan la primavera era fetg bein a ses interess d'esser aviarts ad uras. Mo entochen dacheu han ins mintg'onn stuiu far breigias e breigias e rugar e supplicar tuttas autoritads, uranèses, tessinèses, grischunas e federalas per la finala far arver sin – miez zercladur! Dat ei buca mettels da far fin a quei schlendrian e da procurar, ch'ils avdonts sper ils peis da quels pass vegnien teni adual als auters cun risguard sin commers e liber transit.

*Gasetta Romontscha nr. 18, 4 da matg 1899*

**1899**

### **In bien scolast**

enquera la vischnaunca da **Tujetsch** per sia scola inferiura a **Sedrun** pil proxim onn da scola.

Aspirants sin quella piazza ston s'addressar tier il suttascret cun tarmetter tier a quel lur attestats.

Il cussegl da scola da **Tujetsch (Sedrun)**

*Gasetta Romontscha nr. 18, 4 da matg 1899*

**1899**

### **Rodel**

dils morts per caschun dall'uiara digl onn 1799 per las olmas dils quals ei stiftiau in solemn caudonn en quest s. tempel per lur suffragi.

...

Dalla farria da **Tujetsch**: signur sur Jacob Anton Cundrau, caplon a **Rueras**; statalter Jacob Wenzin; Gion Fidel Wenzin; Hans Gieri Monn; Jacob Martin Berther; Gion Giossi; Clau Giossi; Vigili Joseph Beer; Vigili Joseph Smidt; Jacob Antoni Soliva; Martin Schmidt e Martin Curschellas. Total 12.

...

*Gasetta Romontscha nr. 19, 10 da matg 1899*

**1899**

### **Cumin 1899**

Elecziuns: ... suppleant da mediatur: president communal Anselm Capeder da **Tujetsch**; ella dertgira circuitala: .. president communal Anselm Capeder, **Tujetsch**; suppleant per la dertgira circuitala: ... Gion Felici Monn da **Tujetsch**.

*Gasetta Romontscha nr. 19, 10 da matg 1899*

**1899**

### **Recensiun «Armas e larmas ella Cadi”**

Emprem act

Tgi savess emblidar “la sera avon l'uiara” avon la baselgia da **Sedrun**. - Entuorn ils menaders dils purs e catschadurs, Caprez e Baletta, duas imposantas figuras, bein representadas segruppescan mattatschs senza tema ed ils valerus Tuatschins cul prudent assistent Schmed e las venerablas mummas, dallas qualas ina aulza urond siu affon encunter tschiel. - Ord miez las giuvnas cumpara la curaschusa e frestga Culastia Riedi. Il resolut passar si dil capitani Cargiet cun sia flotta truppa, cloma a nus en memoria il spert guerril, il qual aschi savens en nossa muntognas ha schau sgular la bandiera tier il cumbat. Tier la benedicziun dil venerabel plevon Venzin secartevan tuts aspectaturs presents sin **Cadruvi** avon 100 onns. - Il frestg mattatsch

Deplaz (ch'ei pli tard vegnius spiritual) ha fatg tremblar nies cor annunzionda la vegnida dallas colonnas franzosas; aber il heroic caplon Condrau cumpara sco in Macabäer, in um da fier en rassa nera.

*Gasetta Romontscha nr. 20, 18 da matg 1899*

### 1899

La vischnaunca da **Tujetsch** ei intenziunada da baghegiar naven dil stradun a **Dieni** en sias duas alps **Val e Val Giuv** ina via carregiabla. Il temps cura entscheiver e finir ei aunc buca fixaus e vegn dalla vischnaunca stabilius pli tard.

Reflectonts han da s'annunziar tochen ils 31 da matg tier la suprastonza.

**Tujetsch**, ils 15 da matg 1899

*Gasetta Romontscha nr. 20, 18 da matg 1899*

### 1899

Ei vegn encuretg da prender si a latg sigl emprem zercladur tochen emprem october ina buna vacca da latg. Da s'adressar tier Anselm Capeder a **Rueras**.

*Gasetta Romontscha nr. 20, 18 da matg 1899*

### 1899

**Cadi**

L'ugadia da fargliuns Decrusch a **Tujetsch** ei sligiada si.

*Gasetta Romontscha nr. 20, 18 da matg 1899*

### 1899

La fiera da **Tujetsch** dils 5 d.q. ha giu 53 armauls ed entgins paucs tiers manedels. Denter ils purs ei vegniu marcadau empau per aults prezis.

*Gasetta Romontscha nr. 23, 8 da zercladur 1899*

### 1899

**Dertgira districtuala**

Commembers: ... gerau Gion Andriu Berther, **Tujetsch**;

*Gasetta Romontscha nr. 24, 15 da zercladur 1899*

### 1899

**Annunzia da mort**

Cun profunda dolur notifichein nus cheutras a parents, amitgs ed enconuschents, ch'ei hagi plaschiu agl Altissim da clamar ord questa veta nies car bab, tat e basat

**Statalter Vigeli Giusep Jacomet, naschius 1814**

El ei spartius ils 24 d.q. provedius cun tuttas consolaziuns dils moribunds en ina vegliadetgna da 85 onns e 2 meins.

Nus recumandein l'olma dil car defunct ad ina pia memoria.

**Sedrun**, ils 27 da zercladur 1899.

En num dils parents:

Placi Jacomet, fegl

Maria Liberata Jacomet-Beer, feglia

Maria Ludivina Jacomet-Beer, feglia

*Gasetta Romontscha nr. 26, 18 da zercladur 1899*

### 1899

Memoria dalla fiesta fiesta centenara a **Mustér** dils 14 da matg 1899. Igl album cullas 14 fotografias da revendissim P. Carl Hager ord scenas dil drama «Armas e larmas en la **Cadi**» ei quels dis cumparius en stupenta ligiadira e formescha ina fetg preziosa memoria en famiglias pli beinstontas da quella biala fiesta commemorativa. ... Ella medema stizun ei exponiu ina fotografia da caplon Giachen Antoni Condrau da **Rueras**, il qual ei ils 6 da mars 1799 aschi crudevlamein vegnius mazzas sper il clavau da **Mira a Tujetsch** dils Franzos. Tala fotografia ei

prida giu d'in aunc bein conservau purtret original da colur sin lenn, ch'ei buntadeivlamein vegnius mess en disposiziun d'ina famiglia da **Tujetsch**, ella quala quei purtret fuva aunc vegnius conservaus. Caplon Condrau ei tenor ils cudischs da batten dalla ludeivla vischraunca da **Tujetsch**, ils quals van plirs tschentaners anavos, staus naschius ils 7 da november 1752, sco fegl da Giachen Antoni Condrau e da Maria Barla Degonda. Siu padrin ei stau sur Giachen Antoni Degonda, da gliez temps plevon da **Tujetsch** e madretscha Maria Liberata Zenset da leu.

*Gasetta Romontscha nr. 27, 6 da fenadur 1899*

### 1899

Dumengia vargada ein 18 alums dil seminari S.Lezi vegni benedi ora dil monsignur uestg sco spirituals, denter quels ils suandonts Romontschs pils quals nus alleghein era il di da primizia. ... Beer Giachen, primizia ils 6 d'uost a **Sedrun**, ...

*Gasetta Romontscha nr. 29, 20 da fenadur 1899*

### 1899

Ils 24 d.q. ei miert el spital dalla S. Crusch ella biala vegliadetgna da 79 onns suenter ina liunga malsogna igl aultreveriu resignat parochial Sebastian Beer da **Tujetsch**. RIP.

*Gasetta Romontscha nr. 30, 27 da fenadur 1899*

### 1899

#### Lavur en accord

Ei vegn dau via la lavur da moler vid ina casa nova a **Sedrun** en libra concurrenza. Colurs e material furnescha il patrun dalla casa. Tgi ch'aspirescha sin ina tala lavur ha da dar en il prezi per meter quadrat specificau per lavur dad ieli, cola e caltschina sil mir e sil lenn e quei sigl 1. d'uost agl incumbensau.

Vigieli Beer a **Sedrun**

*Gasetta Romontscha nr. 30, 27 da fenadur 1899*

### 1899

Encuretg da prender si per in temps in cavagl tier in lev survetsch.

Placi Berther ella Cruna a **Sedrun**

*Gasetta Romontscha nr. 30, 27 da fenadur 1899*

### 1899

#### In stutzer dubel

per la catscha cun in ror da balla ed in da schrechs, carga davon, ei venals tier Giachen Fidel Curtins, giuven, calger a **Camischolas-Tujetsch**.

*Gasetta Romontscha nr. 33, 17 d'uost 1899*

### 1899

#### Venal

Ina gronda e biala liufa envernada dus onns, che fa ussa purschals, tier Barla Turtè Jacomet a **Sedrun**.

*Gasetta Romontscha nr. 35, 31 d'uost 1899*

### 1899

Il suittascret fa cheutras enconuschent al ludeivel publicum, ch'el vendi dacheudenvi era ord casa in bien e real vin en detagl ni l'engrossa per in fetg raschuneivel prezi. Era cumpra il suittascret ragischs d'ansauna buca schubergiadas.

Florentin Caveng, ustria dil Kreuzlipass a **Sedrun**

*Gasetta Romontscha nr. 36, 7 da settember 1899*

### 1899

Encuretg in giuven sco fumegl da casa e ch'ei endisaus vid cavals. Da s'adressar tier la Cruna a

## **Sedrun.**

*Gasetta Romontscha nr. 38, 21 da settember 1899*

**1899**

### **Tiers jasters**

A **Sedrun** tier Placi Berther ina nuorsa nera, dretga ina furcletta davon ora ed ina davos ora, in fildirom mellen amiez l'ureglia.

*Gasetta Romontscha nr. 39, 28 da settember 1899*

**1899**

Ina s.h. liufa da dus onns d'enrasch tier Vigieli Capeder a **Zarcuns-Tujetsch**.

*Gasetta Romontscha nr. 41, 12 d'october 1899*

**1899**

### **Venal**

In bien engarschaun da 2 onns, sco era in envernaun d'in e miez onn tier Lezi Brugger a **Rueras-Tujetsch**.

*Gasetta Romontscha nr. 42, 19 d'october 1899*

**1899**

### **Annunzia e recumandaziun**

Il suittascret fa cheutras enconuschent ad in ludeivel publicum, ch'el hagi en bien stan sia maschina da scarsinaria, che negin drova da temer, ch'ei vegni scarsinau mal. Ei vegn era fatg colur blau e ner. El ha siu depot a **Cumpadials** tier signur Gienal, a **Mustér** tier Madleina Fontana. Leu vegn el a vegnir mintg'jamna per suenter turnar a metter leu.

Anton Gisler a **Sedrun**

*Gasetta Romontscha nr. 44, 2 da november 1899*

**1899**

... Marcadont Giger da **Medel** ha catschau quels dis datier da 100 vaccas sul' **Alpsu** sillas fieras d'**Altorf**, cumpradas si ella **Cadi**. Marcadont Berther da **Rabius** ei serendius cun ina tiarza expediziun da 40 stiarls e mutgs sull'**Oberalp** per **Ligiaun**.

*Gasetta Romontscha nr. 45, 9 da november 1899*

**1899**

Era **Rueras-Tujetsch** ha mess neu ina nov'orgla tenor sistem pneumatic, ord la fabrica da signur Metzler a **Favugn**. Tenor rapport dils dus experts seigi quella gartegiada oreifer.

*Gasetta Romontscha nr. 46, 16 da november 1899*

**1899**

### **Tiers jasters**

A Bugnei tier Sep Antoni Decurtins in anugl alv, dretga ina furcletta davon en ed in snez davos en.

*Gasetta Romontscha nr. 46, 16 da november 1899*

**1899**

... **Tujetsch** ha quasi unanimamein, **Mustér** cun gronda maioritad e **Sumvitg** e **Trun** senza oposiziun puspei menau vinavon l'assicuranza *da biestga*.

*Gasetta Romontscha nr. 47, 23 da november 1899*

**1899**

Ina vadiala giuvna tier meister Vigieli Beer a **Sedrun**.

*Gasetta Romontscha nr. 48, 30 da november 1899*

**1899**

**Tiers jasters**

A **Selva** tier statalter Fidel Wenzin in anugl alv muot buca tundiu, ureglia dretga ina furcletta osum ed in snez davos en; seniastra ina ruosna ed in snez davos en.

*Gasetta Romontscha nr. 48, 30 da november 1899*

**1899**

Venal in cavagl da maz, che selai duvrar da trer tier Hans Giachen Decurtins a **Sedrun**.

*Gasetta Romontscha nr. 50, 14 da december 1899*

**1899**

**Tiers jasters**

A **Sedrun** tier Giachen Atoni Soliva in ansiel ner cun scalin, seniastra in snez davon en entraviers.

A **Bugnei** tier Alois Jacomet in botsch entir gagl, dretga in mugrin grond osum davon en, seniastra in mugrin grond osum davon en.

A **Bugnei** tier Giachen Poltera ina caura mesalva, dretga ina furcletta osum, seniastra in snez davon en ed in davos enagiu.

A **Sedrun** tier Gion Antoni Monn da Madleina ina caura nera, dretga ina furcletta rodunda osum, seniastra giudasum e treis snezs davos en.

A **Sedrun** tier Vigeli Werth:

- 1) in anugl alv cun corns, dretga treis snezs davos en, seniastra giudasum ed in snez davos en;
- 2) in anugl ner muot, dretga giudasum ed in snez davos entraveirs enagiu.

*Gasetta Romontscha nr. 50, 14 da december 1899*

**1899**

**Tiers jasters**

A **Sedrun** tier Placi Jagmet ina ansiel alv, seniastra fess e dus snezs davos en.

*Gasetta Romontscha nr. 51, 21 da december 1899*

**1899**

Von **Disentis** führt die breite Strasse nach (6 km) **Sedrun** (Krone, billig; vortrefflicher Honig und gute Weine), dann folgen die Orte **Camischolas** und **Sarkuns**, beide nur durch einen Bach von einander getrennt, **Rueras** (Wirtshaus Oberalp), über welchem sich die Ruine Ponteningen erhebt; hier teilt sich der Weg, links die Strasse, rechts der um 1 Stunde kürzere, aber mühsamere Fusspfad; der Fusspfad führt über **Crispausa** und die Alpen **Milez** und **Scharinas** durch das **Val Tiarms** zum **Pass da Tiarms** (2046 m). Von der Passhöhe schöne Aussicht; dann links hinab zum **Oberalpsee**, wo dieser Weg mit der Strasse zusammentrifft.

Die Oberalpstrasse führt durch die Dörfer **Selva**, **Ciamut** (1640 m; Gasthof) und da **Val Surpalix** über die Passhöhe (2046 m) zum **Oberalpsee** (neues Hotel zum **Oberalpsee**) der ¼ Stunde lang ist und herrliche Forellen nährt.

*Griebens Reisebücher Band 23 Die Schweiz Praktisches Handbuch für Reisende bearbeitet von Th. Stromer, 1899*

**1900**

Venal ina vacca da maz ni era mo mesa tier M. Giuanna Schmed a **Cavorgia**. - Treis tschuncheismas fein da trer a **Mompe-Tujetsch** tier Lezi Huonder a **Sedrun**.

*Gasetta Romontscha nr. 1, 4 da schaner 1900*

**1900**

*Ord il necrolog dil defunct dr. Kaiser.* Pressapauc avon 30 onns vegnev'el inaga sull'**Alpsu** en crotscha viers **Sedrun**. Sin via entaup'el ina mumma ed ina buoba, che bargevan petramein. Dr. Kaiser ha fatg retener la crotscha, e sin sia damonda han ellas rispundi, ch'ellas seigien vegnidias d'**Ursera** per negoziar salvanoris a **Tujetsch** e cuort avon seigi vegniu giud ina spunda in crap ed hagi rut in bratsch alla mumma. Dr. Kaiser ha fatg vegnir las duas pupratschas en sia crotscha entochen **Sedrun** ella Cruna tier siu amitg Lucas Caveng, ha leu

mess a liug e ligiau si il bratsch dalla paupra mumma uranèsa, pagau ad ellas il gentar e quatier e dau spiendi per turnar a casa.

*Gasetta Romontscha nr. 2, 11 da schaner 1900*

## 1900

Il suittascret lai menar vaccas tier siu s.h. stierl-taur per il prezi dad 1 fr. 40 ct.

Gion Antoni Monn da Stiaffen a **Sedrun**

*Gasetta Romontscha nr. 5, 1. da fevrier 1900*

## 1900

**Teater a Sedrun**

**1. Ina ierta**

Cumedia en 3 acts.

**2. Oz a mi, damaun a ti!**

Cumedia en 2 acts.

Dumengia, ils 18, gievgia grassa ils 22 e dumengia ils 25 d.q.

Avertura allas 2 suentermiezdi.

Prezi d'entrada: I. plazza 1 fr., II. plazza 70 cts. Affons la mesadad.

La societad da teater

*Gasetta Romontscha nr. 7, 15 da fevrier 1900*

## 1900

**Venal**

Ina liufa che fa purschals il davos avrel, tier Josef Antoni Decurtins a **Bugnei**.

*Gasetta Romontscha nr. 11, 15 da mars 1900*

## 1900

L'exposiziun da taurs dil **Rein Anterior** dils 6 d.q. a **Trun**, ei stau catschau 70 tocs, en general buna rauba, mo buca excuisita.

Premis:

III. classa: ... 20) Caduff Johann Jacob, **Tujetsch**, per in stierl 50 frs.; ...

*Gasetta Romontscha nr. 15, 12 d'avrel 1900*

## 1900

**Salids als americans**

Saunamein ein ils suittascrets arrivai ord l'**America a Mustér**, ils 13 d'avrel, suenter in viadi da 3 jamnas cun esser 10 dis sillla mar, la quala ei stada fetg ruha.

Buca pauc surstai essan nus stai giud la legreivla restauraziun dalla puspei bein populada venerabla claustra da **Mustér** ed oravon tut giud nossa viseta ella nova baselgia da

Nosssadunna, da quei veritabel ornement dalla **Cadi**.

La biala val **Tujetsch** cun sia renomada baselgia parochiala, siu stradun e telegraf; ha fatg emperneivla impressiun.

Cordials salids a tuts enconuschents cumpatriots ell'**America**.

Vigieli Josef Giossi da **Tujetsch** (*da Bugnei, naschius 1836, emigraus 1854 cun siu frar Giusep Antoni, naschius 1831*) e Jacob Wolf da **Trun**

*Gasetta Romontscha nr. 16, 19 d'avrel 1900*

## 1900

En **Tujetsch** grassescha dapresent il vidruscal tier affons e glieud carschida. Ina famiglia a **Camischolas** veva dacuort 10 malsauns, 8 affons e la fumitgasa tras il vidruscal e lura aunc il tat enta letg. Ina giuvna da 17 onns, che ha bandunau il letg memia baul ed ida a luvrar sil funs, ha cheutras aunc tratg tier in ferm malcostas ed inflammaziun dil tschurvi ed ha aschia stuiu murir en ses bials onns. Ins vul pretender, che recruits hagien runau quella malsogna si da **Cuera**. Da **Tujetsch** ei quell'arrivada a **Mustér**, nua che biars affons ed er'aunc umens carschi ston star enta letg.

**1900**

**Als amitgs americans**

Suenter haver visitau tuttas cuntradas e salidau leu ils signurs spirituals dalla **Cadi** e **Lumnezia**, sesanflein nus per la secunda gada a **Mustér** e serendin ussa puspei a **Tujetsch** per visitar pli tard **Nossadunnaun**. Salid!

**Mustér**, ils 4 da matg 1900

*Vigieli Josef Giossi e Jacob Wolf*

*Gasetta Romontscha nr. 19, 10 da matg 1900*

**1900**

**Avis**

Il suertascret fa cheutras da saver ad in ludeivel publicum da **Tujetsch**, ch'el hagi in depot da paun tier signur satler Schmid a **Sedrun** e serecamonda per numerusa frequenza.

J. Henzler-Genelin, pasterner a **Mustér**

*Gasetta Romontscha nr. 19, 10 da matg 1900*

**1900**

Il vidruscal haregia aunc adina en **Tujetsch** ed a **Mustér** ed ei ussa era ruts ora a **Medel**. Nossa nova el davos numer sulla defuncta giuvna en **Tujetsch** vegn rectificada en quei senn, ch'ella hagi buca luvrau ora sils funs; duront sia malsogna seigi ella stada mo mes'ura ord letg.

*Gasetta Romontscha nr. 20, 17 da matg 1900*

**1900**

Culla laver da 15 umens ei l'**Alpsu** stada carregiabla ils 30 d.q. sil territori grischun, mo dil maun uranès ei deplorablamein aunc ussa daventau nuot! Cons onns aunc cuoza quei annual schlendrian uranès?

*Gasetta Romontscha nr. 22, 31 da matg 1900*

**1900**

**Fiera a Sedrun**

Mardis Tschuncheismas, ils 5 da zercladur, vegn teniu a **Sedrun** la solita fiera annuala dalla primavera. Tuts tiers ston esser provedi cun attestats da sanadad (bullettas).

La suprastanza

*Gasetta Romontscha nr. 22, 31 da matg 1900*

**1900**

Buns schambuns da **Tujetsch** cumpra Carl Caveng a **Tschamut**.

*Gasetta Romontscha nr. 22, 31 da matg 1900*

**1900**

Venal ina biala vadiala giuvna tier Hans Giachen Decurtins a **Sedrun**.

*Gasetta Romontscha nr. 22, 31 da matg 1900*

**1900**

La fiera da **Sedrun** dils 5 d.q. ha giu pintga impurtonza cun quei che l'**Alpsu** era buca aviarta e la fiera buca publicada egl **Uri**.

*Gasetta Romontscha nr. 23, 7 da zercladur 1900*

**1900**

Ils 20 da zercladur prendan ils suertasrets cumiau da lur cara veglia patria grischuna e semettan a **Caschinutta** sillia viafier per ton pli spert turnar anavos en lur nova patria americana.

Els engrazian d'esser vegni retschards aschi cordialmein ella biala **Cadi**, spezialmein als signurs spirituals, quei vegn a restar ad els aunc ditg en dultscha memoria. In davos salid a tuts nos

enconuschents e legreivel seveser ella patria celestia.

Giossi e Wolf

Bien viadi ed in cordial salid a tuts nos cumpatriots grischuns ell' **America**.

*Gasetta Romontscha nr. 24, 13 da zercladur 1900*

**1900**

**Cadi**

En consequenza d'in concediu benefeci d'inventari ein tut ils quens dil defunct gerau Lorenz Jagmet da **Camischolas-Tujetsch** da surdar a president communal Anselm Capeder a **Rueras**.  
*Gasetta Romontscha nr. 25, 21 da zercladur 1900*

**1900**

(Communicau.) Ils novs signurs spirituals che passan uonn ord il seminari da S. Lezi a **Cuera** vegnan plassai sco pasturs dallas olmas els sequents loghens: ... sur Wenzin Giachen Antoni da **Tujetsch** surpren la pleiv da **Siat**, ...

*Gasetta Romontscha nr. 26, 28 da zercladur 1900*

**1900**

Ils 13 d.q. encunter sera ei sesvidau in stravagant uradi sur la costa senistra naven dalla punt **Russein Mustér** entochen l'**Alpsu**.

*Gasetta Romontscha nr. 29, 19 da fenadur 1900*

**1900**

Venderdis e sonda sera ha ei puspei dau terments urezis sur la **Cadi** duront ils quals il cametg deva cuntuadamein en ils uauls e metteva quels en aultas flommas. Mo la dracca stinschentava per ventira dafertontier quellas. ... A **Tujetsch** ei ina vacca vegnida sturnida.  
*Gasetta Romontscha nr. 30, 26 da fenadur 1900*

**1900**

**Cadi**

Gion Giusep Monn ei numnaus ugau da viewa Maria Margreta Maissen-Balzart e da sia feglia Onna Maria, tuts da **Tujetsch**.

*Gasetta Romontscha nr. 30, 26 da fenadur 1900*

**1900**

**Avis**

Cheutras vegn ei fatg enconuschent, ch'ei vegni pigl onn d'uonn buca barschau vinars a **Cavorgia, Tujetsch**, tier Lezi Balzart p.m.

G. M. Monn

*Gasetta Romontscha nr. 32, 9 d'uost 1900*

**1900**

Tscheidiatsch ha in signur da **Basilea**, che vegneva sull'**Alpsu a Mustér** cun atgna crotscha piars agrad giu in da ses custeivels cavals da 4000 frs. en consequenza da constupaziun dil magun.

*Gasetta Romontscha nr. 35, 30 d'uost 1900*

**1900**

*Manevers militars. ... A Tujetsch ei vegniu sittau endadens Rueras entraviers vi encunter la spunda dretga. La notg dils 4 sils 5 ei vegniu priu containement a Tschamut, ils cavals ora el liber, cuvretgs. La stupenta aura ei stada fetg d'enrau. La mesjamna ein las battarias serendidas sull'**Alpsu a Realp** suenter haver sittau dil Calmut vi encunter Val Val. ...*

*Gasetta Romontscha nr. 36, 5 da settember 1900*

## 1900

### Annunzia da mort

Ei ha plaschiu agl Altissim da clamar ord questa veta nossa cara consorta, sora, quinada, onda e niaza

### M. Josefa Filomena Schmid-Berther

Ell'ei spartida ils 15 d.q. en ina vegliadetgna da 44 onns suenter ian dolorusa malsogna, provedida cun ils s. sacraments e perduns dils moribunds, resignada ella veglia da Diu. Nus recumandein l'olma dalla cara defuncta alla pia memoria da tuts parents ed enconuschents.

En num dalla parentella en malencurada:

**Rueras**, ils 17 da settember 1900

Duri Vigieli Schmid, mariu

*Gasetta Romontscha nr. 38, 20 da settember 1900*

## 1900

Sill'exposiziun da biestga feminina dil district **Reinanterieur** digl 1. october a **Trun** ei stau catschau in grond diember da 129 vaccas e 72 genetschas. ...

III. classa: ... 27) Hans Giachen Decurtins, **Tujetsch**, 10 frs. ... 29) Hans Giachen Decurtins, **Tujetsch**, 10 frs.

Genetschas: ...

III. classa: 14) Hans Giachen Decurtins, **Tujetsch**, 10 frs.

*Gasetta Romontscha nr. 40, 4 d'october 1900*

## 1900

Il suttascret tegn in piertg mascal alv en disposizion per schar menar s.h. hutschas per in raschuneivel prezi.

Gion Giusep Fry a **Cavorgia-Tujetsch**

*Gasetta Romontscha nr. 41, 11 d'october 1900*

## 1900

### Venal

Ina liufa, schubergiada, tier fargliuns Werth a **Sedrun**.

In engarschaun tier Vigieli Capeder a **Zarcuns-Tujetsch**.

In grond engarschaun tier Luis Jacomet a **Bugnei-Tujetsch**.

*Gasetta Romontscha nr. 41, 11 d'october 1900*

## 1900

Quater bials envernauns dil fevrer sco era in cavagl da maz tier Carl Caveng a **Tschamut**.

*Gasetta Romontscha nr. 42, 18 d'october 1900*

## 1900

In bien engarschaun tier Lezi Antzoni Brugger a **Rueras**.

*Gasetta Romontscha nr. 43, 25 d'october 1900*

## 1900

### Tiers jasters

Tier Gion Paly a **Camischolas-Tujetsch** sesanflan sequentas nuorsas vanzadas dalla zavrada dalla **Alp Puoza**:

- 1) ina nuorsa alva, omisduas ureglas giudasum ed ina ruosna,
- 2) treis nuorsas, duas alvas ed ina grischa, duas cun sughet enta culiez, seniastra in snez entraviers davos en ed in snez davon en entatier l'ureglia,
- 3) ina nuorsa alva, seniastra giudasum, dretga furcletta davon en,
- 4) ina tgigisch alva (*tschut d'in onn*), dretga duas furclettes davon en, seniastra in mugrin osum,
- 5) duas nuorsas alvas, dretga ina crusch enamiez l'ureglia, giudasum e furcletta davos en,
- 6) ina nuorsa nera cun tschut, seniastra in snez davos en, dretga ina ruosna.

*Gasetta Romontscha nr. 43, 25 d'october 1900*

**1900**

**Tiers jasters**

A **Bugnei** tier ligiacudischs Emanuel Deragisch sesanflan sequentas nuorsas:

- 1) in'alva, dretga giudasum e furcletta davos en, seniastra giudasum e fess,
- 2) in'alva, dretga duas furclettes davon amiez l'ureglia, seniastra duas furclettes davon amiez l'ureglia, fess ed in snez davos en,
- 3) ina alva, dretga treis furclettes davon en ed ina furcletta gronda rodunda davos en, seniastra duas furclettes davon entraviers enagiu, dapli scurselau orasi davon e davos osum l'ureglia.

*Gasetta Romontscha nr. 45, 8 da november 1900*

**1900**

**Tiers jasters**

A **Rueras** tier Paul Wenzin ina starleglia grischa, dretga in snez davos en, seniastra fess duas ga ed in snez davos en.

A **Cavorgia** tier Gion Antoni Schmid in ansiel ner, dretga furcletta osum, seniastra dus snezs davos en.

A **Bugnei** tier Vigieli Deragisch in ansiel stgir-ner, dretga giudasum, fess e snez entraviers davos en.

*Gasetta Romontscha nr. 46, 15 da november 1900*

**1900**

**Cadi**

Tuts quens dad Agata Beer, nata Riedi, da **Tujetsch**, ein da dar en a Gion Paul Berther a **Camischolas**.

*Gasetta Romontscha nr. 45, 8 da november 1900*

**1900**

**Tiers jasters**

A **Rueras** tier Paul Wenzin ina starleglia grischnera, dretga snez davon en, seniastra tagliau giudasum e fess duas ga ed in snez davos en e sils corns marcau si in N.

A **Camischolas** tier Giachen Giusep Deflorin ina nuorsa nera, dretga ina furcletta osum ed ina furcletta davon en, seniastra ina furcletta osum.

*Gasetta Romontscha nr. 47, 22 da november 1900*

**1900**

Otg bials purschals da treis jamnas tier Anselm Muggli a **Sedrun**.

*Gasetta Romontscha nr. 47, 22 da november 1900*

**1900**

**Tiers jasters**

A **Sedrun** tier frars Deragisch ina nuorsa cun tschut aunc da tunder, dretga in snez davon ed in davos en entraviers enagiu, seniastra giudasum ed ina furcletta davos en.

A **Rueras** tier Gion Fidel Berther in tschanc, dretga giudasum, seniastra fess, ina ruosna ed in snez davos en.

A **Sedrun** tier vieua Turtè Jagmet in starlegl tgletschen, seniastra furcletta davon en entatier il tgau ed in snez davos en amiez l'ureglia.

*Gasetta Romontscha nr. 47, 22 da november 1900*

**1900**

**Tiers jasters**

A **Bugnei** tier ligiacudischs Deragisch ina tgigisch alva, dretga giudasum, ina furcletta davos en ed ina ruosna, seniastra in mugrin osum da mintga maun ed in snez davos e davon en.

*Gasetta Romontscha nr. 48, 29 da november 1900*

## 1900

(Communicau.) S. Andriu ha **Tujetsch** surdau alla fossa siu pli vegl um, Gion Giusep Riedi da **Tschamut**, passau el 90avel onn da sia veta, il davos grenadier ord la veglia venerabla garda dallas «caultschas cuortas», in patriarch en cardientscha e pietat. RIP. Nus savein denton segloriar d'aunc haver en nossa vischnaunca da **Tujetsch** ina viscla dunna da 94 onns. Salid ed aunc entgins onns el niev 20avel tschentaner.

*Gasetta Romontscha nr. 49, 6 da december 1900*

## 1900

### Tiers jasters

A **Sedrun** tier Sigisbert Huonder ina ansola strala, dretga ina ruosna en fuorma da trianghel.

*Gasetta Romontscha nr. 49, 6 da december 1900*

## 1900

### Encuretg da schar a tscheins

per il termin da 5 onns l'alp **Cavradi** a **Tujetsch**. Aspirants per tal'alp ein supplicai da s'annunziar enteifer 10 dis tier Domenic Pajarola, ugau-pervenda.

**Trun**, ils 11 da december 1900

*Gasetta Romontscha nr. 50, 18 da december 1900*

## 1900

Duas mugias, 4 stiarlas, 1 vadi-taur e 2 vadialas stai da signur Caplazi a **Trun** ed ein da ver leu ell'acla dalla **Péra**, vegn vendiu sonda proxima dil possessur.

Hans Giachen Decurtins a **Sedrun**

*Gasetta Romontscha nr. 50, 18 da december 1900*

## 1900

El cumin dalla **Cadi** ha la nova dumbraziun giu il suandont resultat da habitants viers la dumbraziun da 1888.

	1900	1888	+ / -
Mustér	1363	1329	+ 34
<b>Tujetsch</b>	<b>810</b>	<b>768</b>	<b>+ 42</b>
Medel	537	528	+ 9
Sumvitg	1201	1169	+ 32
Trun	970	983	- 13
Schlans	170	184	- 14
Breil	865	849	+ 16
<b>Total Cadi</b>	<b>5916</b>	<b>5810</b>	<b>+ 106</b>

*Gasetta Romontscha nr. 51, 20 da december 1900*

## 1900

### Tiers jasters

A **Sedrun** tier Anselm Muggli:

1) ina caur'alva, seniastra giudasum e fess duas ga

2) ina caura mesalva, ina furcletta osum e dus snezs davon en (buca dau en tgei ureglia).

*Gasetta Romontscha nr. 51, 20 da december 1900*

## 1900

Dumbraziun: 809 habitants, 193 fiugs, 399 umens e 411 femnas.

*Notizia da pader Baseli Berther, Dieni/Rueras*